

新式
標點
足本
隨園全集

湘痕閣詩稿

瑤華閣詞鈔

湘痕閣詞稿

瑤華閣詞鈔補遺

瑤華閣詩草

隨園女弟子詩集



杜就田署



湘痕閣詞序

人比黃花，久播新聲於漱玉；屏移粉月，近傳雅製於生香。是知綠鬢詞媛，每多哀怨；朱顏學士，不少牢愁。豈真造物忌才，慧難兼福？畢竟聰明有種，文足彰名。況乎鸞原鳳族，蓀發蘭枝；毓靈珠於碧海，孕仙李於瑤根。居有隨園雅擅蓬壺之勝，學承捧水快分椿蔭之榮。鬪草閒庭，朝翻翠帙；評花小榭，夕按鵝笙。疏雨微雲，結社而頻裁蕉葉；紅情綠意，拈題而細詠蓮花。滴粉研脂，姊唵妹和；引宮刻徵，塤奏篴隨。斯真萃風雅於一門，抗逸情於千古。迨夫耦偕蕭史，曲譜同心；書畲秦嘉，情深連理。對江流之浩渺，飄落天長；吟竹影之檀欒，夢憐春短。一痕新月，寫眉嫵於妝臺；十樣衍波，耀釵光於硯匣。是以蛟囊多綴玉之篇，鴻案有聯珠之什。及其寶鏡分鸞，瑤琴別鶴；已悲子影，更悼孤雛。聽夜雨之啼鶻，青燈明滅；詠春風之貞燕，紅縷依稀。縹緲到蠶絲，偏抽獸齒；焚殘狝鼎，虛裊鬢烟。宜其商聲一片，都從紙上飛來；血淚千行，盡向毫端灑去。善寶才同畫虎，酷愛詩歌性似痴蟬。惟耽圖史，紅塵十丈；愧薄宦之羈栖，白雪一編。喜新詞之瀟灑，數言弁首，貽笑披榛；千里傾心，聊云投李。看此日集刊文梓，爭傳壺內金荃；待他年徑踏烟蘿，

敬訪閣中白石。——道光甲辰六月朔日，同里湘佩沈善寶拜撰。

湘痕閣詩稿序

余家昔有三祖姑，皆事吟詠，先大父曾取其詩，刊入小倉山房全集中，題曰袁氏三妹合稿。嗣余姊輩，亦有能詩者三：一曰琛華，爲余長姊；一曰柔吉，爲余堂姊；一曰黛華，爲余再從堂姊。彼時同居隨園中，聯袂唱酬，無間寒暑。余最幼穉，猶竊聞之。厥後長姊就養山右，喜甥輩已將琛華集付之剞劂，惟柔吉乃及黛華兩姊，以癸丑殉金陵失陷之難，故詩稿並失，心焉傷之。亂定，乃遇天長崇氏子，爲柔吉姊之姪孫輩，幸以抄存湘痕閣詩詞稿見貽。噫！貞魂烈魄，冥冥中竟有呵護者，不然，何以圖書盡失，而此卷獨流存耶？余以薄宦，無力付梓，今承同宗古香閣主，慨然以剞劂自任，此等風誼，近世幾不復聞矣。感激涕淋，敬以原稿授之，並贅數行於卷末，以識發潛闡幽之盛德云。——光緒丁亥冬月弟祖志翔甫氏識。

序

余於丁巳孟夏，暫羈河曲，蓬心不振，蒿目多憂。時與王子甘巖撫桑落以延娛，折舜華而碎詠，間披青牘，坐遣朱明。偶出袁柔吉女士詩相示曰：「此璧水之璇流，玉臺之錦製也，可無一言以弁之乎？」女士靈根浙水，秀出倉山。徵蘭設帙之前，銘菊垂髻之始，金鑾曉筆，披紫石以飛文；織素秋絲，纂青雲而落組。博天公之笑，早擅投壺；騰邦媛之華，爭爲下鏡。旣而女牀載月，墀浦栖雲，銜鴛翼以爲欄，拂龍賓而傳翰。香芳琴好，愁一日之分離；雪夏雷冬，祝千秋之共命。天長古名千秋縣。窈窕淑女，如此良人，樹草無憂，將花何怨？若夫匏瓜命獨，特居紂絕之天。

玉樹神摧，竟瘞沉冥之壤。當是時，飛龍骨出，不難畢命於投棺；黃鵠詞哀，故欲殉恩以引玦。而烏鳥則空巢待哺，鳳雛則文襟方啼。思一夕而九乖，摩笄終忍；扶寸田而尺宅，銜闕奚辭？孰知八難無涯，三辰有譴。羊祜之金環頓盡，澤蘭之彤管俱亡。貞木無春，葉黃凋以畢；雨寒巖背，石赤露而還霜。祚絕身單，吁其憐矣！至若大雷書遠，傷雁去於賢；昆白雪歌沈，慟鸞叱於少妹。悽愴山川之外，邈綿縹素之間，則又觸緒停絃，怨藤蕪而失夢；含欵罷杆，感桃葉而思歸者也。當打槳石城之後，屬傳烽江渚之初，鸞起蒼鵝，鹵騎則投鞭忽渡；兵頽朱雀，關門則棄鑰全開。於時玉弩飛空，聲動鄭元之里；珠樓濺血，心傷李白之孫。賦烏鵲以投臺，靡他永矢；效銀瓶之墜井，此節終完。嗟乎！遺精衛之冤，滄溟尙淺；汨娥皇之魄，湘水何深！大以醉而多惜，人以孤而益戾。道稱與善，復何言哉！予幸爲男子，竊三樂於榮期，悼彼佳人，增四愁於平子。同傷離亂，爲綴斯文。甘泉李肇增冰叔。

崇節母傳

節母姓袁氏，名嘉，字柔吉，浙江錢塘人，爲隨園先生長孫女。幼端慧，父遲，極鍾愛。母沈，本才媛，教以詩，神解獨超，尤工倚聲。長歸天長崇氏，崇巨族，多巍科碩學。所適雲根茂才，名一穎，負才望，伉儷甚篤。早卒，遺子二女。一以奉姑撫孤，不得遂殉夫志，飲水茹檠，盡孝盡慈，無何，子殤，姑亦逝，煢然獨處，與孤女形影相弔。薄田數畝，歲值屢稔，不得已返隨園，侍父母側，代弟輩理家政，怡怡如也。會父母次第三弟夫婦均歿，遺三孤，撫如己子，每當風宵雪夜，一燈課讀，儼若嚴師。其時隨園先生所出遲公一支，已中落，嗣子通公一支，頗溫飽，家庭中多難言之隱，乃縷述當年祖德，痛陳目下艱虞，勉勵三孤，聲淚交迸。二孤旋入泮，一孤亦成立，而孤女忽夭，所謂彼蒼之報施，固如是耶！余姑母其冢弟婦也，道光丙午秋，余以省試金陵，入隨園，拜見之餘，蒙異目視。涼秋九月，芙蓉盛開，

召羣弟姪暨余開尊聯吟縱談今古極一時文酒之樂其獎掖後進類如此合肥梁氏慕其才請授女公子經卽儀徵阮孝廉恩海室也後南河于相山觀察延入署課諸女及愛妾而才名噪袁浦壬子夏余客浦上蒙招往見勉以亟歸赴試毋飄泊墮志兼助資斧至今感不能忘是冬歸隨園時粵逆已破楚東下江省無戰守備余作書敦促出山一再不報似有默阻之者癸丑春賊破金陵乃仰天太息謂一生勞獨守節命也卽死節亦命也投池水淺不死服阿芙蓉喘二日乃死嗚呼烈矣同時隨園眷屬死者衆而節母爲尤慘僕嫗輩咸懷其慈泣裏以衾掩倉山下越十二年城復屍已不可復殮哀哉所著有湘痕閣詩詞稿未付梓甚矣哉造物之忌才也里巷庸女子嫁富室安樂畢世或適小康老死無險巇者衆矣而節母負才早寡且獨乃淬其志於辛勤阨塞中卒以身殉難豈才果不祥之物耶抑夙因有宜然者耶然而其節則千古矣秋風颯沓長夜寂寥懷私恩激公義用是蒼茫感喟而爲之傳——甘泉篤生王榮昌

題詞

金陵凌志珪竹泉

倉山風雅女孫枝，快讀新編百首詩。掃盡尋常塗抹習，吟成恰好淺深時。荒蘆斷鴈聲流耳，落葉哀蟬感沁脾。集中詠燕聲自燕前後落葉詩尤佳。寄語紅閨諸伴侶，買絲只合繡袁絲。自從鏡破復釵分，楚雨酸風不忍聞。雁斷更番悲弟妹，鸞孤半世痛夫君。傷心眷屬同朝露，回首鄉園隔暮雲。淒絕掌珠偏早碎，棠梨一樹小孤墳。

丹徒王榮昌篤生

巾幗才華絕，璇閨節烈奇。露蘭胎慧性，霜柏挺寒姿。世族揚麻遠，高門歷數基。一身林下苦，千載女中師。浙水芬連桂，倉山瑞產芝。佩瓊明習禮，漱玉愛填詞。紫石憑刊字，紅牋擅詠詩。彼姝追宋若，佳壻得羲之。鏡鑑花初

發；珠簾月乍移。雙聲鸞共轉；比翼鳳來儀。擊鉢爭提耳；揮毫更畫眉。玉檀欒小別；所居室名金縷曲相思。管趙柔情合；秦徐豔福宜。香雲籠并蒂；夢雨折交枝。獨宿床空守；呱啼襖未離。生爲嫠婦早；死以藐孤遲。壯匣捐脂盞；纈車響素帷。梅酸方雨泣；苗秀忽霜萎。璧碎珠沈運；巢傾卵覆悲。省親歡盡孝；撫姪教全慈。紗授文宣業；綾霏道韞辭。欲綿名士緒；再闢故山基。畫荻同嚴母；寒芹喜客兒。家庭推屈姊；姻戚舉班姬。憶昔承顏日；新秋應試時。隨園仙境入；奧室異書披。刮目欣傳祕；論心細析疑。棘闈祈鶚薦；杏苑望駒馳。盧李才原敵；潘楊誼夙知。華年工鬪句；涼夜共浮卮。葉落瑤牋遞；烟橫鐵笛吹。鴛亭臨水坐；蟾魄隔屏窺。麟筆精褒貶；騷壇妙主持。搏霄愁鍛羽；贈策慘歌驪。自痛星亡曙；常嗟霧掩曦。寄生非久計；謀食且幽羈。贊看紅妝執；經從白髮咨。袁江攜雀硯；郎署擁臯比。織錦珍蘇薰；墓碑法茂漪。鴻儒驚典雅；龍女惜孤危。愧我逢河涘；依人悵路歧。深憐籌借箸；嘉貺助歸資。義重羞輕薄；恩多療渴饑。金陵重返棹；綺戶又垂恩。日黯積荒蝶；烽狂照大旗。寇鞭投竟渡；士甲棄如遺。豕突雄城破；烏啼寶壘墮。磨筭紆慘怛；仰藥矢捐糜。切急哀難殮；貞完只賸屍。瘦肌攢穴畔；怨魄叫天涯。丹閣飛灰冷；青峯宿草衰。石街填渤海；竹染悼湘湄。命也摧琴瑟；天乎厄綺縠。鴿原傷殉難；令弟小村宰上海殉難。鴛塚悼分支。該未歸葬。梨恨芳圖失；棠餘幼影隨。前母有梨花白燕圖又月廊香夢圖則述女公子之幼緣也。蓉岡魂可返；芙蓉岡在天長。蓬島駕應羈。牛媛誰鑄集；螺磯允築祠。良弓虛似續；綽楔待榮施。冰操先靈慰；徽音後嗣貽。清風吟峻嶺；卓立媲峨嵋。

陽湖張縉英

三妹曾傳絕妙詞，謂小倉山房集中袁家三妹詩。古懷清節亦如斯。淚枯湘竹成斑後，秋老倉山閉戶時。骨肉摧殘悲夢幻，離騷哀怨繼風詩。衆芳零落憑誰惜？珍重虬松百尺枝。

王希韞若謝

淵淵家學溯真傳，白雪陽春字字妍。盥手不嫌千遍讀，論心已在廿年前。丁亥見秋海棠詩，前歲始得見面。每因飄泊愁鴻雁，閒把離懷托杜鵑。鏡破釵分無限感，湘痕一卷恨難捐。讀罷君詩喚奈何，清才如此命坎軻。聰明得福人間少，舊句憔悴終身我輩多。百載韶華原是夢，半生歲月任消磨。掌珠一粒擎難穩，淚溢湘江並女娥。

朱慧貞浣芳

久聞絳帳賦申情，垂老相逢意更縈。共話此生同逝水，不須開卷已吞聲。女師合向文宣拜，天問難從楚郢賡。讀罷玉臺慚鏡雪，羨君彤管著修名。

兄 璜鶴塘

辛苦編成一卷詩，織殘機杼淚千絲。止輸福慧鷗波好，才調何慚管仲姬！

姪孫家 鰲海秋

毛詩三百篇，首載后妃作，共姜古節婦，柏舟意有託。作詩非婦職，此說乃大錯。才與命相妨，或亦命偶薄。吾宗尠詩人，罕見題黃鶴，得之巾幗中，今見湘痕閣。隨園紹宗派，才力未嫌弱。芝蘭氣清芬，芙蓉枝瘦削。發抒皆性情，曾不事雕鑿。陶詠任自然，曾不受束縛。負才既如此，而何傷落莫。嗚呼雲根公，在昔才藝博。胡乃謝盛年，一朝塵夢惡。幸有雙孺枝，或者慰寂寞。胡乃覆巢卵，亦被鷓鴣攪。人事不可知，天道猶難度。日歸侍雙親，藉奉庭闈樂。胡乃歌哀哀，悲風生泉壑。往者姊妹行，詩酒互酬酢。胡乃風吹散，天文一方各。凡諸軫軻境，一一親領略。離恨生死并，人事今非昨。落葉想歸根，浮萍無住著。見之於詩篇，血淚縱橫落。擬古黃鶴辭，悽惋更奚若。

湘痕閣詩稿卷上

錢唐袁嘉柔吉

擬閨中四時詞

柳絲倦舞東風軟，緩踏蒼苔弓印淺。隔宵香夢，
 人癡，鬪草鬪花意先懶。綺窗日日調胭脂，塗抹春寒九
 九時。爲祝封姨勤護惜，紆綃繫徧百花枝。 菡萏香濃
 池館靜，午睡初回湘簾冷。鬢華如雪嬾雲鬢，悄對圓冰
 粧乍整。丁丁蓮漏甄紋移，綠沈堆滿青琉璃。凭欄蔕地
 兜團扇，三兩疎螢墮碧池。 蟬鳴疎柳蟲吟壁，露濕海
 棠紅欲滴。明蟾弄影過銀牆，曝衣樓迴飄橫笛。靈鵲填
 河渡羽車，榆星歷歷亂餘霞。臨風爭試穿鍼手，得巧誰
 先笑語譁。 蕭蕭一夜寒聲送，曉起飛綿壓簷重。捲簾
 眞訝玉爲山，粧慵斜擘釵頭鳳。鵲鼎添香裊篆烟，雛髮
 呵手貼花鈿。南枝漸透春消息，瘦影何如人可憐。

清明

又值清明候，東皇釀物華。綠眠烟外柳，紅顛霧中
 花。拾翠招芳侶，嬉春駕小車。水村山郭近，指點酒旗斜。

春日遊靈谷寺
 駘蕩東風拂面輕，載將油壁趁新晴。春浮芳草蓬
 蓬遠，路入桃花款款行。玉版禪心參四座，金繩法乳證
 三生。山空已覺紅塵隔，又聽疎鐘時一聲。

送別華玉姑母回六合
 慈顏小別動經年，今日歸來喜欲顛。春亦似知歡
 會好，一分留在畫樓前。園林過雨正清和，三五流鶯
 巧弄歌。試向綠雲濃處去，青山一角妬香螺。廚開櫻
 筍趁斜暉，更有銀鱗入饌肥。燕莫離歌聽不得，心隨帆
 影渡江飛。

雨後荷亭夜坐

祛暑愛良夜，雨過邀明月。三兩素心人，圍坐水雲窟。樓高接瓊霄，亭古通瑤闕。碧天淨如措，遙岑淡疑沒。徑深螢火流，樹迴蟬聲歇。冷翠侵苔衣，濃露沁花骨。散髮招新涼，臨風遐想發。相期慕神仙，迷津無寶筏。

和胡湘秋（兆蘭）表妹春日病起詩

綠窗風靜裊晴絲，芳草淒迷冑蝶癡。拾翠恰逢挑菜節，踏青已負禁烟時。病憎花氣垂簾早，心怯春寒捲幔遲。寄語妝成休久坐，任他雙燕語差池。

風

吹偏桃花又棟花，更番芳信報天涯。能噓冷氣乘時令，也扇陽和到物華。江上暗催帆影動，陌頭軟曳酒旗斜。冷習習來何處，只隔琉璃不隔紗。

花

芳譜探來各種妍，聽呼小字便纏綿。開經淺燠輕寒候，養趁微雲淡雨天。解語定邀名士賞，生香合受美人憐。金鈴繫徧珠旒護，不逐春風落舞筵。

雪

灑瓦無聲撲紙乾，霏霏一夜糝成團。梨花落處春無色，蛺蝶飛來影亦寒。凍合疎枝迷翠物，冷封樵徑失青巒。瓊篝薰暖香醅熟，人在重簾怯倚欄。

月

碧海青天夜氣森，何關圓缺問升沈。清凌霜鏡涵秋影，朗濯冰壺證素心。花底閒邀還把酒，桐陰小佇暫停琴。臨風偷聽霓裳曲，悟到前身感不禁。

晴秋野眺

遠山收宿雨，野水澹前溪。楓葉留寒蝶，人煙亂午雞。感時黃菊瘦，惜別翠眉低。且踐登高約，明朝斗酒攜。

風雪憶梅歌

飛廉行天天無色，青女不歡素娥泣。飛瓊仙人爲
解嘲，清辯滔滔霏玉屑。依稀咳唾來九天，詞鋒傾注如
璇源。萬籟俱寂，長空無煙，皚然奪盡四山翠。頓使峨眉
不得爭鮮妍。六雲歷落散復整，傾耳爬沙聲漸緊。不知
松外鶴歸來，忽訝窗前蟾墮影。前邨此際足精神，美人
未見心先春。一醉羅浮夢初醒，衝寒定有詠花人。我欲
探花還載酒，却怕枝高寒出手。消寒戲作梅花圖，呵筆
塗來剛四九。

偶感

寄語東鄰女，臨妝莫效顰。千秋無絕色，悅目是佳
人。

幽居

徙居來深山，築屋如斗大。洞壑杳蒼冥，林莽延虛

籟。謾謾松吟風，泠泠石瀉瀨。地僻絕塵囂，身閒忘否泰。
了悟清淨理，默若元機會。真味參酒中，幽趣聆絃外。千
古賞心人，淵明此爲最。

擬古

颯颯西風寒，皎皎秋月白。三兩烏夜啼，空庭墮黃
葉。對此甯無情？往事回頭憶。十三倚紅窗，鴛鴦繡裙褶。
十五不知愁，憨嬉撲蝴蝶。悠悠度歲華，春晨復秋夕。十
七鳳簫鳴，于歸調琴瑟。向曉竭井臼，親操手無力。入幕
習機杼，抽絲未能織。小姑目斜暝，阿母顏微赤。老嫗背
喃喃，爭嗤新婦拙。從此卸鉛華，荆布表容飾。書聲亂剪
刀，夜夜不忍欸。何日探驪珠，豔誇瓊林客？只恐錦衣還，
鏡裏人非昔。

題墨蘭

不共蘼蕪采，松煤點染奇。秋花君子佩，香草美人
辭。擷露芳如襲，凝烟蝶未知。幽居空谷致，幾費遶欄思。

月夜遊西岡弔胡湘秋妹與黛華

青）姊王潤如（瑾）盟姊小芬儀

吉兩妹同作

嬉春人更惜春宵，三五嬋娟弄影遙。清露漸凝莎徑滑；碧山爭寫黛娥嬌。謝庭詠好空陳迹；湘女愁深賦大招。夢裏芳魂曾相見，遊蹤重待驗來朝。

哭外

一輪月墮畫眉窗，從此鸞分影不雙。鼓到哀音靈瑟冷；醒來噩夢怒鐘撞。松筠志凜看凌節；梅柳春深記渡江。可奈饑驅留不得，夜深雪涕對銀釭。小別依依怨莫舒，而今長決問何如。枉悲婦竟司晨令；未卜兒能讀父書。家少儋儲謀本拙，心存寸草報終虛。蓉城一去知難返，頭白慈顏痛倚闌。早年已抱蓼莪哀，癡叔何曾善理財。先輩俸餘非手散；小庭花滿是親栽。有情未遇傾城色，無命難消絕代才。囊底珠璣零落盡，幾行賸

墨付妝臺。檢點殘篇淚不收，逡巡何事上眉頭。觸來南浦春陰感，并作西窗夜雨愁。曾經南浦春陰裏，却憶西窗夜雨時。乃夫子回石梁時寄余之作也。黯澹青燈悲照影，飛蓬綠髮怕禁秋。傷心水閣塵封久，短竹無聲咽暮流。夫子好音每于冰雪律，閣中品笛徹夜不倦。長貧潦倒減梳妝，病羽驚風信可傷。私典衣襦供藥餌，親調口味作羹湯。背人常漬宵分淚，禱佛時焚月下香。忍視并刀痕尚在，三生短夢費思量。十七盈盈賦結褵，八年靜好感分離。韶光已是生前負，影事翻於痛後思。花密難栖禽並命，風高合斷樹連枝。黔婁有婦空爲誅，再奠椒漿問可知。

送外櫬歸葬天長作

生小離鄉作客居，廿年飽讀五車書。名場落拓桐棺返，也算歸田賦遂初。愁雲暮壓鬱難開，鉦鼓頻催劇可哀。爲問石城橋下水，如何同渡不同回。昔年雙倚小蓬窗，眉翠青山鬪畫長。此日一般同道路，寒烟慘

斷霧人腸。心似冰寒淚眼枯。幾番搔首向天呼。此生
誤我遲同穴。堂上衰親膝下孤。華屋生存夢未溫。荒
邱遠又葬吟魂。平時傲俗知交少。誰叩西州月下門。

別墓

三尺無情土。音容思渺漫。昔時分手易。此日別君
難。已忘人天隔。還憂風露寒。叮嚀休記憶。菽水自承歡。
零丁兒女小。此去仗誰憐。淪落家何在。淒涼夢尙
牽。青燈留燭影。紅淚泣韶年。欲別難爲別。荒郊起暮烟。

春日感懷

春風醞釀百花初。一別鄉關感索居。白髮催人朝
漏短。青燈課子夜窗虛。愁來得句難沾酒。貧到無炊不
賣書。壓線鍼殘勤婦織。綺羅結習盡消除。

遺愁

錦瑟年華纔半過。遺愁無計奈愁何。淚凝乾土都

成血。心逐冰泉不起波。願禮金經消慧業。豈真成佛證
修羅。天寒倦倚蕭蕭竹。補屋牽蘿怨更多。

己丑季春歸隨園

傷心又踏舊妝樓。夢境勞勞頃刻休。泡影三生原
是幻。飛花經劫自含愁。詩箋粘壁塵重拂。鍼線留箱譜
再搜。觸目不勝身世感。縱多春色亦如秋。旃檀香裏
懺情予。窗外韶光度隙駒。千疊翠屏遮雁斷。一奩花鏡
照鸞孤。梨雲夢冷禪機活。止水心清俗慮無。爲問山靈
相識否。可知故我卽今吾。

輓儀吉(淑)四妹

淚濕羅襟賦楚些。招魂愁見月痕斜。繡帷空掩人
何在。腸斷庭前姊妹花。嫁衣重疊鏤金箱。辛苦年年
倚綉床。祇道妝成明鏡裏。誰知早是殮時裝。翠影嵐
光掩映間。一生消受六朝山。只今魂傍西湖側。月白風
清自往還。纔憚鸞分鏡影孤。又看霜重委蘅蕪。傷心

萬種憑誰訴欲向泉臺問有無。

月夜偕汪仙鸞繆露筠王潤如黛華

姊雙湖泛舟作

載得盟鷗侶，橫塘泛月時。烟迷山色斂，人醉櫓聲遲。風景都如昔，情懷欲寄茲。紅樓迴望處，萬樹影參差。

寄吉甫弟（禧）之洛中

慈烏知反哺，鳴鴈自成行。人生何異鳥？骨肉天一方。有父作宦遊，十載別故鄉。有母持薪水，漸染兩鬢霜。有弟就甥館，啞啞喜弄璋。有妹髮初齊，嬉戲共尋芳。阿姊失所天，歸來侍北堂。青山如舊時，世事不可量。哀我家中落，茶蘖自甘嘗。凜冽松筠操，皎潔冰雪腸。豈無手足情？涕泣徒瞻望。記上鶴鶴原，揮手去河陽。趨庭爲猶子，那辭道路長。落日暗關河，驚沙撲征裳。行行二千里，雲樹隔蒼茫。轉瞬別三載，思欲凌風翔。翥飛無羽翼，惟望整歸裝。早作百兩迎，有婦希孟光。執勤主中饋，介壽

同稱觴。侍親娛膝下，永無離別傷。

遊雞籠山登曠觀亭作

風撼松濤萬壑深，秋來乘興一登臨。千家烟火亂南北；六代雲山空古今。羅綺春隨流水去，樓臺影逐夕陽紅。鳴鷄不警繁華夢，猶有鐘聲出樹林。

哭麟兒

玉樹連株隕一枝，枉教天付絕人資。料因薄命難培植，慘見蘭凋蕙折時。癡心屢盼汝傳經，強爲開顏夢未醒。每到夜深親課讀，至今惟對一燈青。晝荻和丸願已遠，朝朝贏得淚沾衣。傷心最是斜陽暝，不見攜書放學歸！

癸未秋次子香兒又殤慈姑悲傷得

疾於甲申八月辭世余焚棄筆墨已兩載矣今攜幼女將返天長爰賦七古一章以誌哀痛不復計工拙也

悲憤作歌歌當哭，生不辰兮傷榮獨！憶昔夫亡子
幼孤，蕭然四壁無餘蓄。古來忠孝全其名，苟臨危難擇
死生，撫孤爲重盡節輕。身立大義當分明，人生百歲誰
無死？俾得從夫亦幸耳。強延歲月歷艱難，兩兒失怙姑
無子。姑無子，妾有姑。菽水承歡婦代夫，上堂吞聲不敢
泣。終朝血淚相模糊。妾無夫兒尙有母，嫁衣典盡供升
斗。機聲軋軋和啼鳥，青燈熒熒照書牖。兒得成名妾願
償，箕裘克紹將烝嘗。養親教子吾事畢，義方豈博彤管
彰？一朝奇禍生不測，兩兒旋化心摧抑。此身俯仰無所
歸，生既不能死不得！悠悠蒼天，慘慘黃泉，我生何辜罹
此愆！君不見松柏青青上凌烟，歲寒而後知節堅。行看
霜磨雪鍊無窮年。

口占

風笛頻催別，離亭黯夕陽。匆匆不回顧，忍淚避高

堂。

過項王卸甲處

湘痕閣詩稿

卷上

重瞳釋甲向烏江，千古遺踪想憤王。八載雄心空
霸業；中分殘局說天亡。塞旗尙欲誇圖陣，衣錦誰看返
故鄉？終見漢軍張赤幟，鴻溝東據總荒唐。

旅店題壁

離鸞別鵠太無端，薄試征衫怯嫩寒。愁剝紅蕉心
莫展；影沈絳蠟淚初乾。故山烟樹雲中渺，舊夢瓊華鏡
裏殘。辛苦年來諳道路，寄棲何處一枝安？

曉行六合道中

筍輿出城肆，曉行雜車轂。宿霧四圍收，朝霞明倦
目。喔喔荒鷄啼，狺狺村犬逐。橋危人跡稀，樹杪晴光綠。
山脚樵負薪，溪頭農叱犢。幼不識桑麻，長焉知耕讀。滌
志處羅紈，年華隨轉軸。今如參真詮，晨鐘警蕉鹿。

率女（棠仙）掃夫子墓作

彈指鄉關別數年，歸惟弱女拜墳前。驚烏冷度松

秋月；倦蝶迷蔓草烟。人世影形悲寂寞；夜台骨肉羨團圓。轉傷他日酬同穴，知否誰猶掃墓田？

天中後五日回隨園

烟雲無恙畫圖新，小別何堪更愴神！照眼榴花紅似淚，入門不見倚閨人。慈雲水隔痛難支，悔煞江干返棹遲。更有勞人同抱恨，麻衣如雪泣天涯。謂吉甫受之錫堂三弟。

偕淑筠（管）淑儀（嫻）兩妹赴家

大人署中賦此留別王玉魚弟婦

買得江頭權，趨庭雁影聯。秋心繁舊夢；別淚灑離筵。地勝餘花竹；家藏贍簡編。君原承祖訓，弟婦乃夢樞先。生女孫。應善主林泉。

金山月泊

貝闕珠宮現，渾疑蜃幻形。潮痕圍岸白；山色隔江

青。月落喧津鼓；風微語塔鈴。我來停短棹，吟嘯有龍聽。

中秋夜月舟泊秦郵與璞泉（廷琅）

受之（祐）兩弟淑筠淑儀兩妹各

賦一詩

野岸停征棹，如臨不夜城。湖光千頃白，鏡影一輪明。絢彩痕初鍊，凝寒魄未盈。露涵銀漢淨，冰濯玉壺清。吹豈憑絃管，催猶雜鼓鉦。荻蘆搖瑟瑟，鈴柝送聲聲。佳節同酬賞，新詩互和賡。清談揮短麈，豪飲吸長鯨。月自憐圓缺，人還感合并。風霜搏鴈陣，雲水冷鷗盟。回首綦歸思，關心計去程。朝來潮信長，好趁片帆輕。

詠芭蕉

綠天黯黯釀成陰，移上窗紗翠色侵。小院兜螢疑扇影；夜庭敲雨擬琴音。三秋作盡淒涼意，百劫難消轉心入畫供。吟成鹿夢，離披牆角未堪尋。

紅葉

不共枯楊落，西風點染工。霜催三徑外，秋老一林中。豔影餘霞襯，酡顏夕照烘。御溝流水曲，有女怨題紅。

雪夜與璞泉弟同作

四面雕欄護，香篝火不溫。乾聲時撲紙，折竹屢敲門。風緊燈無暈，雲寒水有痕。明朝探春信，萬樹醒梅魂。

虞美人草

甲帳歌殘化碧烟，綵衣零亂舞仙仙。臨風似訴興亡感，怨綠愁紅嬌可憐。

暮春感懷

滿眼韶光花事新，故鄉又負一年春。流鶯啼濕愁紅雨，香絮飛殘幻綠蘋。堂冷萱帷雲永蔽，鏡孤鸞影月無塵。宮閒却好衙齋靜，連袂稱觴笑語頻。薄暝簾櫳日上遲，自研薇露學臨池。詩情半是閑中得，世味都由冷處知。琴到爨餘留古調，人從劫後悟殘棋。金閨縱說

春如海，轉憶牛衣對泣時。荏苒年華隨分過，歸舟欲買又蹉跎。身如社燕巢無定，心較春蠶緒更多。惜別儘拚書寄怨，澆愁賸有酒爲波。故人天末家山遠，渺渺予懷悵奈何！檀篆如雲撥不開，自繙貝葉禮蓮臺。生天豈願耽離恨，轉劫還祈少慧才。襟上香痕消芷杜，尊前蠟淚泣瓊瑰。升沉往事和烟散，一寸柔腸一寸灰。

題王小鶴詩態圖

拈出詩中態，仙心妙入微。雲裁五雜組，春織九張機。盟共閒鷗縱，神從獨鶴飛。奚囊收拾處，揮灑落珠璣。

冶城柳枝詞

花草吳宮久寂寥，空餘烟雨認南朝。城陰一帶垂垂綠，挽住秦淮早晚潮。指點征衣淚欲斑，眼看春去與春還。無從更覓金城樹，常帶啼痕遶冶山。東風門巷晝冥冥，依舊烟籠咏絮庭。祇是凝粧人異昔，長眉輸與一痕青。多情搖曳好丰姿，紅板橋頭瘦影支。還憶

柔條和淚折，至今牽恨一絲絲。
隋堤漢苑幾番新，亭是勞勞慣送春。
風起飛花糝如雪，天淮遮斷未歸人。
鏡裏年光似水流，長條何處倚高樓。
他生莫更吹香絮，又惹風飄雨泊愁。

隨園小集賞牡丹以今日良晏會爲

韻分賦拈得日字

惜花竟成愛花癖，每及花時抱吟膝。
親持卮酒醉名花，不放春風閑一日。
招來伴侶坐芳庭，紅酣綠醉香雲溢。
捲帷錦繡縈成堆，花影如潮沁詩魄。
忽忽佳景幾番更，瞥眼韶光異今昔。
琅玕深處締鷗盟，醉折花枝永朝夕。
百寶欄邊蜂蝶喧，一鉤新月窺瓊席。
別離容易合併難，尊前人已天涯隔。
謂倚筇小芬茫茫雲樹繫愁思，指點歡場冷無迹。
鏡裏穠華去不回，飄茵入溷誰相惜。
願乞旛鈴爲護花，東皇留駐花顏色。

晚春病起有懷史心玉（璞瑩）女史

卽寄顯其離鸞集稿

藥爐烟裏百花殘，扶病無心怯倚欄。
人世光陰憐去鳥，天涯同調感離鸞。
年來顧我形如寄，竹外知君影亦寒。
雙鯉迢遙江水闊，石城春盡雨漫漫。
綠章何處訴穹蒼，黯黯思君更斷腸。
遺恨有心銜木石，欲歸無路奉羹湯。
愁看身在供殘劫，苦爲親存獨後亡。
最是傍人相慰藉，掌珠原是異尋常。
拈毫人盡拜粧臺，生本青蓮具慧胎。
洗面祇今惟有淚，畫眉從古不宜才。
相看身世枯桐似，愁絕詩篇束筍堆。
料得難忘餘結習，冰蠶心緒未全灰。
惆悵江東日暮雲，伯勞飛燕惜離羣。
極知遠道情逾重，憶否邗溝手乍分。
加飯擬憑書宛轉，倚裳時有夢慙慙。
何當剪燭哦新句，一字名香一瓣薰。

古鏡

五色鑄龍鳳，金精百鍊成。
妍媸從我辨，肝胆向人明。
幾閱興亡劫，徒徵離合情。
螭文半殘蝕，班剝土花生。

古劍

出匣夜吟嘯，騰蛟風雨愁。精華千古在，恩怨幾人酬？起舞悲歌激，摩挲熱血流。何當終化去，神物肯淹留。

古琴

玉軫金徽缺，離鸞別鶴哀。自參絃外趣，誰惜爨餘材？高雅和書供，清風伴鶴迴。移情臨海上，汨汨水雲來。

古桑

一片如拳石，遺傳孰守經？蟾蜍形不易，鳴鶴眼長青。聚墨從人懶，揮毫仗爾靈。名心磨未盡，匣底尙留銘。

採蓮曲

江南女兒顏如玉，粧成當戶理清曲。女伴朝來約採蓮，蓮舟盪破烟波綠。阿儂生小住橫塘，花裏爲家水作鄉。折得並頭羞顧影，嬌癡渾未識鴛鴦。鴛鴦雙飛復雙宿，小姑居處常幽獨。盡出纖蛾只是憐，朝朝鏡裏雙眉蹙。雙眉蹙人不知，深入花叢放漿遲。願爲花上露，莫

作藕中絲，花露如珠圓不缺。藕絲祇解繫相思，相思相望不相見，生怕秋風棄紈扇。一夜蓮房結子多，明朝淚洗胭脂面。妾面蓮花嬌，妾心蓮子苦，妾面如花君愛看，妾心自苦君知否？朝暮采蓮湖水邊，蓮花灼灼葉田田，芙蓉零落秋光老，依舊湖心唱采蓮。

秋海棠用漁洋山人秋柳韻

淒絕墻陰一縷魂，秋聲如雨逼重門。漫施錦帳籠嬌影，合貯冰壺認唾痕。落葉冷堆衰草徑，花疏豔趁夕陽邨。生衣薄薄蒼苔滑，欲訴幽懷誰共論？已知弱質不禁霜，半結芙蓉恨隔塘。鈿朵零星纔出匣，綠衣歷亂未歸箱。三生紅淚供情切，一點檀心懺法王。翻笑東皇能愛惜，春餘錦繡簇成坊。嬌姿宛轉貼苔衣，環佩歸來是也非。此際秋情空繾綣，當時春夢尙依稀。閉庭露薄幽蟲咽，斷砌風纖瘦蝶飛。只莫再煩螢火照，凝粧應與舊相違。簾前搖曳信堪憐，丹粉勻敷細裊烟。色豈媚人原冷澹，花如解語定纏綿。韶華已分輸前度清景

何堪遜往年！不合顏紅應抱恨，斷腸名更寄誰邊？

小遊仙曲二十首

阿母相招鶴馭遲，蟠桃成熟宴瑤池。羣仙聽慣霓裳曲，又索新翻樂府詞。水瑟雲璈縹緲生，天風吹作步虛聲。只緣貪看旋波舞，忘却騖鸞上玉京。彩鳳爭銜五色泥，醉拋綬帶幻虹霓。更闌要乞斑龍送，家住蓬萊影水西。宴罷真妃歸九華，雲塔催碾紫鸞車。羽衣未卸風鬟嬾，一朵斜簪碧柰花。繡襦甲帳護春宵，豔福從來未易消。歸去瓊臺同寫韻，幾生修到是文簫。絲絲香霧濕雲屏，一縷春魂喚不醒。自憚聰明防墜劫，萬花堆裏禮金經。神仙要遇鵲填河，盼到相逢歲又過。玉露金風等閒度，縱無別恨奈何！霓旌羽蓋擁仙班，知是青琳獻壽還。賞徧瑤宮花萬樹，始知春色勝人間。蹁躑鶴駕藉風扶，空裏乾坤似畫圖。手摘明星拋海面，水晶盤上走珍珠。採徧嫵嬾萬卷儲，芸香滿袖退朝初。無端受得東華籙，又向謨觴校祕書。有誰

來叩白雲扉？自撥冰絃坐石磯。一曲冷然空翠滴，月明珠樹鶴遲歸。一灣流水仙源隔，滿地芝香白鹿啣。寂寂洞天無鳥使，玉璫密札只空緘。雪膚花貌態珊珊，影落明河自愛看。璧月長圓春不老，能除煩惱即還丹。學篆青螭鈴上方，又邀買醉踏雲忙。仙家自是閒時少，誰說壺中日月長？採藥空山蘿薜紛，呼來鸞鶴自成羣。偶拈幾瓣桃花落，下界無端認綵雲。十洲三島任情遊，偶折芙蓉近玉樓。知有修文仙史在，等閒相見敢回頭。誰見乘風月殿來，廣寒深鎖靜無埃。青天碧海嫦娥意，枉費星娥幾度猜。春蘭秋菊隨時惜，不解炎涼上帝心。底事通明探祕譜，綠章只乞海棠陰。自我細杏倚雲中，手種天桃映日紅。留與塵寰好顏色，要人知道有春風。未證華鬢色界天，蕊宮來作掌花仙。殷勤爲藉銀河水，好護人間九品蓮。

輓汪仙鸞表嫂

昨夜西風緊，吹殘蕙蕙姿。囑姑憐弱女，教姊撫孤

兒化鶴知何日。驂鸞正此時。玉環親解贈，千里寄相思。
時以指環託寄小芬。慘見彌留際，無言有淚痕。影孤分斷續，聲咽泣哀猿。忍割千絲愛，難消一魂。泉臺鴛侶在，幽恨好重論。猶記邀盟日，紅閨翠袖聯。但愁雲易散，惟祝月長圓。多病辜春約，論心廢夜眠。倉山吟社冷，來歲有啼鵲。善果參彌勒，招魂藉梵音。淚因知己灑，詩作斷腸吟。人去空留鏡，香殘罷鼓琴。從今蓮步杳，粧閣怕重臨。

題文姬歸漢圖

羌兵西下漢關開，載得焉支馬上回。絕代王嬙悲
大去千秋蔡女竟歸來。空憐幼子留沙漠，未忍親書墮
劫灰。遺拍至今誰解按，哀笳一曲淚盈腮。

題木蘭從軍圖

市來鞍馬卸釵鈿，從此長征著玉鞭。不避紅顏心
自赤，但求父免女何憐。雪山瀚海三千里，鐵甲金戈十

二年。倘使沙場埋戰骨，至今誰識是嬋娟。

至日

應律回陽候，神仙又洗頭。暖催梅意動，凍禁柳芽抽。刺繡宜添線，消寒欲典裘。悠悠無限感，刻日影難留。

夜驟雪

北風撼庭樹，疑是千人軍。黑夜下蔡州，聲亂鵝鸛羣。又疑玉龍戰，倒捲銀河潰。跳珠瓊沫墮，漫天吹繽紛。古松失蒼翠，老梅孕清芬。窗外鶴迷影，簾中香罷薰。當歌何惜慨，對酒不辭醺。頽然襍被擁，身入梨花雲。

題又邨（祖恩）弟松陰把卷圖

瑤華示我絹一幅，展卷俄驚半窗綠。是誰貌此蒼松圖，中有觀書人似玉。長衫鶴立丰格殊，審之毋乃又邨乎。十年一別勞夢想，喜極逕欲臨風呼。往者書來不
如面，寄聲常苦隔鄉縣。聞君嗜學益相憐，況有荆花同

筆視青溪老屋松竹妍，蒼皮溜雨倉山巔，白雲無恙孤
鶴眠，三株五株望雲烟，翩然兄弟軾轡賢，待君花裏攤
瑤編，嗟予貧病百無俚，願驅蟬蠹終殘年，六松亭下寒
濤舞，根觸髻齡讀書侶，我欲披圖一訊之，干霄他日定
何許？

自題梨花白燕圖（并序）

惜花庭院，舊夢闌珊，來燕年光，故巢零落，惆悵
東闌一樹淚灑清明，差池南國雙飛，魂消杜宇，空悲
冷豔，無分將雛，吹殘幾日東風，賸餘春之似水，蹴碎
一簾晴雪，羌瘦影兮如人，早知紅粉成空，應許素心
相對，繪冰綃而寄恨，爭誇彩筆於黃荃，拈好句以絨
愁，殊愧清風於白燕。

雪豔霜毫畫絕奇，一回展玩一凝思，春原似水穩
華澹，爾也如人綺素宜，入夢冷雲曾憶否？捲簾寒影亦
淒其，月明欲墮巢難覓，寫向生綃傍折枝。

晚霽

閉關三日坐，新霽愛清遊，雲脚斜陽露，枝頭殘滴
收，濕煙浮遠嶂，晴翠鎖層樓，餘潤沾芳草，蓬蓬綠意稠。

落花

一夜知多少，飄零風雨中，漫憐歸淨土，香色本空
空。

病起感懷

簾櫳寂寂晝冥冥，燕語鶯啼未忍聽，流水無情春
自去，東風渾不管飄零，翠減紅銷只自憐，鏡中人不
似當年，維摩枉說無生法，一現優曇卽了緣，冰絃彈
斷賞音無，蘅芷香清蝶夢孤，慘絕纖纖新月影，當窗猶
爲寫眉圖，幾重幽恨上心頭，豈爲傷春怕倚樓，斷盡
柔腸彈盡淚，人前遠道不知愁。

顯王潤如姊天寒有鶴守梅花圖

世外冰心畫裏人，一枝香雪認前身，霜寒老屋鄰

同調；月冷空山結比隣。相伴只容花底鶴；
時春幽情不入梨雲夢。林下輸君味獨真。

柳絮

綠陰門巷短長橋，晴雪吹殘糝碧霄。遮莫有情人
意醉；邀留無計馬蹄驕。心歸淨土春隨去，點浣塵襟淚
不消。寄語落花同命薄，儘偕鳳泊與鸞飄。匆匆三月
好韻光，底事飛揚鎖日忙。沾視那曾污潔白？因風豈是
太顛狂？誰搓膩粉開粧鏡，自唾香絨墮繡床。燕子頻啣
魚碎，啜摧殘何忍問東皇。鏤玉雕瓊奪化工，豈無才
思但漫空愁牽苕帶縈迴處；色鬪梨花淺淡中。曲徑痕
留雲碎細；芳塘影綴月玲瓏。託根舊是靈和殿，一落春
風便不同。吹來闌角跡分明，比玉溫柔較雪清。偶趁
游絲扶裊裊；也隨榆莢點輕輕。繁華已過難參果，罨
原無不繫情。畢竟飄零還有恨，欲從流水問三生。

京口

湘痕閣詩稿 卷上

虎鬪龍爭地，南徐舊著名。橫空盤海氣；夾岸捲秋
聲。雲卷金山寺，潮迴鐵甕城。中流人鼓棹，應羨片帆輕。

過揚州

望裏樓臺似畫圖，繁華如舊客心孤。生憎一道邗
溝水，流盡脂香膩粉無。幾絲衰柳不禁秋，三月烟花
記昔遊。已酉與小芬心玉同聚於此。此日重來誰省識？斜風
細雨過揚州。

淮城懷古

蘆荻蕭蕭淮水寒，英雄落魄此垂竿。功成報德千
金易；身踐謀生一飯難。古渡荒涼沉夕照，西風颯瑟捲
狂瀾。萋萋綠遍王孫草，何雲重尋舊釣灘？

楊莊公廨送別藍穎生表姊入粵

蒲帆纔卸又征車，風撼飛沙落日斜。閩海久沉琴
瑟韻；自進甫姊丈官閩中十年吳山終戀滄陽家。繁華事已

如塵冷；冰雪心能絕點瑕。畫荻好申慈母志，願兒攀取上林花。諳來世味總酸辛，萍梗何堪證夙因。半載其傾知己淚，八年同作未亡人。椿庭幸我依棲隱，古道輸君閱歷真。珍重尺書傳嶺外，祝他魚雁莫嫌頻。

落葉用秋柳韻

參來榮悴總消魂，衰柳疎疎冷逼門。未逐春風捎燕影；先傳秋訊破苔痕。翻飛薊北斜陽道，妝點江南暮雨村。身世何堪悲聚散，芳華回首莫重論。纔怨砧催又著霜，恰隨雁影度寒塘。乾聲捲處攙金柝，恨字書成疊玉箱。憔悴豈真關慧業，飄零只合證空王。可憐日炙霞烘處，猶認深林錦作坊。片片飄來點素衣，題紅刻翠事都非。燈昏孤館蟲吟切，月冷空山鳥跡稀。幽思幾多憑水逝，秋心無那逐蓬飛。辭枝未必甘搖落，盼到成陰願已違。託根何所自生憐，掃盡纖塵欲化煙。細雨半簾聞浙瀝，哀蟬一曲殢纏綿。誰言墮地非今日，只覺投空似昔年。風木蕭森何限感，天涯羈思款吟邊。

梅花嶺拜史閣部墓作

四鎮兵驕可奈何，軍書飛急渡淮河。孤臣自灑新亭淚，屏主猶翻玉樹歌。運應金符天馬降，江沉鐵鎖劫灰過。衣冠遺墓精忠氣，明月梅花共不磨。

野泊

隔岸遙峯襯，臨村曲水平。鳥衝煙影直，舟帶夕陽橫。

己丑元旦

歲晚悲風木，新春感不勝。甕無經宿酒，案竽隔年燈。家較烟雲散，愁隨歲月增。桃符從例換，心似玉壺冰。

寄贈朱紉秋（佩蘭）女史

爭唱玲瓏絕妙詞，幾曾相見早相思。工愁似我吟都減，善病如君瘦不支。秋水襟懷能滌俗，冰蠶心緒易

牽絲。生憐忙殺珊瑚管，頰罷椒花又畫眉。

送淑儀三妹于歸秦郵作此爲別

菊綻東籬桂影圓，簫聲奏向九秋天。妝凝紅玉開鸞鏡；香擁春風做玳筵。初試羹湯憐爾幼；親承色笑幸姑賢。慈雲永隔椿庭冷，只住金閨十五年。惆悵青鸞報吉期，相依已慣忍相離。課詩記剪三條燭；纏臂親懸五色絲。花底隨肩甥似妹，謂棠仙女。窗前學綉姊兼師。雁行名次惟君幼，猶憶牽衣索菓時。在家連袂出同舟，數夜燈前計昔遊。回首故園分舊雨；關心小別屆清秋。女儀早向閑中習，婦德須從忍字求。寒暖而今勤自護，迴殊往日有同儔。家風臥雪本清貞，奩薄休爭時世新。好聽雞聲催讀早；莫從雁足盼書頻。沼堤柳色山分翠，入座湖光月瀉銀。他日瀛洲春似海，芙蓉鏡下畫眉人。

南樓晚眺

湘痕閣詩稿

卷上

百尺高樓迴，登臨望眼迷。風翻鴉陣黑，天闕暮雲低。靄靄四山合，蔥蘢萬木齊。疎鐘來遠寺，催月出前溪。

柳綿曲爲少蘭弟作

柳綿三月飛如雪，柳色青青未堪折。豔曲誰歌金縷衣？柔條只縮丁香結。託根原是舊章臺，柳綠初勻費剪裁。糝徑花香人醉候，罨樓春暖燕飛來。乳燕飛來棲正好，瓊華忍被罡風掃。生憐墮溷與飄茵，那得金鈴常護保。朱門有客嘆沉淪，願贖蛾眉別贈人。消得石崇珠一斛，未拈郭璞豆三升。從今余屋深藏貯，不向豪家歌白紵。貼翠難排鶯燕行，拈花笑侍神仙侶。已是盈盈碧玉年，雪膚花頰鬪鮮妍。楊枝合使櫻桃配，錦字都憑紅葉傳。鄉是溫柔人似玉，消魂那不情相屬。爭買花鈿助豔妝，慣裁冰縠爲春服。剗機香塔月影低，鴛鴦翡翠總雙棲。一朝金谷繁華歇，南北東西送馬蹄。雲散風流成轉瞬，天涯何處絨芳訊。密語難將叩叩通，鍾情猶是心心印。蓬門冷落少經過，翠減紅消幽恨多。願把金鐵供

玉粒，幾曾補屋怨牽蘿。回頭已是銀潢隔，廣袖還留唾
華碧，宛轉情絲枉自牽，零星墮粉無人惜。和風和雨倍
可憐，靈根生小便纏綿，漫教春色隨流水，化作青萍箇
箇圓。

酷暑

難遣如年日，雲蒸火逼簾。天心非釀暑，人意要趨
炎。曲院無風入，虛窗有夢添。涼颼容易至，威令莫苛嚴。

七夕以詩牌限韻與又邨弟同作

金風玉露咽吟嬋，瓜果堆來乞巧筵。聽得人間小
兒女，瓣香心忍夜遲眠。清淺銀河淡蕩風，璇璣不似
廣寒宮。一宵要話經年別，啾啾無心聽砌蟲。

將歸天長留別諸姊妹

風輪電火感年華，唱到離歌去路賒。憔悴忍攀前
瘦柳，飄零等作早凋花。強依猶子難爲子，枉說還家那

是家？揮淚出門揮手別，一江南北卽天涯。

中秋對月

纔離白下返歸舟，又見團圓鏡影浮。豈爲光華廿
仰面，願經風露不低頭。霓裳曲演遙天恨，丹桂花濃故
國秋。回首廣寒成小謫，何時重向月中遊。

聞雁

西風瑟瑟夜窗虛，聽到征鴻淚滿裾。北去枉增秋
士感，南來已斷故人書。聲驚歸夢燈昏候，影墮寒江月
上初。自是天涯嘆零落，同行踪跡近何如。

秋懷二首

西南流大火，萬籟動涼颼。節候有代謝，寒暑隨更
移。人生六合內，盛衰同一時。譬彼嶺上梅，分殊南北枝。
南枝多華實，北枝多離披。得氣偶然耳，乃謂造物私。陰
陽具此理，奄化無迹遺。富貴胡可恃，貧賤何足悲。達者

樂天真，豈爲世欲羈？不見葛天民，雍熙如愚癡？美人
隔秋水，相思不相見。娟娟芙蓉花，媚日霞光綯。一夕被
新霜，攬鏡紅顏變。殘妝無復理，芳香何由薦？良玉抱璞
瑩，精金堅百鍊。同心證久要，慎勿棄衰賤。皎皎明月
滿，瀼瀼白露晞。商聲起庭戶，秋氣入羅帷。含情拂玉軫，
哀思託金徽。自明心跡清，敢怨知音稀。一彈花欲舞，再
彈風生衣。慷慨竟此曲，泣下重歔歔。安得化鶴去，華表
復來歸？

和蔭軒姪秋日感懷韻

幼小春深貯碧紗，而今那復說繁華！餘生儘歷窮
愁病，結習難忘詩酒花。空對雲山思故國，可能滄海泛
仙槎？蓬萊咫尺歸何日，盼斷魚書淚眼除。

營先姑裴孺人葬感賦

彼蒼生我慘何極，無子無夫身子立。姑亡六載寄
他鄉，孤壠蕭蕭歸不得。摧我肝腸竭我力，還葬山邱盡婦

職。坟頭愴地痛呼天，白日無光天失色；眼中淚，心頭血。
斑斕和土沾胸臆。九原莫道不追隨，有女丁零心未畢。
良人十載魂其來，先我姑兮遊夜臺。兩兒隨化蒸嘗絕，
他年吾骨安歸哉？君不見高岡荒塚泥深圻，清明何處
紙灰白？

爲先姑營葬畢後至莊戶趙心和家

作

北風捲黃沙，落日沉烟渚。一朝窳窳安，載拜薦薦
俎。心摧血淚枯，去去愁凝伫。田家迎主人，入門色欣舉。
稚子負撲囊，少婦供雞黍。結繩以作床，燃薪代爲炬。老
農僂僕來，垂涕向我語：「昔見雙歸時，人羨神仙侶。滄
桑轉瞬更，迢遞劇如許！農久荷主德，倉穀薄積貯。租賦
非不完，胥吏怒齟齬。溝洫非不清，水道鄰強距。年衰庇
蔭無，外侮誰能禦？」聞此愈感傷，聲結氣喪沮。夫亡無
遺孤，萍飄餘母女。愧難把鋤犁，風波悲失所。浮沉肯隨
世，歲月不我與。錙銖何足較，且進尊前醕。

輓小芬（坤）妹

鄉關迢遞感離羣，又報瓊枝隕夕曛。十載雁分南北影；一朝書斷往來雲。玉臺鏡破曾傷我，紅豆花開每憶君。此日人天成永隔，歌殘楚些料無聞。憶自調羹闕闕家，幾曾陌上見香車。魂歸江左三更月，人種河陽滿縣花。史厚田妹丈餘發河南縣令。才色向難邀福澤，聰明原易損年華。遙知故里荆枝茂，莫慰慈親淚眼賒。曾記邗江返櫂遲，相逢意外轉相疑。蟻杯浮綠聯新雨，蓮盞挑紅論舊時。作婦賢名鄉里羨，思親涕泣枕衾知。忽忽不盡瀕行語，從此天涯又別離。豈期二豎入膏肓，塵世何來却死方？堂上翁姑悲奉席，膝前兒女痛扶床。晨鐘易醒繁華夢，夜柝空驚雲水鄉。慘絕笙螭難補恨，桃花短命菊經霜。

辛卯元旦

殘臘一宵盡，春風換歲華。檐冰猶禁凍；池柳未抽

芽。身世如蓬轉；家山望眼賒。不辭醴醖滿，和醉夢梅花。

春日偶成

賣錫時節雨綿綿，綠慘紅愁又一年。喚得春歸無著處，教人怎不怨啼鵑。一寸冰心百鍊磨，非關春恨壓雙蛾。襟懷別有愁難洗，贏得青衫淚點多。

將至白下留別楚材（楠）二姪

又折河橋柳，臨風絮惹衣。春隨流水去；人共落花歸。別淚沾芳草，離觴餞夕暉。阿兄憐弱妹，相對倍依依。記回江上櫂，小住未經年。身自如萍泛，家祚似月圓。課畊完賦早，刈麥薦春先。別無語多囑，持籌賴汝賢。余每至江南，或數載不歸，所有海產皆姪爲之料理焉。

別蔭軒（樾）三姪

尊前別酒怕重斟，話到蒼涼淚滿襟。截髮雖虛慈母願；磨笄敢忘古人箴。燕孤那分營新壘？烏倦猶容返

故林。悟徹浮生原是（以下原缺）

盃開只剩石如拳，供爾芸窗薇露妍。時以先大父遺

硯爲贈。一代詩名追後步，千秋勳業過前賢。世無古調

絃難緩，家似殘棋著要先。靜夜聞雞休起舞，乘風快著

祖生鞭。

湘痕閣詩稿卷下

梅花

幾株香破凍雲邊，淡淡東風漠漠天。落自有聲隨
 笛裏；開原無意占春先。懷冰襟抱清堪擬；倚竹丰神靜
 可憐。一種幽情悽絕處，江南江北鎖寒烟。雪虐霜饕
 取次經，誰從孤嶼惜伶俜？冰魂未有鶯呼起；清夢惟容
 鶴喚醒。曲奏商聲流水咽；琴翻雅調暮雲停。月明林下
 矜高格，肯共羣芳鬪尹邢。照水橫斜顧影單，竹籬茅
 舍自相安。僂心合抱烟霞癖；傲骨能禁冰雪寒。跡相杖
 枒同調少；生涯冷淡賞音難。品題只許林和靖，不耐從
 人熱眼看。一枝相對欲忘情，橋外巡行酒畔評。人影
 花痕同瘦削；詩魂月魄共孤清。空山只結松雲伴；冷渡
 惟邀鷗鷺盟。穠李天桃翻自幸，不曾脩到亦三生。

贈燕

錢唐袁嘉柔吉

山行

朱必雕梁穩，商量何處飛？新巢餘落月，故巷賸斜
 暉。去往身無定，依棲計總非。卷簾倍惆悵，春晚不能歸。

攬衣步平岡，攀藤陟高嶺。青壁芙蓉開，翠滴松杉
 冷。曲澗鳴流泉，遙峯接雲影。嵐氣鬱蒼蒼，天風吹猛猛。
 山孤落日懸，樹杪餘霞靚。宿鳥驚還飛，眠鶴閒逾靜。幽
 適淡名心，留連忘晝永。迤邐入烟巒，此中有佳境。

雁

衡浦風波朔漠烟，勞勞無定又經年。聽來清唳空
 增感，訴盡秋心亦可憐。縱惜羽毛依碧落，難傳箋字到
 黃泉。雪泥留得分明迹，待話浮生倍惘然。長空飛度
 恨漫漫，髡柳凋梧未忍看。塞北却知回陣易，江南誰信

託身難。三秋風雨吟聲碎。千里關山別夢殘。譜入冰絃
翻怨曲。冷然仙籟不勝寒。離情寫出是耶非。迢遞天
涯何處歸。失侶幾曾傷戢影。呼羣豈爲羨高飛。寒依滌
水眠魚。冷抱斜陽落釣磯。露苦風酸禁不得。江鄉還
說稻梁肥。纔棲沙渚又蘆汀。殘月朦朧幾點星。雲水
儘能容去住。關山畢竟感飄零。心隨帆影沖烟斷。韻雜
砧聲入夜聽。珍重莫從樓畔過。有人愁對一燈青。

消寒第二集

少蘭第需次蜀中詩以寄懷。

雪花如掌風漫漫。去年嚴冬祖餞闌。驪駒在門不
忍發。欲別未別摧心肝。今年試官向西蜀。衝寒犯雪峨眉
巔。白雲凝望數千里。吁嗟行路方艱難。不惜驅車遠
道走。行行一步一回首。相對振翻青雲中。澆春莫憶故
園酒。故園春酒未開筵。思君那復辨旨否。男兒四海若
比鄰。毋爲歧路淚沾巾。名場不慮無知己。虛懷雅望能
傾人。吾家海內聲名著。文詞循史矜時譽。大父窮探天

下山。紀詩獨少猿啼處。君宦西川補壯遊。從茲詩得江
山助。新詩吟成早寄余。快讀能使離懷摠。錦江冰結吳
江沖。慎勿浮沈雙鯉魚。

消寒第四集擬小樂府

金谷聚

錦幃圍春風。嘉賓宴瑤席。良會苦不常。別後成陳

大道曲

近遊多遠憂。急足無好步。大道直如繩。去去重回

有所思

之子一爲別。鬱鬱惜芳時。抽刀勿能斷。環轉心上

作蠶絲

春蠶苦無力。朝夕自纏綿。牽來寡女絲。拈作相思

絃。

機。

顧。

迹。

風。

玉階怨

月是閒階白，燈偏隔院紅。君恩無終極，甯敢怨秋

子夜變

寶鏡鑿團圓，文禽慕儔匹。夜半忽棄捐，空房弄瑤

瑟。

烏夜啼

月落驚鳥起，三更忍飢啼。丹山有竹實，緣君自誤

棲。

企喻歌

孤竹生山阿，經霜猶勁節。不見道旁柳，無風腰自

折？

消寒第六集

迎春曲

不關欽頭綵燕新，也憑小閣貼宜春。更誰速得東
皇駕？只有梅花解傲人。選韻分題酒未闌，重簾深處

不知寒。迎春似覺春光到，飛雪漫天作絮看。柳未抽
絲桃未花，春風何意到山家。但教醞釀為霖雨，濟徧蒼
生潤物華。旭日光輝素月清，如何冷暖各殊情。秋風
亦自有來去，不見郊原綵仗迎。

紫卿（綬）伯姊招飲路經水雲閣舊

居感賦

天桃破萼細梅謝，江南三月春無價。阿婆招飲疊
蠻箋，不辭秉燭消長夜。良夜花辰續舊遊，籃輿道出板
橋頭。板橋東有三層閣，閣外清泉合抱流。此中幽僻無
塵掃，著個斯人擅文藻。司馬題橋壯志違，安仁作賦閒
居好。閒居惆悵記雙栖，三面紅窗壓水低。錦軸瑤籤簾
左右，脂奩粉盞案東西。青燈共讀渾忘倦，相期那必長
貧賤。風雨偏摧連理枝，冰霜忍鍛孤飛燕。燕子孤飛十
二年，身如斷梗夢沈烟。雕梁易主巢無託，重過門庭倍
愴然。愴然水閣還依舊，近水居鄰門盡覆。辛卯水災，鄰屋
皆被淹沒。軒館都成瓦礫堆，眉痕猶共春波皺。極目蒼茫

却可哀，令威化鶴不重來，吟魂寂寂埋幽草，野黍離離沒綠苔。年來我亦忘情者，到此難禁淚盈把，明知蜃海幻瓊樓，且向花陰傾玉罍。花落花開春復秋，百年身世等浮漚，東皇不管升沈恨，醉倒風前自賦愁。

湯太夫人吟釵圖爲雨生都督題

古井無波，寒泉自潔，旃檀逆風，奇香愈烈。君不見湯太夫人，心比鐵玉釵，可分不可折，我讀吟釵圖，似嚼太白雪。憶昔鯨波起，鮫穴望夫山，阻海濤咽，摩挲頭上釵，飲恨心上血，男兒死事成大節，撫孤誓學女中傑。養成小鳳皇，傳家繼簪笏，樹欲靜兮風不甯，玉釵已斷傷兒心。贈從嫁日殷勤戴，寫向園中宛轉吟，三復吟釵圖，撲簌淚如綆，親恩欲報愧未能，閃閃青燈泣孤影，釵分釵斷知何恨，起居八座人爭羨，遙知傳唱繡弓衣，音徽歷歷披圖見，噫嘻虛此圖不朽，釵更堅，吉金樂石壽億年！

淑筠二妹于歸方氏逾兩月矣余時有石梁之行賦此以寄

同懷姊妹憐君小，癡點相兼尤窈窕，擇婿頻年未得人，掄才底事參軍少。東鄰有兒豪貴家，輕裘肥馬矜繁華，西鄰富賈倉穀朽，持籌握算爲天涯，爭遣冰人來問字，廉吏家無溫飽志，富貴浮雲不足誇，因緣自在何勞議，失恃盈盈未長成，迢遙官閣倚靈樁，傷心又抱終天恨，青眼誰憐掌上身，阿兄遠遊姊返室，朝夕相依心卽密，六載同譜冷暖情，一窗共惜春秋日，春鷓秋蟀易昏朝，蕙蘭含英色轉饒，君子有心求淑女，彩鸞應合待文簫，一朝邂逅傳雙鯉，伯氏故交名父子，親挽紅絲續斷絃，自投東閣通媒使，絲蘿欲締議經旬，生恐明珠棄暗塵，小弟登堂申信約，謂又邨阿婆遠衆主婚姻，良緣信是三生定，六禮家貧慚報稱，壓繡何辭午夜勞，添妝不惜傾囊贈，卜吉秋期百兩將，笙簧合奏朵雲翔，試看彩筆生花豔，已兆春風及第祥，螺痕深淺眉新掃，愁叶

琴和誇靜好，學禮新看鴻。案齊勤功代，聽雞聲早。好向
慈幃侍起居，于歸却與在家殊。未諳井臼慚賢婦，替試
羹湯無小姑。雁行一夕輕分袂，寒暖誰調仗夫婿。但祝
同心形影憐，更期努力簪纓繼。春花長豔月長圓，回首
閨中廿四年。問字牕前聞响屐，探梅閣外記隨肩。明知
不是天涯別，賦到日歸心轉切。我亦將辭白下山，扁舟
獨往衡風雪。歲暮天寒離緒紛，平安盼斷隔江雲。來年
陌上花開日，聯袖同遊再把君。

晚行石梁道中大雪迷失路徑僕人

皆驚相對無策，忽思古有老馬知

途之語，卽命驢前人後始得路，至

邨店宿時已三鼓作此以紀

天寒歲云暮，飢驅感離別。江北異江南，冰堅草枯
折。刮面風刀尖，駮手紋皴裂。亂山堆瓊瑤，恍入水晶窟。
溝渠逸不分，橋人迹滅。輿者防墜冰，舉足有羈絆。巡
行古塚旁，疑鬼弄狡譎。幼女驚呼號，童僕形僵絕。餓腸

鳴若雷，敝裘冷似鐵。俯仰中心悲，迷津誰指說？疲瘡幸
知途，踏凍蹄顛蹶。三更叩茅店，入門解腸結。炙衣炊霜
薪，禦寒沾麪蘖。感彼處深閨，錦幕重施列。酣歌酒千尊，
擊鉢宵吟徹。寧知道路難，長夜衝風雪。

消寒第四集同賦

尋梅

竹外橋頭輾轉思，東風消息尙遲遲。踏殘古徑雪
深處，吟到空山月上時。臨水啁啾聞翠羽，隔籬曲折見
疏枝。往來誰識高人迹，只有林邊野鶴知。

折梅

繞屋千株與萬株，難勝揀擇認模糊。不辭出手寒
逾峭，轉惜離根影太孤。風笛淒清翻怨曲，燈窗黯淡寫
新圖。山中春好摩挲嘆，欲寄相思驛使無。

問梅

底事啣霜凍玉斂？謫來孤嶼亦無塵。前身是否爲
明月？入世緣何抱古春。翠袖天寒應倚竹，紅羅香豔漫

驕人北枝原比南枝冷，爭怨東皇剪不勻。

畫梅

點筆春生處士家，託根幸不藉泥沙。橫斜繪影偏宜月，冷淡傳神也著花。紙帳幻來雲落窠，銀屏皴出玉杈桺。更誰幾瓣胭脂染，九九圖中燦若霞。

消寒第五集同賦

唐宮冰箸歌擬梅村體

沈沈魚鑰千門鎖，霓裳舞罷雲鬢禪。羯鼓催開頃刻花，瓊葩瑤蕊隨風墮。風狂凍合上林枝，清霰無聲點適遲。璇閣幾重垂羃歷，晶簾一桁挂參差。華奴冷簇纖纖指，嬌憨博得天顏喜。卯酒登同琥珀杯，辛盤薦共琉璃七。椒殿先疑晃素波，芙蓉帳外嫩寒多。相公漫進千秋鑑，天子新翻得寶歌。仙樂飄揚朝待宴，承恩並輦人爭羨。民幣軍儲不藉籌，昇平時久荒于倦。一朝鼙鼓動漁陽，失守瀟關虜勢猖。四野烽烟來警報，五更昏黑走倉皇。馬嵬坡外喧聲逼，誅錯爲名罪傾國。割愛匆匆謝

六軍，究竟君王非重色。盟誓如水見日消，粉痕泣露界雙條。明眉皓齒歸黃土，夜月梨花瀉冷潮。鳥道縈紆腸九折，哀猿啼處風淒瑟。詔傳靈武靖烟塵，收復神京重返蹕。南內歸來宿草生，權移事去可憐情。傷心秋雨淋鈴夜，猶似敲靖夏玉聲。

消寒第六集同賦

臥雪

積玉中山滿，高人樂自耽。柴門無剝啄，紙帳任沈酣。風緊號窗北，花飛凍硯南。蒼茫圖一幅，眠去好幽探。

聽雪

郭索疑行蟹，推簾看又無。聲如來玉宇，影似浸冰壺。掃徑書燈暗，敲篷客夢孤。寒江人罷釣，靜夜响荒蒲。

笑雪

枉卜豐年兆，甯知稼穡艱。如銀難濟世，聚米不成山。太覺寒溫判，都因厚薄間。未能作霖雨，奚似白雲閒。

淪雪

性愛餐甜味，呼童掃竹邊。空庭敲石火，深院曷茶烟。香共梅花嚼，清同柏葉煎。詩腸寒似水，得句快于仙。

消寒第七集分賦

博浪椎

六國滅嬴秦強，志復韓張子房。散盡資財募死士，一擊不中去鄉里。任爾天下大搜獲，不能得彈丸下邳。能隱匿，嗚呼力士椎，荆軻刀，祖龍凶暴皆幸逃，不待項羽一炬阿房焦，已見絕秦滅秦來趙高。

垓下歎

刁斗光寒星沈水，四面楚歌聲不止。丈夫末路竟如此，雄心猶復拔劍起。慷慨歌處兮，和舞啼痕多。大王意盡輕山河，賤妾生存奈若何？

牧羝曲

去日生人作死別，隴頭流水同嗚咽。水中照見征夫行，藁砧夢斷胡天月。胡天月黑鷓鴣啼，荒涼海岸陰雲迷。殫食酪漿渴不飲，穹廬毳帳風淒淒。臣嚙雪，臣牧

羝，臣節巍巍山岳齊。生妻去帷老母死，仗節歸來見天子。臣心依舊清如水，璧完馬齒如長矣。噫嘻乎，歸不食邑萬戶封列侯，李陵終爲沙漠留！

墜樓詞

不君滿斛珠，但惜一名花。金谷園中歌舞盛，珊瑚七尺矜豪華。何物孫秀利財色，心慕美人求不得。一朝禍起詔收崇，美人宛轉啼春風。已爲悅己容，當爲知己死。妾請以身報君子，樓頭紅濺胭脂水，花落無聲扶不起。

昌宗裘

六郎顏色比花研，羽衣跨鶴翩若仙。宮中效作貴魚寵，南衙不操阿衡權。一朝忤相意，相公視之如奴隸。直言面納，幸臣心底，和解無方賜局戲，名臣佞倖坐兩頭。金輪天子親典籌，勝敗須臾隨道長，御前褫去千金裘。臣有狄宰臣，侯無朱虛侯，懾服諸呂終安劉。想見太宗當年裼裘至，龍章日表驚無儔。手揮天戈定九州，生兒不幸如豚犬，刑化由來隨教淺。開元圖治無幾時，又

見楊家兄妹亂徵典。

消寒第八集分賦

面具

五色窮殊相，真形巧掩藏。顏難分喜怒，舌尙吐鋒芒。昏夜朱門乞，清時水閣妝。知君終有靦，暫假亦何妨。

鐵球

漫道供遊戲，渾緣鍛鍊成。發揚誇捷足，擲地笑無聲。稜角磨來盡，甌夷陷處平。只憑人力轉，空具骨錚錚。

初春有懷倉山諸姊妹

記誦江淹賦，河橋柳又新。年華隨逝水，身世感勞薪。憔悴風霜色，睽違手足親。南來無驛使，誰贈一枝春？爭怪世風薄，都因歉歲多。濃陰寒吐繭，久雨冷妨禾。意淡全忘酒，情孤欲廢歌。故人言笑隔，極目遡關河。

寄和黛華潤如四絕

惜別還歌行路難，北風獵獵雪漫漫。當筵一灑知音淚，古調從今不再彈。（憶別）冷炙殘羹自祭詩，清寒風味只如斯。縱然盼得春光轉，已是鐘鳴漏盡時。（除夕）利市占來說歲豐，屠蘇飲罷醉顏紅。滿堂士女知多少，若個真能度厄中。（元旦）燈光月色鬪嬋娟，令節家家廠玳筵。我獨閉門清似水，任他兒女祝團圓。（元宵）

春陰

漠漠冥冥晝可憐，作晴弄暝養花天。人疑中酒過三月，春似凝愁又一年。壓岫癡雲貪釀雨，幕庭香霧不成烟。綠章誰向通明乞，護取新紅曲檻邊。

閒中

解識閒中趣，渾忘歲月長。削蒲聊代筆，剪麥戲爲囊。滌硯承檐溜，翻書借穴光。晚來新浴罷，紈扇自招涼。

酷暑不寐

枯坐萬籟寂，僵如入定僧。獨吟不成寐，開軒苦鬱蒸。展簾石作床，映階螢爲燈。扇揮腕欲脫，炎颺良可憎。噬膚惡白鳥，止棘驅青蠅。畏月如畏日，凝霧疑凝冰。耳聞更鼓絕，漸覺微涼增。煩襟一時滌，凌風參上乘。

七夕寄懷王潤如姊

鵲橋今夜渡雲輶，銀漢迢迢玉露零。自是離愁担不盡，花前私誓那會聽？一夕相逢可奈何！相思朝暮隔銀河。姮娥獨處無離別，應笑雙星此會多。碧海紅塵百劫哀，幾人濃福稱清才？須知生小聰明誤，莫向天孫乞巧來。羅衣涼逼漏將殘，中酒心慵怯倚闌。料得月斜風靜候，有人一樣感睽鸞。

秋日寄淑筠妹

自別江干喚奈何！詩情酒思漸消磨。家如風絮搏來少；吉甫客都中受之錫堂在蘇淑儀于歸袁江師震裳王靜儀兩弟婦儀吉妹並下世。人似霜花落處多。馴鶴有心栖枳棘；

幽禽無分老松蘿。炎涼閱盡愁耽盡，一任年華委逝波。記從含淚送香車，不待重歌陌上花。江岸孤帆衝雪挂，園林好景入春賒。神仙眷是劉樊侶，閨闕門原王謝家。但祝平安脩竹報，森森玉樹長闌芽。片語傳來却可憐，一灣銀漢限情天。蕉心百折愁難展，蠟淚千行怨莫蠲。掩鏡怕窺人似玉，推簾偷拜月如弦。因何纔露團圓影，便咏班姬執扇篇。瓣香我欲證瞿曇，絮果還從靜鏡參。白璧未沈盟尚在，明珠已誤意何堪！十年失恃牢愁共，一載分襟別恨耽。惆悵秋風秋雨裏，心隨雁足到江南。

附和作

南浦春深感綠波，白門秋柳又婆娑。本無舊恨題紅葉，不遣新愁上翠蛾。粧閣重回花月冷，關河遙隔別情多。碧雲紅樹家山遠，莫更臨風唱懊歌。自悲風木不相離，淺煖輕寒賴護持。芍藥香酣停繡早，海棠春嬾卷簾遲。怕違儀範親教禮，爲惜愁癡更課詩。最是青鸞來報吉，累君心力盡斯時。于歸賦罷

聽雞鳴，碧玉險開鏡影明。當世聲華雲水潔，一家眷屬雪梅清。隔帷膺膊敲閒子，對案伊唔伴短檠。未必畫眉輸采筆，紅絲怎敢怨三生？不因憔悴感乘鸞，唯祝秋風振羽翰。烈日不妨花並蒂，閒雲終礙月團圓。茶烟滿院翻書嬾，雁影橫天寄怨難。但囑重回江上櫂，西窗剪燭話更闌。

接黛華大姊手書詩以慰之

秋氣肅平原，繁霜下庭樹。鑽燧已改火，倏又歲云暮。故人遺我書，眷眷遠懷顧。上言薪水憂，下言別離苦。山居絕塵囂，貧如抱沈痼。援手良醫無，惴惴日憂怖。季子敝衣裘，尙作登樓賦。屈蠖有伸時，豈被詩書誤？盛代重儒冠，濁世矜紈袴。臨淵莫羨魚，守株還待兔。年命委輕塵，榮華比朝露。緬懷毋相忘，心同金石固。

秋郊展墓

蔓草荒烟裏，蕭蕭孤壠寒。未成狐兔穴，已作荻蘆

灘。浪原卷頭白，霞烘嶺外丹。紙灰淒化蝶，鏡影感分鸞。載拜腸空斷，吞聲意更酸。人天今永隔，骨肉昔傷殘。却憐雙籬逝，應知百恨攢。零丁遺女弱，飄泊剩妻單。古道艱辛歷，浮家去住難。熱腸憑寄托，冷眼任相看。傲物才干忌，脩名志不彈。身非嗟乞食，世每起驚湍。溼血經年盡，捫心此夜安。真心松有節，枯誓井無瀾。雨雪推顏色，風霜鍛羽翰。只餘千點淚，洒向墓門乾。

落葉十首次何浣碧（佩玉）女史原韻

扁舟一棹別江邊，家在江南思渺然。玉露凋殘金粉地，西風吹老碧雲天。沈寥人並芙蓉晚，蕭瑟聲來蟋蟀先。莫更登樓愁望遠，平原漠漠卷荒烟。乍染霜華綠已稀，山空時逐亂雲飛。高人只許題爲句，上古虛傳製作衣。滿地黃堆遊獵罷，一肩紅壓晚樵歸。蕭疎極目堪惆悵，蒲柳荒寒草不肥。參到榮枯幾度驚，三春煙景那忘情。經秋怕譜哀蟬曲，入夜愁隨斷雁聲。飄墮豈

因和露重。翻飛轉得御風輕。無端爲作歸根計。蟻食蟲
書怨怎平。纔聞撼撼又蕭蕭。流水聲中度板橋。埜岸
卷風捲荻蓼。空庭戰雨敗芭蕉。山橫睡態猶容寫。霞洗
殘妝未易描。記得綠陰如海外。離魂曾爲黯然消。年
年搖落古牆陰。無復當窗黛色侵。寂寞憑誰書恨字。飄
零何處訴秋心。聲沈孤館留寒淺。人在重簾被酒深。轉
綠回黃遠素願。感來物候總蕭森。高下翻穰自舞風。
故林終戀漫投空。寒敲石砌痕無豔。冷逼燈窗暈不紅。
歸夢驚回砧杵外。吟魂攪碎井梧中。怒濤聲裏攤書坐。
人似荒原繫短篷。夕陽古道卷征沙。脫盡千林望眼
賒。淺沒山腰藏兔窟。疎籠屋角露漁家。韶光總有回春
令。枯木難開得意花。竹院風停如水靜。閒敲石火自烹
茶。洞庭波冷正紛紛。傾耳狂颿到處聞。鵲占高柯憑
露頂。藤欺老幹勢纏筋。早衰心似沾泥絮。不定身同出
岫雲。多少青衫憔悴客。天涯飄泊亦如君。白雲寺古
飛遙山。掃徑無人鶴守關。巖壑可依非隱退。干霄難上
自迴還。印穿屐齒留吟迹。點破苔衣補蘚斑。隨著寒波

流不盡。隔畦一道認彎環。湘簾卷處便生愁。幾片潛
飛入小樓。未必才人皆抱恨。縱非遷客亦悲秋。閒邀冷
月松間照。飽聽乾風石畔搜。尙有瓊林根本在。不須顧
影感疎稠。

題陶雲汀宮保印心石屋圖

衡岳鍾靈地。徵祥文運開。門清宗五柳。庭古蔭三
槐。報國雄才展。趨朝禁漏催。奎章親捧得。衣錦故鄉來。
重認傳經處。山圍水一泓。恩邀盤石重心印。楚江清。
瑞彩凝丹壁。祥雲接玉京。指南回斗柄。中有福星明。
又返湘江棹。昇平答盛時。潮聲喧鼓吹。樹影接旌旄。霖
雨民生望。陽春草木知。兩江重駐節。日月照無私。虛
懷傾海內。東閣每延賓。經濟千秋重。琴書四座春。他時
助舊傳。此日股肱臣。盛事徵圖畫。烟雲萬象新。

題同心並蒂蘭圖

英皇並駕涉湘江。澤畔行吟影亦雙。欲采蘭蕙香

夢遠一簾花氣夜開窗。空谷深居臭味同。珠聯璧合倚東風。幽人讓惜騷人賞，繪取春光入畫中。

挽淑筠妹

又悼荆枝折，堂三弟先四月下世。傷心涕淚漣。家門半中落，骨肉幾生全。運厄難逃劫，時違欲問天。豈真吾薄命，至誤爾良緣。玉是藍田種，絲由錦幔牽。于歸殊草草，遺恨更綿綿。花未栽連理，人原稱比肩。綵鸞空舞鏡，青鳥別銜牋。石闕甘緘默，冰紈怕棄捐。情如霜後菊，身是火中蓮。已下姑嫜拜，都誇婦道賢。羹湯諸食譜，燈火伴吟氈。堂上離歌促，江頭落日懸。烏私終眷戀，蟾影不團圓。憔悴眉凝力，淒涼淚洗鉛。書傳其雨怨，詩誦谷風篇。喜遂刀環願，方調琴瑟絃。結褵雖兩載，舉案未經年。纔詠回心院，旋翻長恨編。投懷徵玉燕，臥病泣秋蟬。藥裹妝臺畔，衣添繡榻邊。慈悲空禱佛，愴惻欲飛仙。囑姊腸如折，規夫意更煎。箕裘須克紹，襁褓要垂憐。漫感珠沈海，重求錦續弦。夢于今日醒，緣向再生聯。酸語吞猶

咽；癡魂斷不延。空房餘墜鳥，畫閣賸遺鈿。嗟我歸來晚，悲君化去先。一朝成永訣，萬悔莫懲愆。往事都陳迹，前因倍惘然。可憐心上血，只洒壠頭烟。

附絕命詩

認漫長眠作短眠，湯能續命莫回天。纏綿忍割三生愛，宛轉難忘兩載憐。鸞鏡重圓知有日，燕釵再合料無緣。悟來事事都成幻，辛苦人間廿六年。也會身入綺羅叢，敢道鍼神奪化工。壓綫每因誰刺鳳，畫眉枉說堵乘龍。陌頭春好愁難洗，鏡裏人歸曲又終。如此緣慳消不得，可憐塵夢太匆匆。絲兒魂斷不禁扶，月下重回事有無。信道浮生原縹緲，豈真返迹更模糊。枉拋心力難酬姊，欲盡劬勞更囑姑。寒要添衣飢擇食，床頭有子泣呱呱。早悲怙恃失晨昏，泉下追償烏哺恩。此後粧臺餘手澤，從今衾枕斷啼痕。鷗盟冷落羣難續，雁陣分飛夢不溫。他日青山埋瘦骨，淒風苦雨莫招魂。

乙未仲冬于揚州寓齋讀何浣碧女

史藕香館詩卽題四律于後並以

贈之

天付璇閨筆一枝，書來濃淡總相宜。清如鸞鶴吟
烟際；壯似蛟龍戰雨時。揮洒都成名士習，風華不諳女
郎詞。玉臺韻事人爭羨，福慧雙脩管仲姬。十年珠海
小勾留，蘭姊瓊姨共唱酬。月暈疏窗宵窈窕；花圍明鏡
曉梳頭。剪裁春織鮫人錦，泛溢潮回蠶女舟。脩到三生
如弄玉，謫居猶得住秦樓。聞說雲緝降彩鸞，于歸還
作掌珠看。綺羅自卸辭親易；井臼能操作婦難。頰到椒
花心悵惘，歌來渭水思瀾漫。畫眉人遠珊瑚凍，翠袖天
寒怯倚欄。文字交于識面先，謂有梅花落葉諸和作靈
山香火有前緣。烟花豈是來三月，珠玉分明落九天。臥
雪我真如野鶴，吟梅君恰稱癡仙。騷壇若許盟鷗鷺，願
插薔薇露共研。

白鴈四首用藕香館集中韻

敢把霜翎比鳳毛，玉關飛度閃弓刀。懷冰自擬心
清潔；犯雪何辭道路勞。影挾空江孤月墮，聲沈大漠萬
峯高。飄零人海如寒士，青眼誰憐敝縑袍。曉餐玉露
晚依霞，落拓關山未有家。橫塞秋痕清似水，倚樓人影
淡如花。零星已斷雲邊陣，歷亂難搏爪上沙。皎皎一繩
明鏡裏，輸他烏鵲傍橋牙。天涯同調孰憐君，野鷺閒
鷗每共羣。避燉疑霏天外雪，傳書如帶隴頭雲。飛臨秋
水神堪擬，栖入蘆花影不分。玉柱音哀休再鼓，夜庭涼
月照紛紛。凌空健翮總難摹，縞袂還同鶴駕驅。冒雨
相呼迷野岸，衝烟欲下映明湖。幾行淡粉皴來未，一點
秋情寫出無。辛苦年年霜滿背，心寒止水寄荒蒲。

題靈根上人僧歸夜船月圖

勘破滄桑幻，非乘萬里風。孤帆天地外，一鉢水雲
中。塔影撐霄漢，江聲浮太空。亂烟殘月裏，歸棹識生公。

戊戌孟冬熊芝霞夫人見訪適女病

危未及出晤夫人以詩集儀物見

遺而去感賦二律以謝

蓮輿忽訝降山中，聞說新來境亦同。皖水魂歸猿

鶴冷，巴山淚染杜鵑紅。夫人新婦，詩篇自是名家派，襟

抱咸推俠士風。多少青雲飛倦鶴，幾從世外訪孤鴻。

謝庭一面荷相憐，夫人乃熊蕪湖先生之女，壬申秋余謁先生時，

于齋中一晤，後夫人隨夫宦蜀，遂不復通音問焉。僕指于今廿五

年，惜別音容勞夢想，論交文字有因緣。人如籬菊經霜

淡，心比江梅耐雪堅。此後更添知己感，瓣香常奉玉臺

前。

哭女十首并題月廊香夢圖

風雪蒼茫裏，洩瀾兩淚揮。問兒何太忍，舍我竟安

歸？斷枕餘鵲血，空床賸蛻衣。爾生不識父，女為淨腹生。此

去轉相依。一自歌黃鵠，癡留待死身。豈無禽犢愛？況

是婦人仁。撫疾親調藥，加餐自爨薪。羽毛都不振，哺餵

枉艱辛。幼小常憐汝，離根作泛萍。春帆南北渡，雪驛

短長亭。已碎庭前玉，思留曙後星。依然餘子影，舊路怕

重經。猶憶垂髫日，嬉遊輟女紅。繙書時向月，擲笛愛

臨風。花豔簪常滿，粧新樣不同。玉臺空自下，回首惜匆

匆。女年十三，已字淮安蕭氏。少長能更事，愁絲似繭繁。熱

腸輕末俗，冷眼閱人情。有母依朝夕，無家鮮弟兄。傷心

椿蔭失，言念涕縱橫。為抱炎涼感，生悲骨肉離。長貧

歡笑減，多病暑寒欺。脩短原知數，因循敢怨醫。烈風偏

殺草，又是斷腸時。半載依床席，終朝伴藥爐。慰余猶

強飯，禱佛枉跣跣。調護心神瘁，相看淚眼枯。時籌身後

計，寒食紙錢無。囑母休為念，牽衣日幾回。未能酬罔

極，空自泣瓊瑰。埋骨家山遠，依人風木哀。死生歸不得，

銜恨到泉臺。撒手從今了，傷心十八年。聲猶疑在耳，

髮尙記披肩。忽忽形離影，淒淒夢化煙。覆巢無賸卵，何

術可回天。冷落蘅蕪徑，蕭疏宿草寒。碣封三尺短，土

掩一杯乾。夜月歸魂杏，春風繪影難。蕊宮消息在，榮落

太無端！余夢折海棠而生女，戊戌冬，復夢海棠一樹，風吹殆盡，女即于是月化去。

題汪晚芬夫人秋江送別圖即次原

韻

謝家道蘊綺羅身，石火光中證佛因。人可勝天傳本誤；才能妨命信原真。驚鴻影瘦窺蓉鏡，別鶴歌淒動麴塵。我悵緣慳遲失面，每臨秋水想丰神。心同冰雪冷難溫，倚竹蕭蕭日又昏。半壁蛩聲縈斷夢；一簾花影愴離魂。填平怨海愁無極，補到情天恨莫論。薄命有人尤較勝，兩行斑竹認啼痕。玉臺人去不勝愁，駒隙光陰小逗遛。思苦渾疑聲有淚，調高應惜唱無酬。角聲斷續和雲散，帆影模糊共雨收。添與年時行役感，西風日夕下羊牛。風笛聲中別淚潛，石城回首杳茫間。衰烟凍鎖江邊柳，殘月寒凝樹外山。明鏡孤鸞吟昔昔，篷牕小鳳誦關關。湘雲湘水增惆悵，輸與閒鷗自往還。

題師霞裳女史梅邊讀易圖

香雪堆前一卷持，吉祥占事象坤儀。玩辭恍入春風座，却是巡檐索笑時。春深金谷靜調琴，疏影橫斜鶴在陰。脩到清才濃福稱，如蘭臭味印同心。

題朱貞女頌伽禮佛圖

幽蘭摧風雨，貞松淩霜雪。罹憂雖不同，數奇無殊別。我賦黃鸝詞，展卷添悲咽。朱氏有三女，令嫺超儕列。淑慧睦昆季，婉順娛親側。擇婿如右軍，謂是雲中鶴。方期百兩迎，何圖比翼折。母兄祕不聞，一載情方泄。淚從此日枯，緣已今生絕。魂遠難追隨，心死腸猶烈。金石志彌堅，自勵共姜節。兄友母復慈，相依終歲月。身世證瞿曇，妝閣為禪窟。樹古抱冬心，藤枯斷繁結。妙諦覺金繩，元理參真訣。淨業了三生，清名傳不滅。

題唐孝女梅花仙館圖

不信梅花落，高堂夢境真。樓臺仙子宅，風雪藐姑神。擫笛沈哀響，披圖愴夙因。至今羅袖底，如見臂痕新。

送別阮淦亭廣文赴任潤州卽次其
留別江南士子原韻四首

三秋鷓鴣早蜚聲，兩晉傳家有令名。槐舍春風芹
泮雨，一時桃李遍江城。機聲軋軋和書聲，合室怡然
那計名？咏到翩翩蝴蝶句，有誰五字敵長城？一。載會
聞夜讀聲，同開絳帳敢齊名。嘉時亦于前都轉梁公寓齋課讀
女公子。耽吟我自慚家學，也向春風唱渭城。此去重
聽振鐸聲，幽探北固好題名。待看喬木鶯遷喜，來種江
南花滿城。

題張孟緹（摺英）夫人澹菊軒詩集

花骨裁成幼婦詞，清才想見澹于斯。鯉庭學授紉
鍼候，鴻案眉齊待漏時。搔首碧雲天未感，懷人春草夢
中詩。吳門烟柳燕臺月，吟瘦蘭閨筆一枝。

祝侯青甫（雲松）先生八十壽

湘痕閣詩稿 卷下

珠玉鑄成百壽篇，條桑時候養花天。筵開八秩圍
絲竹，名著千秋播管絃。上客稱觴皆後輩，佳兒扶杖正
英年。根香，圃名環勝，園名蓬萊境。著個詩人李謫仙。
歸畊豈為薄功名，為好樓居適性情。六代山於窗隙見，
四時春向筆尖生。林泉自結耆英社，鄉里常邀月旦評。
紙閣蘆簾凝望處，女星長傍歲星明。蒔花補竹賦閒
身，歲月渾忘作隱淪。詩酒陶融仙骨格，烟雲供養鶴精
神。清談揮塵時驚座，雅抱題襟慣買春。贏得奇文誇宅
相，杖朝還是杖鄉人。先生令甥梅伯謹為作壽序。老畫蛾
眉尚入時，貧猶好客性相宜。曾蒙倒屣迎王粲，謂家海
秋姪孫。見說通門許左思。謂竹畦兄山水愛翻新畫稿，風
花常撚舊吟髭。閨中慚和陽春曲，遙奏雲璈晉壽卮。

湘痕閣詞稿

東風齊著力

花朝倉山卽事與黛華潤如絮卿小芬儀吉諸

姊妹同賦

淡雨濃晴，輕寒淺燠，最惜今朝。東風著意，柳外畫
旛招。誰遣當筵翠袖歌喉，嘖一串珠拋。時有金袖珠兒戲
香等四校書在園名園好花羞頰暈，峯妬眉嬌。撲蝶鎮
相邀，莎徑裏過幾曲溪橋。二分春色，芳訊望迢迢。悄聽
雙鬢低祝背人處，紅玉頻澆。嶺山外一聲短竹，香雪爭
飄。

瑤池燕

題車子尊姊丈玉台春影圖

雙棲安穩簾櫳靜，不信絮零花落成陣。湘波映，和

錢塘袁嘉柔吉

香帶粉春脚定。別春魂，添與春恨；寄春訊，呢喃訴向
誰聽？春難問，巢泥舊印重憑認。

踏莎行

春暮

燕翦裁紅，鶯梭織綺，困人天氣重門閉。閒愁未許
上眉彎，低徊又省當年事。鸞鏡慵窺，雀屏捲倚，沈沈
犀押簾垂地。漫將心事訴東風，東風不管春憔悴。

祝英臺近

惜花與黛華紫卿同作

燦雲霞，堆錦綉，春色十分滿。蝶倦蜂癡，香護一簾
暖。生憎銀竹宵沈，遮留無計，早又見落紅零亂。意何
限，憐伊半面粧殘，倦凭曲欄畔。惆悵東君底事去難返。

醉花賸有金樽，背人低祝，盼來歲蕊宮重豔。

摸魚子

青溪春泛

趁新晴，蘭橈買得，載將三兩鷗侶。豔陽春好同尋徧，幾曲柳汀花隴。凝望處，指一角蒼茫綠列江南樹。逡巡小住，問長板橋頭，誰歌桃葉？雙槳晚來渡。初弦夜，月子彎環如許，有人眉樣爭妬。羊燈影浸波心靚，冒起層層宵霧。聽俊語，道吹袂風輕，漫逐歸潮去。那時重聚，待團扇招涼，藕花香裏，細認舊遊路。

清平樂

山居

綠陰圍抱，結箇茅廬小。僻徑幽深塵不到，合伴竹爐茶竈。山巒雲氣霏微，飄來冷翠沾衣。鎮日閒情吟嘯，此中人已忘機。

瑤臺第一層

湘痕閣詞稿

登江光一綫閣

輕扣禪關穿曲徑，登臨入翠微。石欄凭暖，竹筇支冷，望眼迷離。亂山重疊處，擁黛螺一綫，江圍片帆穩。嘆浮瀛身世名利生機。誰知有人閒眺，感今弔古，獨依依。三春煙雨，樓臺縹緲，花草芳菲。六朝餘勝迹，半付與蘭若緇衣。悵歸時，已低封暮靄，遠挂斜暉。

欄干萬里心

春閨

輕寒料峭雨連纖，一縷春愁似水添。瘦到腰圍亦自嫌，意懨懨，滿院飛花不捲簾。

如夢令

午睡

壓枕衫痕江皺，春困濃如中酒。無夢到遼西，又被鶯兒輕咒。長晝長晝，難遣落花時候。

喝火令

三九

寄懷汪瓊芝蘭似兩姊

風撼鶯兒夢，香酣鳳子魂。獨來花底立，黃昏。回憶
十年前事，何處證蘭因？社已消陰澤，襟猶澆酒痕。歡
場易散怕重論，一樣園林，一樣可憐，春一樣海裳陰裏，
不是舊時人！

五福降中天

壽汪紫珊姑丈

玳筵開處星躔朗，梧桐閨年堪紀。雲自無心，春原
有脚，真箇隱還兼仕。偷聲減字，聽柳膩秦酥，玉田新製，
文酒風流，江南江北豔傾耳。荷香吹滿衣袖，正園開
綠淨，觴泛紅醴。鶴算頻輸，蚌珠看孕，慶溢金張門第。莊
椿蔭起，憶生小萱暉，一枝曾寄。悵隔江天，有人歌燕喜。

木蘭花慢

倉山尋秋與雲根各填一解

繞琅玕深處，牽翠袖，整明璫。早衰柳沈雲，枯荷洗

露，寒到銀塘。鴛鴦綠波夢穩，怕分飛冷了白萍鄉。貪向
湘欄凭處，鐘聲催送斜陽。思量往事最難忘，水閣記
傳觴。惜花頰殷紅，山眉紺碧，豔襯霞裳。流光又驚警眼，
驀西風吹遍井梧霜。惆悵鴻來燕去，教人閱盡炎涼。

慶春澤

送別小芬妹坤于歸洛中

雁陣寒催，楓林影瘦，南枝漸醒梅魂。見說行期，當
筵紅玉備傾，低徊猶記垂髫事，慣相將醉月呼雲。睹聰
明，詠絮分題，促柱擗筳。河陽警眼春回處，恰落燈風
裏，簾暖笙清。雙倚鴛帷，黛螺新染眉痕，好憑青鳥傳芳
訊，料還應憶我伶俜。盼何時一角家山，重證離情。

南歌子

對雪

玉屑霏鴛鴦，銀光燦綉帷。疎枚破萼冷香吹，時有
啾啾翠羽一雙飛。團絮雕瓊佩，裁冰製麗詞，消寒底

用畫胭脂自嚼梅花和雪沁詩脾。

黃金縷

新柳

陌上春回纔幾許，抹雨和烟，掩冉愁千縷。一角紅
縷簾捲處，有人偷效新眉嫵。欲起還眠芳草渡，容易
成陰，莫恨流光誤。殘月曉風添別緒，絲絲不綰歸橈住。

買陂塘

春波

甚封姨者般裁剪，穀紋拋散千疊？分明綠淨渾難
唾，皺出豔陽天色。青鏡拭，照兩點眉峯，翠蹙雙蛾窄。新
愁似織，恁霞綺暗烘，日華暖熨，翠皺幾曾釋。彈指處，
逝水年光可惜，一痕春蕩吟魄。關心舊日盟鷗侶，南浦
又傷離別。經歲隔，算鷓詠匆匆，過了重三節，遊蹤待覓。
怕桃葉乘潮，紫花掠燕人擁渡江楫。

虞美人

湘痕閣詞稿

冰雲閣納涼

垂楊深護三層閣，入試羅衣薄。鴛鴦眠穩小銀塘，
葉底花間消受水雲涼。鉛刀雪藕絲縈織，笑挽同心
結。珠窗雙倚指嫦娥，爲問青天碧海夜如何？

金縷曲

悼亡

淚灑秋風裏，化連枝他生未卜，此生已矣！怨海難
填天莫補，造物弄人何意！問可是才遭天忌，劇使釵分
憐薄命，嘆伶仃兒女今誰恃？家四壁，食煩旨！淒涼事
怕從前記，任消殘，花紅鈿翠，脂香粉膩。一自鏡鸞悲獨
舞，雲鬢飛蓬慵理，只贏得朱顏憔悴。錦瑟年華隨逝水，
剩青鐙壁月孤帷倚。金石矢，柏舟誓。

摸魚兒

余自庚寅悼亡後不拈長短句已五載矣乙酉
歲隨侍家大人於安平署中憶當時春影鳳泊鸞飄

感此際秋風蓉愁蕙泣旅情暗觸鄉思彌深爰歌長調以抒中悃

度樓頭一聲歸雁，西風先遞寒信。明霞催染楓林，
豔，砧杵滿城淒緊。重九近，試插遍茱萸，籬菊迎霜潤，袖
沾香冷。恁瘦不禁秋，愁偏泥酒，扶醉踏莎徑。鄉心起，
目斷烟波弄暝，雙魚消息無準。憶從蘭棹江干別，添了
幾多新恨。臨玉鏡，問獨舞吟鸞，可是年時影？慵窺青鬢，
記門茗繙書，買春琢句，往事已難省。

唐多令

雨夜不寐

支枕亂愁并，廉纖靜夜聽，響空塔點滴分明。一樣
芭蕉秋戰雨，渾不似故園聲。塵夢苦難醒，勞勞度此
生。濕寒衾淚已成冰，剩有歸心隨斷雁，飄泊處又無憑。

清平樂

庭竹數竿爲雪所折感而倚此

竿竿清立，獨抱凌雲節。雪壓風欺禁不得，莫謂此
君腰折。當年豔刻琅玕，而今塵冷檀欒。翠袖天寒愁
倚，空教淚染斑斑。

定風波

正月初六日送別藍穎生表姊南歸

凍合江干咽不流，迷漫風雪送歸舟。柱說還鄉仍
作客，淒絕飄零，一樣等浮瀛。願祝朝來雙槳疾，人日，
直隨飛夢度邗溝。待抵故園逢綵伴，吟款，爲言添得別
離愁。

湘春夜月

水仙與璞泉弟和俞四香明經原倡

認婷婷謫來姑射仙人，絕似素韞凌波，全不染纖
塵。合併瑣窗清影，奈瑣窗岑寂，莫遣眉顰。見粉痕泫暈，
冰心醞釀，都是消魂。空遊醉國，吟殘楚月，夢斷湘雲。
貯向晶盤，惟結箇素梅爲友，同綻初春。香侵翠袖倚畫

簾，凄冷黃昏者，護怕惜飛瓊已香，瑤臺縹緲，難證前因！

東風齊著力

紙鷲與璞泉弟分咏

香暝遮花，烟疏兜絮，恰趁晴春。憑誰借力，陌上踏青人，爲倩東風著意吹噓處，莫墜紅塵。垂楊外，影低貼水，聲勁粘雲。細骨翦湘筠，裁雪繭，纖毫淺抹濃皴。一絲軟曳，界破碧天痕。那是干霄直上，臨空際，黯黯消魂。清明過，飄零莫定，恨倚斜曛。

浣溪沙

天桃綻碧稚柳褪黃觸緒牽愁拈毫弄墨用寫幽懷敢云惆悵

輕暖輕寒試薄棉，釀花時節困人天，閒情未許到眉邊。玉笛擲殘紅杏雨，瓊簫吹破綠楊烟，可憐春色自年年。

高陽臺

湘痕閣詞稿

春雨連綿綠窗孤寂根觸舊歡彌增新感拈筆倚此并寄倉山諸姊妹

瀾柳拖青，煙蕪暈碧，滴殘疎雨清明。春到江南，紅簫吹暖香鴛。藥欄花檻知無恙，記當時、帶酒同凭。忒淒清，散了歡場，冷了詩盟。年來領略酸辛味，賸啼痕澆袖，燈影搖青。心似冰蠶，絲絲不斷愁縈。幽懷欲遣吟情減，只宜人一枕餘醒。恁膏騰夢也難溫，醉也難醒。

菩薩蠻

沽酒獨酌鄉思頓縈停杯濡墨按譜依聲卽寄玉魚弟婦爲詢故園風景

眉痕減翠紅欺面，芳樽自倒無人勸。小院靜簾櫳，吹殘信花風。迢遙雲水隔，緘恨鸞箋擘。爲問故園春，枝頭到幾分？

憶秦娥

夜泊露筋祠

歸舟急，春江月墮催停泊。催停泊，輕橈繫處，柳絲籠碧。靈旗風捲芳魂滅，荒涼古廟留遺迹。留遺迹，空餘流水，爲誰嗚咽？

高陽臺

舟過邗江借淑筠管淑儀兩妹同遊湖上用

玉田生韻

仙閣停雲，虹橋流影，東風催送蘭船。聯張同遊，尋芳還似當年。游絲不罥飛花住，任飄茵墮溷堪憐。黯淒然。春去蕪城，一碧如烟。鄉柔水軟消魂地，問伊誰落魄也效樊川。根觸新愁，我來買醉吟邊。蓬窗低撫吹橫竹，向波心喚醒龍眠。隔重簾，金縷歌殘，人怕聞鶯。

相月

題車子尊姊丈捧花樓圖

天花捧出，認霏霏紅雨，銖衣香遠。鏡影空明波影靜，未許纖塵輕染。咒出金蓮，參來柳絮，三月春深淺。冰

蠶絲褪，那番還織情繭。回首樓上梨雲，玉台人杳，只剩窺簾燕。我幸倉山隣共賞，雅製爭傳蘭畹。蝶夢惺忪，螺痕彷彿，往事和烟散。重尋林下，鳳簫猶有吟伴。

鬢雲鬆令

悄垂簾，粧未整。怕覩鴛孤，掩却團圓影。怯暖憎寒，衣帶褪，不爲悲秋也。恁秋來病，雁聲酸，風力緊。落葉如潮，並作淒涼境。薄睡未成，愁壓枕。淚滴紅蕤，回首梨雲冷。

虞美人

月當頭夜醉中倚此

去年今夜他鄉月，病酒兼傷別。今年又見月團圓，贏得今宵身在故鄉看。人生幾度逢今夕，莫問陰晴缺。茫茫合向醉中過，自把一樽清酒醉嫦娥。

臨江仙

丁亥三月，偶檢玉檀樂室遺稿，見摸魚子一闋，前半殘缺，不能後識。末云：「添別恨，轉輸與牛衣對泣。人相並，愁生潘鬢，怕玉鏡台前，歸來重照，不似舊時影。」蓋已卯回石梁時寄余之作也。嗚呼！遺澤猶存，芳徽已杳，雲隨風散，海豈石填。憶朱絃之變調，才忌君多，慨翠袖之中分，命憐我薄。招魂愧屈，誌怨輸班。夢醒春夜，心傷啼月之鵲，愁觸秋宵，書斷叫雲之雁。詞成四闋，淚下千絲。

記得江干催買棹，幾番欲去還留。亂山圍合凍雲流，敵裘親代補，絮語倚香篝。道是清寒無奈別，遠遊不爲封侯。時有洛川之行可憐生小那知愁，風塵渾未慣，花月念難酬。

又

記得青鸞傳恨字，已輸花底鷓鴣。傷春傷別一身兼，沈腰看瘦減，潘鬢怕愁添。待到歸期過上巳，羅衣有淚偷沾。藥爐烟裏靜垂簾，風懷渾不似，寫韻筆慵拈。

又

記得幽窗扶病起，喃喃同話心期。香寒玉瘦怯難支，釵花紅一點，腸斷五更時。剩有柔魂消未盡，春蠶不斷情絲。鸞刀小試總成癡，忍教分比翼，天道竟無知。

又

記得釵分悲永別，經年硯匣塵封。而今重展淚花濃，傷心留斷句，鈴印未消紅。玉鏡台前餘獨影，梨雲夢斷無蹤。新舊恨壓眉峯，茫茫泉路杳，何處盼鱗鴻。

高陽臺

少蘭弟以倉山憶舊圖寄題與黛華姊同賦用

玉田生韻

屋角紅稀，欄腰綠倦，幾番冷了航船。慘不成歡，今年又是明年。鵝籐省識前遊在，數前遊數也生憐。賸冷然，萬箇琅玕，款住秋烟。過來多少淒涼事，早心寒止

水，夢冷澄川。絮絮花花，一般交付誰邊？戀人只有當時月，向倉山肯照殘眠。亞垂簾，生怕招他，恨鴉啼鶻。

浪淘沙

感舊

絮語憶零星，半未分明，韶光已悔等閒輕，啼盡鶻紅春去也，直恁愁縈。短夢忒無憑，那管飄零，但留情在證他生。只恐他生緣又斷，此恨難平。

念奴嬌

暮春偶成

輕寒輕暖，又冥濛作弄，釀花天氣。別有幽懷非中酒，可奈困人如醉。一縷情柔，三生夢淺，不問華年逝。春光何限，等閒都付流水。應惜燕妬鶯噴，啄殘紅蕙，護少金鈴繫。參到禪機原是幻，那管風淒雨細。絮已沾泥，絲偏織繭，難斷悲涼意。綿綿長恨，問天天也知未。

琵琶仙

舟泊棠江小東門外，夜聞隔岸琵琶聲冷冷然，似潯陽風景，起視星河弄影，明月在天，不禁有司馬青衫之感，爰扣舷而歌，時漏已三下矣。

雙槳乘潮，鎮無奈一紙書來催別，憫南浦春陰，花飛有誰惜？楊柳岸孤舟自繫，更何處四絃輕撥？冷咽流泉，珠跳急雨，人正愁切。本非是司馬青衫，怎聽到飄零淚痕濕，勞爾素心，低訴似潯陽風月，憐此際蓬窗獨撫，對玉蟾也感斯夕，最是淪落天涯，古今淒絕。

滿江紅

中秋感懷

小謫紅塵，早又是中秋佳節。問怎忍蛾眉遺忌，也同詞客。三尺吳鉤酬壯志，五車書史供歌泣。嘆人間無地可容身，乾坤窄。胸頭事，那堪說。天邊月，曾相識。欲乘鸞歸去，瓊樓瑤闕。碧海茫茫驚夢墮，寒煙漠漠和愁織。聽荒城斷雁叫西風，鄉心切。

洞仙歌

題洪蓉生夫人秋蓉攬鏡遺照

新妝綽約，却湘欄閒凭。照水娟娟自憐影。看眉雕
瓊葉，鬢縮仙雲，明鏡裏，豔與霜華相並。塵寰經小謫，
惆悵將難，噩夢無端驗窺井。紫玉已成煙，遺恨潘郎，算
十載秋懷吹冷。嘆莫向情天證蘭因，賸墜粉零香，畫圖
重認。

綺羅香

題紅袖添香夜讀書圖

綠蠟凝煙，青梧浥露，翠鎖新涼庭院。若許幽情，靜
夜有人攤卷。瑤階畔，蛩和吟寒，晶簾外，月扶花倩。數更
番，玉漏頻催，琳琅披拂，不知倦。金猊犀甲欲燼，纖手
拈來，悄爇煙痕縈篆。心字燒殘，雲裊鳳釵低顫。迴瘦影
兩鬢堆鴉，溜橫波一泓明剪。問疏狂，醉寫烏絲，可如修
史豔。

臺城路

湘痕閣詞稿

題秋林仕女圖

冰綃繪出蕭疎景，披圖便生秋意。霞綺晴烘，霜華
豔炙，點染楓林如醉。題隨流水，恁錦字難緘，淒涼情味。
踏碎苔痕，小鬢低語玉釵墜。伶俜嬌影自惜，慕西風
荏苒，吹殘吟思。翠袖單寒，朱顏寂寞，禁得幾多憔悴。消
魂似此，認瑤島飛仙，墮臨世塵。待喚真真，步虛聲欲至。

醉花陰

偕淑筠淑儀兩妹坐荷亭納涼

嫩綠陰濃參遠岫，無事消長晝。帶酒倦繙書，薄醉
臨風，紅藕香吹透。纖纖眉月窺人瘦，又晚涼時候。小
恁曲欄干，數點流螢，飛墮輕羅袖。

蝶戀花

新月

楊柳梢頭花徑裏，一霎窺人，却又忽忽避。生怕留
連雲吹作去聲起，峨眉從古招謠忌。有恨無愁空自

擬，淺露彎環，誰識分明意？枉祝團圓，變酬再世，情癡偷拜珠簾底。

金縷曲

追悼

百念都灰盡，歷名場一番領略，一番悲哽。爲語當時，就血性，非是吾真太忍。到此際，淒涼方省。事與心違，語世味，道年來縈斷柔腸寸。冰共雪，憑人論。微吟薄醉，甘隨分，又何曾曉窗夜月，自傷形影。縹緲蓬萊歸未得，祇剩淚珠交迸。渾不爲香消夢冷。渺渺孤鴻，風露裏，嘆寒枝檢盡，棲無定。飄泊處，有誰問。

唐多令

蘆花

慣送往來舟，風生瑟瑟秋。傍荒灘影共江流。一片冷雲低欲護，棲不定，有沙鷗。渾似柳綿柔，吹殘紅蓼洲。嘆年華逝水難留。最是情多頭易白，擔盡了別離愁。

洞仙歌

竹畦二兄招同黛華潤如兩姊吉甫少蘭諸弟
讌集沁香山館看牡丹卽席分賦

錦帷初捲，認瑤臺仙格，淺碧輕紅釀春色。看晴霞散綺，茜雪霏香，香沁處，圍住憨蜂嬌蝶。年來分雁影，此夕相招，綠蜩休辭醉芳國。彩筆倚新詞，同擘蠻箋，且莫問啼鶻聲急。試喚取姮娥，伴清樽，願歲歲花前，照人無缺。

南歌子

春日病起

寒怯衣稜峭，眉嫌鏡影濃，病餘落絮不禁風。爲倩游絲，宛轉罨花紅。泥酒心猶怯，攀芳事已空，梨花深院靜，簾櫳，又是一年春負雨聲中。

鷓鴣踏枝

次紫卿姊春日見懷原韻

薄暮新寒生料峭，睡思惺騰，却被狸奴惱。流水又隨春去了，柳綿飛盡鶯聲老。一縷愁絲如篆裊，寄語靈禽，莫向枝頭噪。小院深沈人靜悄，拈來紅豆難成調。

附原作

怯試春衫寒尚峭，細雨斜風，不管鶯花惱。上巳清明都過了，杜鵑聲裏韶光老。寂寂重簾香篆裊，乍喜新晴，靈鵲穿花噪。宿酒醒來情悄悄，綠窗自譜穿雲調。

慶春澤

題趙野航廣文秋雨懷人圖

邀鶴雲閒，款鷗夢冷，西風吹散朋簪。待不思量，可因芳訊浮沈，却憐幾葉芭蕉雨，作淒涼响和疎砧。一聲聲，那管人愁，滴碎秋心。消魂記取天涯別，恨河橋柳暗，隔浦春深。嚼蕊吹花，等閒妨了清吟。憑誰莫唱瀟瀟曲，恁離情強半難禁。證香盟，剪燭何時，同話塵襟。

月華清

再題夜月懷人圖

瓊露零煙，銀華瀉影，一輪圓滿如昔。散了歡場，祇照離人幽咽。濯水壺寒，鎖珠魂暈，皓彩光凝。瑤魄聲急。正疎林風度，亂飛殘葉。那更悲秋惜別，早瘦減青衫，倚樓岑寂。橘綠橙黃，盼斷江南歸客。待商量，他日棠檉怕冷，落舊時花月。相憶倩荆關寫出，畫圖清絕。

壺中天

少蘭弟招同人讌集柳谷賞牡丹，醉後坐雙湖亭，共話疇昔，暖風欺面，涼翠撲衣，月色波光爭耀，如置身於冰壺中，爰各譜一解以紀之。

柳陰深處，正招來綵伴，杯浮香蠟。十載孤吟開眺慣，樂聚今番何似。月門清華，花凝富貴，人醉東風裏。紅酣綠豔，夜涼濃露沾袂。年時悵隔關山，雁傳天末，不盡相思竟。此夕團圓，冰鏡下，六曲迴欄同倚。酒懣愁麈，

雲驅幻夢，共話滄桑事。鷓鴣絃淒斷，按聲猶譜瑤思。

沁園春

花魂

是耶非耶？萬綠園中，珊瑚自憐。怎錦囊纔貯，便如
倩女，芳胎乍蛻，已作游仙？著露仍離，籠陰似化，月夜猶
應落舞筵。何堪問，只優曇現後，綺夢都蠲。絲牽解語
纏綿，又幾片潛消欲證禪。怪春喧小院，蜂粘幻影，香迷
曲徑，蝶抱成煙。石上三生，枝頭一霎，淒斷微雲淡雨天。
傷情甚，恁珠旛招徧，難駐華年。

前調

絮影

非雪非花，疑有疑無，斜陽淡嫩。正漫天搖漾，春迷
短夢。隨風飄蕩，香糝柔魂。搓不成團，散原是幻，入硯沾
泥認未真。雙堤畔，怪昏黃月墮，斂了輕痕。紛紜亂撲
湘紋，似鏡裏盈盈紛淚勻。又飛臨池面，游魚唼誤，吹來

欄角，舞燕啣頻。玉霧浮沈，珠塵落漠，遮亂離亭欲化雲。
悠颺態，剩一分流水，空處傳神。

賀新涼

隨園消夏與竹畦起二兄少蘭祖嘉小邨祖憲
兩弟黛華潤如紫卿姊分賦得鶴橋步月

薄醉邀吟伴，度溪橋鶴遮徑仄，步隨堤轉。翠袖同
牽苔蘚滑，欲倩柳扶花款。慚捲起，姮娥雲幔。璧玉奩開
冰鏡吐鍊，霜痕雪魄凝寒淺。良夜靜，月華滿。銀塘潑
灑霞光燦，蕩吹來荷香一縷，塵襟如浣。水國紅肥人影
瘦，不耐露纖風軟。更悄把羅衣添換。遠遍欄杆捫遍竹，
鎮清遊忘倦歸都懶。應惜取，漏聲短。

齊天樂

雙湖垂釣

園林雨歇山痕鎖，煙波盪搖無際。紅顛風荷，青拖
露柳，圍住雙湖亭子。炎飈盡洗，乍欄曲閒凭，香輪親理。

玉尺爭跳一絲纒，墜又浮起。如參禪意竟日，鎮忘機。顧影牽惹離思。仙舳鉤來，金鱗剖處，中有故人書未斜。陽散綺，正雪藕冰桃，嫩涼生袂。膾細如銀，玉壺同買醉。

斷縷曲

嘔血戲占

湧花出蓮舌，驀猜疑九霄咳唾，霏成紅雪。噉玉懷冰寒不沁，肝胆生來原熱，是半世胸頭凝結。舉目蒼涼無處洒，看星星點點沾襟濕。還較比，淚痕赤。羅浮縹緲尋仙跡，怨天公未容蝶化，偏教磨折。冷雨敲窗魂又返，也似短檠明滅，只聽奴傍人相惜。說道虛名今古累，甚嘔心奇句邀人識。塵寰夢，轉輪掣。

沁園春

對鏡

圓冰之中，似是疑非，端相欲驚。恁兩眉恨鎖，潛消蛾絲，雙鬢愁擁，暗換雅青。水剪瞳寒，花搏頰豔，昔日憐

湘痕閣詞稿

伊此日憎。傷憔悴問今吾故我，誰駐眞形。晶瑩枉自通靈，只難卜團圓，變過一生。嘆憑人幻象，隨悲隨喜，泥人癡坐如醉如醒。簾捲春風，奩開秋月，獨舞吟鸞感不勝。重磨拭，照瑕疵無愧，心共澄清。

滿江紅

庚寅仲秋病歸石梁倚此留別倉山諸姊妹

歲歲分襟，問怎似今番淒切。更一樣長堤衰柳，那堪攀折。囑語原無腸暗轉，離杯未飲聲先咽。心最傷回首望庭帷，音容絕。遮不斷，秋山色。消不盡，胸頭血。悔頻年肝胆，濫因人熱。散盡黃金空買怨，歌殘白雪眞成別。嘆依淒兩地，摠難憑，呼天說。

又

病骨慙慙，禁不起閒愁千疊。況又值新秋天氣，亂蟬哀咽。聽水聽風原歷慣，乍驟暖寒心猶怯。問柔腸底事苦牽縈，非關別。衣上淚，都沾濕。胸中恨，難消滅。奈

江鄉此去，幽思凝結；鏡裏花嬌，悲幻影，風前絮弱飛無力。恐歸來已化杜鵑魂，空啼血。

摸魚子

題程禹山虞卿先生水濱閑舫詞

譜新聲，暗香疏影，清空高格。誰似薔薇，研露緘懷抱，不數柳酥秦膩。傳勝事，道筆鬪春風，豔絕江南地。歌狂劍倚，看酒暈紅，嫩襟痕碧唾。花月澹吟醉，非非想想，好句曾聞姓字。事載本集。當時憐我猶穉，今來聞說坡仙老，減却綺情豪氣。諳世味，只作客年年，栽遍閒桃李。功名逝水，愛舫外雲深，鷗邊夢穩，歸臥故山翠。

沁園春

嬌

中酒懨懨，綉幔深遮，猶憎峭風。似昭陽舜罷，纖腰婀娜，華清睡起，倦眠惺忪。粉倩嬈敷眉，羞郎畫，繾綣偏多。厭箇儂，臨粧鏡，悵隔簾偷眼，芍藥煙籠。裁紅刻翠

都慵，怎小病無端，玉釧鬆。鎮薰香閒坐，蘭吹怯煖，當窗悄立，花氣嫌穠。半晌含顰，幾回斂笑，不耐人嘲頰暈烘。歌喉嚙，比鶯調簧脆，一串珠同。

前調

愁

生小瓊閨，不解閑愁，嬉遊慣尋。記烏圓抱得，棋翻殘局，雪衣教處，經誦多心。宛轉依人，聰明弄舌，聽到關雎也學吟。相嘲急，凭紅絨爛嚼，唾面難禁。停鍼悄曳羅襟，祇愛捉迷藏，避綠陰。更風廊搓手，戲搏飛絮，月欄劃影，笑摘橫簪。清宴猜花，良宵射覆，醉灣星眸酒泥斟。看傾後，尙喃喃再再，嚶語更深。

前調

癡

說夢生涯，賣去重來，依依肯離。慣爐香留得，看煙縈篆，巒雲閣住，遲雨成絲。倦蝶酣春，游蜂粘絮，花落花

開總不知猜疑甚，指鴛鴦翡翠，底事雙飛？
難齊，有半點兼時癖，可醫道狂由恨積，就書非計愁因。
愛結，化石何辭待補情天，多牽緞網，信是聰明百未宜。
拋紅豆，怪柔魂消盡，還種相思。

前調

妬

風味如梅，箇裏參來，深情可憐。是絲牽一縷，猜生
意外，恨縈千種，夢在誰邊？未許卿卿，豈容爾爾？厭聽星
能替月圓。歲蕤鎖，恐尋芳曲院，泥酒歌筵。花前私約
傳箋，道難覓，鷓鴣欲問天。嘆空梁泥落，才猶遭忌，斛珠
怨賦，色自爭妍。眉語潛通，眼波暗遮，噴到人間並蒂蓮。
天桃豔，怕悄凭欄角，又逗纏綿。

黃陂塘

送少蘭大弟入都。

憶河陽碧雲迢遞，琴尊芳譜銷歇。歸來小踐烟霞

湘痕閣詞稿

約，買醉共吟花月。旋賦別，嘆辛苦營巢，依舊成虛說。魚
書剗切，指半角倉山，三椽竹屋，依住慰孤子。庚寅余歸天
長，卜宅未就，弟作書見招，以倉山之側間屋數間借居焉。纔連快，忍
聽鷓鴣催發，匆匆重踏霜雪。荆枝一樣同根蒂，一樣離
懷淒絕。嗟我拙，縱飼鶴無糧，未肯從人乞。消寒社結，算
幾日迎年，團欒守歲，話遠感佳節。

慶春澤

又次少蘭弟留別原韻。

絲管飛花，風搏落葉，歡場似月常圓。選韻分題，梅
邊鶴伴雲間。無端又聽楓亭笛，看長河落日孤懸。料征
車欲發還淳，別緒綿綿。干霄直上從今始，願春暉永
駐，鴻案齊眉，衣錦他時。家山料理，咄煙者番莫作飢驅
感，看衝寒重踏幽燕。慰離情小聚天涯，棣萼新聯。又郭
弟時亦作都。

鎖窗寒

五三

消寒第三集，分賦得寒魚。

玉溪烘晴，珠跳破涼。一江風峭。孤舟雪裏，幾度悞他閒釣。鷓鴣疑鷗，窺拳冷香藉，護無蘋藻。也自安洄。嫩，依沿嘯沫，竟忘寒潦。休道煙波好，怪二月春潮，等閒過了。橋陰聚影，那料蘆荒秋老，甚牽躑躅窩荇絲，素書盼斷冰下少。只供人換酒霜天，夜話漁燈小。

南歌子

大雪行瓦梁道中。

身是風前絮，家如雨後萍，塵心勘破別離輕。銀海蒼茫，何處認歸程？路轉遙山失，車迴曲岸平，衝寒莫怨踏層冰。馬滑霜濃，天外有人行。

清平樂

寄懷淑筠二妹。

衝寒犯雪，底事輕離別？撲面冰花風凜冽，冷了肝腸難熱。六年心曲同商，而今雁影分行。寄語畫眉窗

下，要從時樣梳粧。

摸魚兒

答竹畦二兄見懷之作，並次原韻。

灑離筵淚珠紅，澹酸心非為傷別。翻瀾時事如棋局，袖手那爭殘劫。悲更咽，看弱女零丁也共衝風雪，行路折。有玉屑迎頭，瓊髮剗地，人凍欲僵絕。飢驅感慘綠年華飄忽，愁絲如繭縈結。關情細數分襟後，月影幾回圓缺。歸思切，嘆露苦煙辛，杜宇空啼血。金輪咒徹，只選韻嘲花，分籌賭酒，耳向隔江熱。

慶春澤

題湯雨生都督十二古琴書屋填詞圖。

玉潤鳴泉，寒湍漱石，冷泠古調誰彈？竹隔梅窗，人跨眷屬神仙。數來花信風過半，拂冰絃流水高山。看悠然，香島重簾，韻繞迴欄。將軍甲帳談兵懶，似閒雲出岫，鳥倦知還。築屋江南，天教重主吟壇。蘇豪柳賦含宮

微寫烏絲爭刻琅玕。和應難白。新聲唱徧雙鬟。

摸魚子

琴

撫冰絃賞音人去，橫陳三尺塵滿。垂簾聲悄，銷蘭
炷，是否綠陰眠懶。岩石畔，聽古調冷冷逗松風。轉幽
篁坐晚。又曲澗跳珠，飛湍瀉玉，清籟遏霄漢。房中奏，
靜好年時都幻，新來誰識桐鬢？歸心縈斷瀟湘雨，一曳
一絲淒惋。宮羽換，悵落拓天涯，書劍常爲伴。情孤海岸，
看鶴舞煙霏，龍吟月黑，汨汨水雲亂。

前調

棋

響丁丁誰生何處？空山流水相應。神仙遊戲樵柯
爛，剖橘幻如塵境。消晝永，恰冰簟疏簾，萬个琅玕映。閒
情羨茗，有體賦方圓，聲傳膈膊，人在隔帷聽。沈思際，
似佛低眉形凝，機來籌算無剩。心平輸與從傍者，黑白

滿盤窺定。良夜靜，更玉子敲殘，紅顛蘭缸影。參差不整。
又別墅秋深，幽窗雨黯，黃葉一枰吟。

前調

書

做鍾王墨池濃瀋，危峯崩石幽峭。便娟妍婉夫人
格，綵筆共爭華耀。君莫笑，笑小技雕蟲，枉自矜纖巧。韶
光負了。只篆刻青螭，文磨碧蠹，空記姓名好。搜蝌蚪，
印雪猶留鴻爪，懸針垂露都渺。芭蕉添種臨摹處，座有
綠雲圍繞。深院悄，又貝葉繙殘，一縷茶烟裊。尋來古道，
剩雨蝕雷轟，霜摧日炙，斷碣沒芳草。

前調

畫

恁淋漓潑潑來殘墨，冰綃疑冪輕霧。峯巒重疊，泉流
曲，怪石老松幽古。林壑趣，問若箇支筇，獨立蒼茫處。紅
妍綠嫵，倩妙手吹枯，靈機織綿，更莫點蠅誤。蕭疎景

寫出寒汀煙渚，明湖添著拳鷺。
玳來濃豔如春釀，應有柳噴花妬。
工絢素，是繞徧迴欄，清曉妍薇露。
傳神獨步，只心上秋痕，眉邊謎語，未許綵毫譜。

疏影

題車子尊姊丈家在江南黃葉邨圖，并次原韻。
憶迴短櫂，認故林烟景，三月春好。
可奈西風，髡柳凋梧，曲逕冷和塵掃。
秋人未慣天涯苦，更不料天涯秋早。
甚無端，慘綠年華，暗地被霜催老。
聽說蒹蘆味美，倚樓正望遠，波鏡愁照。
雁影初涵，一剪吳淞，隨著鄉心流到。
柴門靜掩斜陽裏，黛華姊時倉山之側。怪鏤翠裁紅都少。
劇關情，乾鵲為傳，歸信聲聲迎噪。

如此江山

題姚邗生文明府雲山洗眼圖

徧傳樂府金荃製，名壇雅傾元白。
鵝管吹香，螺杯泛玉，錦瑟華年消得。
流光過隙，更出岫雲間，卷舒無迹。

放眼蒼茫，一峯青削倚天直。
晴波搖漾弄影，映烟鬢瀉翠，涼霧如滴。
練淨疑揩，霞明欲浣，倦看春紅秋碧。
南來捧檄，恁六代江山，又供遊屐。
滌盡塵襟，醉吟還似昔。

南柯子

寒月入窗，愁不成寐，偶拈短調二闕，以寄黛華。
潤如兩姊。時於梁都轉夫人寓齋課讀，華琳涵清四女公子。

霜冷凌蟾鏡，香寒損蝶衣，等閒減了舊腰肢。
不分烟波，鷗夢有涼時，聲撼瑤琤玉，情牽宛轉絲。
待拈紅豆譜相思，又恐窺簾，鸚鵡笑人癡。

南鄉子

妨了綉功夫，來校娜嬛祕字書。
欲織靈機絲繞亂珍珠，曲曲穿成不似初。
人悄夜窗虛，風颭花魂月倩扶。
一種閒愁拚訴與模糊，徧到相逢語又無。

祝英臺近

題畫扇——蝴蝶花

雨抽苗烟垢甲，春色幾分吐。草綠南園，應記舊遊路。怪他一夜東風，柔魂吹醒，向香國踟躕還舞。更看取，有人曉鏡凝粧，纔簪又疑悞。顫上釵頭，栩栩欲飛去。生憐濕粉猶粘，難留幻影，倩珊瑚管摹臨紈素。

洞仙歌

荷包牡丹

胭脂染出，認瑤臺仙品。數朵零星綴春影，是風絲織就煙縷穿成，承綵露，結箇同心相贈。羣芳探祕譜，怎字文無三調清平，剪雲錦。搖曳曲欄前，樓翠裁紅同一樣。天香飄徑待覓，取秋荷製爲裳，試紐比湘蘭，佩來纔稱。

清平樂

題沈友竹維瓊公子獨坐幽篁裏圖。

風篁戛玉，萬个凝煙綠。幾日貓頭看未足，咒得濃

湘痕閣詞稿

陰如幄。濕衣涼露冷冷，窺人月轉分明。料理湘絃譜出，四山都作秋聲。

金縷曲

壬寅仲秋，小住石梁，黛華姊以詞見寄，倚此代柬，並以慰之。

片紙傳天外，痛分襟，又悲鏡破，歡場難再。昔日飛觴行樂處，今作愁城怨海，只血淚縱橫偷洒。靜掩柴門無剝啄，閱浮雲幻盡炎涼態。貧與病，一身載。歌離屢夢知誰解，悞聰明，輸他大地，兒癡女駭。便祝生生情不斷，漫向蒲團膜拜，把瑤想瓊思都戒。畫荻和丸勤教子，看古來賢母留名在。酸辛境，要禁耐。

又

我亦傷心者，怎忘情，高歌痛飲，人前聊且縱是啣泥無殼哺，一樣鸞孤鵠寡。況別有愁腸難寫，作達僅供塵眼白，道嘲花咒竹真瀟灑。任來去，片帆挂。玉臺枉

五七

自傳佳話，恁纏綿眉齊目比，良緣都假。石火風輪驚夢覺，說甚愛河難捨。喚不轉春光去也。淚滴成冰珠作字，托雙魚不到黃泉下。生死恨，只空惹。

鷓鴣天

孟冬二日，至南鄉展外子墓，雨阻而返，悵然以紀。

夢想音容不再逢，西風蕭瑟唳哀鴻。淚零蔓草荒烟裏，目極寒雲冷霧中。尋曲徑，碧苔封，一林雨氣濕濛濛。如何咫尺松楸路，也似蓬山隔萬重。

雨中花

癸卯寒食，同人宴集海棠花下，分賦得此。

吹遍番風青到柳，釀輕寒禁烟時候。薄日晴烘，微雲淡養，簾外一枝紅透。結伴月廊閒，煮酒，腸迴處，淚痕濕袖。待乞春陰難圓，幻夢不抱綠章重奏。亡女有月，鄭

香夢圖。

序

自余先大父有三妹合稿之刻，迄余姊妹輩，無不樂習爲詩，而其中雄于才者，首推伯姊瑤華。姊性慧，幼承先君子教，習詩兼習長短句，長更肆力于古，而詩詞遂以大成。近姊夫吳伯鈞優姊詩詞各一卷，將付梓人，寄以示余。噫！與吾姊別二十餘年矣，憶庚子歲，余西走蜀，姊偕伯鈞亦相繼東走閩。凡夫山水之奇險，風雨冰霜之勞苦，宦途世路之崎嶇，余習嘗之，姊亦習見之，其發之爲詩詞之妙也，亦固其宜。惟回思兒時，坐隨園雙湖亭上，邀姊同三五弟妹，掬月弄花，徵歌賭酒，此景此情，如彩雲影散，杳不可覓。而堂姊柔吉殉金陵，仲兄小村亦死節上海，吾姊又睽隔數千里，不知相見於何日？死生聚散之感，其能已乎！所慰者，姊于歸後，家道日隆，諸子俱得功名，克自樹立，今雖隨官異鄉，而白頭偕老，夫婦唱喁之樂，有遠過于奉嘉徐淑者，益知女子有才無福之說，爲不足信矣。至姊詩詞得力之處，識者自辨之，何待余之贅言哉！——咸豐乙卯冬月弟祖惠謹識于西蜀雲陽署中之西齋。

胡序

在昔湘蘋采苕之歌，詠絮銘椒之什，白雪桃花之祝，明珠柳葉之詞，靡不攝秀紅閨，擷華彤管，豈獨鮑家小妹，香茗裁篇，隋苑相如，紅箋琢句，瑤華主人，生長詩書，夙耽翰墨，珊瑚架筆，不畫烟螺，玳瑁裝函，喜臨春蚓，青燈落葉，以分而不倦披吟，黛管生花，粧罷而時勤揮灑，家擅學林，代授伏生之業，人遊藝圃，端齊左氏之才。僕生長隨園，備聆芳懿，雖楮內之言，不傳其篇什，而閨中之秀，夙仰其才華，及歸於伯英司馬也，瑤華靜好，繡閣嫵嫺，秦

嘉徐淑詩篇，增沈儷之歡，清無明誠吟管，益倡隨之樂。雖復搢瑤，繫蘭，恪止蘋藻，佳兒伴讀，燈下哦月露之詞；健婦持豕，林下率烟霞之性，望夫君兮天末，緘札親裁；吟淑女於花前，組訓不廢，迄乎浦江，載渡，閩嶠偕行，紺荔紅蕉，益潤銀毫之色，仙霞香雪，爭芬坵管之華，篇帙尤多，吟哦更富。凡夫未豔，豔香之秀，江花謝草之英，羚羊香象之奇，瓔月裁雲之雋，無不鏘洋在口，組織因心，號作者以何慙，雖專門有不及。今當劖劖，遠屬弁言，僕十載睽遠，一官坎壈，巖邊羽檄，盡日勞形，故國青山，不堪回首，憶金初翠燭之場，杳如昨夢，念竹馬鳩車之歲，同侍吟壇，用誌前塵，敢辭不敏，嗟夫，胡笳拍苦，雜佩歌遙，紅袖工愁，綠衣善怨，澧蘭沉芷，風淒嬰女之砧，綠竹清湘，月冷皇娥之瑟，歌成紈扇之詩，每題秋恨，織就璇璣之字，半寫春愁，遂疑女子多才，生常薄命，竟似名流不遇，詩可窮人，豈知遇並才豐，慶緣善積，齡逾花甲，福備林壬，登之梨棗，無慚女誠之篇，鏤以苕華，大變閨愁之例，愚表弟胡元博謹序——咸豐八年書於武陵運署

簪雲閣詩詞集序

天將牖其人，以成一家之名，非第特有學問也，必先與以過人之聰明，而後有過人之才調，詩詞其最著也，是以名家難求，名家於閨秀之中尤難，予嘗持此說以質之伯鈞表弟，亦以爲然，伯鈞深於此者也，予自辛亥之春，罷官居榕城，與同社諸君閒爲文酒之會，伯鈞公暇必與焉，酬唱之餘，縱談古今詩詞，諸名家議論多吻合，因出其德配袁安人簪雲閣詩詞藁見示，屬商訂而爲之敘，蓋安人爲袁簡齋先生之女孫，蘭邨先生之長女也，簡齋先生高才博學，一代宗工，所著小倉山房集海內珍如拱璧，蘭邨先生聰穎特達，世其家聲，所著捧月樓詞，予嘗誦之，其綺麗綽逸，較之南宋諸家，有過之無不及，安人賦性穎異，髫稚時讀祖父詩，輒怡然意開，卽能寄託韻

事研究倚聲之學。蓋得於過庭之教深矣。予昔遊京師，與安人仲弟小邨大令晨夕過從，試館聯牀，挑燈話舊，側聞安人同懷弟妹，多工吟詠，攜囊扣鉢，殆無虛日。而所居小倉山房，園亭清逸，花木暢盛，四時之樂不同。曉暮恣其玩賞，維時簡齋先生早歸道山，蘭邨先生方啓陳芳之國，主騷雅之境，曹倉鄴架，卷軸紛披，孔尊郇廚，裙屐咸集。然則安人居遊有林泉之美，披覽多匱石之書，而又萃四方名下麗句清詞，供其考鏡，用能探源於風雅，博依乎載籍，寫至情以眞摯，寄逸響於清華，聞小邨之言，益知安人詩詞之所造，亦遭際有以成之也。今觀其集中懷古感時諸作，沈著痛快，無閨閣氣習，卽尋常贈答詩，亦不憚推敲，而務期研鍊，杜陵所謂律細於老，不其然歟。至其尋聲按拍，造語清腴，比之白石屯田，何多讓焉。亟屬伯鈞付諸剞劂，俾戚黨中先覩爲快。又豈僅淑德嫺行，堪爲女宗哉。然則吾謂有過人之才調，必先有過人之聰明，不特於閨秀中罕見之，卽於名家中亦罕見之也。豈虛語哉。謹爲之序，而歸之金陵夏愷序。

師祁自咸豐八年，宰臨汾，迎奉吾母由閩來晉，公餘嘗請以母所詠詩詞付梓。吾母訓曰：「汝承乏衝要，當盡心民事，期信友獲上，毋亟此。況我詩詞，皆性情觸發，意到筆隨，少時作無存者，中年草藁散失亦多，今老矣，親友四散，無復與致爲此。且語且不自信，恐貽當代知者譏。」屢請屢止。然師祁曾侍先君子，誦吾母稿曰：「胎息騷選，出入經史，不愧女宗。」顧謂師祁弟兄他日有餘貲，亟應鑄板，以傳家乘，兼誌汝母慧且賢，逮事重慈，敦親睦族，教子承家，無似爾祖。蘭園詩草至今無存，爲一生恨事。嗚呼！先君子言猶在耳。師祁等敢忘前訓，今因請於吾母，謹編詩二卷，詞一卷，付刻適兄師祁弟師曾各以參校鈔本寄晉，值四妹謹儀歸甯，因相與校刊。惟師祁讀書不多，未諳體例，擬請大雅方家閱訂，並賜序弁之卷首，另裝成帙焉。同治六年嘉平月金陵吳師祁謹誌於榆次官廨。

壽序

易曰：「家人有嚴君焉，父母之謂也。」嚴也者，正家之要。然父過於嚴，恐違子輿氏責善之誠，故嚴必繼以慈。母道本慈，寓嚴於慈，而後正位乎內，家人所以利女貞也。金陵袁太宜人，爲隨園先生袁公孫女，前福建南平知縣吳伯鏞先生正室。嚴以正家，以母道兼父道，年七十矣。哲嗣子選大令，於今春設悅之辰，述其母教，屬序於和。以平日登堂拜母，在子姪之列，敢以不文辭。夫周以前，婦職之克傳者，多以德。秦漢以後，多以節與才，而最著者，莫如相夫子成令名，以及其賢子孫，爲人子者，能以其母之賢爲母壽，則其所以壽者大。方伯鏞先生之由太學生工舉子業也，屢不得志於有司，海內巨公，儀其聲望，倒屣投轄，爭自禮羅，常不家食焉。故家政全資內助。太宜人于歸時，年十九，賢淑之聲，溢於里巷。令祖蘭園先生謝世家，計蕭條，其時祖姑江太宜人，姑鄭太宜人，皆在堂。太宜人主中饋，侍養必豐，故能得重闈歡，內外無間。迨重闈棄養，事事皆中典禮，向平婚嫁，次第施行，至今鄉人稱爲巾幗丈夫，洵無愧焉。吳氏爲洞庭山著姓，遷徙金陵，以大令起家，自蘭園先生，由拔萃官廣東陽江縣，伯鏞先生由內廷騰錄，官福建南平縣，子白大令，以附監生，官直隸盧龍縣，子選以名孝廉，大挑分發山西，今官榆次縣。季弟子沂，以縣丞需次閩疆，子白令嗣，候選鹽場，祖孫父子兄弟，濟美一門，代承清白。是以太宜人恆正色訓諸子曰：「余非望爾等祿養也，但勉爲循吏，無忝於廉吏子孫，於願足矣。」和與哲嗣子白，締交京師，與子選同官山右，知之最深。現同膺赤緊，論者皆稱爲善地，謂其物產之美也，賦額之多也，戶口之庶也，置郵之便也，然而物產美則徵求衆，賦額多置則簿書積，戶口庶則訟獄滋，置郵便則奔走折節，應給不暇，兩大令奉政宣化，肆應裕如，知其稟承母教也，有由來矣。太宜人生長隨園，家世工詩，尤嗜讀史，著有瑤華閣詩詞各二卷，其中讀

史誌異居多。因思江左靈秀，間鍾於閩關，邗江楊德基以讀李白詩傳，桐城張令儀以蠶窗詩集傳。太宜人屏去風雲月露之章，而以詩代史，間嘗觀古今得失，發爲歌詠，皆可被之管絃。生平性至孝，子選之迎養於晉也，太宜人由閩南北來，繞道滬瀆，省視慈親。汪太淑人，值道梗，由乍浦航海而東，中流忽遇颶風，見巨魚勢若吞舟，舟幾於覆，忽於波濤震驚中，聞撲鼻檀香，颶風乃息，得以化險爲平。蓋孝之格於神明若此。居恆最儉約，而好施予，嘗脫簪珥，合藥以濟人所存活者甚多。其就養山西，由平河再遷省官，每日除禮佛外，舍飴弄孫，和以見諸孫頭角嶢嶢，讀書識字，讓棗推梨。江夏黃童，抑何早慧，諸婦善伺起居，希旨承顏，亦都能稱太宜人意。子選年逾強仕，出告反面，仍謹幼儀，皆太宜人之嚴訓致之也。今春三月，設帨之辰，獻壽者實繁有徒，有觥有壺，有爵有觚，或贖或膳，溢於庭除。子婦拜於前，諸孫拜於後，乘龍承鳳，羅拜於旁，太宜人其欣欣然進一觴乎？和於是揚鱣進而祝曰：「坤厚載物，其德無疆。積善之家，必有餘慶。太宜人儉以持己，敬以事上，慈以待下，數十年如一日，而又持家之正，教子之嚴，三子之各得一官，潔己愛民，爭自樹立，以慰太宜人也。若此，則以今日之康強，卜他日之耄耋，繩繩翼翼，綿綿延延，將見子伯昆季，騰達於朝廷，諸孫蟬聯于科第，爲善不期報，乃分之宜，而爲善無不報，乃理之常，天之福我太宜人，正未有艾也。」和故謹述之，以誌鄉里之光榮，而祝岡陵之景慶云爾。——同治三年甲子三月，愚姪汪和拜序。

瑤華閣詩草

錢塘 袁綬 紫卿著

偶成

紫藤香豔蕙蘭清，一樣芳馨兩樣分。却怨水流焚
不得，羅衣欲換倩花熏。

春日飲花下

俯仰境各殊，所貴適吾意。芳辰報花開，就飲忍辭
醉。一盃助歡欣，一盃澆磊塊。借問種花者，此意何人會？

游雞籠山懷古

瓊樹歌殘壁月遙，閒尋故碣認南朝。草埋晉井臙
脂冷，蘿繞荒亭雉兔驕。湖鏡幾窺紅粉倩，山眉猶學黛
蛾嬌。臨春結綺知何處，潮落空江恨未消。

其二

瑤華閣詩草

依舊秦淮繞郭流，珍珠河轉接荒邱。千村萬戶環
雲脚；疊嶂層巒擁石頭。複道記曾迴玉輦，臺城可更護
金甌。我來冥弔斜陽裏，烟靄倉茫起暮愁。

水仙花

瘦影珊瑚種玉盤，幽香一縷臭如蘭。空階冷透梅
花雪，羅襪凌波獨耐寒。

春宵不寐聽侍女彈箏

攤書就燈下，漏盡不忍眠。中庭悄無人，明月空嬋
娟。花上露華溼，屋角星河懸。侍兒解人意，纖指調冰絃。
一彈春鶯語，再彈陌上桑。側耳萬籟寂，明月生輝光。行
雲何繾綣，餘韻猶悠揚。掩卷淡忘言，幽花吹清香。

送春

一道綠陰濃，春歸細雨中。鴨頭新漲碧，燕嘴落花紅。曲徑苔侵檻，深庭絮舞風。啼鴉無賴甚，催去太匆匆。

詠史

亡虜歸來思報復，臥薪嘗膽是英雄。五湖一棹烟波闊，如此功臣竟善終。四皓安劉非助呂，戚姬空自淚縱橫。若教如意爲天子，未必能如孝惠明。壯髮初離宮女腹，綠絲收去使人疑。當時庸主昏難及，自殺嬌兒媚寵姬。餘蔭成功何足羨，汾陽七子有誰賢。一軍盡甲存何意，驕語還爭貴主前。

將進酒

登離筵，初進酒，車麟麟，在門守。紅日近，長安遙，行復行，心旌搖。車麟麟，出門走，丈夫志，忍回首。夕陽沈兮萬山暮，車麟麟兮去何處。望碧雲兮長相思，天一方兮知不知。

西隣女

西鄰有好女，問年纔十七。水波凝風神，冰玉琢肌骨。芙蓉裁衣裳，珊瑚盛妝飾。十一誦經史，十二學紡織。十三解吟詠，詩成擬金石。十四慕蘭亭，刻劃簪花格。十五十六餘，桃李羞顏色。飄飄御仙風，皎皎照秋月。十七正盈盈，門庭媒媼集。阿母從旁言，誰是乘龍客。不求儀輿貌，不爭縑與帛。願得同心人，生作鴛鴦匹。媒媼笑搖首，道此誠難必。不見東鄰女，芳華越三十。

春醒

落梅天氣雨初晴，往事尋思別恨生。怪底簾衣慵不卷，綠窗人正倦春醒。

擬古

東風吹暖江南草，萋萋綠上長安道。長安游子幾時還，江南紅顏鏡中老。流光如水春悠悠，還記年時送遠遊。金勒未離芳草岸，玉懷先上木蘭舟。帆光人影遙相隔，難憑青鳥傳消息。一樣園林花亂紅，如何愁損花

顏色黃昏最怕雨聲。桐院蕉陰夜色沈，驚回紫塞三更夢，滴碎紅闌一寸心。鴨爐香燼蓮籌迴，鐙暈圓紅搖瘦影。春寒惻惻透羅衣，把卷低徊嫌夜永。問郎何時錦衣還，富貴容易離別難。不看江上青青竹，猶帶湘妃淚點斑。

觀採蓮

日暮歌聲起，前溪正採蓮。渡頭逢浣女，相與問華年。

捲簾

纖纖微露畫樓頭，一桁蝦鬚上玉鉤。鏡裏春紅全面現，屏間山翠兩眉浮。軟風過處香難護，素月明時影欲流。雙燕未歸深院靜，亂蟬聲歇斷雲收。

移榻

一卷桃笙妥貼橫，商量何處愜幽情。碧梧陰裏涼

初覺紅藕香中夢亦清。當戶莫嫌風料峭，臨池却愛水迴瀾。良宵欹枕閒吟際，不掃香塵對月明。

雪藕

午夢惺忪睡起初，解醒真個勝醍醐。千絲宛轉情難斷；一握玲瓏玉不殊。璧處最宜纖指爪，拈來剛稱雪肌膚。幾回未忍銀刀試，笑問伊人腕似無？

浮瓜

清泉綠沁泛波時，赤李冰桃總遜伊。能使熱腸涼似雪；可知風味美於飴。圓浮水面疑荷蓋，渴解中宵勝荔枝。記得晚來新浴罷，金盤捧出碧琉璃。

接家書

感時兼憶舊，半載別愁侵。去歲書同展，今宵酒獨斟。落花游子意，明月故人心。爲問長安客，春來思淺深。

春日偶作

竟夕廉纖雨，春寒傍晚加。溼雲堆屋角，乾鵲噪簷牙。綠潤蕉抽葉，紅蘇杏著花。樓高塵事遠，別夢透天涯。

題獨坐幽篁裏圖

修篁拂晴嵐，暗泉咽淒响。冷洽夕露滋，靄靄春雲蕩。停琴獨延佇，吟嘯恣幽賞。小坐展苔茵，襟懷自蕭爽。奚奴抱綠綺，含睇若欣仰。林深無俗喧，境僻起遐想。空外裊餘音，涼陰月初上。

聞雁

霜華如水浸庭陰，根觸哀音感不禁。似坐吳船聽夜櫓，慣催越女急宵砧。香寒紙帳三更夢，秋老關河萬里心。可有尺書從北寄，起看涼月滿遙岑。

明樂安公主玉印圖

樂安公主光宗女，身出天潢貴無比。勅書下降選才人，都尉翩翩似蕭史。簫合秦樓琴瑟歡，金蓮燭下任

人看。天錢撒帳春如海，玉女乘鸞佳遇難。金枝生小耿文翰，異書賜出憑珍玩。錦軸牙籤萬卷橫，簪花格妙詞章絢。小印玲瓏玉色融，雲雷紋細篆來工。畫眉窗下攤書坐，素手親鈐一顆紅。百年佳耦人爭羨，雙修福慧神仙眷。不識人間兒女愁，那知世上滄桑變。罡風忽起委瓊花，一夕瑤清返鈿車。彩雲易向秋空散，都尉神傷髮欲華。總帷虛掩人何處，長簾空牀愁日暮。想像音容入夢難，禪心已逐空花悟。一朝流寇犯神京，九廟煙塵帝主驚。鼎湖龍去乾坤破，獨木難支大廈傾。精忠都尉肝腸裂，媧皇難補金甌缺。兒女親看縛柱焚，冠裳書畫從灰滅。揭天聲鼓震京師，國破家亡恨莫支。身留一劍酬君德，名播千秋答主知。九原相見應含笑，報國捐軀臣節耀。不愧天嫺有幾人，成佛生天還逆料。此印流傳二百年，閨房雅尚想從前。可憐玉石無情物，不管興亡色皎然。

秋夕感懷

涼颯動羅幕，落葉下銀牀。淒淒烏夜啼，皎皎蟾生光。下階急砧杵，冷露沾我裳。舉頭望河漢，牛女隔紅牆。修到神仙儔，尙感參與商。碧城渺何處，青鳥方迴翔。所思不相見，極目秋茫茫。

元宵寄外十韻

自君之出矣，春又返江干。一歲流光速，三秋別淚乾。團圓慶今夕，燈火憶長安。旅館朋簪盍，深閨倩影單。添香嫌漏永，把卷覺宵寒。風景他鄉異，人情兩地難。慎言敦友誼，努力博親歡。月桂期君折，泥金遲我看。姓名題雁塔，離思散眉端。畫錦還鄉里，萊衣膝下寬。

銷寒第二集

宴雪得冬字

東皇工剪水，一白失羣峯。花傍瑤台落，人疑月殿逢。移春還借酒，誤曉不聞鐘。極宴娛今夕，離情感去冬。

催梅得寒字

似被嚴威勒，南枝凍蕊攢。暖宜煨楮柸，斜欲倚琅玕。恨不迎陽植，難教帶雪看。玉妃如有意，可肯一衝寒。

倉山月夜

空山無人寒月明，銀河瑟瑟懸長庚。林疎葉落紅塔燈，萬籟俱寂聞鐘聲。登樓放眼渺無際，烟樹微茫寫秋意。一繩新雁遙天來，可爲離心傳錦字。

九月十六夜夢中得勒住輕寒瘦杏花一句覺後甚奇之因足成一絕

鎮日簾垂水竹斜，樓高何處近喧譁。春陰不散東風軟，勒住輕寒瘦杏花。

長相思

春生茗盃清香浮，二三綵伴話舊遊。爐烟一縷篆心字，菊屏影瘦蘭缸秋。垂髫還記貪嬉戲，嬌憨不識愁難洗。紅酣綠醉海棠陰，一枕春醒扶不起。當時風景依

然在，祇是尊前人事改。誰知此會亦不長，明年此日天一方！天一方，君不知，春蠶結雙繭，織盡千萬絲。恨無長房縮地術，頻年空詠長相思。長相思，在天末，倒瀉銀河酒杯窄，推簾試問夜如何？月冷霜寒墮黃葉。

瓶

曾依仙子貯還丹，小調紅塵質尙完。汲處淺深衡水易；插來宜稱選花難。量寬似爾能容物，膽小於君亦耐寒。清供吟窗添雅玩，愛聽吉語說平安。

爐

著手能回頃刻春，熱中誰信最憐貧？縕袍煖煖娛寒士，翠袖生香悅美人。煮酒論文圍月夜，焙茶撥火詠花辰。溫存不藉陽和力，供養烟雲自在身。

鏡

蟠龍舞鳳貴如何？懸向高堂閱歷多。皎若涼蟾能

寫照；澄如秋水不生波。半生肝膽君應識；一樣光明我未磨。遮莫妍媸總無語，任他花影自婆娑。

扇

新裁紈素奪蟾光，祇掩嬌羞不掩香。出匣能驅三伏熱；入懷休怯九秋涼。苔陰撲蝶春光媚；水榭兜螢露草香。傲世儘誇風骨冷，桃花誰寫寄情長。

冬夜

六曲屏山懶獨凭，西風颯颯雁聲聲。博山香燼不成寐，殘雪映窗如月明。

銷寒第六集分得小樂府

金谷聚

四時多佳日，行樂各有宜。傾觴勿惜醉，良會非常

期。

大道曲

遠。誰云直如絃？未若九折阪。道險或回車，平陽去漸

有所思

有美如浮雲，亭亭離西北。相思天一方，可望不可

卽。

子夜變

郎心愁未知，郎情猶不薄。喜郎今日歸，不忘去時

約。

玉階怨

斜睇西南月，娟娟伴人愁。繩河耿遙夜，底要隔牽

牛。

烏夜啼

五更殘月明，烏啼驚欲曙。雙棲戀故巢，語郎勿彈

去

企喻歌

幽蘭生空谷，含英揚清芬。思爲君子佩，朝夕結

勤。

作蠶絲

春蠶欲作繭，營營縈繞早。懷絲幾時完，纏綿直到

老。

九月初三卽事

謝庭小集數觥籌，桂子香飄一徑幽。曲沼無蘋花
弄影；長空如水月懸鉤。怕聽蟋蟀聲中怨，難寫鴛鴦心
上愁。知否重陽期早近，題糕簪菊勝春游。

養蠶曲

雞鳴喔喔女兒起，起視蠶桑燈影裏。一重綠葉萬
蠶眠，蜿蜒而吐絲纏縣。今春喜說蠶成熟，不向三姑夜

深卜。結成芳繭忘辛勞，銀鐙煖出手自繅。月中皎若冰
絲白，千絲萬絲機中織，織成鴛鴦錦，匹匹加顏色，爲君
裁作襦。君無寒，冷妾心，娛爲君，裁作被，覆君溫，煖妾心。
慰妾思，君君不知，請君但看襦上絲。妾望君，君未曉，請
君但看襦上鳥。他生不願作神仙，愿化鸚鵡西海老。

秋夕

溼雲吹不散，深院嫩涼生。繞砌蟲吟急，當樓雁字
橫。微風撼桐影，疎雨助秋聲。夜靜人無寐，誰家笛韻清。

木芙蓉

匝岸沿堤錦綉鋪，隔年辛苦種千株。拒霜細染紅
深淺，照水遙憐翠有無。月底窺痕疑菊瘦，風前比韻笑
萸纍。清華漫道真無匹，倩女亭亭勝粉奴。

七夕感懷

良宵慵自倚鍼樓，涼逼桃笙水國秋。怪底天孫空

繾綣，不知離恨笑牽牛。睡起閒庭夕照殘，無聊數遍
曲闌干。天涯游子誰相惜，珍重西風日莫寒。

小芬仲妹于歸洛中賦此志別

我生方三卅，母命返錢塘。上省外祖母，三載搖歸
航。歸來已總角，見汝纔扶牀。骨肉有天性，笑語牽衣裳。
少長共嬉戲，蘭閨雁成行。芳辰撲蝴蝶，清宵捉迷藏。學
綉倚紅窗，嬌不識鴛鴦。阿爺遠遊宦，種花滿河陽。慈嬉
憐幼弟，竹馬日騰驤。我時漸長成，簫聲引鸞凰。于歸侍
舅姑，辛苦調羹湯。歸甯喜不遠，花月同徜徉。愛汝解唱
酬，爭此燈燭光。中表聯苔岑，情若同胞良。汝時已攏髮，
婀娜瓊枝芳。人爭誇美好，我更愛端莊。聞汝培年少，簪
筆富文章。一朝爺書來，道汝翁姑忙。盈門豔桃李，棨戟
蜚清香。行報三年績，促此百兩將。阿母送汝去，匆匆束
行裝。姊妹聞汝去，無言欲斷腸。況汝最嬌小，未諳離別
傷。過江慎眠食，曉暮避風霜。豈無相見期，所愁道路長。
當筵唱陽關，含情各盡觴。觴盡情未盡，耿耿毋相忘。回

頭望故山烟樹何蒼茫

新春寄弟妹

瞥眼流光歲又新，東風吹倦倚欄人。椒花獻頌逢佳節，柏酒稱觴壽老親。殘雪寒盈尺瑞，早梅香破十分春。謝庭詠絮饒清興，可有吟箋寄錦鱗。

寄小芬妹

綠窗猶掛吐絨紅，蛛網塵封畫閣東。不識椿萱承色笑，可能花柳夢遙通。明河影裏玉繩低，香霧空濛鎖翠微。倚遍雕闌誰是伴，心隨歸雁月中飛。

感懷

春寒何料峭，春雨何連綿！春風更無賴，吹老豔陽天。鼠姑初著花，嫣然紅且鮮。無端遇風雨，憔悴殊可憐。年年此花開，花下傾千觴。今年逢花時，人爲離別傷。天亦如有知，不遣芬芳感。此念舊遊涕，下沾衣裳。

題心玉女士離鸞集

一卷琅函絕妙詞，迢迢魚雁訴情思。才多那信能妨福，節苦應憐不諱癡。鏤雪團香雙管秀，歌離弔夢兩心知。妾身轉覺分明甚，莫作嬰兒撒瑣悲。碧海青天萬念輕，嫦娥心性許同清。已拚從一靡他志，便未成雙亦此情。鏡裏鸞孤悲自舞，樓頭鳳去寂無聲。他時倘入應常集，別向紅閨播盛名。

中秋對月

三五逢佳夕，清華勝去年。征人秋有恨，思婦夜無眠。香斗燒心字，羅浮畫遠天。姮娥知別苦，不遣十分圓。
十六夜望。

八月十四日爲 庶祖母陸太孺人
八旬生忌追輓

半載慈雲隔，三生壽域開。音容猶宛在，笑語已難

陪。薤露歌聲咽，香花梵唄哀。酬恩空有淚，還望鶴歸來。

題畫四首

牡丹

畫出東風別有情，沈香亭北最分明。如何絕代傾城色，不及名花自一生？

荷花

嬌曳紅衣出碧潭，亭亭弱質不禁寒。絕憐水國秋來早，寫上生綃盡日看。

良姜

不愛濃妝愛淡妝，一枝短襯一枝長。韶光好處無人惜，翠帶紛披縮夕陽。

菊花

三徑荒寒懶自栽，一叢偷向筆端開。傲霜早占高

人品，未許尋常蜂蝶猜。

答孫佩秋世姊卽用原韻

未曾相識早相憐，月落雲停悵各天。一夕交情聯翠袖；十年別恨託朱絃。豈無芳訊來花底？賸有秋心寄雁邊。倚遍疎梅敲遍竹，最銷魂是莫鐘前。林下清才自古難，深慙家學我全拚。歡場過眼鷗盟冷，舊圃關心鶴夢寒。絕代明妝天際想，三生慧業靜中看。雁行捧到瑤華贈，羨煞吟思似轉丸。

春日回倉山作

暗香吹送小樓前，殘雪猶鋪淺水邊。昨日輕寒今日暖，分明作弄釀花天。面面青山入眼新，登臨妒煞詠花人。東風無力春雲懶，隄畔垂楊綠未勻。

題湯雨生都督十二古琴室填詞圖

將軍嗜古琴，列侍金釵比。託興任無絃，一洗箏琶

耳。秋期佇涼月，鶴夢清如水。春曉眠綠陰，鶯啼和宮徵。高懷淡瀟灑，寬句秋聲裏。金閨有賞音，佳偶神仙似。盛世掃樓槍，雅歌傲餘子。

秋興

離懷何處放？吟眺晚風前。涼月淡無色，秋花瘦可憐。碧雲千里合，錦字幾人傳。漫挹浮邱袖，閒身不羨仙。

題秦良玉遺照

十萬黃巾拜下風，桃花馬映綉旗紅。玉容不畫麒麟閣，可惜皇家氣數終。巾幗空生大將才，國亡家破事堪哀。君王若是能專任，錦繡夫人又見來。

秋日寄懷少蘭弟

與君連枝樹，生小常依於。嬉戲阿母側，愛若掌上珠。少長弄柔翰，雅尚琴與書。春秋多佳日，詩酒常相娛。娛樂未終極，忽忽感離居。道路何迢遙，山川阻中塗。何

爲有離別？奈此舟與車，相去日以遠，親愛日以疎。豈忘宿昔意，撫心常嗟吁。獨自下階立，西風吹我裾。秋涼氣蕭索，俯仰獨愁余。繁霜瘁百草，木葉下庭除。圓影麗西北，流光照吾廬。引領望河漢，河漢通天衢。奈無乘風翼，輕軀不能踰。寄書雲中雁，爲我展區區。相逢未遽必，相思天一隅。庭闈有至樂，悵望空踟蹰。

寄懷小村仲弟

極目河山迥，天寒夕照微。征鴻逗離恨，來去一行飛。路遠書難達，愁多酒易醺。人生如意事，骨肉莫離羣。

秋海棠用王新城秋柳韻

西風嫋嫋斷吟魂，絲雨溫香晝掩門。金屋漫憐新笑靨，玉階還認舊啼痕。溼雲冷墜秋聲館，倦蝶癡尋夕照邨。多少傷心兒女事，紅愁綠怨與誰論。花葉伶俜畏早霜，參差倩影隔銀塘。閒邀織女偷窺鏡，愁悵牽牛

懶服箱。莫使品題同菊婢；欲將嬌豔比花王。阿誰深夜
燒高燭，錯遣人疑碎錦坊。合罷梁州疊舞衣，者番相
見是耶非。重來香國紅芳少；望去疎林綠草稀。一徑秋
深涼露泣；三生夢幻綵雲飛。木犀香滿芙蓉豔，願結同
心志莫違。撩人離緒惹人憐，消瘦情懷淡暮烟。不向
東風怨搖落；每經秋雨倍纏綿。綺羅庭院思前度，砧杵
流光又一年。但使輕陰能護惜，綠章同奏五雲邊。

山居

山居遠市囂，即目清且雅。幽鳥時一聲，雜花開四
野。飛瀑樹杪落，鳴泉石竇瀉。地僻人跡稀，意適真賞寡。
盈盈酒一樽，月是同心者。容與滌塵襟，斟酌芳林下。

紅白梅花歌

江南正月梅作花，脂紅粉白爭相誇。龍女冰綃襲
香玉；石尉錦帳裁雲霞。珊瑚碎擊燦奇麗，珠璣密綴驚
豪奢。封條皚皚耀白雪，堆枝粒粒明丹砂。妃子靚妝街

豔冶；夫人素面矜妍姘。又疑飛瓊結伴下塵世，偶然聯
袂遊戲停颿車。桃李不敢鬪顏色，松竹亦復慚兼葭。蜂
未聞香蝶未至，清潔肯屑方凡葩。巡簷索笑詎畏冷，遠
勝踏雪尋山涯。飛來翠羽啼不住，聲清韻逸疑箏琶。作
記好倩高士筆，置酒宜招佳人嘉。花前得飲不辭醉，百
瓶已罄還期賒。月明粉壁弄疎影，千枝萬朵紛橫斜。寒
香沁骨助詩興，走筆直欲飛龍蛇。還恐巴詞俚語不足
相佛彷彿，但覺根蟠幹曲蒼秀而槎枒。調羹會待植廊廟，
百札頭上爭英華。

寄外詞後意有未盡再綴二絕

甘苦年來已備嘗，負居桂玉費商量。彩鸞自降文
簫後，唐韻書完第幾章。兒女初知世道難，燈前也解
憶長安。秋風早報芙蓉發，歸騎休遲畫錦歡。

薄暮登倉山

好山誰蠟屐，烟景望中佳。嵐翠欲眩目，白雲常入

懷幽泉漱危石，冷月掛懸崖。歸路松林暝，藤蘿罨鳳欹。

竟夕

皎皎中天月，照我百尺樓。樓中有思婦，竟夕起離愁。含情拂綠綺，彈出相思旨。誰言春宵月，照人生歡喜。微風曳羅幃，嫩涼侵銖衣。與君千里別，一載心依依。青陌頭柳，思君令人瘦。未若田舍翁，朝夕常相守。

奉懷瓦梁五姑母

色笑睽違歲月遷，每從魚雁訊安便。頒來佳貺離懷歎；捧到瑤函別緒牽。老景可堪輸蔗境，人情未免嘆桑田。卅年慈愛慚深負，何日銜環獻膝前。

秋日遊莫愁湖

南國傳名勝，盧家尙有樓。君臣方講奕，婦孺合無愁。山色淡如畫，水光涼欲秋。滄浪歌一曲，漁笛出蘆洲。

閒中雜詠

瑤華閣詩草

積雨連朝喜放晴，小園花態可憐生。紅闌幾曲圍香坐，定與常儀話別情。花晨月夕惜分陰，未許閒愁暗裏侵。怪底年來無暇日，不妨小病好微吟。深宵把卷清無寐，差喜心情尙故吾。爲問瑤臺游冶伴，風懷猶似舊時無。亂蟲吟砌月沈鉤，秋色簫疏易惹愁。倦倚桐陰拋綠綺，明河影裏望牽牛。

夜讀示兩兒

男兒立志初，所貴乃孝弟。讀曹啓其蒙，豈爲博金紫。事君如事親，忠臣必孝子。治國如治家，循吏必悌弟。爾曹中人姿，習俗易移徙。日讀聖賢書，自然識大體。爾祖少食貧，筆耕貫薪米。拔萃舉明經，一毡爲貧仕。賢良擢令尹，循聲著遐邇。五十歸道山，宦囊清若水。汝父少失怙，孤立鮮依倚。獨木支大廈，恐墜箕裘美。好學寡交游，一編惜寸晷。平生重然諾，所爲慎終始。家貧食指繁，菽水無可恃。飢來驅其行，負米長安市。近跡依我翁，暮游恆自恥。來歲試北闈，但願魚燒尾。揚名卽顯親，文章

有知己。嗟我出名閥，頗亦習詩禮。結褵歸汝父，井臼躬料理。大母髮垂白，所樂在甘旨。羹湯洗手調，終歲懼毀譽。爾父昨來書，問爾近何似。青燈舊有味，慎無惜穉齒。嬉戲徒自棄，歲月去若駛。何時方成人，慰我願復喜。未寒衣先裁，未飢食先俵。典釵供修脯，和丸偕臥起。棗梨莫攘奪，手目共指視。新詩當座銘，高山試仰止。

感舊

深鎖葳蕤靜掩門，遠鐘聲裏又黃昏。夢回珊枕春無影；釵劃雕欄月有痕。誰共燈前彈玉局？獨來花下酌金尊。歡場已逐輕雲散，一度已量一斷魂。

暮春

杜鵑聲裏惜年華，深巷無人喚賣花。燕子不來春欲去，亂紅飛過阿誰家？

山樓坐雨

雨氣逼高樓，憑欄豁遠眸。樹迷千嶂晚，雲釀一天秋。鷹懶盤風迴，鷗閑狎浪浮。來朝占曉霽，擬作北山游。

擬樂府長相思

長相思，夜長無寐時。蟲聲唧唧如催織，起坐寒機理素絲。素絲一何潔，皎若窗前月。窗前月，照圓復照缺。清輝千里共會見，歡愁別。歡愁別，思憶同。遙憐心一片，如日照閨中。寒衣欲寄添惆悵，刀尺聲停勞想望。妾望遠，君懷歸。恨無羽翼凌風飛，可憐多少扁舟子。離別都爲貧賤使，人生富貴會有日。何爲煩憂長戚戚，不如迴環織錦文。錦織成時一寄君。

冶城柳枝詞

芳訊初傳到冶城，迷烟曳雨弄新晴。爲誰漏泄春消息，借與嬋娟作小名。鑄劍池荒景寂寥，漫吹香絮壓春潮。千絲萬縷纏絲態，可爲離人縮畫橈。畫出東風二月天，楚腰纖細可人憐。晴波暖漾烟絲活，兩兩鴛鴦

鴛葉底眠，六朝金粉已成塵，臘有長條媚好春。顧影自憐眉黛倩，效顰休妒鏡中人。舊巷長橋婉轉通，曉風殘月畫圖中。紅牙低拍尋宮徵，樂府伊誰曲最工？輕暖輕寒起未收，愔愔天氣雨廉纖。樓頭少婦多離思，莫遣花飛入綉簾。

題少蘭弟倉山憶舊圖

乾鵲噪屋角，阿弟貽我書。書中何所語？游子感離居。上言加餐食，下言懷故廬。當春發遐想，憶舊寫作圖。乞我贈數言，雅勝投瓊琚。展卷嘆墨妙，位置雅且都。烟巒圍匝匝，臺榭紛縈紆。疎林延夕照，芳塘燦芙渠。小艇盪澄碧，垂竿餌游魚。好風徐一來，蓮香襲輕裾。嘯傲眼界闊，塵襟清以攄。此中足幽賞，我昔臥遊俱。花盟與月社，韻事常相於。忽忽近廿載，白日驚隙駒。鳳臺不我住，小謫下蓬壺。歸甯二三月，膝下多歡娛。弟年方總角，我時二十餘。彼此樂徜徉，不識煩惱吁。河梁一爲別，懷抱鬱不舒。從此盼魚雁，一紙千金如。何日二親歸，荷衣賦

遂初。隨肩承色笑，捧杖花間趨。舊歡或可續，白首盟不渝。倉山好烟景，咫尺空踟蹰。

松濤

謾謾森森一徑陰，漫疑聽雨泊江潯。怒濤卷石千峯合，老幹擎雲萬壑深。涼月滿天驚鶴夢，仙風半夜起龍吟。下簾危坐清無寐，漏盡參橫俗籟沈。

移居漫興

北麓新遷物態殊，地偏心遠恍仙都。清幽不亞斜川景，誰寫高人徙宅圖。新筍齊抽破綠苔，錫香酒熟燕初來。韶光豔說三春好，富貴花迎寶鏡開。隔葉乳鶯啼曉晴，風簾日煖花氣馨。不知山翠排戶入，錯認吾廬添畫屏。柴門晚眺月朦朧，斷續鐘聲斷續風。火齊有時明一串，蔣山東望塔紅燈。

歲暮書懷

寒天苦日短，工作無餘間。日落衆務息，開門見遙山。山容倦欲睡，野燒明其巔。鴉飛不敢落，鴻驚時往還。眼色暗林杪，寒烟翳雲端。悲風捲敗葉，冰堅滯鳴泉。俯仰氣蕭索，根觸感華年。人生百歲中，譬彼四序遷。和風及春夏，顏色花爭鮮。長恐霜雪至，點綴兩鬢斑。駒陰不我駐，却老無還丹。傷貧復傷別，擾擾相糾纏。感此悟物理，僂俛亟爲歡。蕩胸無纖塵，長歌養浩然。

織女

卅萬天錢算未清，雙星離恨幾時平。絳河遠隔相思字，烏鵲難傳宛轉情。作到神仙還惜別，不修富貴總虛名。停梭翻羨閒花艸，並蒂同心過一生。

春雨無聊瑟然多感卽次外原韻

春寒料峭減芳華，盡日陰陰雨脚斜。醉不成歡詩境窄，愁偏泥睡夢鄉賒。當簷鶻噪疑聞霽，繞樹鶯啼似惜花。惆悵踏青期又阻，故園咫尺似天涯。

偶見

綠筠深護小池臺，一樹紅梨倚檻開。簾影漾花浮荇藻，誤他雙燕掠波來。

春日偶成

春水平隄皺綠，春山繞郭籠青。不怨王孫歸晚，一川烟艸冥冥。挑菜不嫌泥滑，踏青却喜天晴。仰面兒童拍手，雲中吹落風箏。地僻惟聞犬吠，山深未有鶯啼。游子尋花倦返，紫騮嘶過長隄。弄晴幾點微雨，催花一前和風。吹得海棠紅綻，輕陰再乞天公。

題姚邦生表姊丈雲山洗眼圖

松壺居士今畫史，尺幅能教具千里。貌出雲山洗眼圖，一朵芙蓉拔空起。公子西冷舊世家，揭來宦海厭繁華。抽身怕入笙歌隊，捫葛攀蘿逸興賒。峯巒崩削嵐光合，帶水盈盈繞山脚。帆檣出沒風浪中，不見縑塵見

邱壑衣裳飄飄欲化雲，屐齒印破蒼苔紋。松陰小憩快
遙矚，赤城霞起蒸斜曛。願借仙人綠玉杖，蓬萊咫尺休
回望。冷翠緜延書不分，披圖不覺心神曠。君家夫人我
中表，廿年遠別芳訊杳。花盟月社感舊歡，妙筆清詞傳
畫稿。石城猶記乍分攜，還是雲英未嫁時。星霜屢換朱
顏改，膠漆難分玉軫知。再逢何日原難定，願託長歌先
問訊。何憶山中舊草堂，雪泥無恙遲鴻印。簿領新參望
正長，烟雪何暇細評量。他年畫錦酬初志，絕頂湖山在
故鄉。

八月十四日卽事

溫雲壓屋風拔樹，覲面人疑隔烟霧。電光閃爍掣
金蛇，霹靂一聲雨如注。倒瀉明河白浪翻，橫飛疋練銀
蛟怒。中庭頃刻欲浮槎，對此茫茫遠客嗟。幾重樓閣波
心浸，一角峯巒暮影遮。當年聽雨蔚藍天，四山飛瀑鳴
濺濺。荷香沁骨涼生袂，煮酒論詩夜不眠。今宵聽雨西
窗下，根觸舊游淚盈把。抱得雲和不忍彈，素心人去知

音寡三更月出雨仍晴，一片啼螿遍短檣。秋從心上來
何易，月到天中色倍明。銀牀浙瀝秋聲迴，細數虬籤秋
夜永。欲將幽怨訴姮娥，翠袖伶俜華露冷。一繩雁字向
南來，珍重霜前尺素裁。爲言一載金閨婦，愁似秋雲鬱
不開。

送倚筠表妹赴山左

廿年中表兩殷勤，月社花盟影不分。一自金徽彈
別調，幾番錦字愴離羣。拈毫愛寫纏綿句，展卷愁看感
慨文。絮果蘭因參未透，三生我欲問神君。垂髫韻事
記從頭，一角倉山景最幽。避暑清游拋繡譜，消寒雅集
檢詩籌。西窗聽雨宵連榻，北隴探梅曉放舟。四序平分
無限樂，不知人世有離愁。鳳簫聲裏賦催粧，從此紅
闌惹恨長陌上，花開歌緩緩尊前。人去路茫茫，青琳舊
夢憑誰證。碧海新愁祇自量，莫向高樓吟夜月，相思應
斷九迴腸。梅花吹雪柳搓絲，那料分襟是爾時。此去
定知鴻案樂，重來莫負鹿門期。鱗鴻好遞愁邊信，猿鶴

應添別後思。三疊陽關兩行淚。銷魂心事水雲知。

有感

人事多變遷，盛衰原不一。貧賤骨肉疏，富貴親朋密。淮陰出胯下，誰復知俊逸。漂母具一餐，豈圖後報德。區區高義心，不謂出巾幗。今人反古道，所好在諛刻。幸免冥報遺，恥乞嗟來食。義命苟自安，寵辱何由惑。

題聽鸝圖

箬笠棕鞋稱體輕，攜柑貰酒踏莎行。倩誰寫出江南景，二月春風十里程。望裏垂楊遶曲隄，金衣搖曳影偏迷。交交鎮日機聲弄，織得春雲一剪齊。詩腸鼓吹動新聲，字字珠圓和好音。莫向枝頭誇百轉，阿誰遲爾上林深。峯迴徑轉戴家山，趁曉幽尋興未闌。穉綠如烟烟似水，滿身花露不知寒。

有意

閒說歸期小雪天，望雲徙倚晚風前。占來鵲喜離心慰，譜到烏啼別恨牽。桂玉家鄉愁晚歲，冰霜道路感華年。何當種秫南山下，偕隱柴桑效昔賢。

興山居漫

意行隨近遠，境僻愜幽尋。寺古松杉老，城荒草木深。鐘魚消俗念，山鳥悅禪心。徙倚事遙矚，空林藹夕陰。

題湯太夫人吟釵圖

崑山一片玉，雕琢成寶釵。貞白表令德，耀首光皚皚。嫁時阿父爲髻髻，珍重不啻紅玫瑰。舅姑慈祥姊妹睦，琴瑟靜好無有猜。阿翁宦閩海，夫壻侍親行。闔室寄榕城，平安盼合并。跳梁小醜忽弄兵，孤軍勢弱力莫爭。倉君之祿盡職守，誓與此城同死生。臣死君子死，父忠孝完名凜千古。凶耗傳來摧肺肝，海枯石爛血淚乾。招魂返鄉里，高塚空衣冠。煌煌天語蔭後嗣，畫荻茹荼勵初志。嫁衣質盡釵獨完，理竟晨粧常隕涕。膝下奇兒漸

長成弓衣花簇紅雙旌，攬拾掃盡天下平。斗南嶽北頌
政清板輿到處花同笑，一篇脫稿兒婦廢。玉釵無恙髮
將白，十九年來龍出骨，摩挲手澤概生平。戛然一聲釵
忽折，釵忽折，知不祥。當時有句吟悲涼，駸駸歲月挽難
駐，憔悴萱花萎北堂。丹青難寫孝子心，表揚大節須鴻
文。吁嗟乎！鐘鳴鼎食門排戟，欲報親恩親不存！

春柳用王新城秋柳韻

綠到江干斷客魂，倦開青眼盼朱門。千絲蘸水嬌
留影；一抹籠烟淡有痕。豔曲清詞翻舊院，曉風殘月憶
荒村。關心別有樓頭婦，根觸幽懷孰共論？纔染鵝黃
未著霜，又縈蘭棹泊橫塘。緜垂細縷遮衣桁，眉學纖痕
啓鏡箱。詠絮詩才傳謝女，回春法水乞空王。多情縮住
斜陽影，搖曳青帘認酒坊。一曲陽關淚滿衣，舊曾攀
處認全非。可因人去腰肢減，敢怨春來信息稀。別恨幾
時和葉展，離心癡欲逐花飛。長條枉向長隄植，不繫騶
聽願又違。依依裊裊可人憐，檢點韶光過禁烟。數雨

量晴同繾綣，傷春惜別獨纏綿。粧成碧玉延芳節，散盡
黃金誤少年。汁染宮袍應有待，龍池佳景正無邊。

輓儀吉妹

泣別紅闌半語無，珊瑚病骨不勝扶。那知一去人
天隔，從此傷心付女嬰。聞說郎君痛欲顛，三生一刻
盡纏綿。情根似此因須悟，休再重牽未了緣。問字繙
書態宛然，依依情事可人憐。上清有夢歸何早，小謫塵
寰二十年。回首歡場事，哀月明應有鶴歸來。雙魚
不識重泉路，芳訊憑誰寄夜臺。

迎春曲

簇簇紅旗出郡城，行行官吏遠迎春。合歡綵勝釵
頭顛，一色新粧看麗人。東皇何處啓韶華，花漸蘇紅
草吐芽。見說陽春原有脚，使君心可在桑麻。檢點輕
裘換薄絨，不須曝背向晴簷。關心壓繡貧家女，此日鍼
工幾線添。介壽筵開酒興濃，青幡猶立粉牆東。柳梢

風色花磚日，纔入春來便不同。

丙午冬日寄懷小芬二妹

冬至草木摧，北風永朝夕。夜長不能寐，明月明簷脊。悠悠歲月遷，忽忽憂愁迫。十年手足分，經歲音書隔。豈曰不我思，關山紛重積。路遠親愛疎，別久心情易。願一見容輝，望望冀雲碧。無因生羽翰，乘風快所適。

卽景寄諸兄弟

金井鴉啼夜色闌，嚴霜似雪曙光寒。臨粧呵手慵開鏡，索笑巡簷怯倚欄。凍蕊幾攢明月底，冷香一縷沁毫端。窗南硯北清幽甚，容易分襟促膝難。

望雪歌

陽氣不斂冬心溫，時節三九如初春。元冥未肯變寒律，無梅無雪愁詩人。臘琴琴歲將暮，六出花從何處吐。萼綠仙人睡未醒，玉龍懶向瑤臺舞。空山一夕吼

北風，溪橋凍斷無人蹤，寒雲漫漫天似墨，堅冰一重霜一重。圍爐火暖神色王，準擬祥雲連夜降，不須東閣訪梅花，好向西山看雪嶂。朝來捲帳窗紙明，尙疑玉屑堆中庭，詎知陽鳥已出海，光華燦爛輝蒼冥。長空依舊碧無縫，盈尺封條空有夢，拂箋裁句報二難，好事都爲造化弄。我年十五十六纔，倉山雪後烟景佳，開筵折簡邀綵伴，謝庭詠絮傾同儕。錦片華年彈指過，歡場回首情無那，當時座上分韻人，落落晨心存幾個。物是人非事可哀，恨無青鳥訊泉臺。浮生似歷紅羊劫，彼美誰爲白雪才。智瓊嬌小蘭姨老，歎息尊前同調少。凌華底事滯歸裝，不管山中猿鶴惱。竭來重整舊詩壇，有約偏憐踐約難。綠章待向瑤清奏，願乞天公玉戲看。

題酬紅記樂府

一卷新詞萬恨攢，愛河刻刻有驚湍。干戈擾攘生離易，骨肉飄零死別難。紅豆種成憐月缺，綠章奏罷惜花殘。佳人小傅才人筆，挑盡陶燈不忍看。

感懷

人壽不及物，此理良可歎！我生三十六，攬鏡容色
換，視彼古稀年，奄忽已過半。轆轤守窮賤，役心勞指腕，
脈絡日就傷，屈申筋不貫。希賢勵素志，撫心獨嗟惋。富
貴或有時，已輸去日算。

漫興再疊前韻

酒潮紅退漏將闌，刺繡挑燈怯夜寒。霜重鴈聲沈
畫閣，月明花影壓雕欄。儘拚幽恨消杯底，莫惜清愁繞
筆端。有約漫嫌同調少，選詩容易選人難。

聞香雪中梅花尙無消息詩以催之

竹外欄前萬樹梅，尙無一朵向南開。難邀玉戲酬
吟筆，想對明粧勸酒杯。懶隨乍敷紅筆淺，虬枝漸聳綠
房堆。衝寒未放春消息，擬倩東君羯鼓催。

題史小鈿表姪女手把芙蓉朝玉京遺照

江南二月濃春時，花明紫陌繁露滋。盛衰乃爲造
化弄，東風忽折芳華枝。名姝彷彿名花樣，相門有女從
嬌養。大母珍看璧入懷，阿娘愛惜珠擎掌。翁時鄉試來
白門，外家小住常經旬。締交吾師方雷陳，願爲兒女聯
婚姻。此姻未就爾翁死，爾母鶯焚依伯氏。徙宅移家來
秣陵，爾時垂髻才八齡。生來弱質嬌無那，軟曳輕綃若
未勝。大家禮法森圍教，長成德性尤純孝。道蘊爭誇詠
絮才，雲英信有如花貌。鍼神巧奪薛靈芸，日向紅窗刺
繡紋。崔盧來往門庭近，彈棋尙字何殷勤。吾師古道敦
友誼，不因生死交情易。特倩冰人執斧柯，遂教喬木附
絲蘿。百年嘉偶一朝定，肯令天孫隔絳河。芳年十九賦
催粧，曲譜瓊簫引鳳凰。門楣喜得乘龍婿，里巷爭看百
兩將。舅姑堂上憐嬌小，酸鹹不責羹湯好。琴瑟初調兩
不猜，雙眉日倩張郎掃。福去無端二豎侵，災來苦被三

尸擾丰態伶俚怯曉風，難將修短問蒼穹。霞衣寶珥遺
同伴，玉質雲容託畫工。禱祀無靈百慮捐，醫巫難起病
纏綿。玉京舊夢憑誰證？手把芙蓉悟宿緣。彩雲易散留
難住，傷心紫玉成煙去。憔悴安仁鬢欲星，黃金屋在人
何處？我忝諸姑誼倍親，新圖獨展淚沾巾。長歌不盡淒
涼意，可有來生未了因。

不寐

彈指流光又歲除，綠窗呵凍倦粧梳。如何雪月交
輝夜，寒透重衾夢也無。

水災行道光辛卯年

六月忘盛暑，孽龍起乘時。風雷助靈威，勢欲傾天
池。晝夜不暫息，五日猶淋漓。海水復泛溢，橫流決河堤。
初驚沒田園，繼訝浸城基。街衢日已滿，升堂漫庭墀。非
魚水中游，非鳥樹上棲。欲行畏沒踝，如雉籠中羈。三遷
非擇隣，再徙無立錫。生者成餓殍，死者爲流尸。旱災尙

有屋，水災漂無遺。大府坐束手，小吏徒奔馳。往歲存樂
輸，何不行權宜？災民日嗷嗷，倉空雀呼飢。輕舫載餅餌，
富者且博施。具奏計往返，已逾匝月期。望賑如望歲，一
日千回啼。煌煌天子詔，撫卹加羣黎。奉行循故事，開廠
分稀糜。老幼相擠踏，有命如懸絲。賑粟存其名，紅朽雜
糠粃。少壯爭先獲，疲癯遭顛危。問利之所在，吏役交營
私。在官不在民，古人早有詞。有賑尙如此，無賑害更滋。
三復鄭公傳，不知涕何之。

紅葉用王新城秋柳韻

秋光黯淡易銷魂，蕭瑟西風冷閉門。青女無心留
豔質；素娥有意鬪春痕。不愁松菊荒三徑，且伴芙蓉映
一村。節物漸移烟景改，茱萸筵上耐評論。半畝涼陰
被曉霜，明粧綽約映方塘。倩他煮酒方開卷，佐我臨池
好疊箱。拚老烟霞棲鳳子，肯隨桃李媚蜂王。素心人遠
茅茨近，卜築新移僻靜坊。爛縵曾爲上古衣，世情轉
燭儉奢非。參來色相年華晚，待到敷榮伴侶稀。幾片冷

翻斜月淡；一林豔逐暮霞飛。隨波悔作氤氳使，流出宮牆事事違。勻染胭脂絕可憐，恍扶殘醉倚寒烟。詩裁素手傳秋緒；衣被蒼生羨木棉。紫玉關情縈遠夢，青雲回首憶當年。化上心事伊誰識，逗我車停夕照邊。

倉山牡丹盛開家嬸母招飲卽席感

賦

陽春百花發，鼠姑擅盛名。今春雨水遲，三月方含英。嫣然倚東風，解語真傾城。主人開瓊筵，邀客吹金笙。行樂貴及時，相與各盡觥。長歌發慷慨，所愁節序更。年時攜手伴，落落如晨星。骨肉多遠別，踽踽難爲情。身遙心自近，夢想通精誠。豈無魚與雁，奈此千里程。溫涼敝片紙，離懷難盡傾。歲月日以去，憂思日以盈。願附飛鴻翻，乘風以北征。

秦淮漫興

開瘦芙蓉碧樹秋，秦淮猶自泛輕舟。迎來桃葉花

瑤華閣詩草

同笑；送去楊枝月伴愁。五尺水添思婦淚；一聲鶯囀美人謳。何如浪擲金錢際，不念高堂憶遠游。

中秋寄懷柔吉妹

電速流光未肯延，又逢令節負團圓。月臨子夜珠光燦；人過丁年玉質堅。伴我微吟清鑿影；照誰私語悄凭肩。定知孤冷金閨客，一樣秋懷怨杜鵑。

哭小芬二妹

處世若大夢，百年亦須臾。胡爲感死生，天高徒悲呼？嗟我與爾身，親愛比衆殊。憶昔一爲別，奄忽十載餘。聞爾待舅姑，羹湯博佳譽。聞爾弄璋瓦，掌上擊明珠。聞爾夫婿貴，指顧綰銅符。歡會期雖愜，往復勞雙魚。千里誠一心，豈在形跡疏？去年痛失怙，五中慘不舒。阿母扶櫛歸，相見惟歔歔。廉吏著循聲，囊囊若無儲。兩弟甫弱冠，研經慕英儒。家聲肯自墮，僂俛支門閭。北堂幸康泰，望此荆五株。方期手足間，協力哺慈烏。天道渺難測，鴉

鳴飛一書，開函讀未竟，雪涕沾衣裾。此別永不見，此恨何時摠！傷心蓋棺時，慘極親人無。繞膝復何恃，哀哀遺三雛。欲往阻山川，心與飛雲俱。攬涕念河母，歸甯亟呼輿。家庭聚骨肉，淚眼雙模糊。兩泣摧心肝，承顏色難愉。死者知已矣，生者常悲吁。念爾最聰慧，魂應返清虛。淒風生林木，涼月下庭除。悵惘思平生，彷彿想形模。精靈苟未泯，夢寐相依於。

和竹畦二兄月當頭夜見懷原韻

蕭寂閑庭夜已分，冰壺驗影下階勤。寒生錦襪癡憐我；冷拂蠻箋雅遜君。鴛瓦霜濃光耀月，貌鑪香暖篆縈雲。一年好景傳今夕，和到陽春思不羣。

偶檢破篋得柔吉妹丙戌歲所貽詩

札迴環雜誦不勝今昔之感卽系六

絕歸之

偶翻破篋尋吟稿，忽見銀鈎眼獨明。丙戌嘉平書

一紙，迴環重讀不勝情。盛衰二十餘年事，祇有多情月姊知。今日思量如隔世，可憐情況憶兒時。強爲作達難消恨，使說還鄉可有家。絕似黃花宜晚節，東籬寂寞傲霜華。半世因人事未成，難將絮果問神君。媧皇浪補情天缺，不策金閨翰墨勳。深宵風雨戰西窗，讀向燈前惹斷腸。六首新詩詞一解，錯疑珠淚溼成行。可是三生有宿因，聰明偏賦女兒身。不須苦怨天公錯，千古才人恨未伸。

寄懷柔吉妹時新接小芬二妹訃音

憶送輕帆返石梁，茱萸徧插又重陽。南來征雁遲消息；北去飢烏戀稻梁。分手似愁千里別，同生已悼一枝傷。人天離恨無窮盡，願祝春回早戒裝。

感懷

世事漸閱歷，人心多變更。貴則棄貧賤，富則薄交情。出山泉多渾，逐羶蠅多營。窺其厚薄間，稟賦亦天成。君子獨不然，反此出真誠。甘爲巧者笑，毋使達者輕。

卽景

蕭騷一夜風兼雨，病起心情懶獨吟。落盡繁花吹盡絮，綠雲如幕晝陰陰。

晚春漫興寄黛華姊

春去寒亦去，單衣始脫絛。晝長夜苦短，恆恐不足眠。孟夏禾葉茂，綠陰覆平川。芳草有生意，蒙茸滿階前。山深聞鶯遲，清宵惟啼鵲。觴詠苦無伴，獨酌常寡歡。之子居同城，咫尺如隔山。豈不知敝樂家貧乏，盤餐賢者常苦窘，愚者偏處寬。鄙嗇盈千倉，慷慨無一屨。賢愚不相等，貧富如天淵。乃知世間事，錢神操其權。

題頻伽禮佛圖

女子貴從一，未嫁與嫁異。卓哉朱氏媛，結髮識大義。阿兄有哲友，碩彥多才藝。拔幟童子軍，高堂選爲婿。絲蘿一朝定矢志，已不二。郎君苦家貧，婚禮猶虛遲。棹

舟赴東郭，義篤師生誼。何圖墮水亡，玉樹無端瘞。阿兄愴其情，阿母隱其事。隔歲女始知，傷心惟隕涕。人生有不幸，請母從兒志。柏舟媿前賢，褒旌非所冀。願親享大年，願兄登上第。旂檀島靜室，一卷懺來世。妙音證靈禽，慧業參真諦。勁節方女貞，凌寒色逾翠。

柳浪

一樹垂楊拂麴塵，穀紋生處葉初勻。銀灣捲雪情吹絮，金縷搓烟暖漾蘋。帶雨綠翻波灩灩，迴風碧皺漲粼粼。多情爲綰蘭橈住，錯認乘潮客問津。

輓舜華妹

人生忽如寄，上壽無百年。況復感死生，悲哀相憂煎。憶我初來時，小姑方及笄。溫良表情性，淑慎仰容儀。相聚甫月餘，之子賦于歸。歸甯數晨夕，鏡檻長相依。高堂無多出，連枝雙繞膝。與君姑嫂情，誼比同生密。親愛無猜嫌，廿年如一日。舅姑相繼終，寒素守家風。操持役

心力。遭際頗相同。去年君來辭。隨宦赴楚中。遠別惜分陰。秉燭話離衷。念兄客燕冀。一官如匏繫。願營負郭田。早作同歸計。此言猶在耳。此志終當遂。方期後福長。戚里交相慰。何圖一載強。凶問來家鄉。披書讀未竟。涕泣沾衣裳。君事多未完。兒女幼可傷。夫婿服官政。顧復難周詳。哀哀撫靈棺。失恃摧腑肝。青燈耿總悵。相對益悲酸。山川隔迢遙。欲見何時還。孤魂寄異域。望遠空悽惻。寒暑忽復遷。音容永不卽。寄書無青鳥。天路浩無極。感舊傷我心。援琴淚沾臆。

晚眺寄懷柔吉妹

高城落日倚蒼茫。放眼郊原野趣長。近水凍烟籠月影；遠山寒燒閃霞光。鳴愁有雁排筍柱。惜別無魚訊石梁。知否綺窗梅欲綻。更從花裏望歸航。

聞少蘭弟需次四川賦此却寄

一檄文書萬里行。蜀山蜀水賦長征。異鄉風物從

頭問；別路關河到眼驚。三峽猿聲悽客夢；五更雁櫓逗離情。錦城到及春如繡。定有新詩寄我廣。

前詩意有未盡再贅四絕

去年此際悵離羣。苦爲家貧手暫分。今日雲山萬重隔。不知何處再逢君。鳥道盤空磴棧連。崢嶸劍閣倚青天。危欄凭處從南望。不及飛奴自往還。卅年手足三年聚。半世都消離別中。不識天公緣底事。却將厚福賦愚蒙。香心不展小陽春。半月曾無一日晴。莫爲梅花思故里。冷烟寒雨石頭城。

春日感懷

春陽煦萬物。和風散香塵。柔條何冉冉。密葉自蓁蓁。軒窗南北阜。山色日以新。野塘蕩幽碧。澄澈瑩心神。觀影一長歎。十年此因循。當時卜居意。詎爲慕隱淪。負郭無薄田。何由息勞薪。向平願未畢。五嶽志莫伸。轍跡滯京華。淹留負芳辰。遙飛淹高鳥。潛淵樂魚鱗。情固不

在遠，意適何憂貧？誰能處局促，養素全其真？

少蘭弟書來以四川道遠爲慮賦此

勗之

蜀道難，蜀道難，川河與雲棧，縈紆嶄絕何開關！昔人已，有語，今人胡不然？蜀道之難如登天，男兒壯遊志萬里，安能終歲寂寂守故園？況君捧檄爲貧仕，顧儲薄祿娛親顏，莫惜折腰趨下風，但祈名譽動上公。儉可養廉，肅僮約，治家爲政將毋同。蜀中米穀三秋熟，不比江南貴如玉，諸葛遺謀例不荒，那識樂輸敲扑辱。君不見叱御王尊忠，負弩相如顯，只在人心安不安，不在山川遠不遠。

寄父村仲弟

別淚淒雙睫，牽衣慰北堂。辭家春正好，作客恨難量。薄宦三巴遠，羈愁一水長。黃金爾何物，買斷雁分翔。山中好烟景，咫尺負花期。那信春宵月，翻成夜雨

時。有情皆遠別，無處不相思。何日塵勞息，同來理釣絲。

遊子吟

歡會時苦少，憂患時苦多。臨觴袂就判，揮淚盡金荷。僕夫駕征驂，長歌行路難。城高望不見，仰首益悲歎。行行上蘭舟，市帆穩中流。雙飛羨水鳥，終歲結綢繆。遙山逝如駛，遠樹排如薺。濁醪不解顏，徒倚蓬窗底。援琴拂瑤軫，絃絕金徽冷。賞音條已分，燒燭憐孤影。慊慊夢還鄉，悠悠道路長。佳人怨遙夜，長定怯空房。

別思

欲采藤蕪悵遠遊，平居容易感離愁。十分春色情無著，一片花光夢未留。出岫雲孤飛亦嬾，在山泉冷韻多幽。未逢如願酬初志，却向閑階望女牛。

題陶雲汀宮保印心石屋圖

長沙古名區，山水著異蹟。巉巖擊石門，俯瞰賈江

碧。砥柱屹中流，地靈孕奇石，像形金印堅，瑞應偉人出。
臨江劈草萊，中有讀書宅，鷗搏嶼志初，鯉對趨庭日雲
路快翱翔，風高振六翮，擁節來江南，愛民無督責，理財
邁劉晏，進賢媿姚伯，佳話遍閩閩，報稱章平績，玉陛覲
天顏，聖眷何薰赫，御筆灑烟雲，褒寵錫題額，鄉心戀一
邱，功業高百辟，畫錦紀光榮，君恩許馳驛，陽春喜再來，
借寇蘇繁劇，霖雨慰蒼生，任重肩難釋，公家太尉賢，三
楚留遺澤，異代紹箕裘，勳名垂竹帛。

孟夏飲芍藥花下

丈夫貴樹立，其志在功名。女子不出戶，長年無所
營，中饋事粗了，鍼線須調停，薄暮得暫息，閑吟豁幽情。
是時四月天，山深聞晚鶯，芍藥開較遲，紅芳殿春英，花
下具杯杓，獨酌還獨傾，三杯樂陶然，氣爽心亦清，凭高
豁遠目，疊嶂青冥冥，地偏絕市囂，寺近聞鐘聲，中懷自
蕭曠，淡泊無牽縈。

送父村仲弟赴試北闈

去年此日君甫歸，木葉落盡霜雪飛，風塵未敢瘁
顏色，比貌略較年時肥，手足由來有天性，讒巧翻笑蒼
蠅非，家庭巨細同會計，心跡如一無相違，名園茅舍距
咫尺，三日不見忘朝饑，有時甯具尊俎豆，奉觴上壽娛
慈闈，燈窗茗話聚同志，漏盡不覺星河稀，銷寒雅集記
客歲，矜奇鬪巧分新題，人生此樂豈易得，況復努力功
名時，驪駒在門酒在盞，行李未發心先馳，願君科第如
拾芥，青雲直上符心期，風霜載途善自衛，道遠莫使音
書遲，十年有約慎無忘，錦衣萊服同光輝。

贈李薇仙女史

和風扇淑氣，萬卉齊著花，倡條拂冶葉，各自鬪芳
華，我愛彼姝子，容色何妍姱，清談霏玉屑，素質輝瓊葩，
妙態翩驚鴻，明姿灼朝霞，陽春豔桃李，不數東隣家，握
手不須臾，離居與歎嗟，眷言慎眠食，暇顧迴香車，三秋
未足喻咫尺，疑天涯。

雜詠

郭外江潮長，城中物價高。天吳三歲厄，風雨又蕭
騷。有酒心難醉，無書性亦明。勞勞身世感，根觸坐深
更。誤被浮名役，悠悠二十年。但期無別恨，何必羨神
仙。寄跡言難踐，依人志莫伸。緘書詢季子，何日息勞
薪。

寄少蘭又村兩弟

案居無聊思舊歡，緘封寄弟愁路漫。家庭巨細言
瑣屑，手腕酸脫書未完。六親同運苦局促，鸞飄鳳泊無
停躅。良人幕游遠赴皖，兩弟伶仃分粵蜀。家無詹石憂
母心，況復年荒昂五穀。不因貧賤困饑驅，何致天涯分
骨肉。聰明早種煩惱根，古來聖賢多艱辛。功名富貴爾
何物，坐令白日愁青春。是時二月風日暖，一羣好鳥啼
花綏。靜坐方嫌春晝長，無眠不覺春宵短。北門橋西有
草堂，殘梅落盡桃李芳。主人不歸猿鶴怨，山容水色空
蒼蒼。人生莫嗤積穀翁，翁方笑人如轉蓬。盛年不得快
胸臆，何日同乘破浪風。

效曹子建別白馬王體送又村仲弟 赴粵就婚

鴻雁行欲分，驪駒在門俟。將赴古南越，就婚省舅
氏。崔盧聯新姻，中表非他比。阿母檢衣裝，奚童東行李。
匪因汝性儉，草草具婚禮。婚禮古所重，衷情難具陳。
先人慕循吏，廉俸無多存。悔買下水田，旱潦徒均勻。春
秋備籽種，無獲空耕耘。屈指三年來，戚戚憂家貧。汝年
已弱冠，卜吉難逡巡。家貧愁母心，路貧愁汝身。汝身
已艱辛，汝兄尤偻促。嚴冬十二月，捧檄之西蜀。萬里賦
孤征，在旁誰骨肉。鞭羶凍欲撤，雪深沒馬腹。肯戀微官
微，爲求升斗祿。敢怨道路長，親老憂風燭。省書情愴愴，
望遠空躑躅。八表感停雲，況復思手足。手足無多人，
年年遠離別。嘉會苦不常，光景如電瞥。良時屆暮春，雜
花如錦綴。開筵展殷勤，傾觴共怡悅。觴盡言未盡，離心
淒以結。結髮慕文翰，棄捐脂粉膩。詩書靡不窺，好學
忘年歲。少長課女工，不櫛負初志。當今博科名，取士重

時藝嘗作敲門磚，門開方可棄。勉旃方盛年，珍重梁棟器。大父著鴻名，箕裘儻可繼。繼起可望者，惟汝猶讀書。三冬貴足用，豈徒誇五車。此行既受室，鐘鼓樂渠渠。冀望新婦賢，詎獨蘋蘩需。抽簪勗勤學，戒旦常相於。晨昏護萱草，兢惕延嘉譽。何以慰親心，甲第光門閭。春華宜自愛，努力翔天衢。

贈王若謝妹

詠絮才名著，瑯琊舊族賢。清標如菊淡，勁節比松堅。十載離懷展，三秋別夢牽。九熊身世感，欲慰轉淒然。夜態由來薄，多君古道存。解衣憐季子，設帳課童孫。慎守三遷教，難忘一飯恩。白頭無恙在，心跡待重論。

哭淑筠妹

幽蘭生空谷，素心絕纖塵。葳蕤發華葉，隨風揚清芬。盛時靡不惜，光彩日以新。驚飆忽暗折，哀怨那可論。遭際痛弱妹，彷彿如花身。枝原一本出，誼比同懷人。結

髮失怙恃，伶俜多苦辛。三年依我母，視若掌上珍。賦性復柔順，繞膝娛晨昏。諸姑與伯姊，奉侍何彬彬。十一弄柔翰，十二刺繡紋。清才林下彥，豔質洛川神。娉婷美豐度，婉孌世無倫。標梅擇佳婿，幾姓通殷勤。高義衆所慕，誰復論富貧。鳩媒來問字，阿姊主婚姻。方期得良匹，飛語置不聞。結褵方數月，眉黛翻長顰。不成與鴛鴦，渺若胡與秦。輕衾覆孤影，蘭房生棘榛。來歸數晨夕，與我尤相親。太息起中夜，淚下沾羅巾。金人口自緘，委婉徒咨詢。一朝傳隱匿，五內轉車輪。正言託尺素，大義冀可伸。愚頑悟公子，始展伉儷恩。綢繆結三月，饑驅感離羣。汝姊滯江北，經年愛思紛。念汝買棹歸，相見爭歡欣。怪汝太憔悴，意謂初有娠。可圖未大期，遽爾誕麒麟。湯餅宴方洽，旋復憂採薪。沈絛困牀第，轉側聞哀呻。賤藥不時投，庸醫誤因循。嗟我患微恙，未獲親視君。遣使探汝還，欲語輒聲吞。殷憂不能寐，凶耗來清晨。永訣摧心肝，從茲見無因。猶聞戀乳襖，彌留慘難分。一月失所恃，音容認未真。人生多憂患，未若君遭迍。嬌女哭阿姨，掩袂泣

斜曛惘惘默相向，哀衷難具陳。悲風起庭隅，恂恍疑臨存。芳徽空想像，目極天無垠。寒月淡幽砌，黯黯凝愁雲。俯仰增感傷，揮涕心如焚。情天或可補，恨海填難湮。已矣今生緣，泉下愴孤魂。

輓棠仙甥女二十四韻

有美閨房秀，難參夢裏緣。斷腸花作讖，長命縵空牽。墮地爺先隕，投懷母更憐。身纔離襁褓，命已賦連遭。刺繡工偏巧，耽吟句早圓。三遷遵淑訓，二九正芳年。我忝諸姨長，兒真絕代妍。外家居最熟，內則禮無愆。小住情都洽，深談夜不眠。半生誇敏慧，一病忽淹纏。祈禱難求佛，參苓敢惜錢。阿娘心已碎，嬌女恙難痊。詎料珠擎掌，翻成玉化烟。蕭郎空締偶，秦媛忽登仙。日暖方調鳳，宵沈遽聽鶉。傷心留臘耳，掩泣檢殘篇。埋玉無多地，探鑽更幾年。紅羊隨劫轉，碧落盼音傳。渺渺穠華逝，悠悠綺塚捐。白楊翻夕照，青塚隔重泉。冷月窺粧鏡，孤花萎墜鉤。可憐魂不返，猶盼夢能還。有淚都成海，無情敢怨

天。浮生多苦境，此恨更絲絲。

春日卽事

薄霧溟濛冒曉烟，送春許節雨廉纖。沈沈深院無人到，飛絮因風入畫簾。夢入蓬山萬慮清，參差樓閣鎖花城。商量擬賦游仙曲，偷得鈞天第一聲。

題鄴樓業師攝山讀書圖

我昔遊攝山，短髮初櫛鬢。幽尋侍舅氏，陟險同躋攀。掛軒縈清夢，遊興殊未闌。一驚軟紅牽，忽忽三十年。平居起遐想，夢遶羣峯間。吾師好襟懷，山水彌拳拳。當時此讀書，飄然疑登仙。春山豔如笑，玉女開朱顏。秋山媚如粧，翠潑修蛾彎。琳宮燦金碧，仙籟發幽湍。山鳥樂相呼，山花嬌欲言。放眼最高峯，俯仰天地寬。長江兩派分，如帶山腰環。萬瓦蹙魚鱗，千疇羅棋盤。青青樹若薺，藹藹嵐生烟。好景愜幽賞，不羨閒雲閒。誰爲作此圖，示我索一篇。行將赴閩嶠，遠別心凄然。勝遊或再續，斯圖

當並傳。山靈默相契，十載看雲還。

和王潤如女史原韻

紅牡丹

沉香舊夢記矜誇，姹紫嫣紅簇絳葩。飛燕晨粧明
豔雪，玉環卯酒醉流霞。錦幃捲處飄芳澤，彩筆書成寄
麗華。百寶欄邊涼月底，有人丰采類名花。

白牡丹

素面朝天莫漫誇，春風拂檻綻瓊葩。鶴翎灑雪梳
朝雨，燕剪分烟破晚霞。富貴底須矜矜色，神仙原不愛
繁華。瑤臺神女拋香玉，幻作人間第一花。

聞笛

葉落銀牀鳥夜啼，薄寒初透五銖衣。誰家長笛吹
殘月，一片秋心逐雁飛。

效長慶體一字至七字

詩感遇，傷離停琴際，刻燭時，碧雲千里，紅豆一枝。
惆悵懷人夢，低徊玩月詞。見說蜂中有錦，生憐扇底無
題送春，春去歸何處？莫向東風唱柳絲。酒驅愁，致富
任遺冠，莫濡首。舉必千鍾，賜惟一斗。桃花能駐顏，柏葉
堪介壽。加帽竟攜還家，拔釵不妨留友。相期醉倒甕邊
眠，忘却杯流到誰某。

瑤華閣詞鈔

錢塘袁綬紫卿

浣溪沙

繡幌低垂燕未還，鴨爐添炷水沈檀，妝成慵自倚雕欄。
却愛輕風醒酒力，生憎微雨釀春寒，可憐時候杏花殘。

賀新郎

賀遠甫十六舅氏就婚浦口

陌上春光換，正華堂雀屏開處，玳筵春滿。十二瓊樓花似海，幾處湘簾低捲，雙影並碧闌干畔。好向玉臺吟豔句，譜新聲吹入紅牙琯，和一樓簫聲軟。別來歲月從頭算，記當年謝庭小宴，似曾相見。今日紅羅親手揭，還是舊時人面，添了九雛釵頂。付與丙丁雙綬帶，待明朝共把同心綰，鸞鳳侶神仙伴。

瑤華閣詞鈔

滿江紅

送雲裳姨母之嘉定

怕說行期，乍領略別離滋味。況又是江南三月，錢春天氣。兩岸柔條和淚折，一襟幽怨憑誰洗。向尊前莫爲唱陽關，添憔悴。游冶處，從頭記。多少恨，從今起。算花深闌曲長相依倚。如舊山眉窺繡檻，檻前人影。今天際，賸銀鈎題壁字，分明空凝睇。

月底修簫譜

春夜乘月登倉山

渡谿橋斷石磴，尋月上巖頂。萬竹玲瓏，搖碎冰輪影。凭闌不盡低回，一亭如笠，算今夜更籌須闋。鬪香茗，輕烟處成絲，風細裊三徑。回首紅樓隱隱，一燈覩。

環簫譜出新愁，梅花落徧。却半臂嫩寒初勁。

風入松

送華玉五姑母歸瓦梁

相依幾夕數觥籌。溝水忽分流。楊枝待折還延伫，
恁輕颿欲去難留。惆悵石城橋畔，一年一送歸舟。歌
殘金縷不勝愁。無語注雙眸。江南剩有歡場在，料隔江
夢也回頭。却怪鶯聲啼處，綠陰遮斷紅樓。

八聲甘州

秋日侍蓮甫舅氏遊攝山

認丹厓翠巘影鈎連，別有洞天。恰秋空雲淨，斜
陽一抹，紅挂客前。樓閣玲瓏不斷，只合住飛僊。何處晚
鐘起，敲破蒼烟。重倚松亭佇立，指水流花淡，泉噴珠
圓。忽怒濤捲暝色，上松巔。有衝寒兩三來雁，寫新愁，
欲下又迴旋。低回處再來蠟屐，知是何年？

菩薩蠻

登最高峯

一峯秀起羣峯小，東流如帶山腰繞。日落數歸船，
江村起暮烟。來時松下路，半被雲迷住。一笑問山靈，
還離天幾層。

謁金門

微雨歇，正是晚涼時節。午睡起來人寂寂，無聊閑
佇立。柳外輕雷纔息，花上夕陽明滅。獨上小樓情脈脈，
遠山青欲滴。

喝火令

寄懷雲裳姨母

點點秋聲碎，絲絲夢影殘。霜涼如水怯凭闌。辜負
水晶簾外月團圓。已覺雞籌閤生憐，蠟淚乾。金猊熏
透四鴉斑。可也無聊，可也掩屏山。可也數他歸雁，愁上
兩眉彎。

洞仙歌

冬日與柔吉妹圍爐賞雪

紅闌六曲，向風前凭徧。曉雪霏霏，撲人面，笑雛鬢。睡起倦眼，惺忪猶認，是一夜柳綿飛滿。水邊梅破蕊，疏影橫斜，不似年時等閒見。翠袖暗香凝，料峭寒生，拚醉倒樽山鑪畔。更枝北枝南，酌芳醪，祝壽綠仙人。月明相伴。

清平樂

冬夜偶成

宵長人靜，剗地東風緊。冷逼羅幃，眠未穩，難遣離愁千頃。起來閒倚窗紗，夜深誰撥琵琶。聽得小鬟私語，月鉤初上梅花。

蝶戀花

感懷

記得常儀分手去，別恨縈懷，怕詠相思句。鷓鴣不。知人意緒，聰明故故撩人語。一夜小樓沈細雨，吹盡嬌紅，春又歸何處。戲把榆錢千萬數，可能買得流光住。

慶清朝

春光明媚，撫景懷人，偶倚此解。

新柳搓烟，暖風熨草，東皇着意安排。鶯啼燕語，小園紅紫催開，又是花朝近也。秋千隻索，影徘徊，輕塵外，誰家冶伴戲蝶歸來。惆悵瑣窗朱戶，自挂帆人去，蛛罥塵封，眉山一角，翠黛多少愁懷。向晚薄寒料峭，半簾疏雨潤蒼苔，凝情處，闌干十二，敲徧鸞釵。

買陂塘

題華玉五姑母深柳讀書堂圖

數東風幾番花信，恹恹香絮吹倦。千條萬縷爭牽惹，綠窗謝家庭院。春影倩，正午日遲遲，一桁窗紗掩，簾波半捲。任軟搭檐牙，低拖闌角，不唱玉關怨。烟絲暖，次第眉痕笑展，有人翻徧黃卷。落花片片飛如雨，咫尺翠雲遮斷。塵思遠，恁殺粉調鉛，一寸愁心綰。流光似箭，甚水碧樓臺，泥紅門巷，貪聽早鶯囀。

卜算子

書懷

秋似有心來，雁竟無書至，獨自凭闌憶舊遊，恁添
離思。疏雨滴梧桐，淡月明幽砌，一片蛩聲和笛聲，不
許人愁睡。

百字令

奉懷雲裳姨母

湘簾捲處，怪新涼如許，作成秋意。颯颯西風吹落
葉，又聽亂蛩吟砌。滿院砧聲，半窗月影，好伴人無寐，定
知今夕，鱗鴻一樣難寄。轉憶舊日游蹤，近來情緒，領
略淒涼味。篆字香銷羅袂薄，懶向玉闌閒倚。盼斷花冠，
剔殘金種，沒個商量地。幽階佇立，碧雲迴望千里。

踏莎行

春遊

倩影迷離，東風料峭，清明過後園林好；桃花波暖
泛輕舟，烟絲無力縈蘭棹。病酒心情，傷離懷抱，畫屏
展翠春山曉。擬將幽怨託朱絃，曲終不信知音少。

南樓令

秋夜懷柔吉妹

深院一燈青，孤吟睡未成。聽蕭蕭葉打疏櫺，斷雁
數聲更四轉，霜墮影峭寒生。花瘦太伶俜，涼蟾繞畫
屏。記年時笑語分明，不信歡場如夢短，尋夢去，夢難成。

喜遷鶯

夜初長，燈欲燼，深院漏聲遲。輕寒漠漠透羅衣，正
是鴈歸時。夢成烟愁着絮，怕聽啼螿如雨。畫闌凭倦
玉繩低，涼月下樓西。

浪淘沙

春夜

香霧溼紅英，玉漏初停。庭閒如水竹聲清。人在隔花闌畔倚，倩影伶俜。夜靜罷調笙，月上疏櫺。微風輕颺繡簾旌。料峭春寒欺薄袂，逼醒餘酲。

蕭蕭雨

秋日懷嘉定表妹

正清秋天氣雨初晴，薄暮嫩涼侵。漸白蘋風起，蓮衣零落，桐葉蕭森。來鴈不傳芳訊，雲樹影沈沈。減却清游興，冷醉孤吟。望處半竿殘照，共炊烟一縷，閣住疏林。却高樓誰倚，橫笛訴離心。怕思量八年前事，任疏花紅瘦倦幽尋。無聊甚，情如釣月，來伴更深。

百宜嬌

剪柳風柔，養花雨細。催就幾番春訊。彈指流光，驚心往事，早是踏青期近。秋千倦倚，恰鎮日慵繙唐韻。試輕衫重又裝絲，餘寒無奈猶蘊。芳徑裸落紅成陣。日影轉迴廊綠窗人困。燕蹴蓮鈎，鶯啼闌曲，不管愁縈方

寸深深院宇乍夢覺，繡屏香燼。凭新來瘦減桃花，釧鏡寬褪。

如此江山

月當頭，夜偕諸姊妹過雙湖亭，登渡鶴橋望月，繞隄而歸。冰輪碾空，玉壺濯魄，幾不知此身尚在塵埃也。

百年幾度逢今夕？當頭月明如鏡。曲繞花陰，閒凭闌角，酒面被風吹醒。霜寒鶴迴，指樓閣參差，塔燈紅映。敲破塵心，一聲清聲出峯頂。良宵偏愛漏永，向溪橋伫立，無限幽興。樹色迷濛，水痕清淺，涼浸一天星影。此時此景，訝玉宇蓬壺，還在人境。便欲乘風，愁鸞背冷。

買陂塘

題汪鄴樓師倉山讀書圖

問山靈烟雲無恙，頻年曾此吟嘯。溪流宛轉亭臺曲，不數十洲三島。香霧裊，恁竹外梅邊，慣聽書聲早。峯

屏綠繞，指矮几眠琴，橫窗停琖，不放片塵到。流光速，那信知音還少？傳經猶記嬌小。絳幃十載春風暖，早識秋蟾懷抱。臨墨沼，感青眼殷勤，矜許巴巫調。凭高遠眺，念鷗縱圓盟，燕偏辭壘，何日認歸棹？

木蘭花慢

寄小芬二妹洛中

指烟巒一角，認十載舊歡場。記花塢題紅，柳隄拾翠，春滿江鄉。芳塘半篙漲暖，約蘭閨綵伴泛輕航。不識閒愁滋味，愁嬉九十韶光。神傷，幕地飲離觴，分袂悵河梁。縱雁足傳情，蠅頭寄恨，輪轉柔腸。淒涼！夜來細雨，慰無聊，誰與話西窗。一夕心馳洛浦，夢回人隔瀟湘。

前調

惜花

背紅閨綵伴，侵曉起繞苔墀。待數樹分鈴，懸旛醉酒，不放春歸。枝枝競芳弄影，最魂消月底上燈時。好伴

笙清笛暖，莫教蝶妬蜂癡。霏霏紅雪撲簾飛，吹落怨風姨。嘆九十韶光，三分春色，多付香泥。心期隔年再見，却何堪一載費相思。誰唱陽關三疊，可憐祇有鶯兒。

慶春澤慢

黛潑山眉，青迴柳眼，惜惜天氣初晴，又到花朝綵旂，紅颭苔陰。曲闌干外東風軟，破春愁燕語恹恹，暗消凝。幾日春寒瘦了梅魂。桃花潭主殷勤甚，借名流池館，小盞朋簪。仁月林疏，一痕新綠粘雲。銀燈細綴星光燦，聽誰歌金縷聲清。囑啼鶯，綰住韶光，莫便飄零。

壺中天

祝汪紫珊姑丈五十壽

堂開綠野，羨羣真低首，藕花香裏，清福消來兼豔福，信是歲星游戲。揮手豪情，軒眉峻骨，江左伊誰比。悄紅拈豆，有人屏後偷記。猶憶膝下慈嬉，倚嬌索果，乙乙垂髫事。未遂褰裳擎玉笋，惆悵隔江烟水。蔭庇萱幃，

群徵蘭夢私頰新擘倚。蒼生多少，望公霖雨重起。

摸魚子

竹夫人

靈根舊是瀟湘種，生來便矜風質。瘦玉玲瓏淡雲孤，冷依倚底因人熱。橫陳七尺，恁一段秋心，未秋先活。午夢初迴，桃笙如水嫩涼逼。廉纖疏雨乍歇，正微醒倚漏，嬌隋無力靜掩金鋪，低垂銀蒜，又是昏黃時節。中宵轉側，愛寵妬全消，自然傾國。碧擁紗廚，奈花香沁骨！

臨江仙

月當頭夜，卽事感懷

見說當頭今夜月，鑒來瘦影都無。惺忪扶醉下庭除。霜華欺酒面，寒透鏤金襦。笑問常儀應識我，故吾可似今吾。倉山風景擬蓬壺，何當成小謫，無分住仙都。

前調

瑤華閣詞鈔

中秋卽事

三五圓期容易過，良霄拚得遲眠。謝庭佳會泛觥船，晶屏開翠幌，邀月墮瓊筵。記與英翹花下立，聯來韻語纏綿。繁華過眼小遊仙，玉壺重濯魄，翹首又今年。

夢橫塘

春日感舊

石髮梳雲，柳絲牽雨，嫩涼深閉池館。乍過燒燈，暮又聽錫簫吹暖。倦不成眠，慵還覓睡，舊情都懶。向危闌悄倚，望斷平蕪，裙腰路烟痕軟。歡悰墜了難尋，任梨花落盡，雛鶯嬌婉。拍遍紅牙，渾不是者般消遣。怕暗裏韶光偷換，小疊蠻牋寫春怨。燕壘泥融，鵲爐香潤，奈相思人遠。

摸魚子

青溪春泛

趁新晴相邀綵伴，河干同上烟艇。垂楊陰裏蘭橈

捷，劃破玻璃千頃。風力緊，度隔岸紅樓，一縷簫聲迴，斜
陰弄暝。指青粉樓臺，碧油窗戶，依約晚粧靚。雙飛燕，
掠水爭誇輕俊。橋邊來去無定。三灣兩曲春如海，多少
六朝粉鷗夢穩。渾不管涼波搖瘦，秋千影。船脣小凭，
看霧薄籠烟，星疏綴月，畫出可憐景。

漁家傲

秋到江城風景異，山空葉落商飆起。此際祛愁真
綠蟻，知也未酒醒，依愁難_九。望斷長安何處是，碧
雲日暮涼如水。來鴈不將芳訊至，添別思，書空又寫人
人字。

聲聲慢

雨窗無寐，別緒盈懷，漫倚此解，並寄都門。

絲絲密密颯颯蕭蕭，悠悠颯颯日日。撥入紅蕉，似
和亂蛩催織。金鋪夜深靜掩，閃蘭釭玉蟲明滅。翠袖薄，
慙新涼如水，倚闌無力。此際渾疑中酒待說與心期，

又誰知得點滴西窗，不管有人淒絕。歡_勞甚時再省，聽
高樓一聲橫笛。慢凝睇，怕吹秋風吹瘦倦客。

江城子

舊家池館怕重經，雨初晴，柳初青，暢好韶光，沒箇
詠花人。把酒醉花花不語，知也未此時情。雙隄壓水
小橋橫，畫船停，畫闌凭，訴與新愁鶯燕也銷魂。欲倩東
風吹夢去，應不隔短長亭。

踏莎行

湘晚妹萎化經年，每憶昔游，益增新感。漫倚此
解，用寫弔懷。

過雨花蘇，迴風竹漾，并刀難剪愁千丈。一坏香土
隔春山，鶻聲併作銷魂況。鏡檻塵埋，粧樓蛛網舊游
重省，添惆悵。待憑幽夢訴無聊，祇憐又被湘屏障。

鳳凰臺上憶吹簫

鑿石通泉，編籬護竹，一番梅雨初晴。漸濃陰綠透，池館悄悄，望裏烟鬢翠溼。蛙聲亂，老怯啼鶯。消長畫玉望低，按坊了閒吟。暮騰近來情緒，算不是傷春，底事銷魂。凭桃枝簾滑，涼浸梨雲，夢斷楚天。何處簾櫳靜，早又黃昏。添惆悵而今始知，情種愁根。

百字令

題二喬觀兵書圖

披圖神往，凭東吳佳麗，內家裝束。雙倚東風閒展卷，三略六韜都熟。頰暈紅酣，鬢痕綠，傾國殊凡俗。樞機參透，運籌好在帷幄。却羨擲戟神亭，慶兵赤口，夫婿人如玉。富貴英雄聯吉偶，不數漢家金屋。一炬東風，三分南國，捷報先聞淑阿瞞。無賴高臺銅雀空築。

賀新郎

送儀吉妹子歸袁浦

之子于歸矣，記垂髻銷窗朱戶，常相依倚。花萼春

瑤華閣詞鈔

濃真似海，底事十年彈指，早料理遙情離思。簫鳳聲中分袂速，算今番歸妹爻占四，徵舊夢渺雲水。年來我亦愁難沈，怪西風鴈行吹散，白雲天際。家有倉山如畫裏，無復冷吟閒醉。料花月也添憔悴，聽水聽風知未慣。更憐伊初試羹湯味，雙鯉訊須頻寄。

又

颯颯霜風勁，恁無端秋心搖碎，香盟篆冷。極目寒江烟水闊，望斷弄珠人影，似半枕遊仙難證。爪雪空留腸九轉，指翠微一角斜陽暝。津鼓促，亂愁競。瑤觴欲盡愁難盡，嘆從今畫闌池館，與誰同凭。荆樹分枝花一色，那比尋常離恨。盼何日墜歡重省，衰柳蕭疏和淚折。願柔條早繫南歸艇，待看取畫眉俊。

浪淘沙 題瀟湘八景(選四)

江天暮雪

江闊水雲寬，暮景蕭然。花飛六出玉成團，風急潮

迥沙不起，壓損痕玕。暝色上層巒，木葉聲乾，踏枝翠羽不勝寒。喚醒梅魂紅欲綻，瞥眼春還。

明月生南浦

遠浦歸帆

望裏江光明似鏡，一葉孤帆，搖曳斜陽影。聽水聽風愁未穩，箇儂歸計今番準。知否小樓人瘦損，說與歸期，好共樵青等。別緒鄉心消不盡，故鄉無恙鷗盟證。

虞美人

漁村夕照

陂塘十里橫橋路，日日鳴柔艣。蓼花紅瘦鯉魚肥，無事薜蘿深處掩柴扉。斜陽影裏秋容老，流水孤村遠。賣魚沽酒不知愁，說甚人間談笑覓封侯。

南柯子

烟寺晚鐘

徑曲松花落，林疏塔影紅。雲深何處梵王宮，敲破塵心清夜一聲鐘。斷續隨風度，相思有夢通。韶華催去恁匆匆，不管征人愁絕月明中。

臨江仙

月當頭夜待月

未許嬋娟全面露，當頭虛說相逢。癡雲深護廣寒宮，中宵明鏡掩，可是晚粧慵。窗外蜜梅初破蕊，生憐香影迷濛。簫聲吹徹玉玲瓏，幽懷何處訴，惆悵倚西風。

無俗念

題王小鶴詩態圖

纖塵不着，甚傳神妙筆，寫來清景。望裏松杉涼翠合，三徑惜惜濃蔭。泉咽雲根，瀑飛樹杪，仙籟如相應。遠山延佇，斜陽未許催暝。最好冷眼閒吟，苔陰選石，小憩凝思靜。五字詩成還獨笑，佳句玉溪差並。鶴唳蒼烟，花明豔雪，點綴瓊環境。披圖認處，無絃琴趣誰省。

前調

題柔吉妹梨花白燕圖

一枝玉雪，倩邊鸞寫出，淡粧丰韻。添箇呢喃迎社燕，錯認釵飛不定。素羽分烟，碧紗籠月，莫辨伶俜影。清明過了，憎寒怯暖，誰省。却憶詠絮清才，縞衣翠袖，風調真相並。神女多情憐寂寞，來伴瑣窗孤冷。選夢口窠，驅愁香國，一樣單棲穩。紅絲親繫，故人無恙，應認。

買陂塘

題小村仲弟松陰把卷圖

鎖蒼烟一叢涼翠，斜陽葉底紅閃。虬枝聳作擎雲勢，望裏濃陰如幔。閒展卷，聽仙籟泠泠似和書生緩。雲根生暖，早楓冷燒霞，林疏罨霧，暝色起天半。披圖認，恰是翠微西畔。當時此景游倦，十年鴈影分南北，知否花愁月怨。離思遠，賸三徑苔痕，軟襯松花滿。流光電轉，盼綠野堂開，青雲路穩，衣錦遂初願。

痛 寧 閣 詞 鈔

前調

送伯英夫子之邢邱

又匆匆送君南浦，離心無限愁思。高堂垂白兒童幼，要妾扶持調理。君但記，恁陌上層樓，凝睇人常倚。風塵況味，歎負米行蹤，勞薪生計，誰念倦遊子。斜陽裏，遙指關河迢遞，潮寒休滯雙鯉。門前綠遍垂楊柳，何日繫君歸騎。花月底，怕鏡裏春紅容易添憔悴。年華似水，盼捧檄歸來，板輿同奉，把盞共君醉。

清平樂

寄外

風尖筆裂，簌簌飛瓊屑，凍合關河天一色，不辨去程南北。天涯游子單寒，客中誰勸加餐，便有今宵歸夢，可能尋到長干。

卜算子

寒夜聞鴈

一字畫遙空響似箏絃度。雲路迢迢倦欲棲，繞遍相思樹。見說帶霜來，可解將書去。夢穩涼波影不分，妬煞鴛鴦侶。

買陂塘

寄筠仙妹山左

剪梧陰一絲涼翠，西風先到金井。亂蛩吟瘦疎林月，香霧暗迷三徑。人語靜，賸竹外欄前翠袖伶俜影。宵長漏迥，待選石張琴，倚樓橫笛，玉臂阿誰並？年來事，覆雨翻雲無定，鱗鴻偏滯芳訊。歡衷輸與山靈笑，嫩約十年難省。癡欲問，凭絮果蘭因，曾指姮娥證。心香篆冷，便社燕多情，盟鷗無恙，離緒甚時罄？

虞美人

宵長漏盡蘭燈施，殘雪明鴛瓦。月波涼浸小庭心，睡鴨香消，慵展九華衾。郵籤細數程過半，腸逐車輪轉。一番離別一番愁，不待思量，偏又上心頭。

過秦樓慢

花魂

夢短成烟，身輕逐絮，好倩曉風扶定。蜂鬢慢惹，珠網潛穿，不怕妬花風勁。還向樹底幽尋，埋玉泥香，癡愁徑冷。怨東皇何事，催將春去，付將淒哽。空記憶豔奪朝霞，嬌韻涼月，幾費詞人吟詠。珠簾望裏，玉笛聲中，飛過闌干無影。惆悵留仙，未能盼斷珊瑚。容消金鏡，便重來有約，只恐鴛盟難證。

疏影

題洪容生表弟婦秋容攬鏡圖遺照

新圖展處，認玉臺倩影，謝家丰度。袖禪鬢低，標格亭亭，獨綺迴欄凝佇。秋涼池館，霜花豔，看幾簇冷紅初吐。怕柳絲碧剪西風，好景又成遲暮。荀令神傷舊夢，彩雲已散矣，空凭淒楚。想像仙姿，憑仗丹青，彷彿帳中重睹。郎君縱應芙蓉兆，賸此恨，媧皇難補。嘆綠窗鏡影

圓時，不是故人眉嫵。

木蘭花慢

春柳

曼涼颺，一剪裁，萬縷霽晴烟。漸媚眼舒，青修眉暈
綠，丰態翻翻。嫣然乍眠未起，便發他秀色也生憐。點綴
園林入畫，日斜扶出鞦韆。年年腸斷灞橋邊，難繫別
離船。爭葉密藏鶯，絲長肯蝶，不似春前纏綿。嫩黃褪盡，
怕韶光還未肯留連。休說萍因絮果，玉關芳訊誰傳？

菩薩蠻

春不老

一畦種向荒園裏，一繩晒向晴窗底。細洒水晶鹽，
曾勞玉指尖。佳名聽便好，真箇春難老。甘脆醒微醒，
樽前最憶卿。

清平樂

瑤華閣詞鈔

女兒紅

脂紅粉白，可是閨娃植？鏡裏嬌容同一色，怎忍金
刀輕劈！登筵曾佐辛盤，漬來糖醋微酸，不為傷春傷
別，也應根觸團圓。

月底修簫譜

雪等件

積庭陰，鋪屋罽，酥粉是誰？瀉眩眼花生，虛白射精
舍。任教雀啁風翻，斜陽暖熨，甚冷抱冬心難化。凍鴛
瓦，待邀月姊星姨，來慰可憐夜。盼斷珊瑚，誰速玉清駕。
不看爪印猶存，深情未泯，問何日鸞輪重下？

蝶戀花

卽景偶成，寄懷少蘭，小村弟，柔吉妹。

怯試春衫寒尙悄，細雨斜風，不管鶯花惱。上巳清
明都過了，杜鵑聲裏韶光老。寂寂重簾香篆裊，乍喜
新晴，靈鷲穿花噪。宿酒醒來情悄悄，綠窗自譜相思調。

前調

少蘭弟招飲牡丹花下，卽席偶成。

幾日輕陰游冶懶，燕子來時，已負韶光半。落盡榆錢風力軟，春愁暗逐焦心展。却喜雨絲吹乍斷，月姊多情，特放蟾光滿。錦瑟雲璈紅玉管，隔花試聽歌喉轉。

又

羯鼓催開花爛漫，人倚東風，花與人爭豔。雲母窗前簾盡捲，參差樓閣燈懸遍。良夜稱觴開綺宴，酒滿紅螺，笑語殷勤勸。願祝萱幃添鶴算，芝蘭常護春暉暖。

惜餘春慢消夏九詠選六

平臺觀瀑

露洗烟巒霞蒸雲岫，望裏翠微斜矗。峯巔樹杪，匹練晴飛，冷挂一條幽瀑。靜日奔騰，斷虹懸處，界破遙山新綠。又噴珠吹雪，銀河倒瀉，濺空難掬。還錯認玉女裝成，水晶簾下，依約螺鬟如沐。冷泠漱石，曲曲穿林，天

籟暗喧巖麓。酷暑全消，凭高目眩，滌盡俗塵千斛。恁雨餘河景，倩誰摹上素綃橫幅？

憶舊游

柳谷聽蟬

任陰陰翠柳，密罅谿窠，秀妬山眉。篩碎斜陽影裏，新蟬三兩，露咽風嘶。爲誰暗傳秋信，曳響過深枝。聽嘒嘒，啞哀音，驚回午夢，瘦却綃衣。幽思，動人處，愛抱葉身輕，涼入琴絲。撫罷清商，怨把一襟餘恨，分付新詞。噪晚和誰吟嘯？仙蛻悵棲遲。記玉手，按抄無絃，有韻空自知。

探春慢

南軒茗話

撥火留香，汲泉試茗，游興新來都懶。暑簟頻移，風簾盡捲，小雨乍過庭院。向綠窗圍坐，聽笑語盈盈不斷。候他蟹眼鳴時，定磁先選宮碗。愛此香清色淺，早齒頰涼生，睡魔潛竄。寫景分題，賦情聯句，次第競奇爭豔。

吟罷推敲處，悄不覺花陰影轉。紅上翠罽，一痕斜照催晚。

瑣窗寒

竹塢納涼

半畝晴陰，千竿涼翠，坐來忘燠。苔邊選石，料理筆牀棋局。聽蟬琴和絃未休，採菱豔唱遙相續。向修篁倚處，禪參鼻觀，露荷芬馥。注目真無俗。正落日篩金，暗風曼玉。人閑境雅，不數淇園幽谷。掩輕紈，餘醒乍醒，遠山暈入雙黛綠。近黃昏，淡月窺簾，冷映螢穿竹。

百字令

雙湖垂釣

湖亭幽寂，愛邀涼最好，曲欄同凭。養茗繙書消永晝，遣興釣竿閒整。緩勒輕桴，徐安香餌，界破琉璃縈遠隄。垂柳陰陰，一碧清潤。向晚雨滴銀塘，波紋圓處，疊出連環印。隱約游魚浮水面，來唼鬢邊花影。軟曳萍衣，

低牽荷蓋，風裊絲難定。金鱗獲得，隔窗綵伴爭問。

聲聲慢

山亭眺雨

霧羃檐牙，雲堆屋角，苔痕綠滿閒庭。乍密旋疏，無端又復盈傾。新涼暗消溽暑，泛方塘泡影晶瑩。風過處，聽竹敲清響，荷蔓繁聲。那更蕭蕭颯颯，攪柔腸欲碎，愁損雙成。水態山容，微茫望不分明。遙峯瀑飛銀練，映撐烟一塔伶俜。凭畫檻，盼何時來眺晚晴。

金縷曲

題秋雨懷人圖

夜靜商飈起，戰梧陰葉飛愁碧。雨聲敲砌。點點絲絲，還颯颯，作弄深秋天氣。悄不管，逗人幽思，攪碎離心，攪清漏，甚長宵醞釀。淒涼味，尋舊夢，渺天際。墜歡約，略從頭記，歎尊前酒徒雲散，共誰吟醉。寒逼西窗燈暈，綠懶向危欄孤倚，空目極亂雲千里。欲倩赤鱗傳遠訊，

怕濤箋，不盡纏綿意。盟未冷，恨難寄！

如此江山

餞花詞

流光撚指逢芒種，藥闌吹盡紅雨。剪綵紉幡，裁綃貼輦，待餞花神歸去。千絲萬縷，擬繞向花梢，可能留住？燈火連宵，繡窗忙煞小兒女。芳春紅紫競豔，記飛觴醉月。生恐辜負。燕惜泥香，蝶憐粉褪，換了清和時序。深情幾許，聽唱到陽關，更添離緒。酌酒風前，隔林啼杜宇。

踏莎行

賞牡丹

綠潤紅酣，香濃粉豔，牡丹初放閒庭院。一春常恐負花期，妝成靜日珠簾捲。倚笑傳停，含情繾綣，若教解語應腸斷。東皇料也惜韶華，倩他月姊來相伴。

臺城路

園中春日來遊者，麗人甚多，偶倚此解。

園林風景疑蓬島，莫辭長日閒仁。柳窰溪橋，花迷樓閣，誰在闌干笑語。嬉春好女，指影轉斜廊，怯遲纖步。半响低徊，被人偷認靚妝去。斜陽紅挂樹杪，怪游絲無力，難綰春住。屐印明量，衣香暗襲，多是繫人情處。新詞謾賦，待說與姮娥，又防相妬。不放清光照伊愁獨訴。

水調歌頭

送少蘭弟謁選赴都

風雪載途日，君又賦遐征。高堂且喜尙健，內政可經營。休慮家貧歲歉，莫捐男兒壯志，身世重功名。努力奮霜鬪，萬里展鵬程。向臨歧，還有語，再丁寧。人心險巖難測，著眼要分明。慎接疏狂親友，善察逢迎僮僕，花柳謾牽情。祖德未湮沒，盼爾振家聲。

又

消得幾番別，添與十分愁。人生碌碌無味，歲月去難留。浪說山川靈秀，終是因成人成事，有志未能酬。智慧

兩無用不憚恨悠悠。滯長安，憐季子，敝貂裘。風塵誰識英俊，何處覓封侯。兼謂伯英。挽鹿尚虛初願，夢犬猶存厚望，生計拙營謀。富貴爾何物，雙鬢不禁秋。

又

知己最難得，況復本連枝。襟懷磊落相似，真偽任人嗤。兩載花吟月醉，猶記圍爐煮雪，賦茗鬪新詞。行雁聚還散，重見在何時？霜廳緊，衰草盡，夕陽微。離筵相對無語，別緒亂如絲。此去烏亭鷺堞，珍重風餐水宿，眠食自扶持。逢鯉寄芳訊，早慰倚閭思。

又

敝屣視簪紱，雅尚慕樵漁。百年駒過隙耳，莫被利名拘。家有園林如畫室，有琴書樂志，花竹遶吾廬。此景若輕負，猿鶴笑人愚。況平生，思反哺，效慈烏。願儲升斗微祿，相與賦歸與。花下板輿奉母，窗下蒲編教子，荆樹茂庭除。佳日介眉壽，醉共捧屠蘇。

一枝春

瑞華閣詞鈔

寄外

倚酒驅愁，留香款夢，過了燒燈時序。韶光有限，爭忍更攙風雨。沈陰作暝，漫贏得晝長無緒。寒尚峭，慵倦犀簾，怕聽畫檐鳩語。長安久羈倦旅，縱春來減離情，千縷。三秋一日，夢也有憑無據。天長人遠，奈魚雁不將愁去。教省識瘦比疏梅，折枝寄與。

鎖窗寒

鶴潭大兄，又邨仲弟原韻。

暗雨疏花，沉雲翳月，漏殘忘曉。愁深夢淺，怕說別來懷抱。憶當時寒螿共吟，智瓊雅製，新聲好。向萬梅影裏，紅牙低拍，瓊觴同笑。誰料分飛早。贖繡戶題牋，尙留印爪。苔侵畫檻，襯綠一庭芳草。甚春歸人猶未歸，片帆望斷離思悄。願晴絲綰住流光，慢遣芳華老。

浣溪紗

月子彎彎瘦一分，可因離思淡秋痕？綠窗幽寂背

香塵。臘有烟絲縈遠夢，更無花片約吟魂，不成閒醉又黃昏。

木蘭花

寄少蘭弟

問迢迢雙鯉，怎不爲遞芳音？自籬菊開時，嶺梅謝後，盼到而今。沈沈半池凍解，蕩長空雁字寫離心。眉月暗窺簾額，暮烟深鎖遙岑。疏林選石自絃琴，驚起欲棲禽。便撫冷冰絲，倚寒翠袖，誰伴孤吟。惜惜乍晴又雪，任花憔悴怕登臨。何日重圓舊夢，不辭同醉苔陰。

算子

紅疏檻外花，綠減庭前樹。雁背斜陽淡不明，秋老兼葭浦。掩却小屏山，遮斷愁來路。剗地西風釀暮寒，又聽瀟瀟雨。

高陽臺

閏七夕

鴛杼重停，鵲橋又渡，銀潢瑟瑟涵秋。笑指星榆，明蟾已上枝頭。含情欲話三旬別，問仙郎可省離愁。算佳期不分，今年兩度綢繆。人間共盼駢車過，早心香篆裊，眉案光浮。露溼蛛絲，穿鍼猶倚高樓。花冠莫使潛催曙，願涼宵更閏蓮籌。乞天孫富貴長生，吉語仍留。

採桑子

送春

春陰過了芳菲節，雨細風尖，蝶怨蜂嫌，輕暖輕寒起未忺。舊游約略和誰話，彩筆慵拈，蕙炷慵添，滿院飛花怕捲簾。

瑤華閣詞鈔補遺

錢唐袁綬紫卿

踏莎行四時曲寄汪靜宜表姊

春

香夢慵醒，綠雲倦縮，綺窗睡起晴光滿。垂楊才染
幾分黃，搓絲無力東風軟。梁燕雙飛，林鶯乍囀，蝦鬚
半捲閒庭院。畫屏倚處暗思量，去年此日初相見。

夏

曲曲溪廊，聲聲檐溜，風荷香沁紅衣皺。桃笙如水
縠紋平，燭奴刻偏燈疑豆。遠夢驚迴，添人倦憊，蕭蕭
颯颯攪清漏。尋常已是不堪聞，如何更值黃昏候！

秋

霜老空林，霞烘遠岫，井梧搖落西風驟。東籬黃菊
又堆金，當筵誰勸茱萸酒。心較雲間，人如花瘦，六銖
衣薄涼初透。小樓容易入深宵，薰爐倚爇香凝袖。

瑤華閣詞鈔補遺

冬

落葉沈雲，巖飆捲竹，衝寒漫繞闌干曲。瓊瑤踏碎
認梅花，枝南笑綻胭脂萼。香鼻金猊，盃浮紅玉，花前
按譜新聲續。雙雙凍雀繞枝啼，萬山欲暝寒烟綠。

意難忘

春日感舊

小院春深，暫苔陰鬪草，樹底調笙。柳烟迷燕夢，香
雪銷花城。問仁立夕陽沈，又暝色黃昏。憶舊游蘭姨別
後，偏繫離心。當時共坐更深，記紅窗病酒，慵倚銀屏。
留香薰寶鴨，送月度簾旌。春去也，怕聞鶯，怎知有而今。
懶重理斷牋零句，誰是知音？

月底修簫譜

東蘭似表姐

篆烟微人語靜，寂寞畫闌凭。隣院簫聲，恁悵共誰聽？當時月底嬉游，迷藏間捉，記踏碎滿階花影。盼芳訊，別後雙鯉迢遙，莫是阻潮汛。舊事淒涼，腸斷怕人問。八年形影相依。一朝分手，歎他日香盟誰證？

臨江仙

記得曉妝臨寶鏡，萬梅花繞紅樓。髻雲同綰兩鬢秋。賣花聲過了，猶未捲簾鉤。鵲鼎香溫烟乍顫，微風細揭羅幃。鸞牋拂罷揀詩籌，吟成先脫稿，贏得玉搔頭。

前調

記得綺窗初罷綉，無聊同步迴廊。廉纖梅雨過銀塘。露荷香沁骨，風遞一絲涼。樂玉舟深斟琥珀，柳陰陰處傳觴。采蓮呼婢泛輕艫，紅衣愁觸損，欲折更商量。

前調

記得秋期逢七夕，綠陰猶噤殘蟬。鉞樓瓜果正當筵。一痕雲際月，剛是近初弦。乞得星娥今夕巧，綵絲穿賭誰先。桐梢一抹鎖蒼烟，露華涼似水，誰畫此時天？

前調

記得長宵纖影並，虬壺聽徹更闌。犀簾不避曉風寒。抽簪閒撥火，獅揀鷓鴣斑。報道玉梅花綻了，數來二九將殘。更看飛雪曉漫漫，似聞瓊姊說真箇玉爲山。

一叢花

寄懷瓊芝表姊

曉妝纔罷倚雕闌，花上露初乾。湘簾半捲荷風細，綠楊外三兩啣蟬。曾記舊時雙湖庭畔，同理釣漁竿。玉簫聲裏恨漫漫，紅淚背人彈。丁甯莫更歌金縷，空贏得愁上眉彎。十二畫樓，凭高目斷，知隔幾重山。

菩薩蠻

春日偶成

海棠枝上鶯聲軟，輕衫乍試春寒淺。風撼護花鈴，驚他蝶夢醒。畫長深院靜，彈指清明近。芳逕燕泥香，新愁上綠楊。

赤棗子

秋日西樓晚眺

風力峭，雁聲寒，象管鸞牋鎖日閒。獨倚危樓凝望處，淡烟疏雨暗遙山。

蝶戀花

卽景

重到舊時游冶處，花底無人，花外流鶯語。翠幌低垂深院宇，落紅幾片隨風舞。依舊雕闌橫玉礎，一角斜陽，漸下西窗去。惹起新愁紛似絮，和雲直到天涯住。

點絳脣

瑤華閣詞鈔補遺

久不得嘉定諸姊信，詞以訊之。

盼斷雙魚，不知尺素從何寄？水雲迢遞，難得相思字。十二紅闌，寂寞和誰倚？當年事，而今猶記，只是愁難洗。

鬢雲鬆令

譜瑤笙，凭綺牖，誰捲湘簾，微露纖纖手。又是井梧搖落後，霜葉紅肥，秋老黃花瘦。綉慵時，嗙倦候，薄醉旋消，羅袂輕寒透。漫說離情濃似酒，爲問西風，「吹冷盟鷗否？」

南柯子

風裏荷香細，庭前露氣清，銀蟾朗徹透疏櫺。笑指粉牆角，倍分明。人影當窗見，簫聲隔院聞，常儀嬌小太憨生。閒約雛鬟，月下撲流螢。

採桑子

閨中秋卽事

百年難得中秋月，又團圓。人又團圓，一碧長空轉玉盤。重逢二八嬋娟面，倦倚雕闌。醉倚雕闌，金粟香中笑語歡。

秋光皎潔逾前度，花影屏山。竹影屏山，香露沾衣不覺寒。瓊樓玉宇知何處，坐到更闌。話到更闌，如此良宵再遇難。

銷窗寒 銷寒第三集

寒蟹

歲晚村荒，日斜潮落，凍開湖嘴。蘆根吐沫，又聽爬沙聲細。愛雙蟹，霜濃更肥，橫行那識漁人計，任筠筐罩住。寒蒲縛好，賣來城市。還憶瓶花底，記解甲吹香酒邊親遞。秋光過了，又被釀成秋意，便無腸離情未諳，稻梁也合思故里。負頻年獨數尖團，盼到寒燈裏。

鷓鴣天

三載京華語守株，馮媛依舊食無魚。貂裘已敝黃金盡，風雪迎人返故廬。纔息影，又飢驅。歸遲別速怨征車。欲將眠食殷勤囑，生恐啼痕染客裾。

菩薩蠻

翠禽啼破相思夢，紅蕤一角鮫珠凍。好夢耐尋思，生憐入夢時。梨雲容易散，不管柔腸斷。強起試妝遲，眉愁怕鏡知。

水龍吟

題聯司馬夫人遺照

蘭因絮果茫茫，丹青留得曇花影。低鬟凝睇，弄珠無語，內家妝靚。見說當時天孫下嫁，璇宮春永，羨比肩靈匹。畫眉佳偶，期白首雙棲穩。惆悵綵雲易散，證香盟神傷荀令。天人標格，春游曾見。夫人游臨園，曾仰丰采。披圖重認，斂鳳分飛，鏡鸞孤舞，情天難問。料紅樓碧落雲魂月夢，盼青禽信。

蝶戀花

題蛺蝶圖

鳳子低飛芳草逕，一碧陰陰，軟襯苔痕潤。露挹風翻香夢冷，六朝餘韻沾金粉。點筆吟窗添畫景，綠愁紅傷，花事成銷凝。不管春醒慵未醒，向人舞倦翩翻影。

步蟾宮

秋夜不寐，有懷黛華姊

珠簾綉闥人聲悄，任落葉滿塔慵掃。西風颯颯雨蕭蕭，更添起離愁多少。屏山倚徧閑情繞，問誰識此時懷抱。夢中剛是話分攜，却又被花冠催覺。

金縷曲

送外

垂老何堪別，况迢迢閩南冀北，山川重疊十萬腰。纏同轉餉，又值炎威酷烈。早夢繞玉京瑤闕，輸與閒鷗。

瑤華閣詞鈔補遺

眠浪穩。歎勞生銷盡輪蹄鐵，漫青鏡添華髮。催歸莫負鶻啼切，更誰憐，傷貧念遠，寸腸千結。看碧成朱還自笑，常恐福因才折，容易過，早春時節。說與旁人渾未省，待宵來，細訴多情月。凝望處，碧天闊。

踏莎行

春游

倩影迷離，東風料峭，清明過後園林好。桃花波暖泛輕舟，烟絲無力縈蘭棹。病酒心情，傷離懷抱，畫屏展翠春山曉。擬將幽怨託朱絃，曲終不信知音少。

前調

暮春

蝶粉猶酣，鶯花漸老，碧雲望斷魚書杳。連宵有夢踏莎行，柔魂綠繞池邊草。貯月林深，題鉤石巧，墮紅糝徑無人掃。歸來倦倚茜紗窗，博山香燼餘烟島。

金鞠對芙蓉

自題桐陰待月圖

斷鴈雲暗，蛩喧雨露，華涼沁空庭。正微醒乍醒，
笛弄淒清。轆轤金井桐陰晚，剪西風作盡秋聲。墜歡何
處，盟寒舊日，夢瘦而今。夜深薄袂冷，向綠天影裏，
敲竹低吟。恰爐溫鵲尾，燈暈花身。素娥不解相思苦，
照離人直恁分明。畫闌凭偏，無聊心緒，說與誰聽。

相見歡

隔花清漏沈沈，又三更。祇恐夜寒指冷，罷調笙。
庭月滿，簾慵捲，雁聲聲。知否有人欹枕，夢難成。

江南好

人別後，又是探梅時。風送歸雅栖不定，阿誰花底
掩雙扉。驚起翠禽啼。深院靜，簾捲避寒犀。羌笛數聲
吹夢斷，屏山一角玉蟾低，冷露濕苔衣。

隨園女弟子詩選序

兌爲少女，而聖人繫之以朋友講習，雖爲中女，而聖人繫之文明以麗乎正。葛覃卷耳，首冠三百篇，女子之能詩，宜也。

聖朝文教昌明，坤貞協吉，名門大家，皆沐二南之化。隨園先生，風雅所宗，年登大耋，行將重宴瓊林矣。四方女士之聞其名者，皆欽爲漢之伏生夏侯勝一流，故所到處，皆斂衽扱地以弟子禮見。先生有教無類，就其所呈篇什，都爲拔尤選勝而存之，久乃哀然成集。攜過蘇州，交穀付梓。穀辭曰：「先生此舉，真盛德事，第中有碧珠意珠二人，皆穀侍者，年幼初學操觚，不敢與女公子及諸夫人並列。」先生笑曰：「當年齊桓晉文，合諸侯時，同盟者豈皆魯衛大邦，竟無邾莒附庸執玉帛而來與會者耶？子何所見之狹也。」穀不能辯，遂就其原本以付梓人。

嘉慶丙辰夏五月新安汪穀心農氏序。

隨園女弟子詩選

目錄

卷一

席佩蘭 孫雲鳳

卷二

金逸

卷三

駱綺蘭 張玉珍 廖雲錦 孫雲

卷四

鶴

卷五

陳長生 嚴蕊珠 錢琳 王玉如
陳淑蘭 王碧珠 朱意珠 鮑之蕙

卷六

王倩 張絢霄 畢智珠 盧元素
戴蘭英 屈秉筠 許德馨
歸懋儀 吳瓊仙 袁淑芳 王蕙卿
汪玉軫 鮑尊古

隨園女弟子詩選 卷一

席佩蘭

字韻芬，洞庭山人嫁常熟孫子瀟原。

湘孝廉兩人工詩，爲一時佳耦。著有長真閣詩稿。

稿

刺繡

手擘香絨一縷輕，殷勤揀取衆芳名。紅顏大半霜前落，不繡芙蓉繡女貞。

月夜

高卷湘簾侍月明，尋詩不覺到深更。一輪皎潔當空照，萬里無雲夜氣清。

柳絮

白似輕霜軟似綿，東風飄泊最堪憐。不如點入桃花水，化作浮萍轉得圓。

思親

隨園女弟子詩選

卷一

十五年無一日離，那堪睽隔兩旬期。昨宵枕上思親淚，猶夢牽衣泣別時。

同外作

水沉添取博山溫，一院梨花深閉門。燕子不來風正靜，小樓人語月黃昏。

惜別

舍却韶光作遠遊，天涯何處覓封侯。忽忽柳絮催春老，默默桃花替客愁。曉夢正酣鶯囀谷，晚妝初罷燕歸樓。黃昏又恐姮娥笑，月到珠簾不上鉤。

聞鐘

坐擁寒衾思悄然，殘燈挑盡未成眠。紗窗月落花無影，只有鐘聲到枕邊。

送春

碧桃一樹絳雲飛，瘦却紅情綠轉肥。怪底東風無

氣力送春歸不送人歸。

寄衣曲

欲製寒衣下剪難，幾回冰淚洒霜紈。去時寬窄難憑准，夢裏尋君作樣看。

商婦曲

別來歲月似江深，江上孤帆是妾心。一片春光無處買，不知何用覓黃金。

望外逾期不歸

記得扁舟放槳遲，殷勤問取早歸時。忽看紅樹青山影，已負黃花白酒期。情重料非言恁悅，愁多莫是病支離。一緘手寄難憑准，豈是橋頭賣卜知。

喜外竟歸

曉窗幽夢忽然驚，破例今朝雀噪晴。指上正輪歸路日，耳邊已聽入門聲。縱憐面目風塵瘦，猶覩襟懷水月清。好向高堂勤慰問，敢先兒女說離情。

感燕巢於舊壘

琴瑟社鼓打新晴，海燕來時繞屋鳴。明月梨花雙

剪白，東風柳絮一身輕。爲他珠箔先期捲，知我雕梁隔歲成。縱使朱門春似海，紅絲應重故人情。

登陸

脫却風波踏地平，穿將珠顆數郵程。明明馬鐸車前響，又認閨中鐵馬聲。

曲阜

杏壇教育至今長，禮讓雍容自一方。道氣尼山瞻藹藹，金聲泗水聽湯湯。冕旒貴且臨天子，巾幗卑難拜素王。他日歸家誇弟妹，也曾親到聖人鄉。

曉行觀日出

曉行亂山中，昏黑路難辨。默坐車垂簾，但覺霜刮面。冰上滑馬蹄，膽怯心驚戰。前駭絕壑奔，後慮危崖斷。合眼不敢開，開亦無所見。俄頃雲霧中，紅光綻一線。初如蜀錦張，漸如吳綃剪。條如巨靈擘，復如女媧煉。綺殿結乍成，蜃樓高又變。五色若玉味，調和成一片。如劍光益韜，如寶精欲斂。精光所聚處，金柱天庭貫。陰氛豁然開，聲飛出還疑電。火輪絳宮轉，金柱天庭貫。陰氛豁然開。

萬象成昭燄。

除夕

官閣沉沉更漏傳，思親此夕倍淒然。夢中白髮三千里，隙裏青春二十年。殘酒傾來都是淚，寒燈挑盡不成眠。嬌兒宛轉頻相近，轉憶當時繞膝前。

夫子報罷歸詩以慰之

君不見杜陵野老詩中豪，謫仙才子聲價高。能爲騷壇千古推巨手，不待制科一代名爲標。夫子學詩杜與李，不雄卽超無綺靡。高唱時時破碧雲，深情渺渺如春水。有時放筆悲憤聲，腕下疑有工部鬼。或逞揮毫逸興飛，太白至今猶未死。豐茲蓄彼理或然，不合天才有如此。今春束裝上長安，自言如芥拾青紫。飄然幾陣鯉魚風，歸來依舊青衫耳。囊中行卷錦繡堆，呼燈轉讀紗窗底。燕晉山河赴眼前，春秋風月藏詩裏。人間試官不敢收，讓與李杜爲弟子。有唐重詩遺二公，況今不以詩取士。作君之詩守君學，有才如此足傳矣。閨中雖無卓識存，頗知乞憐爲可恥。功名最忌累學業，當時則榮歿

則已；君不見古來聖賢貧賤起。

南歸日題上黨郡署壁

一回首處一淒然，弱質曾經住兩年。呼婢留心揀妝盒，莫教人拾舊花鈿。雨後棠梨片片殘，飛來如露濕粘闌。一花一木尋常見，到得離時却耐看。

三橋春遊曲

態度天然彈袖行，旁人著眼太分明。玉顏恰映桃花色，贏得紅潮兩頰生。輕舟搖過復橋迴，偏見儂船費浪猜。通體一絲紅不著，料應知是上墳來。荒祠半圯罷喧闐，滿屋花枝照水鮮。不是彩明裙碧處，更無人釺木蘭船。不是矜嚴不是莊，梵王宮殿拜鸚王。兒家自了燒香願，一响拈花已夕陽。放槳如飛落日遲，並船相見好花枝。春遊學得新興髻，明日梳頭更入時。

楊花

凭闌一陣撲衣矜，飛向天涯何處尋？芳草池塘春寂寂，梨花院落晝陰陰。迎風欲舞佳人態，到處爲家蕩子心。一任兒童閒捉取，不堪雲鬢上頭簪。

茉莉

好花多上美人頭，曉鏡妝臺帶露收。專夕獨應占此種，人中小玉最風流。

題梅棠册子

細寫紅情入素縑，妝成日日看何厭？綠窗記得風如剪，睡起釵橫爲卷簾。

織女歎

秋月已如雪，秋風已如鐵。孤燈耿窗機，有女當窗織。廢我一宵眼，看絲乍盈尺。廢我兩宵眼，看絲不成匹。豈不畏龜手，此心凜無逸。昨日入城提蟹筐，東隣嫁女耀豐妝。綵幣百千束，綺羅十二箱。龍章象服何煌煌，平生不識蠶與桑。歸來泣對機中錦，知與誰人作嫁裳。抽刀斷機不如寢，又聽絡緯啼金井。

夜坐

銅壺幾點漏聲稀，寶鴨香生一縷微。閉却碧紗窗六扇，不教花影上人衣。

斷腸辭（哭安兒也名一棒）

記兒生日祖邊官，錫汝嘉名曰璐安。今日蠻烟瘴雨外，一行書寄白頭看。兒生于一黨郡，汝太守公奇愛之。今春公有從征巴勒布之役，錦綉三日試蘭湯，嘖嘖爭看太守堂。玉印犀錢諸客賀，那知都作殮時裝。四月十五日淒淒，兒死重蘇哭笑齊。早識今朝重訣絕，一番悔作兩番啼。兒生而病羸，臨時頓死者屢矣。六年奉汝似曇華，喜即開顏怒不撓。博得牀頭臨別喚，一聲娘罷一聲耶。阿耶謂汝太聰明，六歲葩經誦已成。痛絕晨鐘初動後，枕邊猶聽背詩聲。青蓮詞句浣花篇，巧對分明惡識傳。頃刻花飛雲亦散，乘槎何處覓張騫。兒工于處對，如「有情憐朱玉，無處覓紅雲。」水如碧玉山如黛，雲想衣裳花想容。偶舉一聯，應聲即答。筆牀硯匣鎮前緣，終日隨身死不捐。裁得雲箋如掌大，奇思早在蔚藍天。兒初讀書，輒喜作詩，語多不可曉。日出云：「誰將烈火輪碾破蔚藍天。」十字。奴失銀盃婢覆羹，替人擔過受耶驚。而今事事皆逢怒，贏得全家哭失聲。兒愛于父，僕婢有過，懼爲主人所呵，輒諉之。兒亦樂爲人任咎，後無不流涕者。一盞元霜絕命時，誰將劍柄受唐醫。黃泉莫

恨唐醫誤，只恨耶娘誤殺兒。十八日兒病小差，進粥矣。唐醫誤，藥投以石膏，適夕瀕死。

梅花香裏竟長眠，碧落茫茫望眼穿。揀個觀音生日死，若非歸佛定生天。釋氏以二月十九爲觀音誕。

剪水雙瞳凍欲沉，雪膚還裹小紅衾。畫師縱有傳神手，難畫聰明一片心。一行魂帛寫冰紈，六

歲嬌兒字阿安。生就成童材質異，忍將無服下殤看。禮

七歲以下無服之殤，哭之以日。兒之醫慧，近于成人。雖欲一殤，也可

乎？並命鴛鴦舅與甥，九京偏有消陽情。可堪兩眼枯

如井，更聽婦親哭子聲。兒歿之次日，幼子禱兒亦死。又三日，余

不查春死五日之間，哭三殤焉。弟後兄先更可哀，一雙珠顆

落泉臺。嬌啼望汝扶持好，十日前纔斷乳來。時禱兒甫三

齡。一盃良醞奠靈牀，滴向泉臺哭斷腸。誰是酒漿誰

是淚？教兒酸苦自家嘗。

己酉三月三日，葬阿安阿祿於報慈橋，余病臥

支離，遙哭以送。自去年兒病，至今筆牀離手

四百日矣。

一對瑤林瓊樹枝，百花生日命如絲。更堪綠水流

觴日，恰是青山葬玉時。病骨不容親視窳，傷心翻借翠
爲詩。雙魂望汝歸來早，依舊扶床未可知。

暮春

十樹花開九樹空，一番疎雨一番風。蜘蛛也解留
春住，宛轉抽絲網落紅。

蟬聲

涼颼送孤響，不定是何枝。斷續成三弄，纏綿引一
絲。小樓清夢覺，老樹夕陽遲。草更看明鏡，先防鬢影衰。

潘妃

永夜宮中拜蔣神，白門一決竟逡巡。玉兒肯爲東
昏死，却勝還朝作傲人。妃本王敬則家妓。

夏夜示外

夜深衣薄露華凝，屢欲催眠恐未饜。恰有天風解
人意，窗吹滅讀書燈。

上袁簡齋先生

慕公名字讀公詩，海內人人望見遲。青眼獨來幽
閣裏，縞衣無奈澣妝時。蓬門昨夜文星照，嘉客先期喜

鷓知願買杭州絲五色，絲絲親自繡袁絲。深閨柔翰學塗鴉，重荷先生借齒牙。漫擬劉公知道蘊，直推徐淑勝秦嘉。解圍敢設青綾障，執贄遙褰絳帳紗。聲價自經椽筆寵，掃眉筆上也生花。南極文昌應一身，幸瞻藜杖拜星辰。十年早定千秋業，片語能生四海春。詩格要煩裁偽體，畫圖何敢祕丰神。願公參透拈花旨，可是空王座下人。方以拈花小影乞題。

謝竹橋禮部爲序長眞閣詩

畫省清曾玉署賓，十年早乞養親身。湖山可少先生住，才力能扶大雅輪。課子恰應如栗里，辭官非敢忘楓宸。要他戀祿忘親輩，知道林間大有人。桃李門牆早綠陰，春風噓拂到幽林。閨中也入憐才格，家食無忘報國心。一卷蠅吟投小草，六朝鴻製重兼金。天教繼起隨園老，特備詞壇兩賞音。

題薔薇使面

淺白深紅次第開，繡屏風上蝶飛回。勸君莫吸花心露，留待香閨盥手來。

以指甲贈外

摻摻指爪脆珊瑚，金剪修圓露雪膚。付與檀奴收拾好，不須背撻倩麻姑。

新年雪

寒衾戀殘夢，曉至失天明。不是雙鴛報，猶疑片月生。小窗深積素，孤石露餘清。莫訴南枝杏，年交臘未更。

春夜月

小鬟夜半推窗看，報道中庭積雪盈。曉起更無餘屑在，始知殘月昨宵明。

古鏡

一片秦時月，清光萬古新。對君原是我，知爾閱多人。難使年華駐，翻嫌面目真。深藏如不露，何處着纖塵。

賣花聲

只隔紅牆角一灣，東風吹過又吹還。何人最解關心聽，偏是檀奴勝小鬟。

十四夜月

最高樓閣最瓏玲，齊出玻璃面面屏。十里青山波

滲透；一城秋夢鶴呼醒。天無表裏皆澄澈；月在中間是性靈。萬事將圓未圓好，此情說與素娥聽。

十五夜月

吹破碧雲何處簫？一輪捧出九層霄。影如秋水無渣滓；光閃明星欲動搖。萬古不磨惟此鏡；百年幾度是今宵。願天月與人俱好，暗把心香歲歲燒。

白蓮

鑑爾亭亭影，波中一片霜。潔連根盡玉，清到葉俱香。殘月墮微白，野風生嫩涼。須知蓮界淨，才好坐空王。

桐葉落

萬綠歸新雨，翩然一葉飛。未經搖落候，先判盛衰機。暑散紅蓮沼，涼生白苧衣。人間趨熱者，輸爾最知幾。

送外入都

打疊輕裝一月遲，今朝真是送行時。風花有句憑誰賞？寒暖無人要自知。情重料應非久別，名成翻恐誤歸期。養親課子君休念，若寄家書只寄詩。

送姪婦謝翠霞歸寧

閨中宛勝竹林遊，忽動鄉情引別愁。潯服暗驚慈母線；飛花隨上美人舟。明知去路無千里，預恐歸期過九秋。我亦有親常苦別，欲留卿住忍相留。

病懷二首

坐廢晨梳倦廢眠，病人心事困人天。桃花流水剛三月；柳絮因風又一年。偶檢藥方翻繡譜，暫開簾押放爐烟。綠紗牕口屏山角，最愛清陰最惱蟬。支離無奈又昏黃，冰簟桃笙不上床。帳底豈宜燒鵲腦；鏡前偏是盼蟾光。頻添繡被疑春冷，細數銅壺覺夜長。何處微風忽吹到，牕邊幾陣藕花香。

以詩壽隨園夫子蒙東縑之報，且以詩冠本朝一語相勗，何敢當也，再呈此篇。

擬繡衰絲未買絲，前呈先生詩有「絲絲親自繡衰絲」之句。獻將彤管當金卮，絳紗反報先生幣。黃絹深慙幼婦詞，筆為掃眉常苦弱。文經擊節便稱奇，關雎偶出宮人手。竟作周南冠代詩。

三月三日隨園夫子來虞山

去歲文星降海陬，春風又見綠箋投。聲名早出千秋上，瀟灑真輕萬戶侯。花榜仙舟齊帶笑，山迎才子也低頭。金釵願拔留公住，換酒還須向婿謀。書報春江下水船，去年秋望到今年。瑞人果見長庚降，佳節剛逢上巳天。一路鶯花供鼓吹，二分蟾月伴神仙。肯移觴詠茅齋地，願獻新詩當管絃。

賀隨園夫子八十壽詩原韻十首

獨占文壇翰墨筵，九州才子讓公先。曾遊園苑真名士，愛入花叢老少年。萬里去看山不厭，一生除去酒無緣。古來誰似先生達，三十休官白樂天。小謫瀛洲玉局翁，繁華早醒大槐宮。腰惟暫折師陶令，家已生營傍謝公。花燭人看並頭白，公本旨完姻。瓊林餅待兩番紅，恰如重演梨園劇。正好登場曲未終，金石搜羅富五倉。山房日日費平章，花香每件書登案。詩句常隨月上牆，避俗客來迂竹徑。仿西湖意開池塘，名園占却千秋勝，不數橋西舊草堂。海內知交落落星，乘舟訪戴獨身輕。西清才子原天謫，南極仙翁却地行。白首還家如

寓客；金釵換酒有門生。得公占盡文人福，始覺蒼蒼不忌名。點鬼搜神總技餘，文如奇貨賈爭居。隨園著述三省翻刻。人疑陽五前朝士，客購香山近著書。瀟灑風流今未老，聰明福分古誰如。門前問字知多少，立盡袁安雪滿廬。六十生兒八十婚，阿翁生日是良辰。桃花恰對盤根李，萱草猶纏合抱椿。香茗一編爲贊禮，掃眉寸管祝長春。隨園衣鉢今堪繼，婦替佳兒作替人。漸婦工詩脫却朝衫野趣長，儒林循吏兩無妨。官以五十年猶好，詩卷三千首未蒼。相馬羣真空冀北，種花人竟老河陽。白頭小吏應相識，曾乞張顛判幾章。仙晷到處萬人招，願識朱顏老未凋。童子亦知迎竹馬，公卿爭喜解金貂。官無內外推前輩，集有詩文冠本朝。休道夕陽紅欲盡，少微星可照通宵。六朝山色展雙眉，花發常先蝶得知。野外經綸前令尹，閨中文集女連枝。袁氏三女士集。十年作官休何早，先生一簾高郵刺史即乞養母常云「女帆在順風時」。萬事先人子獨遲。天意定教公食報，蒼梧會見阿憑時。文心彈指現瓊樓，自敘平生筆未休。

習鑿齒名傾四海魯靈光殿重千秋。論閒可敵公卿貴，
比壽應教李杲愁。一管江花長不死，還丹何必海山求。

附雜作

消寒圖序

消寒圖者，屈子宛仙之所作也。問南枝於笛裏，消
息如年。盼北渚於雲中，低徊此日。雪花如掌，鶴驚珠樹
之魂。璧月當頭，人落瑤臺之想。則有湘江，嬋女天水。仲
姬錦鞵縫成，黍羔薦罷。終日守玻璃，畔畔生涯在翡翠。
罽邊剩有口脂，不離手筆。爲梅花而寫照，鈎出香魂。將
萼綠之前身，并歸疎影。其爲圖也，水天一色，人地雙清。
彤雲與錦幔齊流，玉樹共瑤籤爭映。匆匆短晷，愁量紅
綫之痕。草草寒粧，備掃青蛾之黛。倚雕闌而袖臚，玉臂
誰溫。推月枕以鬢偏，金釵任溜。爾乃添香無暇，染翰偏
勤。試點么紅，俄成一瓣。自是寒隨帶減，繡逐花增。或颺
驚四帳琵琶，或霜脆千山箏篋。或香消被底，藁砧頹玉
眠時。或泥滑街頭，侍女賣珠歸後。素縑開而雲斂，丹粉

落而春生。神來誇誤筆之奇，興到有解衣之樂。羊燈影
裏，酒酣何暇傳柑。犬吠聲中，漏盡猶聞落筆。春光半矣，
寒氣消無。數八十一瓣之梅圖，燕脂紅濕，起二十四番
之風信。芳草青抽，挂向玉樓。恰恰杏花時節，傳來繡閣。
盈盈香茗風流，以我耽吟，遙結纏綿之契。爲卿作序，欣
瞻婉孌之容。嗟乎，姬人列座，祗任遮風。姊妹連床，徒工
擁背。嚴粧乍啓，熏香傅粉之能。巧笑餘閒，射覆探囊之
戲。答曹洪之箋奏，未免倩人嫁韓偓之香奩。將無贗作。
崔徽卷上，醜紅雪以增光。延壽豪端，借黃金而生媚。凡
茲點綴，何足品題。亦有夙敏才華，素耽翰墨。吹簫有暇，
便擘蠻箋。剪綵初嫺，兼施粉本。然而物諧競病，略解丹
青。花冥露以偏慵，絮因風而愈弱。更有左家嬌女，陋寢
不升。蔡氏文姬，流離難免。眉橫遠黛，終漸松柏之真人。
比黃花，已逼桑榆之景。從來福慧，兼有其誰。此則霧鬢
風髻，蘭心薰質。靡顏不玉，人豈非仙。着手皆春，詩原是
畫。不愧梅花同影，人物雙傳。直將明月爲身，中邊俱徹。
呼之欲下，卿真姑射之神。姍何來遲，人到羅浮之夢。

謝袁簡齋先生惠香囊唾壺啓

春風入座，小草生香。偶呈彤管之章，深荷色絲之譽。正擬金釵換酒，代夫壻以相留。何期彩鷁乘潮，載先生而竟去。瞻依未遂，悵望奚勝。乃蒙仙史重來，瑤珍遠覓。飛蓬陋影，得邀瑤島之題。落絮微吟，屢入玉臺之選。如聞擊賞，示以唾壺。應與熏蒸，加之蘇合。從此心香一瓣，只在隨園。還期珠玉九天，分來茅屋。恭修短簡，用佈微忱。外蒙題小影三君，或工仲姬之簪筆，或擅清照之詩辭。並稱繡閣逸才，知出絳紗高弟。未能識面，先乞寄聲。報稱爲難，何處結三生之草感。恩有自，終當繡五色之絲。

上隨園夫子書

白下秋風，多士雲集。先生以斗南一星，照輝壇坫。一時研京練都之輩，莫不手捧盤匱，奉齊盟於下風。遙企絳帷，曷深誦誦。佩蘭深閨弱質，屢荷栽培。如授經於夏侯，忝居桃李之列。嘗獲採於孝穆，頻登管蒯之篇。感佩微忱，久鑄心版。惟是四月以來，肝疾作楚，身不離枕。

席口不離苔連。沉綿委頓中，又值子瀟病歸。既驚且憂，烹治藥石，扶持抑搔，力病任之，然體益憊矣。今幸福庇小安，而吟紅詠絮，渺若隔生，無以仰副期望，思之惘然。惟病中呻吟，語及補謝賜縑之什，錄塵左右，望笑而覽之。子瀟病起，卽補撰先生壽詩，不能妃青儷白，遁而爲絕句。然俶詭僞儻，頗爲平生難得之境，亦先生福慧有以啓之。未審正法眼藏，以爲何如。前蒙頒賜大集，業已露盟蘭薰，朝披夕諷。但有詩無文，——雖高文典冊，原非閨閣所須。然登山者，不歷九折之坂，不甘叱馭而回也。觀海者，不臨極深之庭，不甘自厓而返也。且以韓潮蘇海之筆手，而但見之聲韻格律。譬如食魚而僅得王餘，求玉而祇獲片毀。終覺匡廬全面，未盡仰窺。特栽培有素，敢爲發棠之請。如蒙補發其半，俾奉爲全璧。則女誠七篇，周官一冊，未必非埽眉不櫛之人，從容造就之圭臬也。冒昧干請，無任悚惶。

孫雲鳳字碧梧杭州孫令宜廉使之長女嫁程氏

再游飛雲洞貴州道中

倦客欲休息，驅車問靈境。谷口采樵人，指是飛雲嶺。古洞響寒泉，高峯明返景。松濤從空來，感此動清警。昔我登此山，垂髮始覆頸。杯底吸霞光，溪邊捉雲影。當時雖無知，脈脈心已領。撫樹發長嘆，歲月直俄頃。俯仰心豁然，天風磬聲冷。

曉行

殘月曉霜鐘，馬蹄黃葉路。日出不見人，溪聲隔烟樹。

古意

銀燈結雙蕊，蟾子上裙帶。早起洗啼粧，凝歡畫長黛。

聽泉

聽泉松林間，尋源清溪裏。山光生薄寒，暝色上秋水。孤月帶霧升，漁歌隔烟起。獨立望閒雲，悠悠何所止。

晚溪

日落烟霏霏，渡頭行客少。山月出林遲，幽禽歸樹

早，水面清風來，微波動荇藻。余欲弄扁舟，悠然學垂釣。

題淨香女史小照

新月簾鉤前，楊柳春風裏。靈秀出鉛華，微芬托蘭芷。佳句誦百回，美人隔千里。盈盈不相見，把卷空仰止。披圖慰素思，相去不盈咫。日色槐影中，蟬聲柳陰起。忘言對芙蕖，幽懷澹如此。獨立清風來，遠香在秋水。

山行

曉從春山行，殘月挂高樹。鐘聲出烟林，人語隔溪霧。幽壑多奇花，絕壁飛瀑布。今來秋已深，木葉雜風雨。雞啼似有村，雲深不辨路。風景迥不同，陰晴亦有數。去路正遙，悠悠歲云暮。

題萬近篷先生拈花小照

先生抱高懷，丹青繪幽事。日坐梅花中，幽香繞吟思。現此神仙身，傳彼如來意。持與門人題，屢月無一字。靜坐嘿思之，乃爲題所累。得魚筌可忘，到岸筏可棄。詩理與禪機，其原本無二。此語是耶非？微笑以花示。

媚香樓歌

媚香樓，明末秦淮妓李香君之粧樓也。香君初爲歸德侯生聘妾，被選入宮，媚香樓竟廢。

秦淮烟月板橋春，宿粉殘脂膩水濱。翠黛紅裙競粧裹，垂楊勾惹看花人。香君生小貌無雙，新築紅樓喚媚香。春影亂時花弄月，風簾開處燕歸梁。盈盈十五春無主，阿母偏憐小兒女。弄玉雖居引鳳臺，蕭郎未遇吹簫侶。公子侯生求燕好，輸金欲買紅兒笑。桃花春水引漁人，門前繫住游仙棹。奄黨織兒想納交，纏頭故遣狡童招。那知西子含顰拒，更比東林結社高。樓中剛耀雙星色，無奈風波生頃刻。易服悲離阿軟行，重房難把臺卿匿。天涯從此別情濃，錦字書憑若個通。桐樹已曾棲彩鳳，綉帷爭肯放游蜂。因愁久已拋歌扇，教坊忽報君王選。啼眉擁髻下粧樓，從今風月憑誰管。柘枝舊譜唱常筵，部曲新翻燕子箋。總爲聖情憐靚觀，桃花宮扇賜簾前。天子不知征戰苦，風前且擊催花鼓。阿監潛傳鐵鎖開，美人猶在瓊臺舞。銀箭聲殘火尚溫，君王匹馬出宮門。西陵空見宮人泣，南內誰招帝子魂。最是秦淮古

渡頭，傷心無復媚香樓。可憐一片清溪水，猶向門前鳴咽流。

古意

庭空月皎蝙蝠飛，當戶女兒愁鳴機。投梭太息起拜月，霜色在樹風生衣。千里盈盈不得語，捲簾仰望星河稀。

和隨園先生生挽詩

今春湖碧山縈綠，問字車來傍林麓。丁令纔欣化鶴歸，剡溪又悵回舟速。小病先徵挽句看，先生懷抱海天看。淵明歌與司空藁，曠達千秋鼎足觀。玉堂宴罷歸山早，著書萬卷傳梨棗。我是門牆聽講人，殘膏剩馥沾多少。幾番魚素逐江湖，知住鶯花廿四橋。春酒不曾辭醅酌，元言方且賦逍遙。才人物外多游戲，自云化蝶遙傳示。欲爲今日眼前歡，預借他年身後事。自有人間不朽文，下爲河岳上卿雲。卽今絳帳攀轅客，筆當戈揮返夕曛。

巫峽道中

蜀門西望處，直是上青天。路出重雲裏，人來夕照邊。秋風三峽水，暮雨百蠻烟。丞相空祠廟，千秋一黯然。徑仄盤渦迴，泉流峭壁分。晚風牛背笛，殘雨馬頭雲。故壘生新草，荒碑失舊文。客程行未已，杜宇莫教聞。天外幾歸舟，征人悵遠遊。猿聲知客恨，燈影散江流。月正千山白，風號萬壑秋。巴歌何處起，不寐迴添愁。秋江木葉下，客子獨徘徊。瘴起濃雲合，灘鳴驟雨來。淒涼庚信賦，寂寞楚王臺。俯仰乾坤裏，悲歌亦壯哉。

山行

客思西風裏，車塵暮靄間。蟲聲黃葉路，人影夕陽山。鳥去一何速，我行猶未還。臨溪羨漁者，幽意獨閒閒。

聞蟲

梧桐搖落後，蟲語傍苔幽。以爾呻吟苦，添余寂寞愁。西風半床月，涼雨一燈秋。孤館難成夢，憑闌感舊遊。

登韜光寺

靈鷲峯頭寺，清幽少俗氛。竹深人不見，木落鳥成羣。海氣蒸紅日，山泉瀉白雲。我來遊未足，莫遣暮鐘聞。

舟中度歲

連朝風不定，守歲泊江船。遠水落殘照，孤城生暮烟。凍雲催淑氣，鄉思入新年。杯少屠蘇味，村醪點客筵。

樊城遇雨

暝色樊城驛，車疲未得過。雨深山霧重，樹雜野雲多。漁火春明岸，樵薪晚渡河。天寒風更急，前路復如何。

入峽

風急暮烟起，水寒殘照沉。插天雙壁峭，入峽一江深。見雁多秋思，聞猿動客心。巫山霜信晚，木葉尚森森。

乍晴

黃葉霜前樹，斜陽雨後村。野花依徑草，流水到柴門。牧笛寒山暮，漁燈極浦昏。乍晴無限景，吟眺倚秋根。

常德道中

昔年游賞地，今日喜重經。籃影知漁市，茶烟認草亭。江沙連月白，岸柳待春青。不盡吟邊思，征車且暫停。

漢陽

木落西風急，秋深客思多。半帆雲夢雨，一片洞庭

波。舊賦悲鸚鵡，空江弔汨羅。重來復何日？惆悵此經過。

登高示蘭友及諸弟妹

九日同登百尺臺，茱萸遍插菊花開。清沙白孤帆遠，露冷江空一雁來。人事獨悲秋漸老，少年須惜水難迴。山川信美非吾土，欲賦登樓愧少才。

征程

春來江上鴈知還，我尙驅車道路間。芳草極天迷客思，白雲何處是鄉關。地卑城郭多臨水，縣小人家半住山。聞說西行多石徑，喜無塵土撲征顏。

和隨園太史留別西湖元韻四首

撲簾飛絮一春終，太史歸來去又匆。把菊昔爲三

徑客，盟鷗今作五湖翁。囊中有句皆成錦，閨裏聞名未

識公。遙憶花間揮手別，片帆天外挂長風。巾車踏遍

九州塵，用先生元唱爭識先生氣味真。問字每多攜酒客，

開緘大半索詩人。江湖放浪成高士，草澤羸疎作幸民。

羨殺小倉山館裏，鶯花應勝故園春。行行無計挽歸

初，勉賦驪歌莫見嘲。蛻跡功名縱詩酒，放情山水樂漁

樵。暫來翻作家鄉客，欲去難忘江上潮。聞道西湖游未足，叮嚀花柳莫輕凋。未曾折柳倍留連，縱得重來又隔年。遠水夕陽青雀舫，新蒲春雨白鷗天。三千歌管歸花縣，十二姻緣屬散仙。安得講筵爲弟子，名山隨處執吟鞭。

隨園先生再游天台歸招集湖樓送別分得歸

字

先生矍鑠世應稀，又向湖樓設講帷。鄉井幾回扶

杖到，天台兩度看山歸。義之虛席推前輩，夢樵伯呼

先生爲前輩坡老留船泛夕暉。時泛回太可畫船更指林巒

約來歲，桂花風裏好搢衣。

代家嚴和盧抱經學士重游泮宮詩

白髮蕭蕭尙愛吟，問奇車每到門停。衡文我昔勞

前輩，先生曾評余會卷聽講人應滿後庭。佳句讀來知感

慨，高堂重憶舊丁甯。雞窗芸閣當年事，回首依然燈火

燐。歲星朗照泮宮牆，盛事欣傳翰墨場。海鶴還鄉認

城郭，雪鴻留爪印文章。龐眉來問新廊廡，錢塘學新葺魯

殿羣瞻舊棟梁。垂老自尋游釣處。朝陽光遜夕陽光。
回頭却憶着青年。遠比先生緩著鞭。先生入泮年十六。余年二十三始入。未及追陪遊泮水。空勞俯仰對雲箋。難酬
白雪尊前句。會見瓊林後日筵。許我鬢宮隨故武。徵詩
先向玉堂仙。

宮詞

淚濕紅綃欲斷魂。昭陽歌舞孰承恩。西宮盡日無人到。春雨梨花畫掩門。

出峽

兩岸啼猿厭客聞。西風霜葉曉紛紛。櫓聲一夜出巫峽。十二碧峯空白雲。

和隨園先生告存元韻七首

逼歲書來索句忙。揮戈真已返斜陽。文人別有延齡術。翻笑軍中續命湯。稚子率衣阿姊扶。全家都住小蓬壺。梅花香裏屠酥酒。一幅仙人避劫圖。爆竹聲中萬戶烟。迎春送歲各纏綿。成仙蝙蝠不飛去。遊戲人間幾百年。嶽志河經手著成。來程去路甚分明。游仙

却與游山異。久東行裝不得行。不用丹砂更駐顏。春風長在小倉山。者宵好度黃楊厄。過却浮生第一關。老去江淹筆更靈。耳無重聽眼還明。隔江昨夜占天象。南極星兼太白精。歲燭搖紅照白頭。修書遍寄報添籌。五更攔筆先生笑。明日先寬弟子愁。

題杖鄉園

問字先攜小照回。謝公屐又印蒼苔。後屏却聽家人問。杖者如何不杖來。

題席佩蘭女史拈花小照

想承衣鉢侍蓮臺。親見天花落又開。詩境忽從禪境悟。不教散去却拈來。天然小像寫丰神。國色無雙四座春。應笑西湖諸弟子。從游不及畫中人。

附雜作

湖樓請業圖序

夫清風明月。東坡賦赤壁之游。柳浪椒園。右丞作輞川之畫。況乎門前積雪。久深問道之心。座上春風。曾

被吹榮之化，宜其徘徊舊地，繪寫新圖矣。彥兮叔氏，一樓小築，三竺遙鄰，占人世之仙都，傍塵寰之佛土，平挹孤山之翠，斜當夕照之峯，曉日消烟，明湖開鏡，花光乍滿，紅侵遠寺之牆，草色初齊，青接長堤之柳。於是登斯樓，覽斯景，拂吟床，披祕笈，時翻書帙，簾穿燕子之風，亂撲窗紗，檻落桃花之雨，刻意下丹黃之筆，冥心搜金石之文，亦既尙友古人，自求心得矣。然而開卷有迷津之嘆，漆室無燈，出鐘起叩響之思，虛心似竹，則有隨園先生者，星占太史，殿是靈光，華岳名高，海潮才大，落墨展雲龍之勢，變化無窮，飛身挾海鶴而游，烟霞自在，數載傾心，一朝北面，求師念切，果下榻於斯樓，好古情殷，喜析疑於此日，以棲遲之別館，作安樂之行窩，汲汲從游，殷殷求益，牙琴鼓處，遙分畫檝之聲，絳帳開時，倒入春波之影。經當口授，受九天咳唾之珠，法到真傳，下三匝兜羅之拜。由是眼前之鳶飛魚躍，總屬天機，樓外之水色山光，無非名理。既而山陰棹返，謝眺樓空，聽幽庭風竹之聲，恍疑杖響，憶明月屋梁之句，莫接顏溫問字樽

間，談經席冷，海風一曲，雲水千重。藉以丹青，紀其色笑，不特圖因事載，行且地以人傳矣。鳳曾侍蒙莊，慚非惠子，叨爲小阮，許附竹林，同登泛海之航，知君得濟，若問傳燈之業，愧我難明。對卷尾之佳篇，溯湖頭之陳蹟，欲伸素願，敢綴一辭，得伏生古壁之經，更望傳於女子讀逸少蘭亭之序，當亦有感於斯文。

湖樓送別序

夫太史有採風之職，而周南多女子之詩。此夏侯所以授經義於宮中，東坡所以遇名媛於海上也。況乎西湖之勝，具見前人，北海之樽，重開今日哉。我隨園夫子行年七十，婦孺知名，所到四方，徂敘引領。庚戌四月十三日，因停掃墓之車，遂啓傳經之帳。等摳衣負笈，問字登堂，一束之禮未修，萬頃之波在望。暢幽情於觴詠，雅會耆英，作後學之津梁，不遺閨閣，持符召客，女弟子代使者之勞，置酒歌風，武夷君作幔亭之會，羣季乏地主之儀，能無愧也。先生具門人之饌，有是禮乎？其時風雨有聲，烟波無際，山花留紅，堤草縈綠，不櫛進士，競

傳擊鉢之詩，掃眉才人，獨逞解圍之辯。或真珠密字，寫王母之靈飛，或吐綠攢紅，畫仲姬之花竹。率同小妹，濫廁諸君，既衣香鬢影之如雲，亦柳絮椒花之滿牘。雖偶僂以效顰，有如獻醜，勉趨承而引領，愧不成章。敢進一詞，用呈微志，記此日一卮別酒，餞湖邊小憩之樓，待明年千里揚帆，掃江上來時之路。

菩薩蠻

玉階露冷蟲聲咽，珠簾影透玲瓏月。晝夜夢難成，秋窗不肯明。柳眉花似臉，鎮日深閨掩。人立小闌干，鶯花春正殘。

如夢令

睡起捲簾無力，薄暮曲闌閒立。細雨勒輕寒，一陣落梅風急。堪惜堪惜，吹散滿庭香雪。

蝶戀花

一枕梨雲天欲暮。春夢模糊，又被啼鶯妬。髻子半偏無意緒，金爐慵把沉檀炷。留得殘春無繫處。怪底東風吹向天涯去。蝶粉暗粘簾外絮，黃昏幾點催花雨。

訴衷情

紅樓夢斷曉啼鶯，綉幕峭寒生。二月江南春晚，深巷賣花聲。苔蘚薄，柳烟輕，最淒清。昨宵風雨，今朝寒食，來日清明。

少年遊

淡掃蛾眉，輕盤螺髻妝罷。更塗黃雲母屏前，水晶簾外。荷氣雜衣香。晚來放艇波心去，獨自覓清涼。笑摘青蓮，故驚女伴，隔水打鴛鴦。

臨江仙

書永深閨簾不捲，紗窗風裊爐烟。最無聊賴是今年。夜闌消夢雨，春盡落花天。記得陽關低唱處，河梁回首潸然。從來聚散總前緣。行雲無去住，日月有虧圓。

少年遊

著柳烟濃，送春雨細，猶覺峭寒生。簾影參差，綠陰長畫，枝上杜鵑聲。去年今日闌干外，日暖午風輕。紅摘櫻桃，青拈梅子，何處寄離情。

浣溪紗

舊夢依依睡起遲，春慵無力試單衣。薄寒天氣賣花時。細雨輕烟鶯百轉，暖風斜日燕雙飛。畫樓東畔小堂西。

賀新涼 題隨園先生歸娶圖

驄馬東風立，有丹青公然留住，少年顏色。閒把生綃重展處，脈脈自憐陳跡。回首憶玉堂瑤席，故我今吾誰解認？喜妝臺猶有人能識，春夢語，感而述。金蓮寶炬人難得，況而今杖朝已近，尚調琴瑟。如此恩榮如此壽，千古才人第一，真不羨蓬萊仙客。知隔幾滄桑，自念門人生晚，從何說長短句，聊塞責。

柳梢青

紅藥東風，綠陰疎雨，何處鳴鳩？門掩殘春，簾垂清晝，人倚高樓。綿綿不斷離愁，似芳草萋萋遍洲。天若有情，月如無恨，水亦西流。

隨園女弟子詩選 卷二

金逸 字纖纖蘇州人嫁陳竹士秀才亦詩

人也年二十五歲而亡有瘦吟樓詩草

擬柳柳州雨後曉行獨至愚溪北池

雲去楚天涼，曉行愜幽獨。日氣澹荷風，烟光散喬木。偶然池上來，溪流爲誰綠？

和竹士曉遊鄧尉作

一聲笛破晴空烟，欲明不明天。樹頭殘月白，墮水湖上曉山青。入船風梵飄香落雲外，波光擁棹來門前。四圍皆雪失大地，徜徉絕頂疑游仙。

初夏

繡簾風影警花冷，莊蝶幾分夢亦醒。一縷茶烟人不到，綠陰如水漾空庭。

裁衣曲

秋戍寒，秋風薄，裁衣肥瘦依稀度。重重銅斗熨，細細燈花落。殷勤檢點舊啼痕，忍留紅淚傷郎情。

雪後仁竹士歸

空響不成夢，起來思依依。卷簾映晴雪，風急時霏霏。曉色不離樹，嫩寒猶上衣。佇子一樽酒，常看梅花飛。

峇口曉發

濕烟曉散吳城青，翠峯插天如畫屏。小舟一葉飛蜻蜓，側風泠泠吹袖冷。活火船頭煎綠茗，半湖秋水樓臺影。

隨園先生來吳門招集女弟子于繡閣余因病未曾赴會率賦二律呈先生

西湖續會許相從，閨閣咸欽大雅宗。我豈能詩慚畫虎，人言此老好真龍。竹聲當牖涼三徑，雲氣深潭幻一峯。未得追隨女都講，春愁偏欲惱吳儂。柳條不肯

繫春光，返棹天台。餞別觴。青眼早深知。白頭猶是愛才忙。湖堤草色催新夏。驛路蟬聲到夕陽。願得年年芳訊至，許教桃李附班行。

病起

碧梧移影上林扉，西院無人曉日微。病起名香焚不得，花陰小立當薰衣。

綠窗

綠窗午倦放簾鉤，小榻堆書當枕頭。落鴈有情呼舊侶，寶奩無賴喚新愁。花房鳳子晴留夢，竹院棋聲冷帶秋。駒隙年華容易度，西風扶病強登樓。

曉起卽事

忍將小病累親憂，爲問親安強下樓。漸覺曉寒禁不得，急將簾放再梳頭。

採蓮曲

蒲葵扇冷不知秋，花外清歌何處樓？十二雛鬟嬌小甚，鴛鴦飛過也回頭。

曉起桂花下作

夢冷疎曉曉雨新，鬢雲撩亂起侵晨。涼塔細認弓鞋跡，先我來探已有人。薄日烘花花氣醇，濃香裹住露華新。木樨不是因寒勒，有意遲開待病人。

一 梧齋與竹士夜談去後作

一簾細雨不成絲，挽塔燈前與論詩。家近不歸如夢遠，花寒未放識秋遲。心灰久病拈針嫻，眉蹙新愁只鏡知。約略聽他雙燕語，腰肢減瘦比來時。

借竹士聯句論詩

談何容易說工詩，（基）事在千秋筆一枝。人道蒹蘆依故樣，（逸）天生花葉竟誰師。性情以外無傳作，（基）唐宋之間有等差。今日放言狂不諱，（逸）識君已恨十年遲。（基）

秋詞

瑤塔浸月華，心怯花鈴警。鴛鴦知未眠，不定枯荷影。池塘明水烟，幽夢閒來去。隔牆刀尺聲，冷答秋蟲語。

次竹士韻

梧桐疏雨響新秋，換得輕衫是越紬。忽地聽郎喧

笑近帕羅佯掉不回頭。

題吳玉淞太史除夕四客游山圖

浮空金碧樹模糊，誰倩袁安作畫圖。歲暮如君閒未得，梅花爲我肯開無。溪流殘雪春聲澁，松吹斜陽僧影孤。十萬吳城小兒女，討春只解醉屠蘇。一棹移來遠俗氛，半天鈴語下方聞。青緣臘盡開雙屐，定被山靈識四君。小閣烟寒猶鬪茗，斷崖木落不留雲。依稀記得前遊迹，只是清幽判十分。

竹士同作

相期行樂及佳辰，洗盞繁華趣逼真。舟聽所之隨兩槳，客來不速得三人。松盆煖熱聊從俗，樹樹荒寒未到春。爲語笙簫舊時侶，阿誰今夕是閒身。徜徉疑是小游仙，踏凍人宜晚霽天。殘雪店尋前度酒，夕陽鐘破兩溪烟。只孤僧外無餘子，再一回來已隔年。他日歲除必記取山塘倚棹莫雲邊。

竹士以勉耘齋席上同人分韻詩索和即次空

山無人水流花開元韻

隨園女弟子詩選

卷二

枯楊池館響棲鴉，招得姮娥做一家。綠綺攜來橫膝上，夜涼彈醒水仙花。護花鈴警繡簾風，蘭炷星星欲燼紅。一縷詩魂扶不起，茫茫殘月逼床空。無端吹上雪盈頭，十二闌干十二樓。不解鏡中人意思，肯將紅淚替人流。沉沉巷柝二更纔，聞道檀奴帶醉回。知有新詩忙起讀，銀缸不亮一花開。

歲暮張子白進士過訪竹士

歲云暮矣走天涯，舊雨相逢便是家。拜墓殷勤移桂棹，探春消息問梅花。催詩林吐蛾眉月，醒酒香浮雀舌茶。佳會難逢愁遽別，怪儂夫婿緒如麻。

寒夜待竹士不歸讀紅樓夢傳奇有作

輕陰釀雪逼人寒，宛轉香消瑪瑙盤。待爾未來拋夢起，遣愁無計借書看。情惟一往深如許，魂不勝銷死也拚。彈盡淚珠猶道少，細思子我甚相干。

題許儼瓊女史薔餘小草

研史鎔經鑄豔詞，風騷正格賴扶持。無才慚我貂難續，有夢尋君雁未知。殘雪白飛楊柳笛，東風紅入海

棠枝何修嫁得汪倫侶，潭水深情送別時。

補和方大章胡眉峯

如絲烟篆袅柔腸，臥近幽蘭一榻香。鸚鵡不知人病久，朝朝樓上喚梳妝。

與姊別後頗無意緒感舊述懷得七律十六韻

少小依依似雁行，可憐往事不堪詳。畫樓人去埋塵冷，孤艇潮來載夢忙。記得承歡工雅誼，有時撥悶鬪迷藏。讀書紅剪三更燭，禮佛清燒一瓣香。賭繡當窗隨臥起，種花隔夜費商量。嬌癡撲蝶攜諸弟，好勝敲棋背阿娘。茗盃笑看雙影瘦，詩筒拚負十分狂。偶纏薄病親調藥，驟覺新寒教換裳。紈扇並裁聊擬月，錦箋私擘獨開箱。聽鐘湖上秋停櫂，踏雪壚頭曉舉觴。荆樹方期終繞膝，藍橋忽漫賦催妝。羹湯洗手慚爲婦，鴻案齊眉各倚郎。暫喜歸寧姜被暖，旋驚握別暮山蒼。如儂眞被浮名誤，怪姊甘將舊業荒。昨日庭幃成把晤，今宵燈火暗淒涼。一封寄與相思淚，拆向蘭闌定斷腸。

次韻胡石蘭女史四絕

惜花春起早

搖夢金鈴語夜風，春光二月算將終。花枝破曉關心數，已落猶開一朵紅。

玩月夜眠遲

月明如水一庭深，小榻移來夢嬾尋。立盡五更花氣重，不知涼露濕鞋心。

掬水月在手

竹林籠袖碧雲寒，池上幽尋夜漏殘。癡性未除潛弄水，捉將明月喚郎看。

弄花香滿衣

東風多少阿環肥，在手花枝芳以非。封女似嫌蘭麝俗，亂吹紅雨著身飛。

春寒

冷香吹入繡簾中，新換羅衫避曉風。小雨未來斜照澹，落花猶得暫時紅。

月夜

積水一庭白，梨花寒不寒。東風扶病魂，遍繞雕闌

干烟明苦漬暈，露重林生瀾。羅袂薄如此，抱琴還一彈。

吳素雲女士寫秋芳圖寄其仲兄蘭雪法時帆

學士見而愛之，以曹墨琴夫人手書洛神賦

冊易去甲寅春日蘭雪過吳門屬詠其事

將書易畫未嫌慙，好事他年著美談。我意不如仍

付與兩瑤函，供一詩籠。晴帆先生有詩齋清狂竊笑應

無加，讀書居然願望奢。乞寫一枝持贈我，病維摩瘦似

秋花。

素雲女士爲其兄蘭雪畫杏花雙燕圖

一枝紅雪豔生成，小燕呢喃話曉晴。不向繡窗披

畫卷，朝來忘却景清明。多君早負謫仙才，合醉瓊林

第一盃。明歲酒邊如畫裏，簪花人共燕歸來。

讀香蘇山館集有題杏花雙燕圖詩兩絕句復

和二首

分明深巷買來遲，恰勝娟娟帶露時。是否天涯游

子淚，新紅彈上杏花枝。翠羽紅襟映夕暉，畫圖寂寞

伴書幃。故園雙燕應相語，三度來尋人未歸。

喜簡齋夫子枉過里門奉呈

格律何如主性靈，早聞持論劇清新。惟公能獨開

生面，此席愁難有替人。比佛慈悲容世佞，得仙居處與

花隣。古來著作傳多少，那似袁安見及身。

記夢

膏殘燈燼夜淒淒，夢淡如烟去住迷。斜月半溪人

不見，忍寒小立板橋西。

次韻李石桐山人夜坐聞遠水聲

何處發空響，迢迢遠水聲。窗虛來斷續，風定去分

明。過石蘚花冷，到溪鷗夢清。夜闌渾不寐，傾聽道心生。

柘塘春步

花臥東風柳拂烟，晚晴隨步過村前。柘塘一夜催

花雨，新水如雲綠上天。

烟隴探梅

問春消息往來頻，瘦影橫斜曲澗濱。冷殺凍雲殘

雪路，萬梅花著一詩人。

過朱家園有作

小橋樓閣接烟霞，敗壁頽廊換物華。何似當年秋水上，一亭回合萬荷花。

秋日有懷王碧雲

落盡芙蓉景物非，妝臺晏起思依依。雨深別館蟲聲急，月冷吳江雁到稀。病畏新寒張曉幔，瘦拈舊線改秋衣。生涯近日君知否，一縷爐香息衆機。

舟中卽目

繡簾雙卷水窗開，一葉風帆鏡裏迴。天意似憐人寂寞，青山移近畫船來。

秋閨漫興

梧桐瑟瑟起愁思，閨閣閒情團扇知。曉起摘花催婢早，晚涼待月放簾遲。生前未了三山夢，身外難拋一局棋。識得衰榮原有定，西風莫恨鬢吹絲。

登樓

西山爽氣撲城頭，散盡殘雲豁遠眸。一樹曉風扶落葉，二分新月約登樓。懷人可奈偏成夢，善病何堪再入秋。却羨垂髫溪上女，把竿穩坐釣魚舟。

書懷呈竹士

拾扇煩躬曲，招涼共息機。窗均雲細入，簾啓燕爭飛。久病諳諸藥，安貧守故衣。百年何所願，生死只同歸。

靜綠軒夜坐

一碧梧桐院，新涼生遠樓。落花都怨雨，枯樹易成秋。茶酒拋多病，雲山待放舟。篆烟如有意，縷縷近人流。

中秋夜雨後得月

秋雨洗秋臺，秋城二鼓。碧雲捲地盡，明月上天來。風定孤烟直，蛩寒玉漏催。素娥好酌汝，莫負桂花杯。

牡丹

我見猶憐汝，新晴兩度來。一時無粉黛，百寶有樓臺。著雨春爭豔，迴風繡作堆。可憐蝴蝶倦，繞過百千回。

西溪舟次

春歸三月亂紅稀，一片湖光上釣磯。打槳偶來楊柳外，水禽拍拍近人飛。西溪九曲繞烟霞，矮屋疎籬半種茶。何處東風傳笑語，隔花樓閣美人家。

東塔院題壁

嫩綠埋塔半是苔，此間小坐隔塵埃。東風應笑人癡絕，塔院無花特地來。

暮春偕竹士遊塔影園

依然溪水隔林扉，艤棹來尋舊釣磯。幽賞恰宜三月盡，清狂得似兩人稀。竹烟浮翠晴生塢，花雨吹紅濕濺衣。極閣危欄閒倚望，半天清語塔鈴微。

舟過冶坊浜有見

碧山如畫放晴時，簾押無風一半垂。怪道玉人眉樣好，妝樓都傍綠楊枝。游絲落絮午風催，春盡探春此溯洄。林外酒旗紅不定，隔花櫓響一船來。

曉起

風鈴寂寂曙光新，好夢驚回一度春。何處賣花聲太早，曉妝催起畫樓人。

病中得郭頻伽贈詩并讀近作

誰吹蘭氣化秋烟，得此風流骨亦仙。世上有情春似夢，病來無睡夜如年。活依經卷愁難餓，修到梅花瘦可憐。我愧謝家吟絮格，漫勞刻燭擘蠻箋。早送瀟湘

八月初，小庭梅雨響簾鉤。詩成杜牧三生恨，人在胥江一葉舟。十載青衫勞劍鋏，二分新月醉壚頭。莫言生小愁爲累，不是情多不解愁。

次前韻卽送郭頻伽蔣伯生之淮上

拚將紅淚洒離筵，分手河梁亦可憐。十日相逢真草草，兩人遠道定年年。曉天帆席浮雲外，玉笛梅花古驛前。病骨詩魔兼別緒，昨宵并作不成眠。

頻伽伯生兩君復疊前韻訊病感而有作仍次

原韻

新詩三度費雲箋，病教維摩著意憐。湖上客猶遲別棹，鏡中人不似當年。倩姑壓繡來窗下，呼婢尋花供佛前。除此更無消遣法，讀書纔倦枕書眠。一簾涼月夜明樓，待塔同看不下鉤。與病爲緣惟有夢，此心無著只容愁。杜鵑盡是離人血，萱草難忘阿母憂。容易淒涼閒結伴，濯纓小住碧溪頭。是日兩君偕竹士游滄浪亭

竹士兄見過出織織夫人病中答詩及見題近

稿一首同韻奉酬

郭麐

重和宿墨寫題箋，爲聽秦嘉話可憐。賴有詩篇能過日，不然病骨奈三年。藥烟撩亂茶鑪畔，棋局叢殘繡榻前。又爲吳儂詩半冊，挑鐙廢盡昨宵眠。

奉答嚴歷亭司馬贈詩仍用前韻

織得鴛鴦錦字箋，絨來離恨有誰憐。何堪我病更三暑，記讀君詩已二年。聞道青衫拋淚顆，悔教紅豆種生前。司馬近有黃門之戚。西風長簾涼如許，潘岳秋來恐未眠。

舟中讀織織夫人詩與頰伽伯生唱和之作因

次元韻奉寄 嚴守田

簪花小格衍波箋，詩句鮮新字可憐。詠絮人真留夙慧，聞名我已隔經年。妝臺玉尺才無量，步障清談客敢前。況有秦嘉好夫婿，唱酬日日對書眠。

題汪宜秋玉珍內史詩稿後

一卷焚香供玉臺，燈殘猶讀兩三回。謝家柳絮蘇家錦，如此才真未見來。憶昔歡娛少小時，棠梨吹雨柳垂絲。春來多少傷春夢，訴與春風總不知。空教費

盡好才華，夫婿年年不在家。願化相思一雙鳥，替銜紅豆到天涯。

酬朱鐵門見贈之作

已分微材老散樗，藥鑿花譜意如如。人間那有癡于我？病到無聊轉讀書。

六月十五日，竹士爲余買藥吳江，漏三下不歸，挑燈愁坐，恍惚入夢。有人促曰：「起起！」遂從之行。所履處，非烟非霧，不容駐足。俄至一處，溪水抱門，粉牆圍竹，入其庭，疏窗四敞，但覺風吹荷氣，清入心脾。有人謂曰：「爾所憶某卽在是。」傾耳聽之，隱隱聞吟聲。意欲作詩招之，方小立構思，忽阿母爲兒覆被，一驚而寤。是時微月在簾，神魂撩亂，若猶在烟雲縹渺中也。侵晨強起，拈管得二絕句，初不知竹士之遇。凡仙，凡仙之用是韻也。竹士歸示以凡仙胡桂娥贈詩，互相詫嘆。爰序以誌一時噩夢云。

遠夢知尋水上村，微雲澹澹雨昏昏。如何萬里關山隔？一夜相思已斷魂。輕舟如葉路茫茫，無賴東風亦太狂。紙樣羅衣秋樣瘦，那能禁得水天涼。

春日雜題

新寒簾幙曉淒淒，小婢行來笑語低。昨夜海棠鈴索響，風箏吹落畫欄西。藥爐烟碧剪輕絲，遣悶閒窗校杜詩。簾卷忽驚春滿眼，桃花紅出隔牆枝。陰陰柳色怯春晴，著體羅衣紙樣輕。小立風前倦醉在，彈棋風送隔花聲。等閒春老雨聲中，花積空塔二寸紅。睡起不禁春恨滿，一雙蝴蝶在簾櫳。

代簡答閨中諸子

相思勞慰問，久病報書遲。瘦覺花非偶，愁逢酒不辭。無眠宵剪燭，有感鬢催絲。簾外疎疎雨，新涼扇已知。

題王月函姬夫人蟾影天香小照

木樨香遠隔闌干，換得羅衣小立看。畢竟有情惟月姊，爲花拚受早秋寒。丁當環珮倚風斜，遊戲人間萼綠華。識得倩描春意，要人見月便思家。

次韻和吳蘭雪石溪觀桃花

紅雲飛隔水，應是雨催開。游屐緣溪入，春禽約客來。濕烟低隱屋，老樹臥延苔。幾度尋詩到，無人立一回。

酬謝蘊山觀察兼呈雲卿夫人

等閒青鳥下蓬萊，快讀瑤箋病強扶。閑道清淮春漲水，水深得似此情無。旃檀替燕那能當，清福無多示疾償。丸藥消磨愁不瘳，誤他人喚杜蘭香。

題周湘花女史繡薰風夫人石溪看花詩卷

敢向嬋娟責報遲，可用湘花詞句新詞傳唱遍當時。微人解得才人意，不繡名花繡好詩。一篇脫手萬花飛，絕代才名似此稀。親見玉人挑錦字，勝他傳織上弓衣。墨雲濃潑繡生華，想見欹針傍碧紗。說與詩人供養法，一甌清茗一枝花。吳綾半幅白無波，消受知君福幾何。蘭麝未須熏百遍，粉痕脂暈著來多。

次韻蘭雪訊病之作

已拚小劫到游仙，問訊勞君格外憐。喜聽新詩來病裏，強扶殘夢讀花前。風禁鈴索清如語，月逼窗紗薄

似烟。不是相逢眞國士，等閒燒燭爲題箋。

敬訊織織夫人之病卽簡竹士 吳嵩梁

麗詞如錦字鉤銀，扶病書成墨未勻。見說眉梢

多黯澹，情知詩夢亦酸辛。卷能共把銷長日，窗不會

開過好春。千萬莫教花下坐，露香風冷恐侵人。

次韻酬蘭雪再贈詩并簡蕙風素雲兩女士

萬緒無端埋亂絲，避風鎮日卷簾遲。二分春教鸚

哥惜，一縷寒先燕子知。蘭露沁香清幻夢，藥烟銷碧澹

愁眉。楞嚴經說堪療疾，几淨窗明相對宜。

題香蘇山館圖

三十六奇峯，峯峯濕翠濃。窗虛雲不去，人冷鶴相

從。響度深林斧，寒生隔塢鐘。夢魂尋未到，水複又山重。

聯句次韻和劉松嵐明府與蘭雪游靈巖

尋芳記得兩回經，基十萬人家散列星。獨鳥拖雲

埋樹白，並亂峯挾雨過湖青。籬荒新延鄰院，基春瘦

孤花冷淨瓶。剩有高臺娛遠日，逸誰彈琴與素娥聽。基

聯句

病去惟餘嬾，逸愁來不廢吟。花寒依曉夢，基蟲語

訴秋心。燈閃知風入，逸窗空畏月侵。杪函聯石鼎，基畫

壁漫抽簪。逸

秋夜聯句

浮雲如水屋如舟，竹士燈火閒窗情話幽。一二聲

鐘纔到枕，續兩三點雨欲成秋。誰憐鸞鳳偏棲野，竹

士只有鴛鴦不解愁。江上丹楓湖上月，續好攜蓮棹

與卿遊。竹士

閨中雜詠

繡院微風不隔簾，瘦來小字稱纖纖。自量只有腰

盈尺，一著春寒病要添。小庭雨線約風絲，織得新愁

薄暮時。隔著簾櫳天樣遠，那教人不說相思。東風二

十四番寒，芍藥朝來已向殘。病裏繡簾開不得，拾將殘

朵當春看。當樓楊柳拂簷斜，薄雨梳風綠放芽。草草

春歸人不惜，流鶯銜住半殘花。薄暮春愁一倍添，花

枝著雨覺懨懨。待他燕子雙飛入，冷到羅衫不下簾。坐愁燒燭到深更，雨點疏疏風又生。不信鴛鴦禁得慣，

一池荷葉變秋聲。西風瘦柳無絲。病累愁魔負少年。輪與伶俜小蝴蝶，一庭涼露抱花眠。曉天明月白無情，化作西窗急雨鳴。几有蠟梅爐有篆，一簾香氣不分明。

題惜花圖二絕爲王子乘作

絲絲殘雨濕簾鉤，破曉關心小院遊。到底美人情最重，替花擔盡十分愁。龍髻雙盤學念奴，尋香拋却繡工夫。惜花應被花相笑，似爾青春駐得無。

秋日答武林顧虹橋茂才見和長句之作仍用前韻

天涯誰贈薛濤箋？性僻才疎謬見憐。笑我此身容百病，何人有艾畜三年。雨禁鈴語青簾外，蟲訴秋寒紅蓼前。昨夜月明孤館靜，思家知爾未成眠。

寄懷宜秋院主

落葉生空響涼風著意吹。三分新酒病，一卷故人詩。曉夢殘燈覺，秋懷老樹知。吳淞川里水流不盡相思。

靜綠軒夜話同竹士作

拈韻西窗燈火親，詩狂入夜欲驚隣。貧無長物償花債，冷怪秋風尋病人。剩有睡鄉供小飲，那須丸藥駐青春。笑他到死方成悟，蝴蝶原來夢裏身。

附雜作

上隨園夫子書

前者返棹天台，駐旌茂苑，建坊壇於繡谷，媛集金閨，續宴會於錢塘，才量玉尺。湖山佳話，萬古千秋。風月主人，九州一老，大名灌耳，望等天神。小草懷春，自慚營窟，方苦登龍之無路，乃蒙折簡以相招，恨不奮飛，偏逢小極，樂鐺經卷，消永晝之生涯。病豎詩魔，作終宵之伴侶，腰無一尺，淚有千行。郎君竹士，忝陪杖履，得卽光儀。乃以風雅宗工，儒林耆舊，而肯虛懷若谷，老眼舒青，備述教言，愈加銘佩。又讀六月六日夫子與立崖司馬書，謂龍華會上，必使留名，自問何人，而矜寵若此，感甚也。亦愧甚也。茲逢令坦，藍潤玉公子，挂席金陵，停軍蔣邇，託其介紹，願列門牆。敬達賤名，用修短牘，倘蒙不棄，萬

幸何如，此日碧雲秋雁，奉一函於明月樓中，明年絳帳春風，當雙拜於海棠花下。

附諸挽詩

挽織織夫人

片紙吹來已斷腸，青青潘鬢昨成霜。今生文字因緣重，此去人天離別傷。三島舊遊雲慘綠，一樓殘夢月昏黃。羅衣單薄仙風緊，鶴背應愁怯晚涼。書奩藥裏亂成堆，日日題箋傍鏡臺。四海紅粧歸間氣，一枝彩筆讓仙才。生前手草教親定，病裏心花更怒開。聽說前宵猶強坐，挑燈爲和一詩來。文采誰傳絳幔經，寄生小鳳乍梳翎。織織寄沙散花夫人女鳳珍爲子甫三齡。床前詩卷拋猶滿，畫裏眉峯慘不青。蝴蝶飄來秋影瘦，水仙夢到夜涼醒。旁人爭賞流傳句，不管酸心只要聽。（蝴蝶逢秋瘦一分，夜涼彈醒水仙花） 背集中佳句，隨園先生並采入詩話。鷗波會約共攜家，買屋楓橋願太奢。余與竹士約爲婚姻，擬卜築楓橋爲隣而居。 絮酒重

斟當夜半，扁舟一放即天涯。得埋仙骨山何幸？招到詩魂月正華。會葬我來題片石，墓門圍種萬梅花。織織題余拜梅圖末章云：「埋骨青山後望者，種千梅樹當生涯。孤墳三尺能來否？記取詩魂是此花。」其絕筆也。

沈散花女士挽詩云：「撫鶴雲階誰作伴？侍書月殿可微寒。」

汪宜秋女士祭文云：「入夢想尋君鶴背，恐嫌凡骨重遺真。添畫我飛仙，可要侍兒扶。」

隨園女弟子詩選 卷三

駱蘭綺 字佩香 句容人 嫁江寧龔氏 早寡著

有聽秋軒詩稿

登木末樓

載酒獨登樓，憑闌四望收。江光初過雨，山意欲成秋。霸業隨流水，孤城起暮愁。微茫烟樹外，帆影落瓜洲。

綠萼梅

梅格已孤高，綠萼更幽絕。古幹蟠瘦蛟，數朵點蒼雪。尤愛未開時，碧意枝頭結。宛似空谷姝，倚竹無言說。水邊澹蕩風，庭際昏黃月。誰無惜花心，春來莫輕折。

素心蘭

芳草春已歇，素心將遺誰？一枝綻庭畔，微香透書帷。我見不忍折，移栽白定甃。置之几案邊，靜對覺相宜。斜日茗飲後，晴窗晨起時。與爾結素交，無言心各知。重

重護簾幙，勿使東風吹。

白桃花

素質明流水，瑤英漾月光。秦人如解種，應不引涪

郎。

菊影

高致誰能共？幽懷宜獨看。秋牕纔剪燭，瓶水欲增寒。鏡裏人同瘦，風前蝶亦乾。霜毫拈在手，擬繪一枝難。

春閨二首

春寒料峭乍晴時，睡起紗窗日影移。何處風箏吹斷線？飄來落在杏花枝。樓外簫聲喚賣餠，江城花柳近清明。東風忽送雲頭雨，催得詩成却又晴。

秋閨二首

蕉葉梧葉響蕭蕭，一卷金經伴寂寥。何必窗前有明月？秋燈自愛坐深宵。人間離合飽曾經，天上花開

也易零。玉露金風等閒度，更無情緒看雙星。

登天平山憩中白

身在雲中不見雲，登臨忘却日將曛。回頭欲辨來時路，只有泉聲隔樹聞。

西湖雜詠

偶同女伴泛西湖，真個西湖似畫圖。水浸天光晴亦尚，雲迷山色有還無。渺渺平湖漠漠烟，酒樓斜倚綠楊前。忽來一陣催花雨，錦帶橋頭盡泊船。葛仙嶺上日朝曦，南北高峯樹尚昏。曉倚湖樓貪遠望，花陰庭午不開門。辨才退院居龍井，良友無過米與秦。欲剔蒼苔剛斷碣，長廊行遍不逢人。聞說西湖可采菱，菱花開處碧波澄。小舟盡入菱塘去，路綠垂陽綠幾層。

夏夜納涼

窗開四面小庭空，團寄輕搖竹下風。多恐來朝天更熱，月光初吐一輪紅。

秋燈

獨坐影為伴，開窗對短檠。照人雖冷淡，視我倍分

明。焰閃知風急，光寒避月盈。欲挑還住手，無語聽殘更。

初春偶作

院外濃雲合，微寒欲雨天。殘梅三兩樹，如雪落窗前。

千葉桃花盛開題壁一絕

寂寂園林日未斜，一庭紅影上窗紗。主人難免花枝笑，如此春光不在家。

病起

綠窗冉冉度殘春，檢點羅衣怕上身。明月滿庭圓未足，想應留待倚闌人。

隨園謁袁節齋夫子

柴門一徑入疎筠，為訪先生到水濱。絕代才華甘小隱，名山從古屬詩人。閨閣名二十秋，今朝纔得識荆扉。匆匆問字書窗下，權把新詩當束修。

題隨園雅集圖

昨從畫裏遊，命題圖中句。圖中共五人，邱壑各分佈。先生獨撫琴，趺坐倚高樹。而目尚依稀，鬚眉已非故。

勝會詎偶然，存亡慨天數。圖中沈歸愚蔣若生兩先生俱已下世。只今小蒼山，烟雲萬重護。我無班左才，握筆不敢賦。遍讀琳瑯詞，鏗鉤奏韶濩。況得米顛書，龍蛇走縑素。卷中有夢樓先生題款。當共西園圖，壽齊金石固。

將返潤州留別諸姊妹

話別西窗月影殘，一聲秋鴈過江寒。臨歧不敢輕垂淚，忍到孤舟獨自彈。

題簡齋夫子給假歸娶圖

不意杖朝日，重披合卺詞。詞林增故事，海內補新詩。官馬穿花疾，宮袍拂柳遲。只今圖書裏，如見少年時。

送簡齋夫子歸金陵二首

小坐纔邀荀令香，如何又欲舉離觴？長干不是并州路，却認長干作故鄉。先生世居錢塘，官於江寧，因占籍焉。頻年飄泊竟何依，閒煞江鄉舊釣磯。若問昔時春燕子，隨園今日是烏衣。余家本金陵，今僑寓京口。

秋夜偶成

四壁蛩聲不斷鳴，闌干倚遍下階行。桐陰滿地無

人賞，偏是今宵月倍明。

擬玉溪生燕臺四首之一

重幃深深覆金屋，蘭焰無輝弄寒綠。瑤琴澀縮絃如冰，彈向青天不成曲。女龍雌鳳慣孤棲，閒凭赤闌日又西。銅帶似通東海水，冷月上窗不肯低。犀觴難解丁香結，一寸芳心鑄成鐵。枯松十丈欲何爲，女貞青玉凌霜雪。

晚泊龍潭

薄暮雨初霽，空江日已斜。沿堤孤客舫，近水幾人家。野浦莖還欲，山田稻自花。涼風天未起，秋氣滿汀沙。女伴中有以香奩雜詠見示者，戲爲廣之，得三首。

釵

斜插雲鬟出畫簾，倚闌翹首看新蟾。嫌他金重防他墜，不覺花閒露玉纖。

釧

盤龍刻鳳巧成雙，偏向羅衣暗透光。爲愛臨池愁腕弱，幾回卸却置書牀。

脂

倭髻梳成粉罷調，朱櫻微注更嬌嬌。月明吹徹江南曲，多恐輕紅染玉簫。

謝繡佛夫人暨令姪女蓮艇夫人題秋燈課女

偶將圖畫寄妝臺，多感題詩費妙才。穉女也知新句好，琅琅燈下誦千回。

花朝遲隨園夫子不至

春暖閒庭繡綠苔，闌干倚遍自徘徊。心憐微雨花朝過，眼盼先生桂檝來。新作香羹儲晚膳，舊眠吟榻掃輕埃。柴門一曲通江水，日夕呼童候幾回。

登茅山絕頂

舊聞三茅峯，縹緲在雲外。中峯尤聳秀，直與青霞會。余生句曲里，日夕仰叢蒼。苦爲巾幘縛，無由踐仙界。今春諸女伴，名香肅齋戒。相約共朝真，夙願得一快。始攀途頗紆，漸上觀方大。仰首逼星辰，下視但烟靄。樹遙平若薺，雲過垂如蓋。疇昔鳥居籠，今朝舟出隘。世人困

塵務，觸處成障礙。賢智同羈囚，況我裙釵輩。仙家有夙因，名山復相待。終當謝世緣，長此餐沆瀣。

玉晨觀

地肺開金闕，天文應玉晨。靈風宵步斗，旭日曉朝真。階淨松能掃，門閒鶴自巡。碑應鐫碧落，路已隔紅塵。紫誥雲邊下，黃庭案上陳。山中陶宰相，世外魏夫人。果熟猿知採，舟成虎亦馴。華陽仙洞裏，好領四時春。

宿華陽洞衣雲閣題壁

地僻紅塵遠，窗虛白晝閒。寒松深澗月，芳草夕陽山。採藥雲披袖，焚香鶴閉關。桃花與流水，一路送人還。

柘塘春步

柳外濛濛雨乍停，穿花閒步水邊亭。戲拋一片殘紅落，驚散魚苗入綠萍。

蕉陰名話

羅衣初試晚涼天，並坐蕉陰不忍眠。話到牆東明月上，竹爐猶自裊茶烟。

烟隴探梅

小溪清淺雪初晴，乘醉尋梅夜獨行。月下忍寒閒立久，帶烟花影不分明。

寄懷鮑茵香夫人

羨君福慧有誰如？鎮日金閨樂事餘。花院養姑春奉酒，篝燈課子夜鈔書。舊傳詞翰留名久，新起樓臺攬勝初。獨我他鄉飄泊甚，鏡中愁見鬢蕭疎。

舟泊高詠樓荷花更盛再得一首

溪光過雨碧溶溶，蓮葉參差際遠空。出水千花紅日裏，到門雙槳綠陰中。迴波忽聽新歌豔，佳景難逢勝賞同。更喜絳帷湖上捲，乘閒常許領春風。

重過揚州舊宅二首

維舟重到綠楊城，門巷蕭條轉眼更。鄰媪相逢應識我，隔牆曾聽讀書聲。曾將妝閣作詩壇，每日聯吟到夜闌。十二年前題壁句，一時和淚拂塵看。

夜靜聞鄰家對弈

夜深燈影上牕櫺，清夢多從局後驚。誰道兩家爭勝敗，隔牆人聽轉分明。

月夜對弈

蕉陰分韻罷，棋與月中生。黑白仍如舊，贏虧却屢更。思深情轉感，靜極子無聲。局盡天將曉，殘星數點明。

吳門陳竹士以其亡室金孺人手書詩幅見贈

孺人名逸字織織，詩才冠絕一時今。春病卒刻月雕冰一卷詩，吳天渺渺繫人思。罡風吹送鸞牋到，已是雲英化去時。東風弱柳損纖腰，道韞牆邊綠暗消。一縷藥烟簾不捲，強扶殘夢詠花朝。

女游仙詩

誰懸明鏡畫樓前？一片清光萬古圓。不是姮娥拚獨處，何人領袖廣寒天？瑤臺女伴笑聲譁，同赴金池阿母家。傳道東華祇從過，一時相避入桃花。虛皇欲御袞龍袍，半載天孫機杼勞。特勅來年銀漢水，比教往日淺三篙。瓊宮帝女好年華，學繡初飛綵線斜。偶乘睡絨紅一點，人間開作半年花。

侍夢樓師暨達有夫人餐英閣看菊

碧空吹下鳳鸞聲，仙侶相攜采菊行。窗外秋山臨

閣迴，籬邊朝露著衣輕。地雖近市塵偏遠，詩爲持齋骨愈清。樓與師母俱奉長齋。笑問花枝應識我，醉翁十載女門生。

人日焦山探梅歸舟口號時賓谷都轉邀夢樓師及諸名士亦有斯遊見示佳什六首因題於後

海國聞梅信，扁舟動遠思。鶴歸殘日影，春認舊年枝。洞古雪常在，江寒月到遲。一聲塵夢破，漁笛晚風吹。林巖最幽處，忽值使君遊。騶從全教屏，詩篇捷若流。春風方七日，綵筆已千秋。清況誰堪擬，梅開月掛樓。

張玉珍 字清河松江華亭人嫁太倉金瑚秀才早寡

懷幼嫻四妹

海棠花落怕殘春，綺陌風和扇麴塵。料得畫長針線懶，倚樓也念遠離人。

夜坐

清漏飄來遠，無聊掩碧紗。檢書頻剪燭，破倦且評茶。綠暗春前樹，紅稀雨後花。不堪回首處，極浦暮雲遮。

次韻外子寄懷時余歸寧華亭

久遠蘋蘩事，偏於水石親。簾開花解語，睡起鳥呼人。漫鬪棋中劫，潛消世外塵。天風吹不斷，林外晚鐘頻。竹色涼窗碧，銀牀簾欲更。詩從閒裏得，酒向病中傾。淡月籠雲葉，輕紗護燭檠。遙憐兒尙小，未解別離情。

口占

相見無言別又思，峭寒天氣夜遲遲。愁人何處生離恨，細雨殘燈夢覺時。

七夕壬寅

綠潤苔階雨作絲，蟲聲唧唧報秋期。人閒萬事皆情累，天上何曾感別離。虛堂簾捲月如鉤，花塢香清夜色幽。新句欲吟吟更懶，小姑頻促上針樓。

初秋夜坐次悔堂韻

月華如水漾簾波，可惜光陰一擲梭。忽憶天涯孤館客，也應無語望明河。愛詩積習未能忘，燈下閒吟

對影雙。一架豆花涼露滴，暗蛩聲近碧紗窗。

丁未除夕哭先夫子

虛陳俎豆淚雙垂，形影淒涼守練帷。塵世何人憐孝子，郎君以哭母亡。文章從古忌蛾眉。生前想像情猶在，夢裏追尋見少期。百折迴腸腸更斷，泉臺只願早相隨。

仲夏雨中遣懷次家大人韻

一月難求三日晴，池塘水漲板橋平。悠悠石徑花遲放，涼潤書窗硯可耕。雲帶野烟籠樹黑，風欲蓮葉瀉珠明。憑欄觸忤愁人感，厭聽階前著屐聲。焦葉濃添濕翠肥，蕭齋寂寂掩雙扉。蝶憐久雨渾難舞，燕惜空巢未忍飛。病榻已拋新竹簾，薰籠猶整舊棉衣。排愁却羨仙家好，一局殘棋靜息機。

正月十日雪

瑞雪天教報歲華，清光冷透碧窗紗。已知送臘遲三日，却喜迎春有六花。短竹敲來寒料峭，疎梅着處影橫斜。愧無詩詠風前絮，自撥紅鑪學煮茶。

立秋前一夕作

樓居宜趁晚涼天，風透疎簾竹榻邊。滌地桐陰扶月上，一聲蟲語報秋先。吟因久病詩情倦，味爲安貧菜甲鮮。自嘆餘生無個事，只容消受藥爐烟。

除夕展夫子遺照

遺圖展處獨含悲，清淚難禁祇暗垂。對影依然成舉案，他生能否得齊眉。愁多應是音容改，情切常嫌夢見遲。消受茗香無一語，空餘黃絹有題辭。蒙語名人題詠甚多。

四月二十四日移臥黃楊閣漫成二律

層樓移住隔銀牆，京兆連番作洞房。舊係梅堂遠春臥室。雙燕已翔三徑雨，孤鴻得占幾秋霜。花光四照紅臨鏡，樹色千重綠到床。整理書籤還自笑，徒勞竟日作詩忙。

梅雨不止賦此遣懷

霖雨無端三月餘，游人只合閉門居。當庭積水堪垂釣，何處晴曦可曝書。遠道信沉烟樹合，小爐香潤竹簾虛。等閒怕近彈棋局，愁在中心未破除。

七夕月臺小飲詩以紀事

臺高樹色影蒼蒼，竹葉樽開暑氣降。素魄也憐良夜靜，一痕移照碧紗窗。

雨夜不寐有懷靜宜樓四妹

蕭蕭木葉下空庭，孤影殘燈夢獨醒。惆悵西樓今夜雨，無因還共對床聽。苔床繡罷慣垂肩，一擲光陰已卅年。今我善愁君善病，捲簾瘦過菊花天。

黃楊閣卽事

我性本疎懶，居貧尙諱貧。已無猫捕鼠，祇有雀窺人。古硯留餘墨，圖書絕點塵。一身兼作僕，洒掃及清晨。

看蠶詞

陰陰村落養花天，浴種歸來穀雨前。記得去年春較暖，早蠶此際已初眠。閒聽食葉最關情，彷彿詩人下筆聲。懊惱鷓鴣偏喚雨，個個儂心事要春晴。時應上箔費安排，疎密高低位置佳。紡織久停針線懶，隣家催製踏春鞋。不眠深夜思悠悠，細似文心乙乙抽。光瑩團團初作繭，忌人最是未梳頭。

清明次王麗則女史韻

靜掩窗紗思悄然，鳴爐消盡篆文烟。豈緣病久備拈線，多爲春寒未卸綿。燕剪遠拖新社雨，花光不定夕陽天。謝庭詠絮才，叫敏時向瑤台寄彩箋。

題織雲探梅圖

小雨疎疎濕淺沙，南枝消息早橫斜。生成瑤島無雙品，來訪春風第一花。隨意梳妝憐雅素，有情吟賞惜芳華。多君書本流傳後，從此孤山屬謝家。

三月晦日有懷閨友麗則

幾日輕陰掩碧紗，怕看新綠小樓遮。風如有意團飛絮，雨不成絲綴落花。墨浪香融催覓句，松濤聲沸和烹茶。情癡欲向烏衣語，知否牆東卽謝家。

寄呈簡齋先生

文章宗匠鳳鸞姿，才大何愁老去時。除夕吟餘天益壽，先生有除夕告存記。異香薰處佛知詩。福中堂寄先生句云：「知否有人西域，把君詩卷佛香薰。」東山游興豪猶昨，西海傳經事豈遲。閨閣一時何有幸，儘容斂手拜良師。

對雪感賦時遭先君之喪

彤雲深鎖冷蕭晨，玉戲天教作意新。繞砌平鋪黃葉路，當窗偏對白衣人。模糊淚眼光難定，倘恍梅花色未勻。此日竹爐愁煮茗，一樽空向穗帷陳。

祝隨園先生八十壽

儀鸞威鳳聚仙津，盡識先生慶八旬。海上頻攜青翰舫，花間長駐玉堂春。壽如園綺身非隱，詩過韓蘇筆有神。一瓣心香低首處，吟將赤鳥繼風人。時製朱履奉獻。曾記春風侍絳紗，別來兩度惠瑤華。割雲親製端溪硯，汲水分嘗顧渚茶。福壽爭推公並占，高閒轉恐佛猶差。蓬萊此日霞觴捧，紅遍蟠桃萬樹花。

附雜著

桃源憶故人

松濤聲和瀟瀟雨，六月溪塘無暑。彼美人兮何處？日對相思樹。花時翻悔曾相聚，添得者回離緒。目極行雲來去脉脉和誰語？

減字木蘭花

愁絲萬縷，繚繞樽前飛不去。自是情深，寂寞閒窗倚素琴。檢書覆茗，燈火寒宵同說餅。此去他鄉，盼殺秋風桂早香。

東風第一枝秋感

露墜紅蓮，烟銷翠柳，秋光冷澹如許。苔階不住鳴蛩，桐陰更吹疎雨。閒窗香燼，聊題遍碧箋秀句。奈懨懨瘦却吟肩，添得幾多愁緒。風細細，畫闌怕倚雲漠漠，錦書又阻。夢隨流水千條意，如亂絲萬縷。涼生枕簟，腸斷是天涯羈旅。怪秋來，偏易傷人，何不早將秋去？

城頭月

墨痕淺淡，雲箋碧漫，寫愁如織。只恐匆匆欲言未盡，燈下重開拆。三千里外新詞積，鴈也無消息。葉墜秋聲，砧催日影，待窗紗黑。

沁園春遊知止山莊歸填此解呈梅影表叔

小舫蜻蜓，却任西風，輕吹畫橈。愛寒山黛擁，細眉高髻，殘楊碧鼻，短縷長條。路入溪灣，門涵水影，人立西

湖第幾橋？循廊步早，窗紗齊拓，翠袖頻招。何當曲奏雲璈，聽字字清真，叶鳳簫。正楓丹兩岸，霜文受記，菊黃三徑，粉本爭描。綉斧閒居，斑衣樂志，此福人間不易消。耽遊處，又夕陽一抹，瞥下花梢。

卜算子

不奈沉寥天，又遇黃昏雨。冷冷清清滴到明，蛩語人無語。舊恨并新愁，此際紛然起。斷送華年白髮新，只在秋聲裏。

金縷曲

余自遭變以來久拋筆硯春光過半腸斷淚流無可自解聊寄長調以寫悲愴

小院春寒冽，又無端過了清明，斷腸時節。剪紙招魂，招不得路黑闌山影滅，但只有愁心凝結。五載離情空繾綣，苦而今縱跡成鴻雪。歌宛轉，復嗚咽。林中杜宇應啼血。看天邊月缺猶圓，幾曾常缺。命薄紅顏千古恨，舊事何堪重說。化夢裏雙飛蝴蝶。一霎光陰如露電，願黃昏碧落休言別。生已負，死同穴。

滿江紅 春日課兒感悼外子

雙燕穿簾渾不解，倚樓人獨。纔瞥眼春光已盡，滿前新綠。舊夢竟隨流水去，遺書苦喚嬌兒讀。歎辛勤窗底，母兼師，愁盈掬。思往事，眉常蹙。憐別緒，情難續。願相期一笑，同登仙籙。識字由來愛患始，有才偏使年華促。剩中心抱恨，最難平，拋棋局。

沁園春 卜七字

北斗闌干，猜是銀河，三更四更。記涼瓜食候，蘭期空誤。巧針穿處，弦月將生。里數山塘，賢留竹塢，若個才華，展步成。無聊賴，學盧仝茶癖，風味偏清。畫樓十二春晴，算五處閒，扇未登。愛寶釵徐整，閒情脉脉，翠絃低撥，幽韻泠泠。扶下香車，織殘襄錦，六一爐縈碧篆輕。於中意，付詞人，秦柳寫倚新聲。唐詩閒燒六一爐。

清平樂

藥鑰茶白，病骨閒消受。愁到眉心頻斂皺，不是秋來纔瘦。無言悶拍闌干，西風早報輕寒。回首鄉園迢遞，負他紅樹青山。

踏莎行 題吳曼生茂才綠波春泛圖

漁浪吹香鷗波弄影，柳絲碧罩春烟暝。蔚藍倒寫鏡中天，盈盈著個蜻蜓艇。雁槽頻搖吳歌閒聽，綺懷觸處饒吟興。底須顏色寫桃花，柁樓人與花相映。

廖雲錦

字織雲，松江華亭人。合肥令古檀先生之女。嫁馬氏，早寡。著有織雲樓詩稿。

生之女嫁馬氏早寡，著有織雲樓詩稿。

秋燕

林薄霜清木葉黃，江潭搖落燕飛忙。涼生漢帝昭陽殿，夢入盧家少婦堂。北渚烟深迎客舫，西風日暮掠斜陽。傷心春雨香泥盡，羨爾先歸到故鄉。

雙松圖歌

畫鱗難畫龍，畫樹難畫松。龍乃神物善變化，幾人曾見破壁來。虛空松之視龍勢不異，離奇屈曲難形容。誰摹此圖真妙手，雙松矯矯如雙龍。爪破白日擎雲雨，咫尺庭陰翠萬重。孫枝祖幹相追逐，生怕茅屋搖秋風。我來移挂傍几榻，猛然驚醒午睡濃。繞階而走心胆落，滿庭雲氣生窗櫺。日暮蕭齋兀愁坐，夜夢已到扶桑東。

秋草次韻

盼來芳信總依稀，惆悵王孫去不歸。平野雲開騰過疾，曲欄香散蝶遊非。一鞭殘照催征騎，幾夕西風感授衣。無限紅心銷歇盡，黃昏庭院濕螢飛。

塞上曲

旌旗直出雁門關，百戰沙場尚未還。想見咸陽城上月，一般長似玉弓彎。白月橫空大霧飛，轅門漏下羽書稀。天山近日狼烟盡，加鼓聲中夜獵歸。

哭姑

敘鳳分飛賦命孤，見姑還似見兒夫。私心欲慰垂憐意，任有啼痕總說無。禁寒惜煖十餘春，往事回頭倍愴神。幾度登樓親視膳，揭開幃幙已無人。

喜高平表妹至

廉纖細雨餞春回，靜掩重門晝不開。檐際乍聞靈鷲噪，花間忽報鉦車來。輕綃冉冉籠香霧，微步盈盈破綠苔。別夢重圓在今日，殷勤許我下蓬萊。爾我襟期喜共知，笑言頻到漏殘時。開儉會看將完繡，翦燭閒敲

未定詩。金鴨灰深香篆細，晶簾風定落花遲。既來又恐輕言別，月底燈前繫夢思。

梅花

誰人爲築避風臺，倩影能教頃刻開。賺出繡簾諸女伴，弓鞦忍露立春苔。

隨園夫子自金陵買舟過訪

杖履懷蒸切，芳林鵲報頻。旋攀青翰舫，喜見絳帷人。玉塵揮珠欸，銅餅養碧春。憐才真似命，感激荷陶鈞。海內推儒雅，風流獨我師。兼收飛絮句，寧惜浣花詞。紈扇詩親寫，銀鈞遠見貽。壬子十月子探親六合，蒙寄書詩扇。滿懷珍重意，簾閣炷香時。

春日過塔射園訪韞山表姊賦贈

銀鈞小字衍波箋，想見藤花吹滿天。園有古藤一枝，葉覆畝餘。同是隨園詩弟子，瓣香終讓左家先。

題管夫人墨竹同磐山韞山兩女史作

鷗波亭上比肩人，潑墨晴光染翰新。一抹遠山數叢竹，絕無脂粉累風神。

呈隨園師二律

絳帷小別已新秋，江柳絲絲日露稠。蠟屐名山應更健，素書石室快冥搜。定知學步憐曠女，私喜傳經得夏侯。淥水一方人宛在，溯洄何日到瀛洲。尚憶新蕪婪尾杯，陶村掃逕喜追陪。清閨爭願添絲繡，畫舫難留載月回。好待鶯花三月候，重看壇坫五丁開。生綃一幅憑遙寄，卻媿蠶芽負襍材。

壽隨園師八秩

白鷗浩蕩退閒時，一舸江湖樂不支。潘令花枝陶令酒，廬陵文字少陵詩。茫茫四海元音在，落落千秋作者知。大雅門牆成就廣，手栽桃李幾多枝。月皎冰壺一片清，憐才到處眼分明。珊瑚海嶠尋枝遠，翡翠雲羅拾羽輕。孤韻愛憑爨下賞，零篇鍾得繡餘情。傳經多少金閨秀，寶幄香圍禮伏生。不墮枯禪不學仙，吟風弄月自年年。同官名聽椿庭述，公與先君同作宰。請業書隨鴈侶傳。何意蓬門來上客，還參蓮座認前緣。吳關闕吏應相候，紫氣明春映斗邊。來書有明歲三月避壽吳門之書。

輓麗則女史

松溪猶憶伴香車，琢句拈毫愧不如。錦篋只今愁
不展，零紈多少衛娘書。花前分袂劇相思，秋水迢迢
返棹遲。緘就尺書空欲寄，不知月缺已多時。

孫雲鶴

字蘭友，令宜廉使之次女，嫁金氏。

山行

秋色斜陽影裏，寒烟黃葉聲中。一幅倪迂小景，溪
邊多個漁翁。

寒思

欲寒未寒客心怯，衣試清砧扇歸篋。夜深燈暗闌
無人，臥聽虛廊走風葉。

題石蘭詩鈔後

坡公抹月批風筆，宿昔清嚴重詩律。祇今卷裏讀
遺編，想像音容如昨日。左家嬌女擅清才，早歲吹簫別
鳳臺。使覺謝庭歡事減，移將小草傍蘭栽。鶴曾繼公膝下
幾年作宦天涯走，屢見東風到楊柳。歸去田園松菊存，

閒中歲月詩兼酒。我亦隨親返故山，登堂嘗問竹平安。
升高笑指三層閣，佩德教緝九畹蘭。杖履追隨數朝暮，
遣墨淒涼忍重觀。紫漠烟塵出寒歌，扁舟風雨懷人賦。
箕尾神歸又幾春，還愁仙樂隔紅塵。請將天上金鍼法，
度與慈雲舊覆人。

壬寅九日重慶閣送伯兄東歸

登高兼送遠，客淚一沾裳。歸棹隨流水，鄉心帶夕
陽。秋高山落木，風急雁分行。叢菊何情緒，籬邊依舊黃。

秋夜寄懷

新月照庭柯，開軒雨乍過。客懷當夜永，鄉思入秋
多。殘暑未消竹，涼風欲到荷。天涯時節感，不寐發長歌。

寶劍篇

寶劍遺編在，挑燈擊節吟。恩仇千古事，湖海一生
心。氣逼秋霜冷，光騰夜月沉。從軍應有願，慷慨答知音。

旅樓

旅樓高不極，過客足徘徊。暮色隨烟起，春寒逼雨
來。壯心樽酒在，鄉思嶺猿哀。目斷巴陵路，衡陽雁獨回。

隨園先生再遊天台歸招集湖樓送別分韻

得字

十載天台夢，先生已重尋。烟霞迎杖履，猿鶴認書琴。攬勝憑雙目，傳經到故林。斯樓曾宴集，此日復登臨。

庚戌先生來杭，少以是日宴於此樓。浮荇涵芳沼，餘花綴綠陰。舊遊還歷歷，弟子更森森。潘錢兩女更新受業，講席奇方

問，離筵酒又斟。教人歌折柳，看客寫來禽。時夢樓解伯在座作書。從學三年久，論交四世深。屢蒙時雨化，敢作候

蟲吟。白下歸何速，途中暑未侵。新篁和粉折，遠磬入風沉。月照西湖樹，雲連鍾阜岑。寓園與鄉士，去住若為心。

韜光寺

蕭寺巒光裏，登臨眼界寬。入山雲百磴，引水竹千盤。霜色疎林晚，鐘聲落日寒。塵心與秋思，消盡此憑闌。

客路

故園正是浴蠶天，客路初離上瀨船。三月鳥啼春樹雨，幾家人種水村田。當前已覺農時近，背嶺遙知石棧懸。莫動鄉心且西去，錦城猶在暮雲邊。

蕪湖

江鄉極目客心孤，又聽東風喚鷓鴣。正是鶯花好時節，一帆烟雨過蕪湖。

宮詞

珠簾十二捲晴光，一院東風晝漏長。自向金籠放鸚鵡，禁門春鎖落花香。綃衣披月立瑤臺，何處簫聲夜半來。三十六宮門盡掩，露螢吹影過秋槐。

仁和高氏女，與其隣何某私通，其父母不知也。女已許配某家，迎娶有日，乃誘何外出，而自懸於梁。何歸見之，大慟，即以其繩自縊。兩家惡其越禮，不肯收殮。邑宰唐公為捐貲買棺而雙瘞之，命城中士女均為賦詩。

由來情種是情癡，匪石堅心兩不移。倘使化魚應比目，就令成樹也連枝。紅綃已結千秋恨，青史難教後代知。賴有神君解憐惜，為營鴛冢播風詩。

附雜著

賀新涼隨園先生除夕告存詩

一紙飛書至，報隨園烟霞杖履，依然人世。梨棗思傳多少客，挽住先生歸轡。正好在紅塵遊戲。混沌初分老蝙蝠，問生時誰識何年始。邢璞算虛言耳。賀詩此日應千紙，想開絨梅花風裏。猿歡鶴喜。詩世界寬無歷劫，如此神仙有幾。真別有人間天地。明日歲華新，又是壺中甲子從頭起。松柏壽，自難紀。

沁園春口

薄染輕朱，豔傳樊素，一點紅凝。愛杏花樓畔，吹簫略掩，海棠風裏，壓笛長橫。玉甲佯肥，金釵剔齒，界破盈盈半顆櫻。嚴妝罷，吮毫端螺子，染上微青。鞦韆欲上還停，怕汗濕冰膚喘未勝。憶午窗慵繡，綵絨半唾，春朝消渴，花露偷噙。斂黛將吁，低鬟欲笑，十度沉吟萬種情。堪憐甚，更戲調鸚鵡，軟語輕輕。

又可甲

雲母棧成，春冰碾就，裹住葱尖。憶綠窗人靜，蘭湯悄試，銀屏風細，絳蠟啞彈。愛架仙葩，偶挑香粉，點上些

隨園女弟子詩選

卷三

兒戲瑣斑支頤久，有一痕鈎影，斜映腮間。摘花清露微粘，剖繡線雙虹挂月邊。把霓裳悄拍，代他象板，藕絲自雪，搯個連環。未斷先愁，將修更惜，女伴燈前比並看。消魂處，向紫荆花上，故逗纖纖。

點絳脣

村柝聲寒，鄉關夢斷三更過。紙窗風破，一點殘燈墮。靜院無人，獨自開簾坐。重門鎖，梅花和我，對月成三個。

沁園春題佩園女史拈花小照

慢捲珠簾，初離明鏡，繁花翠鬢。正碧窗香細，晴添午倦，綠陰晝永。風滅春寒，聽罷流鶯，拈來香草小立空庭。意自閑，幽懷好，把素心同契，清極忘言。東風乍識華顏，念欲綴新詞，下筆難。況詩中情思，吟時楚楚，望來環珮，聽處珊瑚。韻寫烏絲，神傳粉本，人在盈盈一水間。披圖久，喜芬芳氣味，吹上毫端。

四五

隨園女弟子詩選 卷四

胡德林 字

杭州人太常卿星齋先生之

孫女嫁葉氏

長夏偶成

幽檻不知暑，吟成自據梧。苔痕沿砌盡，絮影出簷無。插架嚴蟬禁，空梁任燕租。簾紋涼似水，小坐足清娛。

夢醒口占

金箔橋邊宅，分明此夕歸。忽驚風瑟颯，始悟夢依稀。經宿篆香古，薄寒燈影微。深宵增遠思，落月滿牕扉。

城南晚歸

城南五尺五，地僻谿雙。樹色雅邊暮，人家雁底秋。烟光迷淺浦，嵐氣接層樓。更愛迴車處，蒼蒼蘆荻洲。

夾竹夾

穠華爛漫不勝描，却愛迎風翠影搖。地擬渭川生

錦浪，人來湘浦泣紅潮。儘教綽約貞常抱，爲報平安恨始銷。知有凌霄清節在，不須錯認董嬌嬌。

其二

小窗依約寫橫枝，淺暈輕烟看尙疑。紅雨一蹊驚昔夢，綠陰三徑感秋期。天寒幽谷人初倚，水暖春江畫亦宜。愛爾清妍偏耐久，年年開過菊花時。

初夏

未必春殘勝事稀，綠窗人靜惜芳菲。雨餘瘦蝶伶俜舞，風軟閒花自在飛。西課金經頻檢字，爲調玉軫罷裁衣。屏紗欲掩還重啓，好待雕梁乳燕歸。虛堂瑟瑟度南薰，炷盡沉烟散午芬。沸鼎茶聲疑作雨，隔簾花氣欲生雲。嘔心句少吟逾苦，信手棋多敗亦欣。小倦不須尋素簟，碧闌干外易斜曛。

病起見盆梅偶成

辜負韶華事藥爐，忽驚古盎挺虬株。雪餘孤萼寒猶斂，風定疎香淡欲無。小坐對君成主客，無言伴我各清癯。挑燈留住橫斜影，寫向屏山作畫圖。

禮佛詞六首

刀尺齧鹽現在身，怕教羅綺味前因。偷閒得傍慈雲座，願作西泠善女人。敲棋鬪茗兩忘機，爲課楞嚴暫掩扉。隨分縞綦儂自稱，底須新製水田衣。瞳瞳朝旭上東隅，稽首新瞻掃象圖。寫罷金經三百字，不曾妨却繡工夫。欲覓名花供法王，露蘭霜菊總尋常。何如參破華嚴界，領取優曇自在香。細爇都梁滿鴨爐，又參微悟學跏趺。重簾鎮日垂垂下，依舊沉烟散欲無。雨過庭蕉還浙瀝，風來簷鐵自丁冬。綠窗儘足聲聞悟，不聽迦藍寺裏鐘。

枕上口占

街鼓分明枕上聽，又疑身已到西泠。朦朧起認窗前月，燈漸殘時夢漸醒。

夏日

虛堂人靜淡于秋，敲罷殘碁局未收。槐蔭一庭簾不捲，日長閒煞小銀鈎。

嚴蕊珠 字綠華吳江人未字著有露香閣詩

草年纔十七

隨園夫子舟過吳門向選樓母舅索拙句作此

志謝

到處渾同說項斯，品題直欲到蛾眉。憐儂學館靈蛇髻，尙少風前詠絮詩。

春日雜詠

簾鎖爐香盡日垂，曲闌低亞坐題詩。慈親指點桃花笑，憶否當年饋面時。粘天芳草翠平鋪，三月江南似畫圖。小立溪邊春祓禊，水中人影萬花扶。薄寒天氣掩窗紗，九十韶光半已賒。戲剪彩幡庭畔立，教他常護未開花。如烟小雨潤苔衣，花塢風酣蛺蝶飛。楊柳多情又多事，綰將春到放春歸。

鶯卮湖權歌

淡妝濃抹，清陰柳色花光間淺深。描出西湖新
樣子，亭臺一簇擁波心。鏡面波光點黛螺，鳴榔處處
起漁歌。朝來幾陣廉纖雨，雪色銀魚上網多。

純扇

織就蟬紗薄，蒲葵樣不同。清風生袖底，皓月落懷
中。製羨班姬巧，詩慚柳惲工。夜深搔小院，螢火墮光紅。

新秋次媚川母姨韻

碧紗風細鎖香遲，研露新編舊製詩。爭羨詩人居
福地，玲瓏新築小仇池。

織梅翠岩兩兄讀書浮玉樓爰呈二律

文窗窈窕敞空虛，棣萼樓高得所於。筌典珠填探
二酉，露研雪纂課三餘。桐花棲穩收香鳳，芸葉驅除蝕
字魚。排闥雲山來萬疊，詩情畫意更何如。棠棣花開
最上頭，彈琴擊鉢共夷猶。清才雅續聯珠集，妙手雙修
五鳳樓。風送漁歌來研席，燈催燕影上簾鉤。定知兄弟
憑闌飲，不吸長江勢不休。

歸鴻曲

春風一夜到衡陽，旅雁驚心覓故鄉。寶瑟無聲明
月冷，幾行殘字落瀟湘。

夜觀秋千戲

梨花乍開杏花落，深院朦朧月色薄。雙竿百尺立
中庭，淡雲低護紅絲索。美人玉貌超凡羣，半酣結束紅
羅裙。留仙不住忽飛起，丁冬環珮空中聞。一笑低頭顧
女伴，腰支無力飄揚緩。髻斜墮馬玉釵，垂眼底明霞烘
頰煖。白面金盤絳蠟燒，氤氳香霧迷春宵。簾幕沉沉漏
聲永，五銖衣薄猶含嬌。翻隨再試迴鸞舞，彷彿霓裳別
翻譜。飄飄繡帶曳長虹，影墮簷前驚鸚鵡。

浮玉樓晚晴

浮玉全遮柳人家，掩映居。風輕扶弱燕，花落聚游
魚。渡靜橫孤艇，農歸荷短鋤。河汀新霽後，最愛畫難如。

寄戴柔齋夫人

聞川烟水望迢迢，我住松陵第四橋。他日挂帆容
訪戴，不逢雪夜即花朝。

桃花塢

浣水抱桃林，春風吹爛漫。深塢鳥聲幽，隔花人影散。憑弔讀書處，夕陽紅雨亂。

秋日雜興

垂虹秋色五湖連，雁響菰蒲宿渚烟。簾卷西風雲影散，洞庭飛翠落窗前。研光牋滑兔毫柔，落墨須教腕力逾。開匣怕枯鸚鵡眼，一泓秋水洗雙眸。泉試茶經活火烹，玉棋敲落月三更。西風亂剪芭蕉葉，斜掠書窗夜有聲。

錢琳

字曇如杭州人福建布政使錢琦女

嫁同里汪海樹秀才

夜雨

一夜蕭蕭雨，西窗夢不成。芭蕉三兩葉，多半作秋聲。

聲。

春日偶成

韶光已過賣餚天，風景依稀似去年。莫訝綠窗人
意倦，吳蠶宮柳各三眠。

秋。子。月。

題夢香生傲陸放翁詩意畫冊

黛色千峯秀，波光一道流。似將銀漢水，添作大江
梧桐一百尺，日日呼童洗。苔徑綠無塵，時時落桐
西溪清且淺，樹樹梅花發。折得一枝歸，清漪弄閒

題畫扇

山興，黃葉聲中自在行
月落鴉寒暮靄平，小橋流水一灣橫。幽人別有看

隨園先生以湖樓閨秀十三人送行詩冊命題
得四絕句

記從澄碧小齋前，窺見婆婆鶴髮仙。欲說先公舊
交誼，未拈詩筆已悽然。中郎曾與顧雍名，光君觀蔡京
江適先生來，而家五兄初生遂以己名與之，今早及第。三十年來
離合情。却笑阿兄真好事，又教女弟拜門生。湖樓佳
話遍錢塘，閨閣聯吟集錦章。恰似簪花好書格，洛神傳
刻十三行。

題孫淑人梅花小影

林下高風屬謝家，清於仙鶴淡於花。闌干不放纖塵到，日莫天寒翠袖斜。

隨園先生再遊天台而歸招集湖樓作別分得

山字

仙翁遊戲此身閒，曳杖新從華頂還。屈指平生幾兩屐，夸人飽看萬重山。詩壇久作風騷主，閨閣頻添弟子班。自愧驪歌未能唱，也教絳帳一追攀。

奉題隨園先生歸娶圖

玉堂佳話久流傳，却扇詩成五十年。絲竹東山尙借隱，翰林春夢早遊仙。問天長乞清閒福，展卷重添筆墨緣。他日後堂花似雪，可容來作女彭宣。

題女史何仙裳畫

筆底春風取次招，綠窗清課靜中消。靈心此似天孫錦，細織雲絲十萬條。綽約丰姿展卷看，仙家抱得骨珊珊。畫中標格誰堪擬，清過梅花韻過蘭。

綠蝴蝶知實庭兄韻

分明么鳳是前身，相賞宜開綠酒樽。飛近楊花春

有影，倦棲芳草夢無痕。畫將眉黛疑輕黛，翠接羅浮有斷魂。可是仙家裙一幅，幻形飛出碧雲根。

王玉如 雲南人令宜廉使筵室

和隨園先生自壽元韻十首之一

尚書小楷尙登樓，川先生句龍馬精神正未休。山得標題成勝蹟，事經手筆定千秋。非關到處能行樂，自是生來不帶愁。漫說鹿鳴秋宴近，大羅天上再遨遊。

題淨香女史小照

先生筆底掃纖埃，千里遙聞絕調才。料得繡餘清詠處，冷香飛入句中來。

春陰

東皇愛惜牡丹深，費盡量晴較雨心。雨恐太寒晴太暖，爲花連日作春陰。

書菊

西風叢桂正含香，籬菊先開不待霜。暫向毫端借秋色，何妨八月寫重陽。

夜坐

爐烟細裊碧窗紗，人靜天空北斗斜。滿院蟲聲一
簾月，夜深風露落桐花。

陳淑蘭 字蕙卿庠生鄧宗洛之妻鄧生溺死

淑蘭自縊

春燕

去歲營巢最苦辛，今年飛舞又逢春。雕梁畫棟知
多少？偏肯呢喃訪故人。

聞鐘

日落又黃昏，閉目匡床坐。聽得一聲鐘，萬古塵心
破。

夏日書懷

簾幙風微日正長，庭前一片芰荷香。人傳郎在梧
桐樹，妾願將身化鳳凰。梧桐樹地名，郎讀書處也。

金陵感舊和韻

玉樹歌殘不忍聽，六朝金粉半凋零。而今只有天

邊月，曾向陳宮照後庭。

寄懷吳姑母

手理紅絨坐綠窗，懷人真覺晝偏長。回思昔日湘
簾下，共把金針繡鳳凰。

繡餘吟

繡餘靜坐發清思，養茗添香事事宜。招得階前小
兒女，教拈針線教吟詩。

讀月霞氏追感二首

夜半挑燈正欲眠，忽傳珠玉好詩篇。吟來恍入班
昭坐，悔我遲生二十年。細雨紛紛夜氣寒，那堪感舊
意闌珊。同生此世為同調，緣薄三生一面難。

感懷

幾日春風氣漸和，忽逢霜雪又相磨。雖然未損幽
蘭韻，已覺同拋珠淚多。

吳姑母問冬寒尚彈琴否賦此奉答

有負中庭月幾圓，非關指冷怯冰絃。自從家事分
心後，拋却絲桐已數年。

病中口占

執手殷勤問，夫君誼最深。爲儂多染病，分却讀書
幾欲臨窗坐，腰肢不自由。病多羞對鏡，力怯懶梳
強步到簾櫳，濃陰滿院中。草肥應是綠，儂瘦却消
紅。頭。心。

對蘭

畫長偷得繡餘工，坐領清香趁午風。我對幽蘭蘭
對我，素心相照不言中。

素綾繡字呈隨園太史索詩序

我有妝臺句，才疎未敢投。若經燕許筆，閨閣亦千
一代駢詞體，知公最擅場。瓣香花底囑，錦字換文
章。秋。

寄竹軒兄

自從分袂上征車，趙北燕南天一涯。料得瀟瀟風
雨夜，秋來容易客思家。六月椿堂病忽生，歸甯常侍
月華明。可堪慈母將頭指，白髮新添又幾莖。

十月十五夜雙瑞堂前作

風捲浮雲半點無，果然月朗衆星疎。遙知此際秋
齋裏，正照檀郎夜讀書。

寄和會書屋

小院清香撲面來，拋針幾度立蒼苔。幽蘭亦有懷
人意，素蕊微含不放開。

憶蘭

二月春閨冷氣侵，金爐撥火自沉吟。百花都在兒
心上，不及芳蘭繫念深。

對月

開簾欣見月團圓，素手焚香整鬢髮。拜問蟾宮一
枝桂，今秋可許鄧攸攀。

病中

風雨深閨伏枕時，萬重心緒惹愁思。自憐尺二腰
圍減，尙是瞞郎不使知。

之

七月初九夕大雨定更時星月交輝矣吟以誌
纔見雲迷雨亂飛，忽然星朗月光輝。天時人事都

無定，堪笑癡人料是非。

立秋前一日再寄竹軒兄

一夕西風雨送涼，何時剪燭話更長？人雖膝下分南北，不及青天雁一行。

謝贈佛手

堪愛玲瓏壓衆芳，知君惠我意偏長。深閨不用焚龍腦，纖手拈來是佛香。

秋夜偶吟

蟲韻風聲助嘯歌，香飄丹桂落銀河。秋光更比春光好，宋玉如何感慨多？

十月五日作

病體支持倚竹床，未甘同夢愧鴛鴦。多君自捲青袍袖，手拂雲鬢代理妝。

謝隨園夫子詩序時甲辰新正二日

果然含笑過新年，公來札云使闈含笑而過新年也。已得名傳太史篇。儂作門生真有幸，碧桃花種彩雲邊。

詠春草寄竹軒兄

已見苔階色漸滋，池塘春煖夕陽遲。最憐綠到他鄉口，遊子天涯有夢思。踏去弓鞋綠可憐，疑眸望處影連天。自從雁序分飛後，春到江南又一年。

題畫

種得忘憂草，花開一倍妍。爭如圖畫上，顏色日年年。

甲辰春月偶過隨園適夫子赴粵遊羅浮奉懷

四詩書于壁上

爲訪名園偶駐車，遊仙人已去天涯。自慙繡得簪花格，猶領春風護絳紗。國所繡詩句夫子裁作門簾故云。高下亭臺位置宜，花飛水面鳥穿枝。貪看魚影歸家緩，閒倚闌干弄釣絲。想到羅浮夢亦閒，先生此去幾時還？公然白髮添遊興，天與精神看好山。幾度蒙招未暇過。蒙招看梅看對居然人似隔天河，五字即公朝考詩句。非關儂性耽疎懶，半爲風多半病多。

王碧珠 字紺仙蘇州人汪心農筵室

紅梅和韻

梅妃寵罷賦長門。偶著紅綃格韻存。修竹斷霞三徑晚。空山香雪一枝溫。林妻中酒顏初暈。何閣燒燈月有痕。只恐牧童初睡醒。誤將鄧尉認桃源。

春暮過樂圃

茶糜架上雨初乾。雙燕銜泥數往還。小院無人春寂寂。竹簾低護鼠姑殘。

瓶荷

雅韻比君子。相看意氣同。影搖疑瀉露。香度不因風。入室聯蘭臭。當窗映日紅。一瓶清可挹。吟詠助詩筒。

冬夜月下聞笛

院靜霜初下。誰家玉笛橫。樓頭寒月上。窗外白雲生。調逸疑三弄。風高送一聲。餘音聽不倦。獨坐愛雙清。

新柳

東風剪出柳如絲。正是尋春繫舫時。乍聽枝頭鶯語澁。尙憐無力影垂垂。

試硯齋同妹意珠賞菊

九月霜花淡勝濃。捲簾日夕對秋容。香生四壁堪同賞。不獨餐英有阿儂。

奉懷隨園夫子

還山應爲著書忙。此日園林風露涼。料得秋窗添晚景。玻璃屏映菊花黃。彩雲高護老人星。閨閣多才共執經。獨愧徵詩珍重意。姊妹未嫻吟詠。頃蒙索詩再三。賦以誌感。也容問字到元亭。

朱意珠 字寶才蘇州人汪心農蓮室

冰心蠟梅

一樣兩枝結束殊。額黃點點水雲孤。天寒只合藏金屋。心淡誰知託玉壺。風動麝臍珠顆細。月明磬口雪花麤。清標若遣涪翁見。可有嘉名更喚無。蠟梅原名黃梅。稱蠟者山谷所改也。

新柳

桑蕾初勻淺碧鮮。東風蘸水舞翩翩。乳鴉飛上梢頭娘。最好江南二月天。

苦錢

空塔風雨久，苔蘚似青錢。不共古榆落，還疑細草穿。篆文傷剝蝕，蝸迹遍中邊。難買春光好，何須箇箇圓。

南樓觀漲

溝澗橫流急，川原一望同。斷雲低度水，遠岸欲浮空。鷺立菰蒲外，鷗飛滅沒中。相看情未已，暮雨又濛濛。

試硯齋瓶菊

草堂無物件，身閒情寄幽。香几席間，想像高人鏡。逸韻東籬採，罷對南山。

奉懷隨園夫子

江風吹暑催歸速，秋澹倉山恨各天。雜佩曾貽瓊玖重，今夏蒙賜水晶瓶玉扇鑲諸珍。名花長傍彩毫鮮。夢中

絳帳勞翹首，門下青娥愧並肩。安得金閨頻艤棹，授經歲歲侍高賢？

鮑之蕙 字仲姒號葑香丹徒鮑海門次女張

舸齋室

同舸齋聯句祝隨園夫子八十壽

歲逢聖紀周花甲，(鈇)剛值先生慶八旬。料峭風

先度寒食，(蕙)融和天爲閨花辰。千秋已定無雙譽，

(鈇)五福應推第一人。合香華筵開海屋，世兄即於先生

生日完姻。(蕙)齊眉鶴算閱靈椿。晚栽瓊樹成連理，(鈇)

早著文章欲等身。北部鶯花供彩筆，(蕙)南朝山水結

芳隣。交逢故舊情逾重，(鈇)客遇清貧意更親。白傅栽

詩還示嫗，(蕙)陳公投轄喜延賓。三吳名媛爭趨謁，

(鈇)一代才人企選掄。薦士蓬蒿皆振鬪，(蕙)休官婦

孺盡攀輪。金鞍紫陌忘追夢，(鈇)紅粉青山藉葆真。壽

永任憑推甲子，(蕙)骨仙不待守庚申。遨遊名勝皆關

福，(鈇)供養雲烟信有神。投贄忝隨桃李末，(蕙)操觚

深荷品題新。壬子秋蒙賜清娛閣各刻詩序。會聆廣樂開先

路，先生有八十自壽詩十首索和。(鈇)敢步陽春拜後塵。惟願

年年逢上巳，(蕙)瓣香遙祝秣陵春。(鈇)

題虎山尋夢圖有序

吳門陳竹士，曾偕尊闈金織織女士。虎山唱和

甫及歲餘，而織織物化，欲作虎山尋夢圖以寄意。適

得陸定子畫幅，若預為留贈者。翰墨因緣，非偶然也。
爰題小詩紀之。

虎山重訪舊遊蹤，山自巖岈柳自濃。惟有冰魂無
覓處，淒涼孤棹夢惺忪。珠聯玉和幾經秋，佳偶人間
罕白頭。今日披圖思往事，一坪芳草替人愁。

揚州湖上遲月

試燈風細夜潮平，曲岸維舟待月生。垂柳和烟敲
水影，亂鴉如雨入林聲。山橋客散車塵定，畫舫燈紅鼓
吹清。却憶板輿花裏過，湖光應識舊時情。
乙巳秋侍先慈都門歸經此。

立秋後一日和佩香夫人見寄原韻

消閒誰似女相如，棋局茶烟逸興餘。緜卷舊傳班
氏業，絳帷兼課左芬書。左，城妹，為夫人弟子。聲華十載神
交久，風範三春把晤初。慚愧頻年忙裏度，吟懷羞共鬢
絲疎。

同舸齋登北固山有作

孤亭矗起迴陵雲，天際驚濤木末聞。爽挹樓臺千

嶂合，勢吞吳楚一江分。尋秋客訪南朝跡，弔古人稱北
府軍。更向高崖同極目，數行烟鳥落斜暉。

舸齋遊廣陵秣陵以紀遊詩見寄戲答

秣陵僧院廣陵船，幾日遊蹤附彩箋。懷渴得梅濃
較酒，詩狂乘興樂於仙。二分新月扶殘醉，四美佳辰媚
少年。珍重宵深風露冷，征衫多半未裝棉。

月夜有懷

月滿中庭冷雁羣，閒塔如水靜無紋。風搖樹影移
虛幌，笛弄秋聲入遠雲。客舍連宵應惜別，蘭閨何日共
論文。離情欲對姮娥說，銷盡蠶熏夜漏分。

三妹歸自都門紅蕉館剪燭夜話再疊

樓外漣漪水依然，一帶周異鄉三地客。同對故園
秋。會巧翻疑夢宵深足話愁。團圓有今夕，何憾二毛頭。
春日登凌江閣懷論山兄

東風吹暖嫩晴天，細草成茵柳脫棉。新水偏從前

浦綠，好花爭向故枝妍。遙山映日螺痕淺，虛檻依雲亞
字連。因憶昔年曾此地，舟中岸上各淒然。

深秋夜坐

疎林如畫月初生，小坐閒窗夜氣清。
簾影高低分燭影；漏聲迢遞雜蟲聲。
誰家砧杵添秋思，何處笙歌弄月明。
千里長安勞夢寐，一行雁字最關情。

舸齋構草堂落成喜賦

數畝西園地，能舒寸草心。
誅茅安石磴，種竹護窗陰。
院敞迎涼蚤，庭空貯綠深。
得酬潘岳志，不礙白駒駸。
好趁春暉永，佳時未可忘。
對花朝把卷，留月夜稱觴。
竹徑輸張薦，蘆簾愧孟光。
却邀名彥筆，點綴滿庭芳。

秋日寄懷晚芳姊

尚憶春帆握別時，可堪秋雨又絲絲。
寒蟬樹杪吟黃葉，征鴈思歸苦未知。
簾外芭蕉捲綠雲，殷勤數語報君聞。
長安近日無多景，秋色三分雨二分。

夏夜同三妹集大姊起雲閣納涼

日暮消煩暑，凭高一解顏。
松陰當戶亂，溪水隔林

還疎竹籠新月，輕烟淡遠山宵分。
羣籟寂，心共野雲閒。
月懸空碧外，涼散小樓中。
樹雜疑聞雨，窗虛覺有風。
清談揮麈尾，分坐檢詩筒。
玉漏休頻促，團圓幾度同。

舟中月夜寄懷玉亭嫂

清光如水滲窗紗，回首長安路已賒。
別後乍逢今夜月，知君思我亦思家。

隨園女弟子詩選 卷五

王倩字雅三號梅卿浙江山陰人文成公

第八世女孫介休令諱謀文女歸蘇州陳竹士(基)為繼室

女伴招游湖上有作

清明前後做愁天，時暖時寒起又眠。侍女勸尋湖上約，隔宵開篋檢花鈿。

春殘

書為閒人特地長，小鬟偷放紙鴛忙。柳池打結楊花鬧，催得春殘尙自狂。

病起

匝月懨懨病，琴書堆滿床。芭蕉能解意，替做一窗涼。頓覺煩囂釋，伊蘭開一叢。鐸鈴渾攪睡，各語小樓風。

過話秋軒有贈

小小雙扉安樂窩，軟簾斜揭海紅羅。何須商賈登臨屐，壁上青山楓樹多。玉軸牙籤七寶床，雕文楠子水晶光。知君怕聽空塔雨，不種芭蕉種海棠。

觀女劇作

豈是蓬萊小謫流，戲來掌上御風游。月中聚雪卿何豔，皮下聽歌我獨愁。鏡檻有鐙光奪曉，蕉簾無雨意先秋。繁絃急管魚龍舞，誰肯當筵不掉頭。

贈村女

汲水舂糧氣力微，伴人小語自依依。不知機上鴛鴦錦，剪作誰家嫁女衣。清波為鏡竹為釵，塵垢難堪光澤埋。說道採桑蠶事緊，不曾製得踏青鞋。

待月

風外浮雲滓太清，誰催月姊御空行。行行只待風

扶出，待得月明天又明。

湖樓題壁

瀟湖小閣望迢迢，一瓣香因禮佛燒。稽首慈雲休
做雨，阿儂生日是花朝。

鄧尉探梅圖

鄧尉梅花會聽說，雪香成海望層層。眼中如許佳
山水，夢也無緣到未能。十里春風花四圍，幾人扶杖
倚斜暉。先生難免東君笑，花正開時臥病歸。

題畫

好山一抹幾登臨，隱隱殘鐘導客尋。湖上維舟春
正午，桃花紅擁寺門深。

奉寄東巖三兄五首之三

嬌女邀親愛，依依繞膝前。髮梳新樣髻，詩誦古人
篇。風忽摧椿樹，田還抵俸錢。幾多生小事，說著總潸然。
恨被東皇賺，幽花寂寞開。那知蜂有毒，却是蝶招
來。鳩鳥頻相畧，雌狐故善猜。素心誰與訴，愁上望鄉臺。
原缺一首

舟行雜詠

匆匆小住又辭家，行李無多一擔賒。添得描金新
匣子，半安詩稿半盛花。唱罷陽關解纜行，風前愁聽
鷓鴣聲。一雙天外浮圖影，船尾船頭遞送迎。川原風
物望中舒，遠境青蒼畫不如。半嶺雲濃半嶺淡，一村樹
密一村疎。江天一色水瀾漫，白鷺羣飛過蓼灘。兩岸
綠陰人不見，溪頭閒却釣魚竿。數聲牧笛訴斜陽，水
面輕風送薄涼。開謝百花春去久，野田蝴蝶尙尋香。

病況

轉盼逢佳節，遙空玉鏡懸。未同花一笑，轉效柳三
眠。紈扇先捐篋，秋衣早著綿。簾垂清夜永，靜對一爐烟。

新葺小齋作

西風颯颯動江干，小葺軒齋好辟寒。恰稱日華當
戶照，最宜花影隔窗看。門通始覺經過便，地窄全憑布
置寬。術士不煩頻指引，心安時即是身安。粉垣整潔
掃紛華，紙閣蘆簾處士家。竹牖閒臨修禊帖，瓦盆初放
傲霜花。舊移壁畫雙飛燕，新置牕糊六扇紗。同是眼前

供點綴，略翻新樣與偏賒。

秋柳和韻

殘枝搖曳晚涼天，一度相看一惘然。金縷曲終成
昨夢；玉關人去又經年。荒村野店嘶征馬，疏雨斜陽咽
暮蟬。那識蠻腰憔悴盡，怕牽離恨到眉邊。芳姿濯濯
憶當時，斂笑含顰總自知。笛裏有聲傳好信，風前無力
漾殘絲。烟消遠浦斜陽淡，月冷荒堤瘦影垂。倚遍闌干
人不見，蘆花如絮又相吹。

春柳和韻

濯濯丰姿最可憐，枝頭好鳥話纏綿。一谿新綠翻
春浪，襯出明霞夕照天。舞態凌波勢欲飛，長堤漠漠
淡烟霏。東風幾日催刀剪，疑是新裁金縷衣。

論詩八章 送五

春花如笑，秋山疑顰。宇宙皆詩，本乎天真。靈機妙
悟，無陳非新。不物於物，斯能感人。良醫用藥，亦攷古
方；名將行師，亦戒陳行。要其神妙，不主故常。夫惟善學，
鴻文聿彰。詩境甚寬，詩律甚嚴。十年非遲，三思豈嫌。

如味諫果，得苦中甜。不能研精，空暫磨磨。句一落紙，
已滯于形。存乎詩先，靈臺熒熒。鞭撻山岳，奔走風靈。素
養克裕，奇功斯成。原缺一首

借沈月舫夫人游惠山

幽澗淙淙雪濺香，攜舟豈爲賞秋忙。山靈也學儂
梳掠，綠擁雲鬢鬪曉妝。相逢那分在天涯，清興無多
付品茶絕勝一甌冰雪味，嚼來可惜欠梅花。

稽天眉公子以駱佩香女史所贈芍藥一幅索

題爲賦二絕

葉翦琉璃玉不寒，斜枝低亞曲闌干。十年夢想揚
州種，今日先從畫裏看。春淺春深蝶自知，風吹芳氣
軟如絲。王孫愛作天涯客，特寫將離贈一枝。

題江南春畫卷

一夜梅花江上開，打團蝴蝶曉寒催。東風知道人
離別，何苦將春吹得來。拂堤楊柳綠蕤絳，入骨相思
味乍諳。隔岸曉鐘何處寺，替催春夢落江南。

小住寄梅館作

別館棲遲近二旬，荒園知有幾多春。夢殘蝴蝶飛如豆，小朵梅花落滿身。

題竹士夫子書尾

背人羞露指，摻摻欲寄新詩啓。又緘高柳陰濃迷遠目，落梅風冷掠春衫。書遲澤國無魚報，夢入花叢有燕銜。勝約清明能踐否？九龍山下待抽帆。

滿宮花 香倦

緜湘蘭催玉李，春事又過半矣。釀愁風雨近清明，都被林鳩喚起。睡憎騰情旖旎，夢墮碧桃花裏。枕函無奈鬢雲鬆，扶向鏡奩重理。

次韻佩香夫人紅橋修禊詩

做晴天不負芳朝，道韞香山一例招。楊柳幾多圍白塔；桃花行盡見紅橋。洗將詩骨清明雨，訴出春心隔院簾。何幸也隨修禊事，登波如鏡撥輕橈。

呈隨園寄父大人

等閒扶上碧雲端，得遂依依膝下歡。風力盡催花絮墮；日光能破雪冰寒。迴生法試慈悲大，入骨恩深報

答難。願化銜環雙喜鵲，爲親百歲祝平安。

揚州春雨同竹士作

底事芳魂恰易銷，珠簾不卷雨瀟瀟。碧迷眉黛初三月；紅洗桃花廿四橋。好夢驚回騎鶴客，春寒吹入賣錫簫。光陰黯黯愁孤負，湖上遲儂泛畫橈。

題轉運會賓谷先生三朵花圖即次自題元韻

一代風流數使君，蘭閨絕藝鬪烟雲。開來芍藥花三朵；抵得揚州月二分。玉作障屏春不夜；人傳盧駱代能文。謂駱賓王、盧元素兩女士。香薰露盥從頭讀，所見明明勝所聞。離懷底事未能拋，尙憶聯吟字互敲。嵇紹風儀如立鶴；子安詞筆自騰蛟。眼前句就誰憑訂，別後詩成只自抄。日暮愁心託江水，家山回首白雲包。

寄玉橋五兄

江岸楊花似雪吹，江頭楊柳綠參差。扁舟一棹衝烟去，半載離愁半載詩。出郭青山遞送迎，故鄉風物總多情。陌頭楊柳知兄意，綰住蘭橈不放行。

聞家大人右遷永定觀察

三年重領頭銜舊，十載渠防著績多。臣勵清操同白水，帝期佐策障黃河。鵲山笑語懷中夜，碣石風烟隔遠阿。幾度庭幃勞盼望，辛勤定見髮垂顰。

詠所居室

地窄難分日月光，安排几榻費商量。縱橫書卷難容鏡，羅列牙籤半近床。壞壁塵封蒸氣濕，破窗絃動透風涼。那禁幾日黃梅雨，塔滿青苔蝸滿牆。豈有賢聲繼孟光，欲銘陋室費思量。數聲藥杵研松粉，一縷茶烟颺竹床。有作硯田常浣滌，無營心地自清涼。舉頭喜接元龍舍，時聽書聲落院牆。閒居閱歲感流光，往事悠悠費較量。倦繡遣兒收畫譜，欲眠呼婢掃藤床。室因近暗先驚夜，人帶微疴早怯涼。怪底詩情清徹骨，一丸冷月照東牆。塵壁徒分翰墨光，玉堂金屋漫評量。簷低窻雨斜侵牖，室淺霜風易逼床。芍藥繁華嫌冷淡，牡丹富貴怕荒涼。海棠獨恐吟懷減，每到秋來發短牆。

聞家慈挈弟妹北上奉懷

惆悵慈闈隔暮天，紙窗愁見月痕穿。秋風敢怯吳

江冷，擬買歸船送別船。重署頭銜帝澤濃，燕臺風物寄遊蹤。深閨恐有思親夢，知到遙山第幾峯。

暑窗卽事

書長無事睡方濃，靜愛幽廬少俗蹤。獨有浮雲偏耐熱，依然出岫幻奇峯。晚涼衣袂好風牽，花滿銀塘月滿筵。出水新荷誰得似，玉環扶醉浴溫泉。

題倚香小影

朦朧淡月白雲攢，春在南枝耐細看。詩思一天清到骨，滿身香雪不知寒。何遜襟懷原冷淡，劍南風骨本清癯。畫圖洗盡鉛華氣，朗照乾坤玉一株。

題九九消寒圖

選三

四九嚴寒餒臘殘，相期隨例作春盤。年年際此愁風雪，多少人家度歲難。匆匆六九近元宵，佳節平添夜色饒。燕市紅燈吳市酒，輕寒無力凍痕消。七九纔交柳色柔，懷人容易動離愁。陽和欲暖風偏冷，還怕登樓望陌頭。

紫雲硯歌

硯故藏余家，紫白色蒼潤細膩，非宋以下物也。近余舅得之，喜曰：「是足爲硯畚第一硯。」字之曰

「紫雲」而命余作歌。

修不盈尺，厚二寸，渾然天成，朴有餘名。曰「紫雲」。從其色，是乃真得雲水腴，中和孕毓，互千載涵濡，浸潤敷華，愉堅于千年青銅，幹嫩于三歲嬰兒膚。險廉應手磨無痕，積潤三日猶不枯。以口噓硯，硯有氣，反射漆匣結作珠。愛之便思終日玩，却又不敢輕撫。摩古來品硯名，各著歷朝硯譜，廣蓄儲，辨眼鑒，絲窮妙忽，製作精巧，誇僂輸。是硯獨無名款識，將毋僅等莒與邾，要其光氣不可掩，靜對能使心神舒。闌然日章美在中，穆然想見君子儒。庭珪之墨，諸葛筆安可無此供清娛？嗚呼安可無此供清娛！只愁墨華化作雲采去，瑤星夜半歸天都。

又和落梅韻

落梅風急乍陰晴，相對還增氣味清。采筆幾經留好句，幽閨曾與訂深盟。一簾香雪春無語，滿地梨雲月

正明。萼綠仙人本高潔，花開花謝觸吟情。

題落花雙蝶便面

點綴能生粉黛光，一雙錦翅度迴塘。綠簾有意延春色，紅雨無聲送夕陽。幾度高吟懷謝逸，誰將妙繪傲滕王。笑看攜入簪花手，飛出還驚鬢影香。

閒居和韻

愁蹤幾許定難除，雨滴空林感索居。一夜東風催臘盡，數枝梅萼報春初。尊無佳釀難成醉，句乏新裁總懶書。瘦鶴清琴無恙在，孤山花事近何如。

秋夜

飢鼠窺人閃睡眸，閱殘蠹卷夜悠悠。將融燭化垂垂淚，不盡烟縈縷縷愁。竹影橫窗搖碎月，蟲聲隔砌曳殘秋。生憎小苑西風緊，不捲湘簾上玉鉤。

月夜憶弟婦董九妹却寄

露滑香塔碧蘚滋，湘簾初捲繡停遲。一庭明月娟娟影，想見臨風玉立時。相逢祇隔水雲重，錦字殷勤月數封。倘遇秋風蘇薄病，與卿江上采芙蓉。

曉起

朱闌曲曲爛晴霞，
剪剪和風拂絳紗。
簾捲玉鉤人乍起，
一庭曉色正籠花。

寒夜吟

繞室徘徊久，
沉吟意若何。
聞砧知夜永，
見月覺寒多。
院靜無人倚，
天空有雁過。
露濃鴛瓦濕，
落葉下庭柯。

廬元素

字淨香候官人錢玉魚（東）之篋室

春日口占

臙脂纒折牡丹芽，
著雨柔枝重欲斜。
莫似天桃輕薄甚，
教人容易數飛花。

虹橋春泛同如蘭女史

隨隄柳色最堪憐，
綠到揚州三月天。
雙槳虹橋橋下路，
數聲啼鳥一溪煙。

新燕

霏霏細雨濕簾櫳，
燕子呢喃小院東。
啄得香泥營舊壘，
紅襟兩兩試春風。

中秋對月寄外

夜湧一輪月，
秋橫萬里天。
浮雲掃空碧，
清露浴嬋娟。
知否霓裳序，
遙將玉宇傳。
美人渺天末，
桂影共團圓。

九月十五日同許如蘭女史夜話用玉魚主人

寄示重九登高韻

今歲團圓月，
如環第九巡。
長空碧於洗，
萬里淨無塵。
冷處猶存我，
吟邊不見人。
有誰會詩意，
但可與君論。

十六夜對月用前韻寄玉魚主人於吳門

爲憐庭外月，
繞柱幾週巡。
眼帶三分白，
心無一點塵。
良宵寧負我，
清興不同人。
更有誰相對，
推敲自話論。

菊葉分韻得分字

誰向東籬下，
離披剪綠雲。
肯因花共瘦，
莫與草同耘。
翠輦寧無骨，
青腴尚有筋。
瓏玲傲霜影，
秋老已三分。

奉酬玉魚主人觀繡之作

明牕一榻對朝暄，
珍重春絲刺紫鴛。
安得儂郎有知己，
請將新綵綉平原。
春絲白白與朱朱，
曾與丹青得似無。
但使繡牀堪入畫，
要郎補袞作新圖。

詠西瓜燈

自有瓜皮樣，春燈未足雄。一時開混沌，四面望玲瓏。含潔心逾曠，懷清意自融。強持冰雪冷，迫受火雲烘。刻鳳矜奇巧，雕龍奪化工。乍辭沉李水，翻倚繫匏風。淺淺垂青蓋，輕輕挂碧籠。懸繖聯蒂綠，剪燭替瓢紅。幸遇彈冠客，羞從納履童。最憐秋悄悄，何忍夜匆匆。割愛悲黃裏，傾心示赤衷。莫教遲見跋，移照畫樓東。

拜題吳夫人遺像

詠絮才高夙昔聞，玉梅花下吐清芬。因緣何事偏儂薄？只許丹青拜女君。一半陰晴三月時，不成聲處寫相思。一鶯語不成聲，一半陰晴。一夫人送春詞語。瑟琴靜好今如在，應有新填第二詞。吳興三絕本無倫，伉儷曾經有翼賓。聽說鷗波亭下路，傍人猶說管夫人。珍重千絲網玉魚，崑腔傳唱總嘻噓。儂郎自是真情種，遮莫三生賦子虛。夢裏分明說再生，春風吹上闔閭城。祇今金縷裙猶在，莫放花間化蝶輕。

新秋

纔動高梧一葉風，飛霜染到雁來紅。薄羅衫子新涼乍，不耐尋詩夜月中。

秋夜

為愛清光透碧紗，繡幃齊上玉鴉叉。庭前放著團圓影，一樹香分月姊家。

冬月

針線拋殘倚畫闌，一輪看湧水晶盤。不知何處倚樓笛，吹墮清光徹夜寒。

菊花

籬下黃花色自妍，淡容原不在春前。獨攜尊酒來相就，秋雨秋風玉砌邊。

和佩香夫人四十感懷元韻即題畫梅為壽

春風豔桃李，臙脂濕晨露。所向在顏色，繁華作恩遇。奈何時世妝，妖媚故學步。我生慕高潔，此獨不我與。乍聞夫人來，歡然愜心素。未見冰玉姿，擬獻梅花賦。梅花植靈苑，安得象外句。曷若以畫為，疎枝影橫布。瓊英寒雪綴，清風暗香度。何當萼綠華，移植竹西路。芳意尙

可攀幽情欲成病。所結歲寒交。遠避凡卉妒。誰與作疇
侶。凌波珮鳴。瑤神仙匪難期。塵夢虛勿寤。香遠具別韻。
清極得靜趣。絕無瑕與玷。美列鍾會庫。所惜在萍水。牽
船易為渡。安得玉雪坡。與之下鄰住。盤桓撫梅龍。對坐
參佛悟。人生如浮雲。即此已前數。吟情與禪理。朗徹視
寒兔。

賓谷都轉詩致玉魚主人屬素為三朵花圖繡
幅用元韻并繡卷上

房州異人久仙去。此地忽降房州雲。仙雲五朵復
三朵。明月二分增一分。畫圖始識春風面。綺繡還添弱
線紋。佳話古今徵故事。卻於花事所希聞。

繡卷成賓谷先生以詩賜示步元韻謝教即題

卷後

花傳粉本繡三英。江北江南次第成。句曲女史駱佩

香繡幅先成。為是使君詩句好。玉盤金帶一時明。揮毫

聞是柳誠懸。係香繡使君詞於所繡上為夢樓先生書。手擘吟

箋寫綠天付與駱娘好。絲繡主賓三絕總翩翩。芳閨

何幸列兵家。素先世為盛京鎮黃旗人。世授武職駐防圍海。袖卷
冰綃拂劍花。只為買絲翻繡譜。却從夫壻報瓊華。箕
唇帝尾詎能文。廡下居然刺繡紋。要是虛名同畫餅。自
慚深誤使君聞。

題左蘭城銀河洗筆圖

華胄爭傳作賦才。銀河蘸筆筆花開。於今好獻河
清頌。自有詞源天上來。星濟迢迢漢使誇。但攜頑石
下靈槎。何如此日天河路。濯錦都成墨繡花。

紅橋修禊和駱佩香夫人韻

一年曾有幾芳朝。酒旆高懸隔岸招。共泛麗人三
月水。却陪仙侶百花橋。隄邊近擬蘭亭路。柳外遲留畫
舫簫。我欲因君同問字。共尋香草賦蘼樛。

題陳竹士秀才虎山尋夢圖

山徑依然是。重尋點屐苦。相看圖畫裏。不見美人
來。一夢何時醒。三生只自猜。冷泠劍池水。嗚咽繞山隈。

菊花有名黃鶴翎者為佩香夫人題畫二首

昔人已乘黃鶴去。誰剪修翎作此花。應是神仙好

詩酒却吟秋興到陶家。分將額上新顏色。笑向東籬
爲寫真。聽說王濛已仙去。范金今始鑄花神。

淨香姓盧氏。名元素。淑蓮其小字也。其先漢軍

鑲黃旗人。世授武職。駐防閩海。父鼎。以裁旗入侯官
籍。轉徙梁溪。父沒。從其母依於許如蘭女史之母氏。
與如蘭共習針黹。閒或誦讀。初亦未能爲詩書也。歲
戊申。東謀置篋室。因如蘭之尊人爲之執柯。時方七
夕。以詩十章爲聘。未嘗以貲入也。越三年辛亥。淨香
歸。明年壬子。舉一子。曰守詒。又三年乙卯四月。揚州
金帶園開一莖三花。都轉會賓谷先生屬東爲圖。且
乞淨香典絲爲合卷。時淨香頗學爲詩。并繡所作。和
章於上。七月圖繡並成。八月十九日生次子。故命名
曰守瑞。至冬至之後四日。賓谷都轉招東奉同夢樓
師題襟館銷寒小集。師言淨香能以詩畫羽翼風雅。
不宜久處篋室。都轉立爲陔吉。卽是月之二十一日。
高軒臨於敝廬。崇淨香以繼室之禮。今先生來以東
爲世交子。且以淨香之能學爲詩。錄其名於十三女

弟子之後。因述其緣起如此。并錄戊申七夕詩十章。
於淨香所呈詩後。錢東誥

戊申七夕示許公子思

年年離合證今宵。樓上穿鍼若個邀。未許英雄迎
繡幄。且隨兒女說冰綃。一天星會銀河迴。萬里秋橫玉
露飄。隔水盈盈應不遠。只愁靈鵲未成橋。靈羽爭成
窈窕橋。年年離合證今宵。騎來金犢臨河渡。遣得黃姑
逆浪邀。端爲仙緣留綺語。儘教雲影曳輕綃。樓頭大有
同心結。珍重相看繡帶飄。誰家香縷一痕飄。女伴商
量河上橋。兩兩心情憐後夜。年年離合證今宵。蜘蛛掩
盒能成結。瓜果當筵任所邀。旋聽鳴雞催月落。淚痕偷
濕到鮫綃。河漢微雲澹碧綃。鳴梭聲響逐風飄。倩誰
私語傳天路。遂我閒情話鵲橋。歲歲因緣終萬古。年年
離合證今宵。料他仙侶憐余甚。肯妒三生隔世邀。秋
期來歲更相邀。此夕衣裙攬翠綃。玉鏡半開霜月吐。紅
絲雙繫綵雲飄。人間巧借應從鵲。天上情緣尙藉橋。底
事總須冰下語。年年離合證今宵。

再作五首

年年離合證今宵，月掩開門十五橋。早是瓜期當月代；尙無花信趁風飄。蛛絲險誤西施網，龍杵虛停玉女綃。多少情懷終未了，且遲青鳥下庭遊。且遲青鳥下庭遊，敢爲綦懷怨此宵。烟柳夜橫桃葉渡，湖波秋咽尾生橋。豈無緒雙絲結，尙少盟香一縷飄。多事五更成獨坐，但教清露濕衣綃。但教清露濕衣綃，幾見雙星向夕遊。未必神仙期此夕，爲供塵世設今宵。彩雲易散難成錦，烏鵲貪飛恐誤橋。不信乘龍真個事，鸞車雙駕夜翩飄。鸞車雙駕夜翩飄，握手尋盟卷臂綃。天上錦霓工踐約，人間紅袖學招邀。自來佳話終千古，無盡歡期此一宵。分付寶雞休唱曉，讓儂情思賦星橋。讓儂情思賦星橋，月珮雲環暗影飄。斑管有花工織錦，烏絲無縫好裁綃。爲遲雙槳迎潮渡，且待飛槎下漢遊。還把支機來卜市，年年離合證今宵。

戴蘭英

字瑤珍，嘉興人，適家舒亭弟次子，早

寡，有子恩官，著有瑤珍吟草。

西湖卽事

排行花舫泛空虛，新漲平湖水尺餘。一帶柳堤歸已晚，六橋酒市上燈初。

賦詩

未解歌風韻，翻深詠絮思。性慵常倦繡，興到卽題詩。攬景簾頻捲，焚香座屢移。偶然佳句得，自賞自還疑。

閨中卽事

霏微春雨柳含烟，每聽鶯聲覺曉眠。學舞雙雙新燕子，已銜花片到簾前。

春日偶成

雕梁紫燕語呢喃，簾外成茵草不芟。記得去年春較早，海棠風裏試輕衫。

鐙

百枝同樹乍燒蘭，挂處能教滿麗幃。花蕊報人明日暮；雨聲伴我半宵寒。夢回紙帳光初淡，影上紗窗燼未殘。隱隱妝臺煙幕壓，詩成午夜漏將闌。

簾

蝦鬚却月盡堪誇，曉霧朦朧暮色遮。濃映草光青
到壁；澹籠烟篆碧穿紗。畫樓寂鎖三春景，繡戶低垂一
院花。最好雨晴遲未捲，清波無數漾風斜。

鳳仙

暮春時節手親栽，歷亂嫣紅次第開。風動乍疑乘
風去；月明還認降仙來。猩紅試染纖纖指；弱本還依淺
淺苔。羨殺娉婷迷五色，傍人菊婢漫相猜。

次女痘殤回煞之期又生一女

招魂適值女生時，一轉輪迴事可知。識舊金環應
認母；抄懷玉燕倍思兒。再來好證前生夢，且復如逢七
日期。試聽啼聲看說脫，半爲慰藉半含悲。

春日雜興

九十芳春欲半時，笑將雜興入新詩。花開替護風
前蕊；竹長親扶雨後枝。坐久漸嫌晨起早，曉晴惟覺午
炊遲。却將往事從頭憶，多負韶光不自知。苔痕一望
綠初交，新茁蘭芽課婢澆。得句怕忘隨手錄，消閒得計

借書鈔，海棠帶雨含紅淚。乳燕尋泥補舊巢。細響忽驚
春夢醒，隔窗鐵馬聽輕敲。

八角亭

臨池聳高亭，亭孤頗奇卓。秋來木葉鋪，春至花陰
遶。雨霽晚風餘，夕陽明半角。

春晴

小苑苔痕一望迷，曉晴窗外有鶯啼。春塘柳弱微
風度；紅杏花深燕語低。雨意綠浮山際草，烟光斜鎖水
邊堤。郊原此夕農人喜，荷鍤初添雨一犁。

哭硯珍大兄

計到猝然驚，爭禁淚雨傾。如何成薄宦；兄攝象五湖。
竟爾畢浮生，遠信疑還假。遺容記尙清。大雷書現在，檢
篋倍傷情。

悼亡

一曲雜鶯唱夕暉，輕塵短夢萬緣非。可憐稚子情
癡甚，猶著麻衣待父歸。少壯功名志太堅，望夫臺畔
哭鳴咽。自彈幾點斑斑淚，半欲呼天半問天。三千里

外竟亡身，擬向泉臺共死生。祇慮膝前兒太小，教儂強作未亡人。

檢篋得先夫手札，淒然有作。

頻年只自苦相思，搜篋驚看手澤遺。讀罷傷心渾忘却，情癡轉盼歸期。

深柳讀書堂爲右之二甥題照。

柔條斜拂午風輕，低護芸窗愛曉晴。定有春鶯啼戶外，深林遙和讀書聲。

秋暮

漸覺秋將暮，新霜朝未乾。風聲迎樹戰，雨氣作宵寒。傍砌蟲鳴急，空山木葉殘。菊花終耐冷，丰骨自珊珊。

祝隨園夫子八十壽卽步原韻

共羨人間矍鑠翁，一枝早折廣寒宮。不將科第輕時輩，自有文章動上公。陸艇載花春水活，潘輿奉母晚霞紅。生來福分清如許，歷歷遊仙夢未終。築成曹氏

舊書倉，壯歲逍遙詩萬章。除却性靈無筆墨，廣收羅綺在門牆。名花四季成香國，修竹千竿遍野塘。白髮不如

梁上燕，銜泥頻得到公堂。早聽甘棠播政聲，朝衫卸却此身輕。儘教名士低頭伏，每到騷壇撒手行。萬里遊山攜弟子，四朝耆老一先生。千金願購香山集，海外人都識姓名。分來鶴俸有贏餘，營就園亭十畝居。陶叟佳兒能應客，鄭家小婢亦知書。愛閒但覺林泉好，習靜幾忘歲月除。更喜青山全繞屋，白雲還往護詩廬。

祝隨園夫子壽和孫小姐韻

憶別慈顏十四年，壬寅春於陽羨官署得見先生。膝前重拜老神仙，盈頭皓雪唐公度。駐景丹砂晉稚川，天爲杖朝開壽域，人從澤國乞詩箋。攜歸雛鳳三春好，剛賦桃夭第一篇。江鄉小住聖湖樓，案贈新篇客未休。終賈聲馳蓬苑日，韓蘇筆落海潮秋。隨班問字三生幸，屈指還山兩地愁。得侍騷壇能幾度，年年春仲望來遊。

隨園夫子惠題秋鎗課子圖誌謝

翁惜才名噪天下，惜墨南金重無價。春三聞泛武林舟，急命工師繪圖畫。杖朝令旦客續紛，欲乞題詩日不暇。辱承收錄付侍史，頓釋從前心膽怕。一回瞻拜一

回幸。五月頻煩三枉駕。白門歸棹甫經旬。兔毫躍起珊瑚架。寄來展誦琳琅句。細楷高年真奇詫。九天雲影忽下垂。千里河源驚直瀉。卷中差比無鹽齊。林下慚非詠絮謝。九齡稚子課未成一。薰秋鐙青難卸。蒙公椽筆撰長歌。仰公蓮峯簪太華。濫廁弟子十三行。我較名姝有憑藉。夫婿君家舊竹林。一脈師門非外借。倉山山色晚逾青。道遠楓江阻親炙。深閨寂處提倡少。擬託閒吟輒罷。從今暗裏金鍼度。絡繹抽思晝復夜。蛩音豈作許田易。鴻藻翻同鄭壁假。後來貂續屬誰手。海內何人不避舍。投贈拚將精衛填。巾幗恐癡願宥赦。

題湖樓請業圖

詩人慧業雅作圖。公獨創以湖樓呼。湖樓幾輩豪吟客。散盡名士歸名姝。十三行已早馳譽。後進追攀輒棄去。公因小阮憐鄙人。丹青補在空虛處。松風琴韻笑語頻。點筆凭欄態度真。興到偶然拈彩筆。德孤今喜結芳鄰。卷中淑媛均作手。況復先生誠善誘。心香一瓣奉南豐。事業名山永不朽。湖面朝朝鏡影清。湖樓夜夜哦

詩聲。尚書口授今文經。九十不倦老伏生。賤質年來飽霜雪。蒙公一片婆心切。同坐春風假獨親。平生佳話逢人說。

隨園女弟子詩選 卷六

吳瓊仙 字口口號珊瑚平望人嫁梨華里詩

人徐山民（達源）著有寫韻樓詩草

春望同外子作

放眼春如許窗開六扇紗。綠齊門外柳紅到水邊。
霞雨覺者番足帆橫之字斜誰家作寒食落盡小桃花。

懷鍾元圃夫人

汀蘭江芷碧離離欲采幽芳寄遠思。自有清歌翻
白雪可無小字寫烏絲一燈挑盡花開少短札修成雁
過遲何日扁舟長泖上翦殘畫燭共論詩

梅花

夢逼疎香繞畫闌月明庭院夜漫漫東風知道人
寥寂著個梅花伴歲寒

寄外

嘗盡相思味方知離別難。為憐春病瘦轉憶客衣
單。黠鼠禁魂怯孤燈逼夢寒。小姑不解事來報杏花殘。

小齋印事

東風無賴弄簷鈴花落柴扉盡日扁鈔就詩篇餘
墨在綠蕉幾葉寫黃庭。

寄妹

有妹清才好別來今幾時最憐身瘦削不改性嬌
癡嫩碧翻鶯脰湖名新紅繞畫眉橋名遙知修禊日懷
我定裁詩

絕句

鯉魚風起逗輕寒料檢春愁衣帶寬明月不來花
又落夜涼閒煞畫闌干

夏日憶外

高樓竹樹夜陰陰十里相思幾許深蟬鬢微搖珠

露濕；明星漸逼月華沉。愁生鶯脰無波起。人在梨華有
夢尋。屈指歸期渾未卜。好裁側理寄新吟。

螢

著雨禁烟怯不勝。乍明忽暗巧相矜。天涯芳草前
生夢；水榭書囊昨夜燈。月黑移來星一點。風高扶上閣
三層。蒲葵撲墮知何處。笑問檀郎見未曾？

新詠樓之後圃新栽稗竹數叢賦此紀之

閒福，三泐茶聲一局棋。
隔城疎篔手自移。漸看滿徑碧參差。商量消受清

秋海棠

薛荔牆邊見一叢。連宵滾露又禁風。人間多少相
思淚。試滴花枝紅不紅？

夜坐聞笛

高樓風色夜蕭蕭。檢點牙籤倦欲拋。何處一聲長
笛起？隔簾催月上花梢。

春日送外子之玉峯

春水三篙綠。春帆一葉輕。生憎楊柳月。人去轉分

明。

寫韻樓對月次外子韻

楊柳毵毵拂畫檐。中間容得玉纖纖。薄寒如此春
三月；殘夜分明水一簾。肩並相憐人影瘦。花明始覺露
痕添。怪他婢子催眠數。特地還將險韻拈。

偶述

素性清寒不作家。深閨長日閉窗紗。玉臺閒展雞
碑字；磁甌香生雀舌茶。風颭簾波扶柳絮。雨餘蝶夢在
梨花。薰爐烟燼慵重爇。獨倚迴闌數暮鴉。

同袁麗卿夫人作

日長倦繡倚紅闌。一縷茶烟午夢殘。鈴語綠窗風
不定；梨花吹雪作去聲春寒。

秋夜寄懷夫子

倚闌倦更繞迴廊。繡榻寒薰荳蔻香。小院秋深蟲
語亂；空階葉落月痕涼。閒情難諱愁鸚鵡。薄病無端負
海棠。百里生憎太湖水。誤人曉夢去來忙。

哭金織織夫人

豈是瑤池舊侍書。修文徵到女相如。三更一覺游
仙夢，記墮塵寰廿載餘。見面緣慳恨已遲。人天路遠
費相思。累他扶病攜鉛槧，爲我親題一卷詩。我嘗以筆而
樓記草屬夫人題辭。

自君之出矣

自君之出矣，不復對菱花。思君如春草，一路到天
涯。

曉渡太湖

殘夢正如烟，衝寒曉放船。亂峯紅映日，一水碧浮
天。霧重羅衣濕，帆低雲影連。琉璃成世界，渾似小游仙。

姑蘇道中具瓣香弔織織夫人不果感賦

寒潮胥口水，潑洄夢到香閨有幾回。今日梨花酒
一盞，扁舟載取哭君來。冷風淒雨逼花朝，望斷銅坑
烟水遙。惆悵芳魂飄泊處，梅花一樹虎山橋。

哭四妹

有子呱呱泣，尋娘一面難。遺真須我畫，他日付兒
看。摹帖書應在，描花墨未乾。可憐諸女伴，猶是問平安。

晚眺

炊烟一片起前村，幾隻漁船傍岸根。昨夜平添三
尺水，今朝撐不進橋門。

次韻奉酬袁湘濼

尺幅緘來字字新，生香不斷句中春。世無知己誰
同調，詩到能傳必異人。閨閣何心邀月旦，墳廬合樂奏
花晨。他時幾葉叢殘稿，要問體裁別偽真。

題江南春卷子同麗卿作

經旬臥病訝春遲，春到江南總不知。忽展畫圖煙
景好，又驚花事近將離。春郊結伴踏青游，芳草茸茸
碧似油。行過曲闌橋宛轉，東風扶上小紅樓。

夏夜坐月

雨洗喬林濕翠浮，一天涼月正當頭。瀉來秋水明
如此，鋪著花陰淡不流。寫怨瓊簫聞隔院，寄愁新雁過
妝樓。貪眠只恐嫦娥笑，不許湘簾早下鉤。

郭頻伽題寫韻樓詩稿次韻奉酬

百鍊鋼成繞指柔，清才應是幾生修。千秋有筆開

生面；四海何人出一頭？不碍疎狂能入世，每因牢落欲悲秋。稜稜骨相梅同瘦，消得天涯爾許愁。

題陳秋史亭角尋詩圖

茅亭四角水之隈，門爲尋詩畫不開。倚遍闌干無一語，梅花如雪點蒼苔。修竹過牆分外青，風前如和玉瓏玲。推敲未穩休高唱，防有人從亭後聽。謂麗姬。

客歲朱鐵門見題寫韻樓詩草病久未答今春

鐵門同頻伽過訪山民因次元韻奉呈

春蠶無力吐絲絲，病起多慵得句遲。一事自嘲還自解，閨中差免應酬詩。偶然小謫判人天，寫韻何當繼昔賢。今日樓頭見帆影，始知李郭似登仙。

題袁秋卿夫人繡餘吟稿

午夜翻殘一卷詩，想他得意唾絨時。肯將五色絲分我，便繡夫人絕妙辭。

隨園先生枉過里門出十三女弟子湖樓詩業

圖命題賦呈

深閨柔翰半荒蕪，破格憐才有此無。一路春風吹

不斷，真從白下到梨湖。才子掃眉數十三，湖樓佳會一時難。自慙香草童蒙拾，也許隨肩入講壇。論文有素見無緣，月子兩頭那得圓。賴有畫圖傳髣髴，不然何處覓飛仙。謂繡餘夫人。

謝隨園先生賜物

閨秀吟詩之墨

研露膩無聲，精光著紙生。病來佳句少，孤負錫嘉

名。

繡帕

羅帕繡花枝，娟娟如可摘。只識五文章，金針無處

覓。

羅裙

珍重先生意，閨中學步難。他時來立雪，不怕十分

寒。

繡枕

自無錦繡才，轉愧鴛鴦枕。作報不成章，苦吟廢宵

寢。

題惜芳女士月地花天圖冊用隨園先生韻

惜昔春殘夜，清歌聽上耶。三分纖月影，一樹小桃花。蟬鬢堆輕霧，弓鞋印軟沙。幾時重見過，好煮鳳圍茶。

病起寄呈隨園先生

那得人間經驗方，轉嫌弱質病難當。感公一服清涼散，百里迢迢特寄將。山塘攬勝記吾曾，五十三參拾級登。想見滿山紅葉裏，白頭人上最高層。時先生寓山塘。大好樓名題寫韻，如花小字不勝簪。却愁請業湖樓後，無復臨池但苦吟。

花落賦示外子

無計留春強賦詩，空庭紅雨一絲絲。凭闌莫怨東風惡，只要回思未放時。

夏日曉起

燈燼簾櫳散曉光，癡尋蝶夢繞池塘。愛他擎露高荷葉，六月能生水閣涼。

對月

風聲簾波起，瀟湘一片秋。月明愁易盡，更上最高樓。

樓。

